

80



ಪೆಚೆಮೆ ಪೊವ್ಯಾಳೆ

[ಮಾಚು - ಪೂವಿರ ತಕ್ಕಾಚಾಕೆ]

ನಾಗೇಶ್ ಕಾಲ್ಕೂರ್



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

ಪಳಮೆ ಪೊಮ್ಮಾಲೆ

[ಮಾಚು - ಪೂವಿರ ತಕ್ಕಾಬಾಕ್]

ರಚನೆ

ನಾಗೇಶ್ ಕಾಲ್ೂರ್

ಎಳ್ತಕ್ಕಪೆ

ಆಕಾಶವಾಣಿ, ಮಡಿಕೇರಿ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

ಪಳಮೆ ಪೊಮ್ಮಾಲೆ

PALAME - POMMALE

A collection of satires, Published by The Karnataka Kodava Sahithya Academy, Madikeri

First Edition : 2012

ಆದ್ಯ ಮುದ್ರಣ : 2012

© ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್.

© All Rights Reserved

Copies ಪ್ರತಿ : 500

Price ಕ್ರಯ : 120 ಉರ್‌ಪಿಯ

ಬೊಳಿ ಪಡ್‌ತನವು :

ರಿಜಿಸ್ಟ್ರಾರ್

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,

ಮ್ಯಾನ್ಸ್ ಕಾಂಪೌಂಡ್, ಮಡಿಕೇರಿ - 571 201

ಫೋನ್ : 08272 - 229074

ಅಚ್ಚುಕಾರ :

ಶಕ್ತಿ ಪ್ರಿಂಟರ್ಸ್, ಮಡಿಕೇರಿ

ಮುಂಬೆಳ್ಳಾ

ಕೊಡವ ತಕ್ಕಾಲ್ ಪುದಿಯ ರೀತಿರ ಎಳ್ತಾ ಬರಂಡು ಎಣ್ಣುವದ್ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಚಿಂತನೆ. ಈ ನಾಟ್ವಾಲ್ ಅಕಾಡೆಮಿ 'ತರ್ಜುಮೆ' ಸಾಹಿತ್ಯಕ್ ಈ ಕುರಿ ಆದ್ಯತೆ ಕೊಡ್ತಿತ್. ಅಲ್ಲತೆ ಇಕ್ಕಾಕಣೆ ಬೊಳಿಪಡ್ತತ 'ಪ್ರಹಸನ' ಸಾಹಿತ್ಯತಾನ ಬೊಳಿಪಡ್ತತವ ಚಿಂತನೆಲ್ ಇಪ್ಪಕ ನಂಗಕ್ ಕಾಟ್ವನವು ನಾಗೇಶ್ ಕಾಲ್ವೂರ್. ಕೊಡವ ತಕ್ಕಾಲ್ ಕವನ, ಕತೆ ಅಲ್ಲತೆ ಪ್ರಬಂಧ ಸಾಹಿತ್ಯತಾನ ರಚನೆ ಮಾಡಿತ್ ಕೊಡವ ತಕ್ಕಾನ ಬೊಳತಾನ ಪ್ರತಿಭಾವಂತ.

ಇಲ್ಲಿ ಮಡಿಕೇರಿ ಆಕಾಶವಾಣಿ ಕೇಂದ್ರತಾನ ಮೆಚ್ಚಂಡು. ಕೊಡವ ತಕ್ಕಾರ 'ಸಿರಿ'ನ ಊರ್ಕೇರಿರ ಮೂಲೆ ಮೂಲೆಕ್ ಎತ್ತಾಚಿಟ್ಟಿತ್ ಜನಪ್ರಿಯ ಮಾಡಿತ್ ಕೊಡವ ತಕ್ಕಾಕ್ ನೆಲೆಬೆಲೆ ಕಾಟ್ವವಕ್ ಸಾಧ್ಯ ಆಯಿತ್. ಇಲ್ಲ ಆಕಾಶವಾಣಿರ ನಿರ್ದೇಶಕಿ ಇಂದಿರಾ ಗಜರಾಜ್ ಪಿಂಞ ಉದ್ಯೋಷಕಿ ಶಾರದ ನಂಜಪ್ಪ ಇಯಂಗಡ ಪ್ರಾಮಾಣಿಕ ಸೇವೆನ ನೆನತ್ವಿ. (ಪಳಮೆ ಪೊಮ್ಮಾಲೆ ಆಕಾಶವಾಣಿಲ್ ಪ್ರಸಾರ ಆಯಂಡ್ ಉಂಡ್)

ನಾಗೇಶ್ ಕಾಲ್ವೂರ್ ಎಳ್ತಾನ ಪ್ರಹಸನ ಸಾಹಿತ್ಯ 'ಪಳಮೆ-ಪೊಮ್ಮಾಲೆ' ಸಾಂಸಾರಿಕ ಬದ್ಕನ ಒರ್ ಜವಬ್ದಾರಿಲ್ ತಮಾಶಿಲ್ ನೋಟವ ಪ್ರಯತ್ನ. ಚಾರ್ಲಿ ಚಾಪ್ಲಿನ್ ತೆಳ್ಪಿಚಿಟ್ಟಂಡ್ ಜನಬದ್ಕರ ನೊಂಬಲತನ ತೊರ್ಂದ್ ಬೆಪ್ಪನೆಕೆ ಇದ್. ಕೊಡವ ಪ್ರಹಸನ ಸಾಹಿತ್ಯ ಬೊಳಿಯಂಡು, ಜೊತೆಕ್ ಕೊಡವ ಸಾಹಿತ್ಯ ಲೋಖಿಕ್ ಇದ್ ನಲ್ಲ ಕೊಡ್ಗೆ ಆಪಾಂದ್ ನಂಗಡ ನಂಬಿಕೆ.

ಈ ಪುಸ್ತಕ ಎಲ್ಲಾ ಎಳ್ತಾ ಅಭಿಮಾನಿಯಡ ಮನೆಲಿರಡ್. ಕೊಡವಾಮೆರ ಬೊಳಚೆಕ್ಕೂ, ಕೇಳಿಕ್ಕೂ ಸಾಹಿತ್ಯಕ್ಕೂ ಸಹಾಯ ಆಡ್ಂದ್ ಬಯಂದವಿ.

ಅಡ್ಡಂಡ ಸಿ. ಕಾರ್ಯಪ್ಪ

ಅಧ್ಯಕ್ಷ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಎಳ್ಳೆಕಾರಂಡ ತಕ್ಕೊ

ಕೊಡವ ತಕ್ಕೊರ ಮಟ್ಟೆಕೆ ಎಣ್ಣೊಂಡೊಂದಾಚೆಂಗಿ 'ರೇಡಿಯೋ ನಾಟಕ' ಎಣ್ಣುವದೇ ಒರ್ ಪುದಿಯ ಪ್ರಯತ್ನ. ಈ ಪರಿಕಲ್ಪನೆಕ್ ಚಾಲನೆ ಕ್ಹಾನ್ದಾ ಮಡಿಕೇರಿಲ್ ಆಕಾಶವಾಣಿ ಆನ ಪಿಂಞ ಕುಂದ್ ಕಾಡ್‌ರ ನಾಡ್ ಕೊಡಗಲ್ ಮಡಿಕೇರಿ ಆಕಾಶವಾಣಿ ಕಾರ್ಯಕ್ರಮಕ್ ದುಂಬಾ ಅಭಿಮಾನಿಯ ಉಂಡ್. ಅದತೂ 'ಕೊಡವ ಸಿರಿ' ವಿಭಾಗಕಂತೂ ಪೆರ್ತ್ ಅಭಿಮಾನಿಯ. ಆರೆಗಂಟೆರ ಈ ಕಾರ್ಯಕ್ರಮತ್‌ನ ಎನ್ನನೆ ಇಂಞಚ್ಚೆಕ್ ಚಾಯಿ ಕೂಟೊಲು ಎಣ್ಣುವ ಅಭಿಪ್ರಾಯತ್‌ನ ಬೋರೆ ಬೋರೆ ಜನ ಎಳ್ಳೆದಿತ್ ಪ್ರತಿಕ್ರಿಯೆ ಕಾಡ್ತೊಪ್ಪ.

ಇನ್ನನೆ ಉಳ್ಳಲ್ಲಿ ಕೊಡವ ಸಿರಿ ವಿಭಾಗತ್‌ರ ಮುಖ್ಯಸ್ಥೆ ಆಯಿತುಳ್ಳ ಶಾರದಾ ನಂಜಪ್ಪ ಅಯಿಂಗಕ್ ಒರ್ ಪುದಿಯ ಐಡಿಯಾ ಬಂದಾಂಡ ಫಲವೇ 'ಪಳಮೆ ಪೊಮ್ಮಾಲೆ' ಜನ್ಮ ಪಡ್‌ಂದವಕ್ ಕಾರಣ ಆಚಿ. ಒರ್ ಕಾಲ್ ಗಂಟೆರ ಚೆರ್ ನಾಟಕತ್‌ನ ರಚನೆ ಮಾಡುವಕ್ ಅವು ನಾಕ್ ಪುರ್‌ಡ್ ತಂದಾಂಡ ಮಾರಿಪತ್ತ್ ತಿಂಗೋದಿ ಓರಂದ್ ಚೆರ್ ನಾಟಕ ಪ್ರಸಾರ ಆಪಕ್ ಮೊಳಿ ಆಚಿ. ಆದ್ಯತ್ ಜನಡ ಪ್ರತಿಕ್ರಿಯೆ ಎನ್ನನೆ ಇಕ್ಕುವೊ ಎನ್ನೊಂದ್ ಒರ್ ಪೋಡಿ ಇಂಜದ್ ನೇರ್. ಆಚೆಂಗಿ ಕಾರ್ಯಕ್ರಮ ಕೊಡ್ತಂಡ್ ಪೋನನ್ನೆಕೆ ಮಾಚು ಪಿಂಞ ಪೂವಿ ಅಯಿಂಡ ಮನೆರ ಸದಸ್ಯಂಗಳೇ ಆಯಿರ್‌ತ್ ಎಣ್ಣುವದ್ ಇಕ್ಕಿ ಇತಿಹಾಸ. 2002ನೇ ಇಸವಿಂಜ ಸುರುವಾನ ಪಳಮೆ ಪೊಮ್ಮಾಲೆರ ತಿಂಗೋದಿ ತಕ್ಕೊಬಾಕ್‌ಕ್ ಇದಿಕ್ಕ ಪತ್ತ್ ಕಾಲ ದುಂಬ್‌ನ ಕುಶಿ. ಸುಮಾರ್ 120 ಕಂತ್ ಕೈಂಜಿತ್ ಈ ಕಾರ್ಯಕ್ರಮ ಮಿಂಞಕೋಡಿಯಂಡುಂಡ್.

ಕೊಡವ ತಕ್ಕೊರ ಇತಿಹಾಸತ್ 'ಚೆರ್ ನಾಟಕ' ಪೆರ್ತ್ ಕಮ್ಮಿ ಕಣಕ್‌ಲ್ ಉಂಡ್. ಅದತೂ ರೇಡಿಯೋ ನಾಟಕ ಇಂಞೂ ಕಮ್ಮಿ. ಈ ಸಂದರ್ಭತ್ ಚೆರ್‌ನಾಟಕ ಕೋವ್‌ನ ಬಲ ಪಡ್‌ತುವಕೂ ಈ ತಿಂಗೋದಿ ತಕ್ಕೊ ಬಾಕ್ ಮೊಳಿ ಇಡುವನ್ನೆಕೆ ಆಚಿ. ಸ್ಕೂಲ್, ಕಾಲೇಜ್‌ರ ಮಕ್ಕಕ್ ಕೊಡವ ತಕ್ಕೊಲ್ ಚೆರ್ ನಾಟಕ ಕಳಿಪ್ಪಕೂ ಈ ಪುಸ್ತಕತ್‌ನುಂಡ್ ದುಂಬಾ ಸಾಯ ಆಕೂಂದ್ ತೋಂದ್‌ನಾಂಡ ಫಲತ್ ಇದಿಕ್ಕ ಮಡಿಕೇರಿ ಆಕಾಶವಾಣಿರ ನಿಲಯ ನಿರ್ದೇಶಕಿ ಆಯಿತುಳ್ಳ ಶ್ರೀಮತಿ ಇಂದಿರಾ ಏಸುಪ್ರಿಯ ಗಜರಾಜ್ ಇದ್‌ನ

ಪಳೆಮೆ ಪೊಮ್ಮಾಲೆ

ಪುಸ್ತಕ ರೂಪತ್ ಕೊಂಡ ಬಪ್ಪಕ್ ಮನಸ್ ಮಾಡ್ಚಿ. ಈ ಕಾರ್ಯಕ್ರಮ ಎಡೆ ಬುಡತೆ ಪ್ರಸಾರಾಯಂಡಿಪ್ಪಕ್ ಅಯಿಂಡ ಅಭಿಮಾನ ಕೂಡಿ ಕಾರಣ. ಪುಸ್ತಕ ಬೊಳಿ ಕಂಡಕ ಪೋರ. ಅದೊನ ಜನಕ್ ಎತ್ತ್ಚಿಡುವ ಕಾರ್ಬಾರ್ ಪೆರ್ತ್ ಮುಖ್ಯ. ನಿಲಯ ನಿರ್ದೇಶಕಿರ ಅಭಿಪ್ರಾಯ ಪೋಲೆ ಈ ಪುಸ್ತಕತ್ನ ಬೊಳಿಕ್ ಕೊಂಡ ಬಪ್ಪಲ್ಲಿ ಅಭಿಮಾನತ್ ಕೆ ಕೂಟ್ನವು ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಇಕ್ಕತ ಆಡಳಿತ ಮಂಡಳಿಕಾರ. ಅದತೂ ಮುಖ್ಯ ಆಯಿತ್ ನಾಡ ಪ್ರೀತಿರ ಸಿನೇತನೂ, ಆಯಿತ್ತುಳ್ಳ ಅಡ್ಡಂಡ ಕಾರ್ಯಪ್ಪ (ಕ.ಕೊ.ಸಾ. ಅ. ಅಧ್ಯಕ್ಷ) ಅಯಿಂಗ. ಇದಿಕ್ಕ 'ಪಳೆಮೆ ಪೊಮ್ಮಾಲೆ' ನಿಂಗಡ ಕೆಲುಂಡ್.

ಈ ಪುಸ್ತಕ ಬೊಳಿಕ್ ಬಪ್ಪಕ್ ಕಾರಣ ಕರ್ತಂಗಳಾನ ಶ್ರೀಮತಿ ಇಂದಿರಾ ಏಸುಪ್ರಿಯ ಗಜರಾಜ್ ಅಯಿಂಗಕೂ, ಶ್ರೀಮತಿ ಕೂಪದೀರ ಶಾರದಾ ನಂಜಪ್ಪ ಅಯಿಂಗಕೂ, ಅಕಾಶವಾಣಿ ಬಳಗತ್ನರ ನಾಡೆಲ್ಲ ಸಿನೇತಂಗಕೂ, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಎಲ್ಲಾ ಸದಸ್ಯಂಗ ಪಿಂಞ ಅಧ್ಯಕ್ಷ ಅಡ್ಡಂಡ ಕಾರ್ಯಪ್ಪ ಅಯಿಂಗಕೂ, ಈ ಪುಸ್ತಕಕ್ ಪೊರಪಾಳೆನ ಡಿಸೈನ್ ಮಾಡ್ನ ಪ್ರಸನ್ನ ಅಯಿಂಗಕೂ, ಚಾಯೋಡೆ ಅಚ್ಚ್ ಮಾಡಿತಂದ ಕೃಷ್ಣ ಕಂಪ್ಯೂಟರ್‌ಕಾರಕೂ ನಾಡ ಮನದುಂಬ್ನ ಕೃತಜ್ಞತೆನ ಒಪ್ಪ್ಚಿಟ್ಟಿವಿ.

ನಾಗೇಶ್ ಕಾಲೂರ್

ಕಾಲೂರ್ ಗ್ರಾಮ

ಮೊ. : 9480788714

ವಿಪ್ರಿಲ್ ಪೂಲ್

- ಪೂವಿ : ಮಾಚು, ತಿತ್ತ್ ಪೊಟ್ಟಿ ಎಲ್ಲಿಯೇಂಗಿ ನೋಟಿತ್ತುಳಿಯಾ?
- ಮಾಚು : ನೋಟಿಯೆ.
- ಪೂವಿ : ಎಲ್ಲಿಯ ಅಂದಕ?
- ಮಾಚು : ಅಮ್ಮಪ್ಪ ನಾಕೆನ್ನ್ ಗೊತ್ತ?
- ಪೂವಿ : ಇದ್ ನಲ್ಲ ಕಷ್ಟಾಚಿಲ್ಲ, ನೀಡ. ತಿತ್ತ್ ಪೊಟ್ಟಿ ನೋಟಿತ್ತುಳಿಯಾಂದ್ ಕೇಟಕ ನೋಟಿಯೇಂದೂ ಎಣ್ಣುವಿಯ. ಎಲ್ಲಿಯಾಂದ್ ಕೇಟಕ ಗೊತ್ತಿಲ್ಲೇಂದೂ ಎಣ್ಣುವಿಯ ಎಂತ ನೀಡ ಕತೆ?
- ಮಾಚು : ತಿತ್ತ್ ಪೊಟ್ಟಿನ ನಾನ್ ನೋಟಿತ್ತುಳಿದ್ ನೇರ್. ಎಲ್ಲಿಯಾಂದ್ ಕೇಟಕ?
- ಪೂವಿ : ನೀನ್ ಎಕ್ಕೊಲೂ ಇನ್ನನೇ ಮಾಚು. ಕರೆಂಟ್ ಪೋಯಿತ್ ಪತ್ತ್ ಮಿನಿಟ್ ಆಚಿ. ಇಕ್ಕ ಬಕ್ಕು ಇಕ್ಕ ಬಕ್ಕೊಂದ್ ಪಾರಕಾತದೇ ಬಾತ್. ಆ ಕರೆಂಟ್ ಎಡ್ಪವಂಡ ಕೈಕ್ ಇಂಡ್ ಕಡಿಪ್ಪಕ್!
- ಮಾಚು : (ತೆಳಿ) ಅಲ್ಲ ಪೂವಿ, ಓರಬ್ಬ ಅವಂಡ ಕೈಕ್ ಪಾಂಬು ಕಡಿಕ್ಕಡ್ಂದ್ ಬಲ್ಲ ಶಾಪ ಇಟ್ಟುಂಡಿಪ್ಪಕ ನೀನ್ ಇಂಡ್ ಕಡಿಕ್ಕಡ್ಂದ್ ಚೆರಿಯ ಶಾಪ ಇಟ್ಟುಂಡುಳಿಯ?
- ಪೂವಿ : ಪಾಪ! ಅವಂಗೂ ಪೊಣ್ಣ್ ಮಕ್ಕ ಇಪ್ಪುಲಿಯ ಮಾಚು? ಏಕ್ದಂ ಪಾಂಬು ಕಡ್ಚಿಟಕ ಅಯಿಂದ ಪಾಡ್ನ ಗೇನ ಮಾಡ್...
- ಮಾಚು : ಒಹೋ, ಶಾಪಕೂ ಒರ್ ರಿಯಾಯಿತಿ ಉಂಡಾ ಅಂದಕ?.. ಅಲ್ಲ ಇಂಡ್ ಎಂತಾಂಗ್ ಕಡಿಪ್ಪುಂಡಿಯೆ?
- ಪೂವಿ : ನೀಕ್ ಅಚ್ಚಕೂ ಗೊತ್ತಾಪ್ಪುಲಿಯ? ಇಂಡ್ ಇರ್ಕಿಟಕ ಅಂಡ ಕೊಂಬುನ ಎಡ್ಕಣೆ ಕೈಕ್ ಜೀವ ಬಾಯಿಕ್ ಬಪ್ಪ. ಅವೊ ಕರೆಂಟ್ ಎಡ್ಪಕ ಇಂಡ್ ಅವಂಡ ಕೈಕ್ ಇರ್ಕಿರೊಂಡು. ಒಮ್ಮೆ ಅನ್ನನೆ ಆಯಿಟಕ ಇಂಞಿ ಜೀವಮಾನ ಅವೊ ಕರೆಂಟ್ ಎಡ್ಪಕಿಲ್ಲೆ.... ಪಾಂಬು ಕಡ್ಚಿಟಕ ಅವೊ ಚಾವಕೂ ಮದಿ. ಅಕ್ಕ ಎನ್ನಾಪ ಎಣ್ಣ್?... ತಾಂಡ ವಡಿಯನ ಶಾಪ ಇಟ್ಟಿತ್ ಕೊಂದಯಿಂಗಕ್ ಅವಂಡ ಪೊಣ್ಣ್ ಮಕ್ಕಳೂ ಶಾಪ ಇಡುವ. ಅದ್ ವಾಪಾಸ್ ನಂಗಕ್ ಪಡುವಕ ನಂಗಕೂ ಅನ್ನನೇ ಆಯಿಟಕಲೊ?
- ಮಾಚು : (ತಿಳಿ) ಪೂವಿ, ಈ ಪೊಣ್ಣಾಳಾದ ಮಂಡೆ ಎನ್ನನೆಲ್ಲ ಓಡುವಾಂದ್ ಗೇನ ಮಾಡುವಕಲೇ ತೆಳಿ ಬಪ್ಪ. ಇಂಡ್ ಕಡಿಕ್ಕಡ್ಂದ್ ಇಟ್ಟು ಶಾಪ ಬಡಿಮ

ಸಹಸ್ರ ಪೂವ್ಯಾಲೆ

- ರಾಂಜಕ ನಂಗಕೂ ಇಂಡ್ ಕಡಿಕ್ಕು ಅಚ್ಚಕೆನ್ನೆ?... ಎಂತೆಂತೆಲ್ಲ ಐಡಿಯಾಂದ್!
- ಪೂವಿ : ಪ್ರತಿಯೊಂದಾನೋ ಪೊಣ್ಣಾಳ ಬೇರ್ ಚಿಟ್ಟಿತೇ ಮಾಡುವೊ ಮಾಚು. ನಿಂಗಡನ್ನಕೆ ತೆಗೆದ -ಬಿಗಿದಾಂದ್ ಏದೊಂದಾನೋ ಮಾಡಲೆ. ಆಣಾಳ ಬೊರಿ ಆತುರ. ಪ್ರತಿಯೊಂದಾಂಗೂ ಒರ್ ಚೊಡಿಯೂ - ಒರ್ ಅಡಿಯೂ! ಅಚ್ಚಕ್ ಬುಟ್ಟಕ ಒಂದೂ ಇಲ್ಲೆ!
- ಮಾಚು : ಆಚಪ್ಪ ಪ್ರತಿಯೊಂದಾತೂ ಪೊಂಗಲೇ ಮೇಲಾಡ್ ನಾಕೆನ್ನೆ ಇಕ್ಕ? ನೀಡನ್ನತ ಪೊಣ್ಣ್ ಮನೆಲಿಪ್ಪಕ ನಾಕೆನ್ನೆ ವರೀಸ್ ಎಣ್ಣ್? ಒಂದಲ್ಲೆಂಗಿ ದಂಡ್ ಇಂಡ್ ಕಡಿಕ್ಕಡ್ ಅವಂಡ ಕೆಕ್ ! (ತೆಳ)
- ಪೂವಿ : ಅದಿರಡ್, ಅಕ್ಕಲೆ ಮುಮ್ಮೂಂದ್ ಕುರಿ phone ರಿಂಗಾಚಿ ಮಾಚು. ಎಡ್ಪಕ ದಾರೂ ಉಸರೆ ಬುಟ್ಟಲೆ. ದಂಡ್ ಕುರಿ ಹಲೋ ಹಲೊಂದ್ ಎಣ್ಣನಾ? ಮೂಂದನೇ ಕುರಿ ಚೊಡಿ ತಡ್ಪಕಯ್ಯತೆ ಏದ್ ಪರ್ದೇಸಿ ನೀನ್ಂದ್ ಕೇಟ ಸುಮಾರ್ ನೇರ ಡಿಸ್ಕನೆಕ್ಟ್ ಮಾಡಲೆ. ನಾನೂ ಅನ್ನನೇ ರಿಸೀವರ್ ಪ್ರಡ್ಚಂಡ್ ಪಾರ ಕಾತನಾ.... ದಮ್ಮ ಉಂಡೆಗೆನ್ನೆ ನಾಡ ಕೂಡೆ ತಕ್ಕ ಪರೆವಕ್?
- ಮಾಚು : ಅಯ್ಯೋ ಅಯ್ಯೋ! ಕೆಲಸ ಕೆಟ್ಟತ್!... ಬಾರಿ ಬೇರ್ ಚಿಟ್ಟಿತೆಕಾರ್ಬಾರ್ ಮಾಡುವೊಲೊ ಇವ! ಮಂಡೆಕ್ ಕಲ್ಪಾಚಿ!
- ಪೂವಿ : (ಗಾಬರಿ) ಅರೆ ಎಂತಾಚಿ ಮಾಚು ಅಂತದ್?
- ಮಾಚು : ನೀಡ ಮಂಡೆ! ಎಂತ ಆಪದಲೊ ಇವಕ್? ನೀಡ ಅಕ್ಕಯ್ಯನೂ ಬಾವನೂ ಮಕ್ಕಳೂ ನಾಳೆ ಮನೆಕ್ ಬಪ್ಪಾಂದ್ ಇಂಜಕ ಏಕಿದಂ ಪರ್ದೇಸೀಂದ್ ಬಜ್ಜಕ ಎನ್ನಾಕೂ ಎಣ್ಣ್? ಈ ಬರಿಕ್ ಮಂಡೆ ಇಡುವಾ ಅವು?
- ಪೂವಿ : ದಮ್ಮಯ್ಯ! ಅಯಿಂಗಳೇ, phone ಮಾಡ್ನದಾ ಅಂದಕ? ನೀಕ್ ದಾರ್ ಎಣ್ಣೆಯೆ ಮಾಚು ಬಪ್ಪಾಂದ್?
- ಮಾಚು : ದಾರ್? ನೀಡ ಬಾವನೇ ಮಾಡಿಯೆ. ಇಲ್ಲಿಕ್ ದಂಡ್ ಮೂಂದ್ ಕುರಿ ಮಾಡ್ಚೊಲೊ ದಾರೂ ಎಡ್ತದೇ ಇಲ್ಲೆಲೊ. ಅಲ್ಲಿಂಜ ನಾಡ ಮೊಬೈಲ್ಕ್ ಮಾಡ್ಚಿ.
- ಪೂವಿ : (ಮೊರೆ ಸ್ವರ) ಇಕ್ಕ ಎಂತ ಮಾಡುವೊ ಮಾಚು?... ಥೂ.... ನಾಡ ಬಾಯಿಲ್ ಎನ್ನಂಗನ್ನನೆ ಬಾತೋ... ಅಲ್ಲೆಂಗಿ ಅಯಿಂಗಾಂದ್ ನಾಕೆನ್ನನೆ ಗೊತ್ತಾಂಡು?... ಎಣ್ಣ್ ಮಾಚು, ಎಂತ ಮಾಡುವೊ ಇಕ್ಕ?
- ಮಾಚು : ಅದಾಂಗೇ ಎಣ್ಣುವೊ ಪೂವಿ. ಬೇರ್ ಚಿಟ್ಟಿತೆ ತಕ್ಕ ಪರಿಯೊಂಡೂಂದ್.

ತಕ್ಕ ಪರಂದಕ ಪೋಚಿ - ಮುತ್ತ ಒಡಂದಕ ಪೋಚೀಂದ್ ಅದಂಗಾಯಿತೆ
ಗಾದೆ ಮಾಡಿಯೆ.

- ಪೂವಿ : ನೀಡ ಉಪದೇಶ ಎಲ್ಲ ಮದಿ ಮಾಚು. ಇಕ್ಕ ಎಂತ ಮಾಡುವೊ ಎಣ್ಣೆ ಬೆರಿಯ.
- ಮಾಚು : ನಾನೆಣ್ಣೆಡಾ? ಮನೆಕ್ ಮೂಂದ್ ಸುತ್ತು ಡ್ಯಾನ್ಸ್ ಮಾಡ್. ನಾನ್ ಟಿನ್ ಕೊಟ್ಟುವಿ... ಡುಂ ಡಕ್ಕುಂ... ಡುಂ... ಡಕ್ಕುಂ...
- ಪೂವಿ : ಮಾಚೂ, ನೀಕ್ ಎಲ್ಲ ಕಳಿಯೆ, ಅಕ್ಕಂಗೂ ಬಾವಂಗೂ ನಾನೆನ್ನನೆ ಮೂಡ್ ಕಾಟುವೊ ಎಣ್ಣೆ? ಬೋಂಡತಾನ ಪರಂದಿತ್....
- ಮಾಚು : ತೆನಾಲಿ ರಾಮಕೃಷ್ಣ ಮಾಡ್ ಚಲ್ಲ? ಅನ್ನನೆ ಮಾಡ್! ಒರ್ ಮಣ್ಣರ ಕುಡಿಕೆರೊಳ್ ಮಂಡೆ ಇಟ್ಟ! ದಂಡ್ ಕಣ್ಣೆ ಉಳ್ಳಲ್ಲಿಕ್ ತೂತ ಮಾಡ್ಯಂಡಕ ಮದಿ! (ತೆಳಿ) ಆಹಾ! ನಂಗಡ ಪೂವಿ ಎನ್ನನೆ ಕಾಂಗು!
- ಪೂವಿ : ಪೋ ಮಾಚು ನೀನ್! ನಾಡ ಬೇಚಾರ ನಾಕ್!... ಎಂತ ಗೇನ ಮಾಡ್ಯಂಡತೊ ಬಾವೊ!
- ಮಾಚು : ಪುಣ್ಯ ತಾಯಿ, ಚೆನ್ನ ಚೆನ್‌ಷನ್ ಮಾಡ್ಕೊವತೆ ಆಚಾ. ನಂಗಡ Land line ಚೆನ್ನ ಮಿಸ್ಸಿಕ್ ಉಳ್ಳಾಂಗ್ ಬಚಾವು. ಓರಮ ನಂಗ ಪರಂದದ್ ಅಯಿಂಕ್ ಕೇಟಿತಿಪ್ಪುಲೆ. ಬಹುಶಃ ಬಾವಂಗೂ ಕೇಟಿತಿಪ್ಪಕ್ಕಿಲ್ಲೆ. ಕೇಟಿತಿಂಜಕ ನಾಳೆ ಬಪ್ಪಾಂದ್ ಎಣ್ಣೆವಿಂಜಿಲೆ ಗೊತ್ತಾಚಾ!
- ಪೂವಿ : ಸದ್ಯ! ಇಕ್ಕ ಚೆನ್ನ ಸಮಾಧಾನ ಆಚಿ ನಾಕ್. ಅಲ್ಲ ಮಾಚೂ, "ಎಂತೊ ತಕ್ಕ ಪರಂದಂದಿಂಜತ್‌ಂದ್" ಎಂತಲೆಂಗಿ ಎಣ್ಣೆಚಾ?
- ಮಾಚು : ಇಲ್ಲೆಂದೆಣ್ಣೆಲ್ಲ? ಅಂದಿತೂ ಸಂಶಯ ಅವಕ್! ಈ ಪೊಣ್ಣಾಳಡ ಹಣೆಬರೇ ಇದ್. ಆಪಾನ-ಪೋಪಾನ ನೋಟುವದ್ ಬುಟ್ಟಿತ್! ಪರ್‌ಪಾಂಡ ಬಯ್ಯ ಬೂವದ್ ಬುಟ್ಟ್ ಪಾರುವಾಂಡ ಬಯ್ಯ ಬುದ್ಧತೊಲೊ, ಅನ್ನನೆ ನೀಡ ಕತೆ. ಅಖೀರಿಕ್ ಪರ್‌ಪದೂ ಇಲ್ಲೆ - ಪಾರುವದೂ ಇಲ್ಲೆ!
- ಪೂವಿ : ನಾನೆಂತ ಮಾಡ್‌ನ ಅಂತದ್? ದಿನಕ್ಕೊಮ್ಮೆಂಗಿ ಪೊಣ್ಣಾಳ-ಪೊಣ್ಣಾಳಾಂದ್ ನನ್ನ ದೂರತಿಂಜಕ ನೀಕ್ ವರ್‌ಕ್ ಪತ್ತುಲೆ ಮಾಚು... ಅಲ್ಲ. ಅವು ಎಚ್ಚಕ್ ನೇರಕ್ ಬಪ್ಪೊಲೊ ಕೇಟಿಯಾ?... ಅಲ್ಲ ನಾನೇ ಒಮ್ಮೆ Phone ಮಾಡಿರಡಾ?
- ಮಾಚು : ಪೂವಿ, ದೇವಡ ದಯತ್ phone ಕೂಡಿ ಡೆಡ್ ಆಯಿತ್ ಗೊತ್ತಾಚಾ?... ಅಕ್ಕಲೆ, ತೆಡ್ ಬಾತ್ ನೋಟ್, ಅಲ್ಲಿಂಜ ಕೊಟ್ಟುಲೆ. ಮಡಿಕೇರಿಕ್ ಪೋಪಂಜಿ ಆಕಾಶವಾಣಿ ಟವರ್ ಉಂಡ್ ನೋಟ್, ಅಂಡ ಕೊಡೀಕ್ ಪತ್ತಿತ್ ಕೂತ್‌ಡ್!.... ಇಂಞಿ ಪರ್‌ಪೇಸೀಂದೆಣ್ಣೆಲೆ- ನಾಡ ತಪ್ಪಾಚೀಂದ್.

ಸಹಸ್ರ ಪೂಮ್ಯಾಲೆ

- ಪೂವಿ : ನೀನ್ ಪರಂದಾನೇ ಪರಂದಂಡಿರತೆ ಮಾಚು. ಎನ್ನ ಆಕಸ್ಮಾತ್ ಆಯಿರತಪ್ಪು. ಅದನೇ ಬಲಂಜನೆ ಮಾಡಿರುವ ಈ ಆಣಾಳ!
- ಮಾಚು : ಇನ್ನತ ಚೆರಿಯ ಚೆರಿಯ ಕೇಸೇ ಓರಮ ಬಲ್ಯದ್ ಆಯಿಪೋಪೋ. ಜಿಮ್ಮಿ ಬಾವಂಡಲ್ಲಿ ಆಚಲ್ಲ ಅನ್ನನೇ.
- ಪೂವಿ : ಎಂತಾಯೆ ಜಿಮ್ಮಿ ಅಣ್ಣಯ್ಯಂಡಲ್ಲಿ?
- ಮಾಚು : ಜಿಮ್ಮಿರಲ್ಲಿಕ್ ದಾರೋ ಬೆಂದ್ಕ ಬಂದಿತ್. ಬೈಟೆಕ್ ಒಟ್ಟಿ ಕುಂಬಳ ಕರಿ ಮಾಡುವಕ್ ಏರ್ಪಾಡ್. ಅಂದಿತೂ ಬೆಂದ್ಕಳ ಓರತಕ್ಕ ಕೇಟಿತೇ ಮಾಡಂಗಾಂದ್ ಆಯಿಂಗಳನೇ ಕೇಟಿತೊಲ್ಲೊ...
- ಪೂವಿ : ಓರಬ್ಬಕ್ ಆಪ - ಓರಬಕ್ ಆಪುಲೇಂದ್ ಇಪ್ಪಲ್ಲ ಮಾಚು. ಎಂತ ಎಣ್ಣೆಚೊಲೊ!
- ಮಾಚು : ಎಂತ ಎಣ್ಣೆವೊ ಬಂದ ಬೆಂದ್ಕ ವಡಿಯನೂ ಪೊಣ್ಣೂ ಮೂಡ್ ಮೂಡ್ ನೋಟಿಯಂಡತೊಲೊ! ವಡಿಯಂಡ ಮೂಡ್ ಚೆನ್ನ ಪುಳಿ ಪುಳಿ ಆಚೊಲೊ!
- ಪೂವಿ : ಎಂತಾಂಗ್ ಮಾಚು?
- ಮಾಚು : ಆಂಡ ಬಯ್ಯಲೂ ಒರ್ ಕತೆ! ಆ ಪುಣ್ಯಾತ್ಮಂಗ್ ಅವಂಡ ಊರ್ಲ್ ಕುಂಬಳ ಮಂಡೇಂದ್ ಅಡ್ಡ ಪೆದ. ಅವಂಗ್ ಅಪ್ಪವ್ವ ಬೆಚ್ಚ ಪೆದಕಂಜ ಈ ಅಡ್ಡ ಪೆದೇ ಪೆರ್ತ್ ಚಾಲ್ತಿಲ್ ಉಳ್ಳದ್. ಪೋಸ್ಟ್‌ಮೇನ್‌ಕ್ ಬುಟ್ಟಕ ಬೋರೆ ದಾಕೂ ಅವಂಡ ಒರಿಜಿನಲ್ ಪೆದೇ ಗೊತ್ತಿಲೆಲೊ! (ತೆಳಿ)
- ಪೂವಿ : ಪಾಪ! (ತೆಳಿ) ಪಾಪಿ ಪೋನಲ್ಲಿ ಪಾತಾಳಾಂದ್ ಆಯಿತಿಕ್ಕು ಅವಂಗ್! ಇಯಂಗಳಕೂ ನಾಡ ಅಡ್ಡ ಪೆದ ಗೊತ್ತಾಯಿತ್ ಕಾಂಬಾಂದ್ ಗೇನ ಮಾಡ್ಯಂಡಿತಿಕ್ಕು! (ತೆಳಿ)
- ಮಾಚು : ಅದ್ ಅನ್ನನೇ ಆಪದಲ್ಲ ಪೂವಿ? ಕುಂಬಳಕಾಯಿ ಕಳ್ಳಾಂದೆಣ್ಣಕ ನಿಪ್ಪು ಮುಟ್ಟಿತ್ ನೋಟ್ಯಂಡತ್ಂದೆಣ್ಣಾಟ ಓರಬಕ್ ಅಂತದೇ ಬೆರಿಯ ಮಂಡೆಕ್ ಪೋಪೋ! ಒರ್ ಕತೆ ಉಂಡ್ ನೋಟ್, ಅನ್ನನೇ!
- ಪೂವಿ : ಎಂತ ಕತೆಯೊ? ಕೆಟ್ ಕತೆಯಾ ನಡಂದದಾ?
- ಮಾಚು : ಕೆಟ್ ಕತೇಂದ್ ಇಪ್ಪುಲೆ. ಎಕ್ಕಲೋ ಎಲ್ಲಿಯೋ ಅಂತದ್ ನಡಂದತಿಪ್ಪು. ಅದ್ ಬಾಯಿಂಜ ಬಾಯಿಜ, ಬಾಯಿಂಬ ಬಾಯಿಕ್, ಕಾಲ್ ಬಾಲ್ ಕೂಟ್ಟಂಡ್ ಬಪ್ಪಕ ಆಖೀರಿಕ್ ಕೆಟ್ಕತೆರನ್ನಕೆ ಆಯಿಪೋಪ ಅಚ್ಚಿಕೇ!
- ಪೂವಿ : ಎಂತೇಂದ್ ಎಣ್ಣೆ ಮಾಚು ನೀನ್. ಕತೆರ ಇತಿಹಾಸ ಇಕ್ಕ ಬೋಂಡ...
- ಮಾಚು : ಅದೇ ಪೂವಿ, ಜೀನೆ ಬುದ್ಧಿಕಾರಡ ಕತೆ. ವಡಿಯಂಗೂ ಪೊಣ್ಣೆಕೂ ಒಟ್ಟಿ

ಎಣ್ಣೆ ಕುರಿ ಕುರಿ. ಚೆನ್ನ ಕಷ್ಟತೂ ಇಂಜತೂ ಎನ್ನೂ. ವಡಿಯ ಒಟ್ಟಿಕ್ ಪೊಡಿ ಕೊಂಡ ಬಂದಿತ್....

ಪೂವಿ : ಓ ಆ ಕತೆಯಾ? ಅದ್ ನಾಕೂ ಚೆನ್ನ ಚೆನ್ನ ಗೊತ್ತುಂಡ್ ಪೊಣ್ಣ್ ಮೂಂದ್ ಒಟ್ಟಿ ಮಾಡಿತ್. ಅಯಿಂಡಯಿಂಡ ಒಳ್ಳಲ್ ಚರ್ಚೆ ಸುರು ಆಯಿತ್. "ದಂಡ್ ಒಟ್ಟಿ ನಾಕಾಂಡೂಂದ್" ಇವ. ಇಲ್ಲೆ ನಾನೇ ದುಂಬ ಕಷ್ಟ ಬಂದಂವೊ, "ದಂಡ್ ಒಟ್ಟಿ ನಾಕಾಂಡೂಂದ್" ಇಂವೊ!

ಮಾಚು : ಅಯಿಂಡ ಅವಸ್ಥೆನ ಗೇನ ಮಾಡ್. ಮೂಂದ್ ಒಟ್ಟಿ ಮಾಡಿತ್ ಬೆಚ್ಚಂಡ್ ಸಮ ಪಾದಿ ಪಾದಿ ಮಾಡ್ಯಂಡ್ ತಿಂಬದ್ ಬುಟ್ಟಿತ್ ಜಗಳ ಸುರು ಮಾಡ್ಯಂಡಿತ್.

ಪೂವಿ : ಸುಮಾರ್ ಮನೆಲ್ ಇಕ್ಕಲೂ ಅಂತದೇ ಕತೆ ಮಾಚು. ಮನೆಕ್ ಕೊಂಡ ಬಂದಾನ ಪ್ರೀತಿಲ್ ಎಲ್ಲಾರೂ ಕೂಡಿತ್ ಪಾಲ್ಟಿಂಡ್ ತಿಂದಕ ಆಂಡ ಚೋದೇ ಬೋರೆ. ಅಂತಲ್ಲಿ ನಲ್ಲ ವಸ್ತುವಳ ಅವ್ವಂಗಿಲ್ಲತೆ ಮಕ್ಕಳೂ, ಅಪ್ಪಂಗಿಲ್ಲತೆ ಅವ್ವನೂ ಓರಬ್ಬಳೇ ತಿಂದ್ ಟಕ ಆ ಸಂಸಾರತ್ ಒತ್ತೋರ್ಮೆ ಎಲ್ಲಿಪ್ಪ ಎಣ್ಣೆ?

ಮಾಚು : ನೋಟ್ ಪೂವಿ. ಚಾಕ್ರಿಲ್ ಉಳ್ಳಯಿಂಡ ಮನೆಲ್ ಓರಂದ್ ವಾರಕೆತ್ತನೆ ಅಪ್ಪವ್ವ ಮಕ್ಕ ಮೂಡ್ ಮೂಡ್ ಕಾಗಂತೆ ಇಪ್ಪ. ಪಣಿಕ್ ಪೋಪಕ ಮಕ್ಕ ಎದ್ದಿತ್ತೇ ಇಪ್ಪಲೆ. ವಾಪಾಸ್ ಬಪ್ಪಕ ಮಕ್ಕ ವರೀತಾಯಿತಿಪ್ಪ. ಅಂತಾಂಗ್ ಒಂದೂ ಬಟ್ಟೆ ಇಲ್ಲೆ. ಎಲ್ಲಾರೂ ಮನೆಲೇ ಇಪ್ಪಕೇಂಗಿ ಒಕ್ಕಚೆ ಅಳೆತಂಡ್ ಉಂಬೊ-ತಿಂಬೊ ಮಾಡಂಡಾ?

ಪೂವಿ : ನೇರಪ್ಪ. ಒರ್ ಸಂಸಾರತ್ ರೊಳ್ಳಲ್ ಪರಸ್ಪರ ನೆಮ್ಮದಿ -ಶಾಂತಿ ಇಪ್ಪಕ್ ಎಲ್ಲಾಡೊ ಪಾಲೂ ಉಂಡ್. ದಿನಕ್ಕೋರಮ್ಮೇಂಗಿ ವಡಿಯ-ಪೊಣ್ಣ್ ಮಕ್ಕಾಂದ್ ಒಕ್ಕಚೆ ಅಳೆತಂಡ್ ತೆಳಿ ಕಳಿ, ಉಂಬೊ ತಿಂಬೊ ಇನ್ನತಾನ ಮಾಡೊಂಡು. ಅಂದಕ ಮಾತ್ರ ಆ ಮನೆಲ್ ನಂಗಲ್ಲರೂ ಒಂದ್ ಎಣ್ಣೆ ವನ್ನತ ಒತ್ತೋರ್ಮೆ ಬೊಳಿವಕ್ ಮೊಳಿ ಆಪೊ.... ಅರೇ, ಕತೆ ಪಾದಿಲಾಯಿರ್ತಲ್ಲ ಮಾಚು?

ಮಾಚು : ನೀಕೂ ಗೊತ್ತುಳ್ಳ ಕತೆ ಆನಕ ನಾನಂತಾಂಗ್ ಅದ್ ನ ಎಣ್ಣೆಂಡ್ ನಾಡ ಕೊರ ಪಾಳ್ ಮಾಡ್ಯೋವಡ್ ಎಣ್ಣೆ?

ಪೂವಿ : ಕತೆ ಗೊತ್ತಿಂಜಕಲೂ ಓರಬ್ಬ ಆನ ಎಣ್ಣೆವಾನ ಕೇಪಕ್ ರಸ ಇಪ್ಪ. ಅಲ್ಲತೆ ಆ ಕತೆರ ಪೂರ್ತಿ ವಿವರ ನಾಕಿಕ್ಕ ಮರಂದ್ ಪೋಯಿತ್ ಮಾಚು.

ಮಾಚು : ಅಲ್ಲ ಪೂವಿ, ನಂಗಡ ಅವಸ್ಥೆನ ಇಕ್ಕ ದಾರೇಂಗಿ ಬಂದಿತ್ ನೋಟೊಂಡು!

- ಕರೆಂಟ್ ಇಲ್ಲೆ. ಇರಾಟತ್ ಅಳಾತಂಡ್ ಕತೆ ಬೋರೆ ಕೇಡ್!... ನೀನ್ ಮಿಂಞಾ ಬೊಳಾಚಿ ಕತ್ತ್ಚಿಡ್ ಪೂವಿ!
- ಪೂವಿ : ನಾಕ್ ತಿತ್ತ್ ಪೊಟ್ಟಿಯೇ ಕಾಟ್ಲೆಂದ್ ಎಣ್ಣಿಲ್ಲ ಮಾಚು? ಇರಡ್ ಬುಡ್ ಚೆನ್ನೆ ನೇರಕ್ ಕರೆಂಟ್ ಬಪ್ಪ. ನೀನ್ ಕತೆ ಎಣ್ಣೆ! ಒಮ್ಮೆ ತಿತ್ತ್ ಪೊಟ್ಟಿಕ್ಂದ್ ಕೈ ಇಡುವಕ ನಾಡ ಕೈಕ್ ಮೆತ್ತನೆ ಮೆತ್ತನೆ ಕಾಟ್ಲೆಚಿ. ನಾಕ್ ಬೊತ್ತಿತ್ ಜೀವ ಇಲ್ಲೆ. ಕರೆಂಟ್ ಬಂದ ಪಿಂಞಾ ನೋಟುವೀ.... ಕಪ್ಪೆ!
- ಮಾಚು : ಆಹಾ ಏದ್ ಧೈರ್ಯಕಾರ್ತಿ! ಆರ್ಡಿನರಿ ಕಪ್ಪೆಕೇ ಬೊತ್ತಾನವ ಏದ್ ಗಟ್ಟಿಗತಿ?
- ಪೂವಿ : ಬೊಳಿ ಬಂದ ಪಿಂಞಾ ಕಪ್ಪೆಂದ್ ಗೊತ್ತಾಯೆ ಮಾಚು. ಬೋರೆಂತದೋ ಆಯಿತಿಂಜಕ? ಹಂಗ್ ಚಿಡುವೊ ನೋಟುವೊ.... ಎಣ್ಣೆಕ್ಕ ನೀನ್ ಕತೆ.
- ಮಾಚು : ಓರ್ ಊರ್ಲಾ ಒರ್ ವಡಿಯನೂ ಪೊಣ್ಣೊ ಇಂಜತಲೊ. ಮಕ್ಕಳ ಬೆಂದ್ಕಡ ಮನೆಕ್ ಅಯಿಪಂಜಿ ಕರೆಂಟ್ ಕೈ ಕೊಡ್ತೆ ನೇರತ್ ಮೂಂದ್ ಒಟ್ಟಿಕ್ ಜಗಳ ಮಾಡ್ಯಂಡಯಿಂಡ ಕತೆನ ಎಣ್ಣೆಂಡ್ ಇರಾಟತೇ ಅಳಾತಂಡಿಂಜತೊಲೊ!
- ಪೂವಿ : ಕತೆ ಎಣ್ಣೆಪ್ಪ ಯಜಮಾನಾಂದ್, ವಡಿಯನವರಾತ ಮಾಡ್ಚೊಲೊ- ವಡಿಯ ಕತೆ ಒಂದಾನ ಬುಟ್ಟಿತ್ ಬಾಕಿ ಎಲ್ಲಾನೋ ಪರಂದಂಡ್ ಕಾಲ ಕೈಚತಲೊ!... ಓರಮ ಕರೆಂಟ್ ಪೋಪದೂ ನಲ್ಲದೇ ಮಾಚು. ಎಂತಾಂಗ್ಣೆ!?
- ಮಾಚು : ಅಚ್ಚಕ್ ನೇರ ಸೊಳ್ಳೆ ಕಾಂಬುಲೆ. ಕಡಿಪ್ಪದ್ ಮಾತ್ರ ಗೊತ್ತಾಪ. ಸೊಳ್ಳೆ ಪಾಟ್ ಕೇಟಂಡ್ ಆರಾಮ್ಲಾ ಸೊಳ್ಳೆ ಪೊಯ್ಯುವ ಚಾಯನ ಗೇನ ಮಾಡ್ಯಂಡಕ ಮದಿ. ಆಹಾ! ಸ್ವರ್ಗ ಸುಖಿ!(ತಳಿ)
- ಪೂವಿ : ಮಾಚೊ! ನಾನೆಂತೋ ಎಣ್ಣೆಕ ನೀನೆಂತೂ ಎಣ್ಣೆತೆ.
ಕರೆಂಟ್ ಇಂಜಕ ಓರಂದ್ ಮನೆಲ್ ಮನೆಕಾರಡ ತಕ್ಕ್ಬಾಕೇ ಇಲ್ಲೆ. ಎಲ್ಲಾಡೊ ಕಣ್ಣೊ ಓಟಿ.ವಿ. ರತ್ತಟಿ ಬೆಂದ್ಕ ಬಂದಕಲೂ ಮನೆಕಾರಕ್ ಬೇಜಾರ.
ಮಾಮೂಲಿ ಸೀರಿಯಲ್ ನೇರತೇ ಇವು ಬಂದ್ರೆಲ್ಲಾಂದ್ ಒಳ್ಳೆಂಜೊಳ್ಳಕ್ ಕೆಲ ಉರಿ. ಒಳ್ಳೆ ಉರಂಜಂಡ್ ಮೇಲೆ ತೆಳ್ಳಂಚಂಡ್ ಕಳಿಪ್ಪ ಅಯಿಂಡ ಪಾಡ್ನ ನೆನತಂಡಕ ತಳಿ ಬಪ್ಪ.
- ಮಾಚು : ನೀನ್ ಎಣ್ಣುವ ಪ್ರಕಾರ ಓರಮ ಕರೆಂಟ್ ಪೋಪದೂ ನಲ್ಲದೇ. ಎಲ್ಲಾರೂ ಒರೇ ಬೊಳಾಚಿತ್ಲಿ ಗುಡ್ಡೆ ಕೂಡುವ. ಕಷ್ಟ ಸುಖಿ ಪರವ. ಒರೇ ಬೊಳಿಲ್ ಉಂಬಕಳಪ. ಅಂದಕ ಕರೆಂಟ್ ಎಡ್ತವಂಡ ಕೈಕ್ ಪಾಂಬೊ ಇಂಡೊ ಕಡಿಕ್ಕಡ್ಂದ್ ಎನ್ನಂಗ್ ಶಾಪ ಇಡಂಡಿಯೆ?

ಪೂವಿ : ನೇರೇ ಇನ್ನತ ಒರ್ ಒತ್ತೋಮೆಕ್ ಮೊಳಿಯಾಪನ್ನತ ನಲ್ಲ ಅವಕಾಶತ್‌ನ ಮಾಡಿ ತಂದಾಂಗ್ ಅವಂಡ ಪೊಣ್ಣ್ ಮಕ್ಕ ಚಾಯಿಲಿಕ್ಕಡ್‌ಂದ್ ಆಶೀರ್ವಾದ ಮಾಡುವದಾ ಅಂದಕ? (ತೆಳಿ)

ಮಾಚು : ಬೋರೀ ಆಶೀರ್ವಾದ ಮಾಡ್‌ನಕ ಪೋರ. ಒಕ್ಕಣೆ ಕೆಟ್ಟಿತ್ ಆಶೀರ್ವಾದ ಮಾಡೊಂಡು. ಮೇಲ್ ಮೇಲಾಂಡೆಕೂ ನೀಡ ಒಕ್ಕಮಕ್ಕ. ಕಂದ್‌ಕರು, ಸಾಲ್ ಚಾಚೆ, ಇಲ್ಲವನೂ ಬೆಂದುವೂ ಒಂದ್‌ತೊಟ್ಟ್ ನೂರೊಳ ನಂದಾಯಿತ್ ಪೊಲ್‌ಂದೊಳೀಂದ್ (ತೆಳಿ)

ಪೂವಿ : ಕರ್ಮಕರ್ಮ! ಅವಂಗ್ ಆಶೀರ್ವಾದ ಮಾಡುವದ್ ಕಡೇಲಾಡ್. ಕತೆರ ಕತೆ ಎಂತಾಚಿ ಮಾಚು?

ಮಾಚು : ಸರಿಯಪ್ಪ. ಕತೆ ಕೇಳ್ ಅಂದಕ. ಮೂಂದ್ ಒಟ್ಟಿನ ಮಾಡಿ ಬೆಚ್ಚಿತ್ ನಾಕ್ ಚಾಸ್ತಿ - ನಾಕ್ ಚಾಸ್ತೀಂದ್ ಜಗಳ ಆಡ್ಯಂಡತಾ.. ಅಲ್ಲಿಂಜ ಅಯಿಂಡೊಳ್‌ಲ್ ಒರ್ ಒಪ್ಪಾಚಾರ ಆಚಿ....

ಪೂವಿ : ದಾರ್ ಸುರೂಲ್ ತಕ್ಕ ಪರ್‌ಂದತೊ ಅಯಿಂಗಕ್ ಒರೇ ಒಟ್ಟಿ ತಕ್ಕ ಪರಿಯತೆ ಉಳ್ಳಯಿಂಕ್ ದಂಡ್ ಒಟ್ಟೀಂದ್!

ಮಾಚು : ಅಕಸ್ಮಾತ್ ನೀನೂ ನಾನೂ ಈ ಒಪ್ಪಾಚಾರ ಮಾಡ್ಯಂಡಿತಿಂಜಕ ನಾಕೇ ಲಾಭ ಆಪಿಂಜತ್. ಎನ್ನನೆ ಎಣ್ಣೆ?

ಪೂವಿ : ನೀನ್ ನನ್ನ ಇಂಡ್ಯೆರೆಕ್ಕ ಆಯಿತ್ ತಕ್ಕಕಾರ್ತೀಂದ್ ಎಣ್ಣೆಂಡುಳ್ಳಿಯ ಮಾಚು... ಪಂಥ ಪುಡ್‌ಚಕ ನಾಕೂ ತಕ್ಕ ಪರಿಯತೆ ಇಪ್ಪಕ್ ಗೊತ್ತುಂಡ್.

ಮಾಚು : ಗೊತ್ತುಂಡ್ ಗೊತ್ತುಂಡ್. ನಾಡ ಕೂಡೆ ಜಗಳಾಡ್ಯಂಡ್ ತಕ್ಕಪರಿಯತೆ ಇಪ್ಪಿಂಜಿಯಲ್ಲ? ಮಂಗಲಾನ ಸುರೂಲ್! (ತೆಳಿ)

ಪೂವಿ : ನೀನ್ ಮಾತ್ರ? ದುಂಡ್‌ನ ಉಪ್ಪಾರಾಂದ್ ಕಂಜಿಕಲತ್‌ರನ್ನಕೆ ಮಾಡ್ಯಂಡ್ ಇಪ್ಪಿಂಜದ್? (ತೆಳಿ) ನೀನೂ ಕಮ್ಮಿ ಒಂದೂ ಇಂಜಿಲೆ!

ಮಾಚು : ಅಲ್ಲ ಪೂವಿ, ನಂಗ ಸ್ವಾಂಗಾಯಿತ್ ಜಗಳಾಡತೆ ಸುಮಾರ್ ಕಾಲ ಆಯಿರ್‌ತ್ ಕಾಂಬಲ್ಲ? ಈ ಪಣೆಂಜಾಯಿತ್ ಜಗಳಾಡುವಕೂ ಪುರಸೊತ್ತೇ ಆಯಂಡಿಲ್ಲೆ.

ಪೂವಿ : ಆರಾಮ್‌ಲ್ ಒರ್ ದಿವಸ ಜಗಳಾಡನ ಮಾಚು. ಇಕ್ಕ ನೀನ್ ಮಾಡುವಕ್ ಪೊರಟಾನ ಮಾಡ್ ಮದಿ. ಕತೆರ ಬಾಯಿಕ್ ಮಣ್ಣಡತೆ....

ಮಾಚು : ಆಚೆಪ್ಪ, ಮಾರಾಣೆರ ಅಪ್ಪಣೆ! ವಡಿಯ ಪೊಣ್ಣ್ ದಂಡಾಳೂ ತಕ್ಕ ಬುಟ್ಟಿತಾ... ದಂಡಾಳೂ ಉಸ್‌ರ್ ಬುಡತೆ ಕಟ್ಟ್ ಪತ್ತಾಚಿ. ಕೆಲ ಪಯಿಚಿತ್ ಪುಣ್ಣಾನಕಲೂ ಇವನೂ ಉಸ್‌ರ್ ಬುಟ್ಟಿಲೆ-ಅವಳೂ ಉಸ್‌ರ್ ಬುಟ್ಟಿಲೆ. ಸದ್ಯಕ್ ವಡಿಯ

ಸಕಮೆ ಪೊನ್ನಾಲ್

ಪೊಣ್ಣಾಕ್ ಮಾಚು-ಪೂವೀಂದ್ ಪೆದ ಬೆಕ್ಕನ!

ಪೂವಿ : ಥೂ! ಬೋಂಡ ಮಾಚು. ಅನ್ನತ ದರಿದ್ರಕಳಿಕಾರಕ್ ನಂಗಡ ಪೆದ ಬೆಪ್ಪದಾ?
ಅಯಿಂಗಡನ್ನಕೆ ನಂಗಲೂ ಜೀನೆಯಳಾಯಿಪೋಕು!

ಮಾಚು : ಆಚಪ್ಪ. ಪೆದ ಬೋಂಡ ವಡಿಯ ಪೊಣ್ಣಂದೇ ಇಂಜವಡ್ ಅಂದಕ. ಕೆಲ
ಪಯಿಚ್ಚಿತ್ ಅವದಿಲ್ಲತೆ ಆನಕಲ್ಲೂ ದಂಡಾಳೂ ಕಿರಿ ತೊರಂದ್ಲೆ. ಕೋಳಿ
ಕೂಂದತ್. ಬೋಳಿ ಆಚಿ. ಎಲ್ಲಾಡ ಮನೆಲೂ ಪಣಿಪಲ ಸುರುವಾಚಿ.
ಇಯಂಗಡ ಮನೆರ ಪಡಿ ತೊರ್ಂದದೇ ಇಲ್ಲೆ....

ಪೂವಿ : ಬಾತೇ ಬಾತ್ ನೆರೆ ಮನೆಕಾರ! (ತೆಳಿ)

ಮಾಚು : ನೆರೆಮನೆ ಮುಮ್ಮನೆ, ಕೂಟ್‌ಕ್ ಊರ್‌ಕಾರಳೂ! ಪಡಿನ ಪೊಳ್‌ಚತ್.
ನೋಟುವಾ. ಗುಮ್ಮಂಗಡನ್ನಕೆ ಅಳ್‌ತಂಡಿತ್ ವಡಿಯನೂ ಪೊಣ್ಣೂ! ದಾರ್
ಎಂತ ಕೇಟಕಲೂ ಅಂವೊ ತಕ್ಕ ಪರಿಯಡ್‌ಂದ್ ಅವ -ಅವ ತಕ್ಕ
ಪರಿಯಡ್‌ಂದ್ ಇಂವೊ. ದಂಡಾಳ್‌ಕೂ ಈರಂಡ್ ಬೂವಕ ಓರಬ್ಬಡದೇ
ಸ್ತರ ಉತ್‌ಚಿ!... ಎಲ್ಲಾಡೋ ಬೈಗಳ, ಅಡಿ ತಿಂದಿತಾನದೂ ಚೆನ್ನ ಬುದ್ಧಿಯೂ
ಬಾತೊಲೊ!

ಪೂವಿ : ಇದ್ ಕತೆ ಆಯಿತಿಂಜಕಲೂ ಇಂದೆಕೂ ಓರಬ ಉಂಡ್ ಮಾಚು ಇಂತವು!...
ಇರ್‌ಂಬುಲ್ ಪೋಪಾನ ನೋಟುಲೆ-ಚೂದ್‌ಲ್ ಪೋಪಾನ ನೋಟೂಂದ್
ಗಾದೆ ಉಂಡ್ ನೋಟ್. ಅನ್ನನೆ ಇಯಂಗಡ ಚಾಲ್. ಬಂದ ಸಂಪಾದನೆನೆಲ್ಲ
ಗುಡ್ಡೆ ಕೂಟುವದೇ ಇಯಂಗಡ ಪಣಿ.

ಮಾಚು : ಸಂಪಾದನೆ ಮಾಡುವೊ ಎಂತಾಂಗಣ್ಣ್? ಉಂಬಾಂಗ್ ತಿಂಬಾಂಗ್ ಕೊರವು
ಮಾಡ್ಯಂಡ್ ಕೆಟ್ಟಿ ಬೆಚ್ಚಿ ಸಂಪಾದನೆ ಕಂಡವಂಡ ಪಾಲಾಪದೇ ಜಾಸ್ತಿ.
ಮಿತಿಮೀರಿತ್ ಖರ್ಚಿ ಮಾಡೊಂಡೂಂದಲ್ಲ. ಇಂಜಿತೂ ಇಲ್ಲತೈಂಗಡನ್ನಕೆ
ಜೀನೆ ಬುದ್ಧಿ ಮಾಡುವಕಾಗ... ತಿಂಬಕಾಲತ್ ಉಂಗತೆ ತಿಂಗತೆ ಕೂಟಿ ಬೆಪ್ಪ.
ಆಖೀರಿ ಕಾಲತ್ ಇರುವತ್ತೆಟ್ ಕಾಯಿಲೆಂಜ ಬೋಂಡಿಯಾನಾನ ತಿಂಗತನ್ನಕೆ
ಆಪ್. ಕೀಂಜಿತೂ ಪೋನಕಲೂ ಕೊಡ್ತಿತ್ ಪೋಗಾಂದ್ ಎಣ್ಣೆವ ನೋಟ್,
ಅನ್ನನೆ ಬದ್‌ಕಿತ್ ಎನ್ನ ಫಲ?

ಪೂವಿ : ಅದೇ ಮಾಚು. ಉಳ್ಳಾನ ನೆರೆಕರೆಕೂ ಕೊಡ್‌ಪಂಜಿ ಅಯಿಂಡಲ್ಲಿ ಉಳ್ಳಾನ
ಅವು ತಂದಾನ ನಂಗಲೂ ಪಡ್‌ಂದಂಡ್ ಒತ್ತೋರ್ಮೆಲ್ ಬದುಕುವದ್
ಎಚ್ಚಿಕೊರ್ ಚಾಯಿ!

ಮಾಚು : ಉಂಡ್‌ಂದ್ ಉಡಾಯಿಚಿಡುವದೂ ಸೆರಿಯಲ್ಲ. ಏದೇದಂಗ್ ಎಚ್ಚಿಚ್ಚಿಕ್

ಖರ್ಚ್ ಮಾಡೊಂಡುವೊ ಅದೊಂಗ್ ಮಡಿಪ್ಪದೂ ಸೆರಿಯಲ್ಲ. ರವಿರ ಕತೆನೇ ನೋಟ್! ಆ ಮಾದ್ರಿ ಖರ್ಚ್ ಮಾಡ್ನಕ ಸಂಸಾರ ಉದ್ಧಾರ ಆನ ಕಾಲ ಉಂಡಾ?

ಪೂವಿ : ಅಲ್ಲ ಮಾಚು, ರವಿ ಬೆಂಗಳೂರ್‌ಕ್ ಪೋನ ಕತೆ ಪೆರ್ತ್ ರಸ ಉಂಡೊಂದ್ ನಿನ್ನೊಂದ್ ಎಣ್ಣೆಯ. ಎಂತೆಂದ್ ಎಣ್ಣೆದೇ ಇಲ್ಲೆ!

ಮಾಚು : (ತೆಳಿ) ಅದಾ!? ಅದೊಂಗ್ ಸೂಟ್‌ಕೇಸ್ ಹಗರಣೊಂದ್ ಪೆದ ಬೆಕ್ಕೊಲು!

ಪೂವಿ : ಎಂತಾಯೆ ಸೂಟ್‌ಕೇಸ್?

ಮಾಚು : ಎಣ್ಣುವಿ ಕೇಳ್ ರವಿ ಮಡಿಕೇರಿಂಜ ಬೈಟೆರ್ ಬಸ್‌ಲ್ ಬೆಂಗಳೂರ್‌ಕ್ ಪೂಯಂಡಿಂಜತ್. ಇಕ್ಕ ಚೆನ್ನಂಗಲ್ಲ ಜಾಗತ್ ರೋಡ್ ಅಗಲ ಮಾಡುವ ಪಣಿ ನಡೊಂದೊಂಜ್ಚೆದಲ್ಲ?... ಓರ್ ಚಾಣೆ ಮಂಡೆಕಾರನೊ ಇವಂಡ ಸೀಟ್‌ರ ಎದಿಕ್ಕೆ ಅಳೊತಂಡ್ ವರ್‌ಕ್ ಜೂಂಗುವಿಂಜತೊಲೊ!...

ಪೂವಿ : ವರ್‌ಕ್ ಎಲ್ಲಾಕೂ ಬಪ್ಪಪ್ಪ. ಚಾಣೆ ಮಂಡೆಕಾರ- ತಲ್ಮಿ ಉಳ್ಳಂವೊಂದ್ ಉಂಡಾ ಮಾಚು?

ಮಾಚು : ಎಣ್ಣುವಾನ ಕೇಳ್ ಪೂವಿ, ನೀನ್. ಸುಂರಿಕೊಪ್ಪತ್‌ರ ಪಕ್ಕ ಎತ್ತುವಕ ಕೊಡಿಬರಿಂಜ ಒರ್ ಸೂಟ್‌ಕೇಸ್ ಚಾಣೆಮಂಡೆಕ್ ಡಬಾರೊಂದ್ ಬುದ್ಧಿತ್! (ತೆಳಿ)

ಪೂವಿ : ಉಯೀ ಪಾಪ!ನೊಂಬಲಾಯಿತಾ?

ಮಾಚು : ನೊಂಬಲಾಪದಾ? ಅವಂಡ ನಡು ನೆತ್ತಿಲ್ ಒರ್ ಚೋರಂಗಿ ಪುಳಿರ ಬಣ್ಣತ್‌ರ ಉಂಡೆ ಎದ್ದತೊಲೊ! (ತೆಳಿ) ಅವಂಡ ಕೂತೇ ಕೊತೊಲೊ ಬಸ್‌ಲ್!... ಚೋಡಿಲ್ ಎದ್ದ ನಿಪ್ಪಂಜಿ ಮಂಡೆರ ಉಂಡೆನೊ ಉದ್ದಿಯಂಡ್ ದಾಡ ಸೂಟ್‌ಕೇಸಿದೊಂದ್ ಎಲ್ಲಾರೊನೋ ಕೇಟತೊಲೊ (ತೆಳಿ)

ಪೂವಿ : ದಾಡ ಸೂಟ್‌ಕೇಸೊಲೊ ಮಾಚು? ಮಂಡೆ ಒಡೊಂದ್ ಪೋಪಿಂಜತಲ್ಲ ಅವಂಡ? ಅಲ್ಲಿಂಜ?

ಮಾಚು : ಅಕ್ಕಣೆ ಅವಂಡ ಕೂಟ್‌ಕ್ ರವಿಯೂ ಕೂಡ್ಯಂಡತೊಲೊ!" ದಾಡ ಸೂಟ್‌ಕೇಸಿದ್? ಬಾಯಿ ಬುಡಿ ಇಕ್ಕ? ಸೂಟ್‌ಕೇಸ್ ಬೂವಾಂದ್ ಗೊತ್ತಿಂಜಿತೂ ಎಂತಾಂಗನ್ನನೆ ಬೆಚ್ಚಿಯೆಂದ್" ಬಸ್‌ಲ್ ಉಳ್ಳಯಿಂಗಳ್ ದಬಾಯಿಚಿಟ್ಟಿತೊಲೊ! ಒಬ್ಬರೂ ಉಸ್‌ರೇ ಬುಟ್ಟಾಲೆಲೊ! ದಾರ್‌ನ ಕೇಟಕಲೂ ನಾಡದಲ್ಲ- ನಾಡದಲ್ಲೊಂದ್ ಎಣ್ಣೆಚೊಲೊ!

ಪೂವಿ : ಅರೆ, ಬಸ್‌ಲ್ ಇಂಜಯಿಂಗಳಡ ಅಲ್ಲತೆ ಇಂಞೊದಾಡ ಸೂಟ್‌ಕೇಸ್

ಪಳಮೆ ಪ್ರೊಮ್ಯಾಲೆ

ಬಸ್‌ಲಿಪ್ಪ?

ಮಾಚು : ಬಸ್‌ಲ್ ಉಳ್ಳವೂ ಅನ್ನನೇ ಎಣ್ಣೆಚೊಲೊ. ಎಲ್ಲಾರೂ ಚಾಣೆಮಂಡೆ ಕಾರಂಗ್ ಕರುಣೆ ಕಾಟುವವೇ!... ಬಸ್ ಇಳಿವಕೇಂಗಿ ಗೊತ್ತಾಪುಲಿಯ ಅಕ್ಕ ನೋಟ್ಯಂಡಕ ಆಚೀಂದ್ ರವಿ ಎಣ್ಣೆಚೊಲೊ!

ಪೂವಿ : ಆಖೀರಿಕ್ ಗೊತ್ತಾಚಾ? ಸೂಟ್‌ಕೇಸ್ ದಾಡದಂದ್?

ಮಾಚು : ಬಸ್ ಬೆಂಗಳೂರ್ ಮೆಜೆಸ್ಟಿಕ್‌ಕ್ ಎತ್ತೆಚಿ. ಎಲ್ಲಾರೂ ಅಯಿಂಡಯಿಂಡ ಆತುರತ್ ಬಸ್‌ಂಜ ಇಳ್‌ಂಜತ್. ಆ ಸೂಟ್‌ಕೇಸ್‌ನ ಎಡ್‌ತಂಡ್ ರವಿ ಆಖೀರಿಕ್ ಇಲ್‌ಂಜತೊಲೊ!

ಪೂವಿ : ಅರೆ, ಎಂತಾಂಗ್ ಮಾಚು? ಆ ಸೂಟ್‌ಕೇಸ್‌ಕ್ ಒಡೆಕಾರನೇ ಇಂಜಿಲಿಯಾ ಅಂದಕ?

ಮಾಚು : ಅಲ್ಲ ನೀಡ ಎಂತೋರ್ ಮಂಡೇಂದ್? ಇಚ್ಚಕ್ ಎಣ್ಣೆತೂ ಗೊತ್ತಾಯಿ ಲಿಯಾ? ಅದ್ ರವಿರದೇ ಸೂಟ್‌ಕೇಸ್! (ತೆಳಿ)

ಪೂವಿ : ಉಯೀ ರಾಮಾ! ಪಿಂಞಂತಾಂಗ್ ಅಂವೊ ಅದ್‌ನ ತಾಂಡದೇಂದ್ ಎಣ್ಣೆತದ್?

ಮಾಚು : ಬದುಕುವಯಿಂಡ ಕೆಣಿ ಪೂವಿ! ಆ ಸೂಟ್‌ಕೇಸ್ ನಾಡದೇಂದ್ ಎಣ್ಣೆತಿಂಜಕ ಬಸ್‌ಲ್ ಉಳ್ಳವು ಎಲ್ಲರೂ ಕೂಡಿತ್ ಇವಂಡ ಬೆನ್ನ ಮಂಗಲ ಮಾಡುವ. ಆಂಗಾಯಿತೇ ಇವನೂ ಸೂಟ್‌ಕೇಸ್ ದಾಡದಂದ್ ರೋಪ್ ಇಡುವಕ್ ಕೂಡಿಯೆ!(ತೆಳಿ)

ಪೂವಿ : ಇದ್‌ಂಗೇ ಅಲ್ಲ ಮಾಚು ಎಣ್ಣೆವೊ! ಉಪಾಯ ಇಂಜಕ ಅಪಾಯ ತಪ್ಪ್ ಚಿಟ್ಟವಲೊಂದ್.

ಮಾಚು : ಓಡ್‌ನ ಕುಂಞಿನ ನಾಳೆಯೂ ಕಾಂಗೋಲೊಂದ್ ಗಾದೆ ಮುಂಡತೆ ಮಾಡಿತಾ? (ತೆಳಿ)

ಪೂವಿ : ನೇರೇ. ಮಿಂಞ ಬದುಕುವಾನ ಪಡ್‌ಚವಂಡು. ನೋಟಿಕ್ಕ ಕರೆಂಟ್ ಇಲ್ಲತಾನುಂಡ್ ನಂಗ ಎಚ್ಚೆಕೆಲ್ಲ ತಕ್ಕ ಪರೆವಕಾಚಿ? ಕರೆಂಟ್ ಇಂಜಿತಿಂಜಕ ಇಚ್ಚೆಕೆಲ್ಲ ವಿಷಯ ನೀಡ ಬಾಯಿಂಜ ಪೊರ ಬೂವಿಂಜತಾ? ಪಾಪ! ಅವಂಡ ಕೈಕ್ ಇಂಡ್ ಕಡಿಕ್ಕತೇ ಇಕ್ಕಡ್!

ಮಾಚು : ಪೂವಿ, ಇಂದ್ ಕರೆಂಟ್ ಎಚ್ಚೆಕ್ ನೇರಕ್ ಬಕ್ಕೊಂದ್!

ಪೂವಿ : ನಾನ್ ಮಾಯಾ ಮಂತ್ರ ಮಾಡಿಟಕ ಇಕ್ಕಲೇ ಬಪ್ಪ ಮಾಚು! (ತೆಳಿ)

ಮಾಚು : ಓಹೋ ಬಲ್ಯ ಮಂತ್ರವಾದಿ ಇವ! (ತೆಳಿ)

- ಪೂವಿ : ಮಾಚು, ನಾನೋರ್ ವಿಷ್ಯ ಎಣ್ಣುವಿ. ನೀನ್ ಚೊಡಿ ಮಾಡ್ಯೋವಕಾಗ....
- ಮಾಚು : ಎಂತಪ್ಪ ಅಂತದ್? ಬಲ್ಲಾದೆ ವಿಷ್ಯ?
- ಪೂವಿ : ನೀನ್ ಮಿಂಞ ಬಯ್ಯುಲೇಂದ್ ಪ್ರಾಮಿಸ್ ಮಾಡ್. ಅಂದಕ ಮಾತ್ರ ಎಣ್ಣುವಿ.
- ಮಾಚು : ಆಚಪ್ಪ, ಇದಾ ನೀಡ ಮಂಡೆರ ಮೀದ ಕೈ ಬೆಚ್ಚಿತ್ ಎಣ್ಣಂಡುಳ್ಳ. "ನೀನ್ ಎಂತ ಎಣ್ಣಕಲೂ ನಾನಿಕ್ಕ ಬಯ್ಯುಲೆ!" ಮದಿಯಾ?
- ಪೂವಿ : ಮಾಚೂ, ಆದ್... ಅದ್... ಅದ್.. ಎಂತ ಗೊತ್ತುಂಡ್? ಕರೆಂಟ್ ಅದಾಯಿತೇ ಪೋನದಲ್ಲ ನಾನೇ ಎಡ್ತಿಯೆ. Main Switch ನಾನೇ ಆಫ್ ಮಾಡಿಯೆ!
- ಮಾಚು : ಎಂತೆಣ್ಣೆಯ?
- ಪೂವಿ : ಮಾಚು, ನೀನ್ ಸ್ವರ ಬಲೆಂಜನೆ ಮಾಡತೆ. ನೀನ್ ಬಯ್ಯುಲೇಂದ್ ಪ್ರಾಮಿಸ್ ಮಾಡಿತುಳ್ಳಿಯ ಗೇನ ಇಕ್ಕಡ್.
- ಮಾಚು : ಬಯ್ಯುಲೆ ಡ್ಯಾನ್ಸ್ ಮಾಡುವಿ. ನೀನ್ ಕೊಟ್ಬ್!
- ಪೂವಿ : ಮಾಚು, ಇಂದ್ ತಾರೀಕ್ ಎಚ್ಚೆಣ್ಣೆ? ಏಪ್ರಿಲ್ ಒಂದ್ ಗೊತ್ತಾಚಾ?
- ಮಾಚು : ಓಹೋ ಇನ್ನನೆಯಾ ಸಂಗತಿ? ನನ್ನ phool ಮಾಡುವಕ್ ಏರ್ಪಾಡ್?... ಇಕ್ಕಡ್. ನಾನೂ ನೀಕ್ ಮದ್ದ್ ಅರ್ಪಿ. ಇಕ್ಕೋರ್ ಸತ್ಯ ಸಂಗತಿ ನಾನೂ ಬಾಯಿ ಬುಡುವಿ. ಫೂಲಾನದ್ ನಾನಾ - ನೀನಾಂದ್ ನೀಕೂ ಗೊತ್ತಾಪ.
- ಪೂವಿ : ಎಂತ ಮಾಚು ಅನ್ನತ ಸುದ್ದಿ?
- ಮಾಚು : ಒಂದೂ ಇಲ್ಲೆ. ನೀಡ ಅಕ್ಕನೂ ಬಾವನೂ ನಾಳೆ ಬಪ್ಪದೂ ಇಲ್ಲೆ. ಅಯಿಂಗ phone ಮಾಡಿತೂ ಇಲ್ಲೆ, ಗೊತ್ತಾಚಾ?
- ಪೂವಿ : ಅಯ್ಯೋ! ಪಿಂಞ ಮನೆಕ್ ಮೂಂದ್ ಕುರಿ ಮಿಸ್ಕಾಲ್ ಮಾಡಿಯೆ ದಾರ್ ಅಂದಕ?
- ಮಾಚು : ಡೆಂಡೆಣೆ! ನಾನೇ!... ಎಂತಾಂಗಣ್ಣೆ? ಇಂದ್ ಏಪ್ರಿಲ್ ಒಂದ್!
- ಪೂವಿ : ಅಲ್ಲ, ನಿನ್ನ ಬೆಪ್ಪಕಾಕುವಾಂದ್? ನಿನ್ನ ನಂಬುವದೇ ಡೇಂಜರ್ ಮಾಚು! (ತೆಳಿ)
- ಮಾಚು : ನೀನ್ ಸ್ವಿಚ್ ಆಫ್ ಮಾಡ್ನದ್? ಬೆರಿಯ ಒಮ್ಮೆ ಲೈಟ್ ಆನ್ ಮಾಡ್ ಪೋ!ಅಲ್ಲಿಂಜಲ್ಲಿಕ್ ಸಾಲ ವಜಾ ಆಚಿ! (ತೆಳಿ)

ಭೂಮಂತ್ರಂಗಾಳಿ

- ಮಾಚು : ಎಂತೆಲ್ಲ ಎಳೆದಿಯ ಪೂವಿ?
- ಪೂವಿ : ಒರ್ ಮಾದ್ರಿ ಎಲ್ಲ ಆನನ್ನೆಕೆ ಮಾಚು. ಈ ಕುರಿ ಏದೊಂದಾನೋ ಬುಟ್ಟಿತ್ಲೆ.
- ಮಾಚು : ಲಿಸ್ವ ಮಾಡಿಟಕ ಪೋರ. ಮಾಡ್‌ನ ಲಿಸ್ವ ಪ್ರಕಾರ ಕೊಂಡಪೋಪಕೂ ಪೋಂಡು.
- ಪೂವಿ : ಅದ್‌ನ ಗೇನ ಬಪ್ಪಾಚಿಡುವಕ್ ನೀನ್ ಉಳ್ಳಿಯಲ್ಲ ಮಾಚು? ಎಣ್ಣಾನೇ ನೂಯಿಟ್ಟಿ ಪತ್ತೊಯಿಂಬದ್ ಕುರಿ ಎಣ್ಣಂಡೇ ಇಪ್ಪಿಯ. (ತೆಳಿ)
- ಮಾಚು : ನಾನ್ ಅನ್ನನೆ ಎಣ್ಣಲಾಯಿತೇ ನಂಗಡ ಸಂಸಾರ ಇಚ್ಚಕ್ ಮಟ್ಟಿಕೆ ಉಳ್ಳೊ. ಅದ್ ಗೊತ್ತಿರೊಂಡು.
- ಪೂವಿ : ಮದಿ ಮಾಚು. ದುಂಬ ಹೊಗಳಿಯವಕಾಗ. ಕೇಪಯಿಂಕ್ ಬೇಜಾರಾಪ! (ತೆಳಿ)
- ಮಾಚು : ಕೇಪಯಿಂಕ್ ತಂಗಡ ಪುದುಮೆನ ಮುನ್ನೂರ್ ಕುರಿ ಕೊಂಡಾಡಿಯವದೂ ಕೇಪಯಿಂಕ್ ಕುಸಿ ಆಪುಲೆ ಪೂವಿ....
- ಪೂವಿ : ನಾನೆಂತಾನ ಮಾಚು ಅನ್ನನೆ ಎಣ್ಣೆಯಂಡಿಯೆ?
- ಮಾಚು : ನೀನ್‌ಂದೆಣ್ಣನಾ? ಕೇಪಯಿಂಗಾಂದ್ ಎಣ್ಣ ಅಚ್ಚಿಕೇ.
- ಪೂವಿ : ಇಲ್ಲಿಕ್ಕ ಸದ್ಯತ್ ಕೇಟಂಡುಳ್ಳ ನಾನೊಬ್ಬಳೇ ಗೊತ್ತಾಚಾ? ನೀನ್ ಓರೆ ಓರೆಲ್ ಪರಿವದೊಂದೂ ಬೋಂಡ.
- ಮಾಚು : ಅಂದಕ ನೇರೆ ನೇರೇ ಪರಿವಿ ಕೇಳ್. ನಾನಿನ್ನನೆ ಇಲೂರ್ ಪೊವ್‌ಲೂ ನೈಕಲಾಯಿತ್ ಈ ಮನೆ ಇಚ್ಚಕ್ ಮಟ್ಟಿಕೆ ಉಂಡ್. ನೀಡನ್ನಕೆ ನಾನೂ ಚೊಡಿ ಚೊಡಿ ಕಳ್‌ಚಿತಿಂಜಕ ಗೊತ್ತಾಪಿಂಜತ್‌ಂದೆಲ್ಲ ಬೂಸಿ ಬುಡುವಿಂಜಿಯ ನಿನ್ನಾಂದ್?
- ಪೂವಿ : ಅಲ್ಲೆಂಗೂ ನೇರೇ. ಉಳ್ಳಾನ ಉಳ್ಳನ್ನಕೆ ಎಣ್ಣ. ಅದ್‌ಲೆಂತ ಇಕ್ಕ ತಪ್ಪು?
- ಮಾಚು : ಉಳ್ಳಾನ ಉಳ್ಳನ್ನಕೆ ಎಣ್ಣಕ? ಇಲೂರ್ ವರುಲಿಯ ಅಂದಕ ನೀನ್?
- ಪೂವಿ : ಅದೂ ಒರ್ ನೈಪು ಮಾಚು!... (ತೆಳಿ)
- ಮಾಚು : ದಮ್ಮಯ್ಯವಯ್ಯ!... ಗೂಕೆ ಬಲಿಪ್ಪದೂ ಒರ್ ನೈಪುಲೊ ಇವಕ್! ಪುದಿಯ ಥಿಯರಿ. ದಾಕೇಂಗಿ ರೀಸರ್ಚ್ ಮಾಡುವಕ್ ಎಣ್ಣಕ ಆಕು! (ತೆಳಿ)
- ಪೂವಿ : ಅನ್ನನೇ ಮಾಡ್. ನಾಕೆನ್ನಾಂಡು ಇಕ್ಕ? ಥಿಯರಿರ ಪಾಯಿಂಟ್ಸ್‌ನ ಬೋಂಡಿಕೆ ಟಿಕ್ ಮಾಡಿಯ. ಮನೆಲ್ ನೆಮ್ಮದಿ ಉಂಡೇಂಗಿ ಮಾತ್ರ ಅಂತಲ್ಲಿ ವರ್ಕ್ ಬಪ್ಪೊ. ವರ್ಕ್ ಬಾತೆಂಗಿ ಮಾತ್ರ ಗೂಕೆ ಬಲಿಪ್ಪೊ... (ತೆಳಿ)

- ಮಾಚು : ಅನ್ನನೆ ಗೂಕೇಲೇ ಮರ ಮುರಿಚ್ಚಕ ಮಾತ್ರ ಕಟ್ಟೊಳೆ ಪಡಿಕ್ಕುಳೆ ಪಾರಾರೆಡಿ ಆಪೊ...
- ಪೂವಿ : ತಪ್ಪಿ ಪೋಚಿ...ತಪ್ಪಿ ಪೋಚಿ. ಎಲ್ಲರೂ ಗೂಕೆ ಬಲ್ಚಂಡ್ ವರಿಯಂಡುಂಡ್ಂದಾಚೇಂಗಿ ಮಾತ್ರ ಆ ಮನೆಲ್ ಎಲ್ಲಾರೂ ಒತ್ತೋಮೆಲುಂಡ್ಂದ್ ಗೊತ್ತಾಪೊ....
- ಮಾಚು : ಅಂತ ಮನೆಕ್ ಮಾತ್ರ ಕಳ್ಳಂಗ ನುಗ್ಗುವಕ್ ಸಾಧ್ಯ ಆಪೊ...
- ಪೂವಿ : ಥತ್. ಇದೆಂತೋರ್ ಅನಿಷ್ಟ ತಕ್ಕ್ ಮಾಚು? ನಾನೆಂತೋ ಎಣ್ಣುವಕ್ ಪೊರಟ್ಟಕ ನೀನ್ ಇಂಞೆಂತೋ ಎಣ್ಣುಂಡುಳ್ಳಿಯಲ್ಲ?
- ಮಾಚು : ನಾನ್ ಎಣ್ಣುವಕ್ ಪೊರಟ್ಟದೂ ಬೋಂಡತದ್ ಒಂದೂ ಅಲ್ಲ. ಬೋಜಿ ಬಾವಂಡ ಮನೆಲ್ ನಡ್ಂದ ವಿಷ್ಯ ಇದ್...
- ಪೂವಿ : ಎಂತ? ಗೂಕೆಕೂ ಕಳ್ಳತನಕೂ ಸಮ್ಮಂದ ಉಳ್ಳನ್ನಕೆ ಪರಂದಂಡುಳ್ಳಿಯ?
- ಮಾಚು : ಸಮ್ಮಂದ ಉಂಡಾ ಇಲ್ಲಿಯಾಂದ್ ಮತ್ಯಂವೊ ಪೊಲೀಸ್ ಸ್ಟೇಷನ್‌ಲ್ ಎಣ್ಣುವಕಲೇ ಎಲ್ಲಾಕೂ ಗೊತ್ತಾಯೆ. ಇಲ್ಲೆಂಗಿ ನಾಕ್ ಮಾತ್ರ ಎನ್ನನೆ ಗೊತ್ತಾಂಡು?
- ಪೂವಿ : ಬಾರಿ ರಸ ಉಂಡ್ ಕಾಂಬಲ್ಲ ಕತೆ ಅಂದಕ?
- ಮಾಚು : ಇದ್ ಕತೆ ಅಲ್ಲ ಪೂವಿ. ಇಂದೆಕೆಟ್ಟಾಂಗ್ ನಡ್ಂದ ಸಂಗತೀಂದೆಣ್ಣುಂಡುಳ್ಳಲ್ಲ?
- ಪೂವಿ : ಸೆರಿಯಪ್ಪ ಎಣ್ಣ್ ಅಂದಕ...
- ಮಾಚು : ಇರ್ ನಡ್ಪಾದ್ರೆ ನೇರ. ಬೋಜಿ ಬಾವಂಡ ಮನೆ ಉಳ್ಳ ಕಾಡ್‌ರ ನಡುಲ್ ನೀಕ್ ಗೊತ್ತುಂಡಲ್ಲ. ಕಾಡ್ ಪುಳು ಜೀ ಜೀ ಜೀಂದ್ ಎಣ್ಣುಂಡುಳ್ಳದ್ ಬುಟ್ಟಕ ಸುತ್ತು ಮುತ್ತು ಏದೂ ಸದ್ ಸುದ್ದಿ ಇಲ್ಲೆ. ಕಳ್ಳ ಮೆಲ್ಲೇ ಪೊರಟ್ಟತ್...
- ಪೂವಿ : ಒರ್ ಗಳಿಗೆ ಬಂದ್‌ಟ. ಎದಿಕ್ಕೆ ಪಡಿ ಇಟ್ಟಿಯೆನಾಂದ್ ನೋಟಿತ್ ಬಂದ್ರುವಿ.
- ಮಾಚು : ಪುಕ್ಕಲಿ ಪುಕ್ಕಲಿ! ಪಡಿ ಇಕ್ಕಡ್ ಅನ್ನನೆ. ಶೆಖೆ ತಡ್‌ಪಕಯ್ಯುಲೆ ಇಲ್ಲಿ. ಇವಕ್ ಪಡಿ ಇಡುವೊ ಜೋರ್... ಚೆನ್ನ ಮುಂಡತೆ ಅಳೆಪಿಯ ಅಲ್ಲಿ?
- ಪೂವಿ : ನೀನ್ ಪಿಂಞನ್ನಂಗ್ ಅನ್ನನೆ ಬೊತ್ತ್‌ಚಿಡುಪವನ್ನಕೆ ಅದ್‌ನ ಎಣ್ಣುವೊ? ಬಾಕಿ ವಿಷ್ಯ ಪರಂದನ್ನಕೆ ಪರಂದಂಡ್ ಪೋಪದೆನ್ನೇ?
- ಮಾಚು : ನೀಡ ಬೇಳೆ ಕಾಳ್ ಇಚ್ಚಕೇಂದ್ ಗೊತ್ತಾಚಲ್ಲ? ಇಕ್ಕೆನ್ನ್ ಎಣ್ಣೊಂಡುವಾ? ಬೋಂಡಾ?
- ಪೂವಿ : ಎಣ್ಣ್. ನಾನೊಂದೂ ಪುಕ್ಕಲಿ ಅಲ್ಲ. ನಾಕೆನ್ನ್ ಅಚ್ಚಕ್ ಧೈರ್ಯ ಇಲ್ಲೇಂದ್ ಗೇನ ಮಾಡತೆ. ನೀನಿಲ್ಲತೆ ಇಪ್ಪಕ ಈ ಮನೆಲ್ ನಾನೆಚ್ಚಕೋ ಕುರಿ ಒಬ್ಬಳೇ

ಬುದ್ಧಂಡದ್?

ಮಾಚು : ಒಬ್ಬಳೇ ಬುದ್ಧಂಡದ್ ನೇರೇ. ಆಚೆಂಗಿ ಅಂಜೇ ಮುಕ್ಕಾಲ್ ಗಂಟೆಕೇ ಮನೆರ ಪಡಿನ ಎನ್ನಂಗ್ ಬಂದ್ ಮಾಡಿತಿಂಜಿಯ?

ಪೂವಿ : ಓ. ಅದ್ ಬೊತ್ತಿತ್ ಒಂದೂ ಅಲ್ಲ ಮಾಚು. ಸೊಳ್ಳೆ ಒಳ್ಳೆಕ್ ಬಕ್ಕತ್ತಿಕ್ಕಡ್ಂದ್ ಅಚ್ಚಿಕೇ.

ಮಾಚು : ಸೆರಿಯಪ್ಪ. ದಾಸು ನಾಯಿಕ್ ಬೈಟೆಕ್ ಎನ್ನಂಗ್ ಕೂಳ್ ಇಡತದ್?

ಪೂವಿ : ನಾಯಿ ಬುದ್ಧಿ ನೀಕೆಂತ ಗೊತ್ತ್? ಪುಡ್ಂಜನೆ ಉಂಡ್ಂಟಕ ಅನ್ನತ ನಾಯಿಯ ಇಲ್ಲ್ ಕೊರ್ಪದೂ ಇಲ್ಲೆ- ಒಂದೂ ಇಲ್ಲೆ. ಅದ್ಂಂಗ್ ಪೊಲಾಕ ಇಟ್ಟಕ ಆಚೀಂದ್ ಕೂಳ್ ಇಟ್ಪಲೆ ಅಚ್ಚಿಕೇ.

ಮಾಚು : ಆಚಪ್ಪ. ಮಂಡೆರ ಬರಿಲ್ ಕತ್ತಿ ಬೆಚ್ಚಂಡಿಂಜದ್ ಎಂತಾಂಗೋ?

ಪೂವಿ : ಅದ್ ಧೈರ್ಯಕ್ ಮಾಚು. ಕಾಲ ಅಂತದ್ ಇಂದ್. ಒಂಟಿ ಮನೆ. ಒಂಟಿ ಪೊಣ್ಣಾಳ್. ಎನ್ನನೆ ನಂಬುವೊ? ನಂಗಡ ಎಚ್ಚರತ್ ನಂಗ ಇಕ್ಕಂಡ?

ಮಾಚು : ಸೆರಿ ಅಂದಕ. ಕೇಕೊಳ ಪಕ್ಕಕಾಲೆ ಪೋಪಕ ನಾಡ ಕೈನ ಅಮುಕಿ ಪುಡ್ಚವೊ ಎಂತಾಗೋ? ಕೂಳಿ ಬಂದಿತ್ ಕೈ ಬಲ್ಚಿರೊಂದಾ?

ಪೂವಿ : ಥೂ.. ಥೂ.... ನೀಡ ಬುದ್ಧಿ ಇಕ್ಕಿಕ್ಕ ಪೆರ್ತ್ ಪಾಳಾಯಿತ್ ಮಾಚು. ಈ ನೇರತ್ ಕೂಳಿ ಮಾರಿರ ಸುದ್ದಿ ಎಡ್ಪಕಾಗಾಂದೂ ಗೊತ್ತಿಲ್ಲತಾಚಲ್ಲ ನೀಕ್?

ಮಾಚು : ಅಲ್ಲ ಪೂವಿ, ಕೂಳಿ ಉಂಡಾಂದ್ ಕೇಟಕ ಇಲ್ಲೆಂದ್ ಎಣ್ಣುವವಳೂ ನೀನೇ. ಎಲ್ಲಿಯೇಂಗಿ ಇಂಜಿಟಕಲೋಂದ್ ಎಣ್ಣುವವಳೂ ನೀನೇ. ನೀಡ ಕಳಿಯೇ ಅರ್ಥ ಆಪುಲೆ ನಾಕ್! (ತೆಳಿ)

ಪೂವಿ : ಮಾಚು, ನೀನ್ ಕಯ್ಯವೆಂಗಿ ಬೋರೆ ಸುದ್ದಿ ತಕ್ಕ ಪರಿ. ಪಾಳ್ಂಬರಿ ತಕ್ಕಪರಿಯತೆ.

ಮಾಚು : ಛೂ ಮಂತ್ರಂಗಾಳಿ. ಕೂಳಿ ಮಾರಿಯ ದೂರ ನಿಂದೊಳಿ. "ಮಾರಿ ಕಣ್ಣ್ ಕೂಳಿ ಕಣ್ಣ್ ಅವಂಡ ಕಣ್ಣ್, ಇವಂಡ ಕಣ್ಣ್ ಇಂಜದ್ ಇಂಜನ್ನಕೆ ಕಂಡದ್ ಕಂಡನ್ನಕೆ, ಬೆಂಜದ್ ಬೆಂಜನ್ನಕೆ, ಕಂಡಾನೋ ಕಾಂಗತಾನೋ ಕಂಡಿತ್ಂದೆಣ್ಣುವನ್ನಕೆ ಪರ್ಂದ ನಾವು ನೋಟೊನ ಕಣ್ಣ್, ಕೇಟ ಕೆಮಿ ಕಾಡ್ ಕೂಡಿಯೇ ಪೋಡ್.... ವೂ ಮಂತ್ರಂಗಾಳಿ!

ಪೂವಿ : (ತೆಳಿ) ಅಯ್ಯೋಯ್ಯೋ ಎಂತ ಮಾಚು ಇದ್ ನೀಡ ಕತೆ? ಚೆರಿಯ ಮಕ್ಕಡನ್ನಕೆ? ನೀಡ ಅವಸ್ಥೆ ನೋಟೊನಕ ತೆಳಿ ಬಪ್ಪ ನಾಕ್!

ಮಾಚು : ನಾಕೂ ಅಚ್ಚಿಕೆ ಪೂವಿ. ಕೂಳೀಂದ್ ಎಣ್ಣುವಕಲೇ ಕೈಕಾಲ್ ತರಪರ ತರಪರ!

ಅದ್‌ಂಗಿಕ್ಕ ಅಂತದ್ ಕಾಡ್ ಕೂಡಿ ಪೋಡ್‌ಂದೆಣ್ಣೆತ್ ದಂಡ್ ಮಂತ್ರ ಇಟ್ಟ್, ಇಂಞಾ ಧೈರ್ಯತ್ತಿರ್.

ಪೂವಿ : ಅಲ್ಲ ಮಾಚು. ಇದ್‌ನೆಲ್ಲ ಎಲ್ಲಿಂಜ ಪಡ್‌ಚಂಡಿಯೆ ಎಣ್ಣ್ ನೀನ್? ಇದ್‌ನೆಲ್ಲ ಕೂಟಿತ್ ಒರ್ ಡ್ರಾಮ ಮಾಡ್‌ನಕ ಚಾಯಿಕ್ಕು ನೋಟುವಕ್! (ತೆಳಿ)

ಮಾಚು : ಇಂಞಾಂತ ಮಾಡುವೊ ಪೂವಿ. ಪೊಣ್ಣ್ ಧೈರ್ಯಕಾರ್ತಿದ್ ಗೇನ ಮಾಡಿತಿಂಜ. ಅಲ್ಲಿಂಜ ಅವಡ ಓರಂದೇ ಬಂಡವಾಳ ಪೂರ ಬೂವಕಾಚಿ. ಇಂಞಾ ಬೋರೆ ಬಟ್ಟೆ ಕಾಂಗತೆ ಅದೇದೋ ಒರ್ ಮಂತ್ರಕಾರಂಡ ಪಕ್ಕ ಪೊಪಂಜಿ ಛೂಮಂತ್ರಂಗಾಳಿ ಪಡ್‌ಚಂಡ್ ಬಂದ. ಅಂದ ಪಿಂಞ ಪೊಣ್ಣ್‌ಕ್ ಚೆನ್ನ ಧೈರ್ಯ ಬಾತ್.

ಪೂವಿ : ಮುಂಡತ್ತಿರ್ ಮಾಚು ನೀನ್. ನಾಕ್ ಚೊಡಿ ಗಿಡಿ ಬಪ್ಪಾಚಿಡತೆ.....

ಪೂವಿ : ನಾನ್ ನೀಕ್ ಎಣ್ಣನಾ ಇಕ್ಕ? ನಾಡ ಪೊಣ್ಣ್‌ಕ್ ಎಣ್ಣ ಗೊತ್ತಾಚಾ?

ಪೂವಿ : ನೀನ್ ಮುಂಡತೇಂಗಿ ಕಾಲ ಕೈಕತೆ. ಬೋಜಿ ಅಣ್ಣಯ್ಯಂಡಲ್ಲಿ ಎಂತಾಂಚೆಂದ್ ಎಣ್ಣ್.

ಮಾಚು : ಆಕು. ನಿಂಗಡಪ್ಪಣೆ. ಕಂಡಾನ ಕಂಡನ್ನಕೆ ಕೇಟಾನ ಕೇಟನ್ನಕೆ ನಿಂಗಡ ಮಿಂಞಲ್ ಅರಿಕೆ ಮಾಡುವಕ್ ಪೊನ್ನಪ್ಪಣೆ ತಕ್ಕೊಂಡು.

ಪೂವಿ : ತಂದದಾಯಿತುಂಡ್. ಮಿಂಞಾಕ್ ಎಣ್ಣೊಳಿ... ಕಾಲನೇರ ಇಲ್ಲೆ. ಕಡ್‌ಂಜನೆ!

ಮಾಚು : ಓಹೋ, ಇದ್ ಬಲ್ಯ ಕಷ್ಟಾಚಿಲ್ಲಪ್ಪ. ದೇವ ವರಂದನ್ನಕೆ ಎಣ್ಣೊಂಡುಂಡ್!

ಪೂವಿ : ದೇವ ಅಲ್ಲ ಮಾಚು. ದೇವಿ, ದೇವಿ!

ಮಾಚು : (ಸ್ವಗತ) ಕೂಳಿ ಕಾಡ್‌ಕ್ ಕೂಡ್ಯಂಡದೂ ದೇವ ಅಲ್ಲಲ್ಲ -ದೇವಿ ಬಂದ್ರ ತೊಲೊ! ಕಷ್ಟ ಕಷ್ಟ!

ಪೂವಿ : ಎಂತ ಎಣ್ಣೆಯ?

ಮಾಚು : ಒಂದೂ ಇಲ್ಲೆ. ಕೇಂಬು ಕರಿಕ್ ಇಂಞಾ ಚೆನ್ನ ಉಪ್ಪು ಇಟ್ಟಿತಿಂಜಕ ಆಪಿಂಜತ್‌ಂದ್!

ಪೂವಿ : ನಾಡ ಕೆಮಿ ಚಾಯಿಲುಂಡ್ ಮಾಚು. ಕೇಪಾಲೇಂದ್ ಗೇನ ಮಾಡತೆ. ಎಣ್ಣುವೆಂಗಿ ಎಣ್ಣೆಕ್ಕ. ಬಲ್ಯ ಬಡಾಯಿ ಬಂಬಂಡನ್ನಕೆ ಕಳಿಪೊ ನೋಟಂವೊ!

ಮಾಚು : ಕೇಳ್ ದೇವಿಯೇ ಕೇಳ್.... ಅಂದ್ ಪಂಡ್ ಕಾಲತ್ತ ನೀಡ ಮುತ್ತಪ್ಪಣೆ ಪ್ರಕಾರ ಕುಂದ್ ನಾಡಾನ ಈ ಕಾಡ್ ಮಲೆರೊಳ್‌ಲ್ ನಿಂದ್ ಬೋಡಿತ್,

ಪೆಳಮೆ ಪೊಮ್ಮಾಲೆ

ತಂದ್ ಬೆಂದು, ಒತ್ ಬುದ್ದಿತ್ ಇಂದಿಕ್ಕ ಈ ಕತೆನ ಒಂದೂ ಬುಡತೆ ಎಣ್ಣುಂಡುಳ್ಳ. ಚಂದ ಚಾಯಿರ ಮಂದ್ ಪಕ್ಕಲುಳ್ಳ ಮುಂದ್ ಮನೆ ಆನನ್ನತ ಬೋಜಿ ಬಾವಂಡ ಮನೆಲ್ ಅಂದಿರ್ಲ್ ಎಂತಾಚೀಂದೆಣ್ಣುಕ...

ಪೂವಿ : (ತೆಳಿ) ಇದ್ ಎಂತ ಮಾಚು? ಬೊರಿ ಕತೆಯಾ? ಹರಿಕತೆಯಾ?

ಮಾಚು : ಬೊರಿ ಕತೆಯೂ ಅಲ್ಲ. ಹರಿ ಕತೆಯೂ ಅಲ್ಲ. ಪಿರಿ ಪಿರಿ ಕತೆ ಮ ಮಿಂಗಳೆಲೆ ಅಲ್ಲ. ನರಮಾನಂವೊ ಆಯಿತುಳ್ಳ ಬೋಜಿ ಬಾವಂಡ ನೆರೆಮನೆಕಾರನೇ ಎಣ್ಣಾನನ್ನತ ಒರ್ ಕೊರಿ ಕತೆ!

ಪೂವಿ : (ತೆಳಿ) ಎಂತ ಮಾಚು ಅದ್? ಕೊರಿ ಕತೆ ಎಣ್ಣುಕ?

ಮಾಚು : ಕೊರಿ ಕತೆ ಎಣ್ಣುಕ ಕೊರಿಯಂಡ ಬುದ್ದಿ ಗೊತ್ತುಂಡಲ್ಲ ನೀಕ್ ಸುರೂತದ್ ಏಲೆ ಪೋಚೋ ಬಾಕಿಯತದೂ ಅದೇ ಬಟ್ಟೆಕಾಲೆ ಪೋಪೊ.

ಪೂವಿ : ಅದೆಂತಾಂಗ್ ಬಾತಿಕ್ಕ ಈಂಡೆಡೆಲ್? ಬಾಳೆಲೆಲ್ ಅದೆಂತೆಂತಾನ ಬಳಂಬುವಿಯೋ ನೀಕೇ ಗೊತ್. ಬೋಜಿ ಅಣ್ಣಯ್ಯಂಡ ಕತೆಕೂಳ್ ಬಳಂಬಿಯಂಡಿಪ್ಪಕ್ಕಲೇ ಇದೆಂತಾಂಗ್ ನಡುಕ್ ನುಗ್ಗಿಟಿಯೆ ಮಾಚು?

ಮಾಚು : ಕರೆಕ್ಕ್ ನೀಡ ಲಿಸ್ವಲ್ ಬಾಳೆ ಎಲೆ ಎಳಾದಿತುಳ್ಳಿಯ ಪೂವಿ?

ಪೂವಿ : ಇಲ್ಲೆ. ನೋಟಿಯಾ? ನೀನ್ ಗೇನ ಬಪ್ಪಾಚಿಟ್ಟಿದ್ ನಲ್ಲದಾಚಿ. ಇಕ್ಕಲೆ ಎಳಾದಿರುವಿ. ಬಾ.... ಳೆ.... ಎ... ಲೆ.. ಇಂಚಿಂತೆಂಗಿ ಗೇನ ಬಪ್ಪ ನೋಟ್ ಮಾಚು.

ಮಾಚು : ಇಕ್ಕ ಎಂತೆಲ್ಲ ಎಳಾದಿತುಳ್ಳಿಯ ಅದೆಣ್ಣ್ ಮಿಂಚ್.

ಪೂವಿ : ಚೂದ್, ಚಾಕ್, ಕತ್ತಿ, ಸ್ವೀಲ್ ಕಪ್, ಟಾರ್ಪಾಲ್, ಉಪ್ಪು, ಸಕ್ಕರೆ, ಕಾಫಿ ಪೊಡಿ, ಅವಲಕ್ಕಿ, ನೀರು ಬಾಟ್ಟಿ, ಬೆಡ್‌ಶೀಟ್, ಕಾಫಿ ಕಾಚುವಕ್ ಒರ್ ಗಂಜಿ ಇಚ್ಚಕಾಯಿತ್ ಮಾಚು.

ಮಾಚು : ಅಲ್ಲ ಚೂದ್ ಎಂತಾಂಗ್ ಪೂವಿ?

ಪೂವಿ : ಕೈಂಜ ಕುರಿ ಗೇನಾಪ ನೀಕ್? ಏದೊ ಕಾಡ್ ಪಣ್ಣನ ಕೊಯ್ಯುವಕ್ ಪೋಪಂಜಿ ಸಂಜು ಕ್ಕಣ್ಣ ಮುಳ್ಳೆ ಪಡ್‌ಚಿಟ್ಟಂಡದ್? ಈ ಕುರಿ ಅಂಗಾಯಿತೇ ಚೂದೂ ಇರಡೆಂದ್.

ಮಾಚು : ಸೆರಿ ಇಕ್ಕಡ್. ಪಣ್ಣ ತಿಂಬಕ ಚಾಕ್ ಉಪಯೋಗ ಬಪ್ಪ. ಬೈಟ್ ತಿತ್ತ್ ಗುಡ್ಡೆ ಇಡುವಕ್ ಪುಳ್ಳಿ ಆಂಡುವಲ್ಲ. ಆಂಗ್ ಕತ್ತಿ ಆಚಿ. ಟೆಂಟ್ ಮಾಡುವಕುಳ್ಳ ಟಾರ್ಪಾಲ್ ರೆಡಿ ಉಂಡ್. ಅಡಿಕ್ ಬಿರಿಪ್ಪಕ್?

ಪೂವಿ : ಅಡಿಕ್ ಬಿರಿಪ್ಪಕ್ ಒಂದೂ ಬೋಂಡ ಬುಡ್. ಟಾರ್ಪಾಲ್ ಬಲೆಂಜನೆ

ಉಂಡಲ್ಲ? ಒರ್ ಬರಿನ ಅಡಿಕೂ ಬಿರ್‌ಚವಲು. ಪೇಸ್, ಬ್ರಶ್ ಎಳೆದಿತ್ತಿಲ್ಲೆ
ಮಾಚು.

ಮಾಚು : ಬೋಂಡ ಬುಡ್. ಒರ್ ದಿನ ಉಪ್ಪುಲೇ ಪಲ್ಲಾ ಕತ್ತಾನಕ ಆಚಿ. ಪಲ್ಲಾರ
ಆರೋಗ್ಯಕ್ ಉಪ್ಪುಕ್‌ಂಜ ಮೀತದಿಲ್ಲೆಂದ್ ಇಂದ್ ದಾಕೂ ಗೊತ್ತೇ ಇಲ್ಲೆ.
ಕೊಡಿಮನೆ ಅವ್ವಯ್ಯಂಡ ಪಲ್ಲಾ ನೋಟ್ ಇಕ್ಕಲೂ ಎನ್ನನೆ ಉಂಡ್‌ಂದ್!

ಪೂವಿ : ಅನ್ನನೇ ಆಪಕಲೇ ಕೈಂಜಕಾಲ ಜಗಳ ಆಡಿಯಂಡಿಪ್ಪಕ ತಾತಂಗ್ ಓರ್
ಕಡಿ!(ತೆಳಿ)

ಮಾಚು : ತಾತ ಎಂತ ಮಾಡ್‌ಚೊಲೊ? ಮುಂಡತೆ ಇಂಜಿತಾ?

ಪೂವಿ : ತಾತ ಎಂತ ಎಣ್ಣುವೊ? ಆಹಾ ಪೋಯಿ ಪೋಯಿ ನಾಯಿನ
ಮಂಗಲಾಯಿಟ್ಟನಲ್ಲಾಂದ್ ಏಂಗ್ ಚೊಲ್ಲೊ! ಏದುಂಗೂ ಮತ್ಯಂದ್ ವೆಟನರಿ
ಡಾಕ್ಟರ್ ಬಪ್ಪಲ್ಲ. ಅಕ್ಕ ನೀಕೂ ಓರ್ ರೇಬಿಸ್ ಇಂಜೆಕ್ಷನ್ ಮಾಡ್‌ಚಿಡತೆ
ಬುಡುಲೇಂದ್ ಎಣ್ಣುವಿಂಜತೊಲೊ. ಕಡ್‌ಚಿತ್ ಆನ ಪಿಂಞ ಅವ್ವಯ್ಯಂಗೂ
ಬೇಜಾರಾಯಿತ್. ನಾಡ ಸುದ್ದಿ ಬಕ್ಕತೇಂದ್ ಎಚ್ಚಕ್ ಕುರಿ ಎಣ್ಣು ಮುದ್‌ಕ
ನೀಕ್? ಚೊಡಿ ಬಾತೆಂಗಿ ನಾಡ ಪಿತ್ತ ಮಂಡೆಕ್ ಕೇರಿರುವ. ನಾನ್ ಎಂತ
ಮಾಡುವೀಂದೇ ಗೊತ್ತಾಪುಲೆ.... ದುಂಬ ನೊಂಬಲಾಚಾಂದ್ 'ನೊಣೆ
ಮಾಡ್‌ಚಿಲೊ.

ಮಾಚು : ಕಾಲ ಕಲಿಯುಗ ಲೇಲಕ್ಕ ಮಾಯಿ ತಾಲಿ ಲೆಲ್ಲೇಲಾಂದ್ ಇದ್‌ಂಗೇ ಎಣ್ಣುವೊ.
ಅಜ್ಜಿ ಅಜ್ಜಂಗ್ ಕಡಿಕ್ಕು. ಅಜ್ಜ ಅಜ್ಜಿಕ್ ಕೊರಿಕ್ಕು. ಎಂತಾನೆಲ್ಲ ಕೇಪಕುಂಡೊ
ಈ ದೇವ ತಂದ ಕೆಮಿಲ್!

ಪೂವಿ : ಕಾಲ ಕಲಿಯುಗ ಪಾಡ್‌ನದ್ ಮದಿ. ಕುಂದ್ ಪತ್ತುವಕ್ ಪೋಪಕ ಆನೆ, ನರಿ
ಇಂತದ್ ಬಂದ್‌ಟಕಲೋ....

ಮಾಚು : ನೀಕ್ ಎಕ್ಕೋಲು ಇಂತದೇ ಗೇನ ಪೂವಿ. ಬೋಂಡತದೇ ಉಳ್ಳ ನೀಡ
ಮಂಡೆಲ್!

ಪೂವಿ : ಇದ್ ಬೋಂಡತದಲ್ಲ ಮಾಚು. ನಂಗ ಮಾತ್ರ ಪೋಪದಾಚೆಂಗಿ ಸರಿಯಪ್ಪ.
ಮಕ್ಕಳೂ ಇಪ್ಪುಲಿಯ ಕೂಟ್‌ಕ್?

ಮಾಚು : ಇಕ್ಕಂತ ಅಂದಕ? ತೋಕೂ ಎಳೆದಿಯ ಲಿಸ್‌ಲಲ್!

ಪೂವಿ : (ತೆಳಿ) ಚಾಯಿ ಉಂಡ್ ನೀಡ ಐಡಿಯ. ಪಿಕ್‌ನಿಕ್ ಪೋಪೊಲೊ, ನಿಪ್ಪುಲ್
ತೋಕ್‌ಲೋ ದಾರೇಂಗಿ ಕಂಡಕ ತೆಳಿಕ್ಕತಿಕ್ಕುವಾ? ಅದೆನ್ನ ಬೋಟೆಕ್
ಪೋಪದಾ?

ಸಕಮೆ ಪ್ರೂಮ್ಯಾಲೆ

- ಮಾಚು : ಆನೆ ನರಿ ಇಪ್ಪಕೂ ಮದೀಂದ್ ಎಣ್ಣುವದೂ ನೀನೇ- ತೋಕ್ ಎಡ್ತವನಾಂದ್ ಎಣ್ಣಕ ತೆಳಿಪ್ಪದೂ ನೀನೇ. ಊದ್ಬತ್ತಿ ಎಡ್ತ್ತ ಅಂದಕ....
- ಪೂವಿ : ಊದ್ಬತ್ತಿ? ಅದಂತಾಂಗ್ ಮಾಚು? ದೇವಸ್ಥಾನ ಉಂಡಾ ಅಲ್ಲಿ?
- ಮಾಚು : ದೇವಕ್ ಪೂಜೆ ಮಾಡುವಕ್ ಅಲ್ಲ. ಆನೆ ನರಿ ಕಂಡಕ ಊದ್ಬತ್ತಿ ಕಾಟುವಂಜಿ ಓರ್ ಅಡ್ಡ ಬೂಳಲ್ ! (ತೆಳಿ)
- ಪೂವಿ : (ತೆಳಿ) ಅನ್ನನೆ ಮಾಡ್. ನೀಕ್ ಚಾಯಿಲ್ ಆಶೀರ್ವಾದ ಮಾಡು. ಒಕ್ಕ ಮಕ್ಕಾಯಿತ್ ಪೊಲೊಂದಾಂದ್!
- ಮಾಚು : ಅಲ್ಲೆಂಗಿ ಮಾತ್ರ ಇಂಞೆಂತ ಮಾಡುವಕಾಪ ಪೂವಿ? ಆನೆ, ನರಿ ಕಾಂಬಕ್ ಕೊಟ್ಟೆಚೆಂದ್ ಬೆಚ್ಚ. ಎಂತ ಉಂಡೆಂಗಿಯೂ ಅದೇ ಎಂತೆಂಗಿ ಮಾಡೊಂಡು. ನಂಗ ಎಂತ ಮಾಡುವಕಾಪ?... ಅದಿರಡಲ್ಲಿ. ನಂಗ ಜೀವ ಜಾತಿಯಕ್ ಎಚ್ಚಕೊರ್ ಅನ್ಯಾಯ ಮಾಡ್ತುಂಡುಂಡ್ ಗೊತ್ತುಂಡ್? ಅಯಿಂಕ್ ಬಾಯಿ ಬಪ್ಪನ್ನಕೆ ಇಂಜಿತಿಂಜಕ ಎಚ್ಚಕ್ ಬಜ್ಜಿ ಕೂಟುವಿಂಜತೊ ಎನ್ನೋ?
- ಪೂವಿ : ಎಂತ ಮಾಚು ಅಂತದ್?
- ಮಾಚು : ಒಂದನೇ ಶತ್ರು ಪ್ಲಾಸ್ಪಿಕ್ ಪೂವಿ. ಕೊಡಗ್ ಪೊರ್ಮೆಂಜ ಪ್ರವಾಸಿಯ ಬಪ್ಪಂಜಿ ಇಲ್ಲಿಯತ್ರೆ ಚಾಯಿ ಬೋಜತ್ನ ನೋಟಿತ್ ಕುಸಿಪಡುವದೆನ್ನೋ ಸರಿ. ಆಚೆಂಗಿ ಬಂದಯಿಂಗಕ್ ಚೆನ್ನಂಗ್ ಜವಾಬ್ದಾರಿಯೂ ಇಕ್ಕಂಡಿಯಾಪ.
- ಪೂವಿ : ಅಲ್ಲ ಪ್ಲಾಸ್ಪಿಕ್ಂಜ ಎಂತ ಆಪಾಂದ್ ನೀನ್ ಎಣ್ಣುವೊ?... ಅದ್ ಎಚ್ಚಕೋ ಕಾಲ ಮಣ್ಣಲ್ ಕರುವದೇ ಇಲ್ಲೆಲೊ. ಅದ್ ಬುಟ್ಟಕ ಮಿಂಞೆಂತ ತೊಂದರೆ ಉಳ್ಳೊ?
- ಮಾಚು : ಮಾಂದಲ ಪಟ್ಟಿಕ್ ಬಾ. ಗೊತ್ತಾಪಲ್ಲ? ಅಚ್ಚಕೊರ್ ಪಚ್ಚೆ ಪಚ್ಚಡತ್ ಎಲಂಗಿಯಂಡ್ ಉಳ್ಳನ್ನತ ಕುಂದ್ನ ಇಕ್ಕೊಮ್ಮ ನೋಟ್. ಎಲ್ಲಿ ನೋಟ್ನಕಲೂ ಪ್ಲಾಸ್ಪಿಕ್ ಬ್ಯಾಗ್. ಸುಮಾರ್ ನಾಲಂಜಿ ಗ್ರಾಮಕಾರ ಅತ್ತಳ ಕುಂದ್ಕ್ ಆಟುವ ಪದ್ಧತಿ ಇಕ್ಕಲೂ ಉಂಡ್. ಸುಮಾರೆಲ್ಲ ಅತ್ತ ಬಯ್ಯಕ್ ಬಪ್ಪದೇ ಇಲ್ಲೆ.
- ಪೂವಿ : ಎಂತಾಂಗ್ ಮಾಚು? ನರಿರ ಹಾವಳಿಯಾ?
- ಮಾಚು : ನರಿರ ಹಾವಳಿ ಅಲ್ಲ ಪೂವಿ. ಪ್ಲಾಸ್ಪಿಕ್ ಹಾವಳಿ!
- ಪೂವಿ : ಆರೆ, ಪ್ಲಾಸ್ಪಿಕ್ ಹಾವಳಿಂಜ ಅತ್ತ ಎಂತಾಂಗ್ ಬಯ್ಯಕ್ ಬಕ್ಕತೆ ಆಪೊ? ನೀನ್ ಎಂತ ಎಣ್ಣುಂಡುಳ್ಳಿಯಾಂದೇ ಅರ್ಥ ಆಯಂಡಿಲ್ಲೆ ನಾಕ್....
- ಮಾಚು : ಚಾಯಿಲ್ ಎಣ್ಣುವಿ ಕೇಳ್. ಅತ್ತ ಮೇಂಜಂಡ್ ಮೇಂಜಂಡ್ ಈ ಪ್ಲಾಸ್ಪಿಕ್ನೊ

ಬಾಯಿಕ್ ಇಟ್ಟವ. ಅದೊಲೆಂತೆಂಗಿ ತಿಂಡಿ ಗಿಂಡಿ ಕೊಂಡ ಬಂದಿತಿಪ್ಪ. ಆನಂಗುಂಡ್ ಬಾಯಿಕ್ ಚೋದಾಯಿತ್ ಕಾಟ್ಟುವ. ಅತ್ತ ಅದಾನ ಮುಗ್ಗಿರುವ. ಅದ್ ಒಳ್ಳೆಕ್ ಪೋಯಿತ್ ಅತ್ತಡ ಕರುಕ್ ಸುತ್ತಿಯವ. ಮೇಚಿ ಕರುಕುವಕ ಪ್ಲಾಸ್ಪಿಕ್ ಅಲ್ಲಿಯೇ ಬಾಕಿ ಆಪ. ಪಿಲ್ಲ್ ನೀರ್ ಬುಡುವಂಜಿ ನಾಲಂಜಿ ದಿನತ್‌ರೊಳ್‌ಲ್ ಅತ್ತ ಚತ್ತೇ ಪೋಪ.

ಪೂವಿ : ಉಯಿ ದೇವಳೇ. ಇದೋರ್ ವಿಷ್ಯ ಗೊತ್ತೇ ಇಂಜಿಲೆ. ಎಂತೋರ್ ಅನ್ಯಾಯಲ್ಲ ಮಾಚು!

ಮಾಚು : ಅತ್ತಡ ಕತೆ ಅನ್ನನೆ ಆಚೆಂಗಿ, ಪಕ್ಷಿಯಕೂ ಬಾಳ್ ಗತಿ ಇಲ್ಲೆ.....

ಪೂವಿ : ಪಕ್ಷಿಯಡ ಕತೆ ಎಂತ ಅಂದಕ?

ಪೂವಿ : ಪ್ರವಾಸಿಯ ಎಂತ ಮಾಡುವ? ಏದೇಂಗಿ ಜ್ಯೂಸ್ ಬಾಟ್ಟಿ ಕೊಂಡ ಬಂದಿತಿಪ್ಪ. ಅದ್ ಏದಪ್ಪಂಡ ಕಾಲತ್ ತಯಾರಾನದೋ, ಆ ಬಾಟ್ಟಿನ ಕಾಟ್ವಾನ ಕಾಟ್ವಾನಲ್ಲಿ ಕನ್‌ಚಿತ್ ಪೋಪ. ಪ್ರತಿಯೋರ್ ಜ್ಯೂಸ್ ಬಾಟ್ಟಿ ಕೂ ನಿರ್‌ಕ್ ಆಯಿತುಳ್ಳನ್ನತ ಅಖಿರಿ ತಾರೀಕೊಂದ್ ಇಪ್ಪ ಗೊತ್ತುಂಡಲ್ಲ ನೀಕ್?

ಪೂವಿ : ಅದ್ ಗೊತ್ತುಂಡ್ ಮಾಚು. ಅದ್‌ನುಂಡ್ ಪಕ್ಷಿಯಕ್ ಎನ್ನನೆ ತೊಂದರೆ ಆಪೋ?

ಮಾಚು : ಜ್ಯೂಸ್ ಬಾಯಿಕ್ ಚೋದಾಪಕ್ ಆಂಗ್ ಎಂತೆಂತೂ ಎಸೆನ್ಸ್, ಪುಡ್‌ಕಲರ್ ಅದ್ ಇದೋಂದ್ ಇಟ್ಟಿತಿಪ್ಪ. ಅದೆಲ್ಲ ಅಂಡ ಸಮಯ ಕೈಂಜದೂ ವಿಷ ಆಪ. ಪಕ್ಷಿಯಕ್ ಎಂತ ಗೊತ್ತಿಪ್ಪ? ಕಲರ್ ಕಲರಾಯಿತ್ ಕಾಂಬಕ ಸಂಸಾರ ಅಡ್‌ಕ ಅದಾನ ಪೀಂದವ. ಈ ಕೆಮಿಕಲ್ ತಡಿಕ್ ಕೂಡಿತಾಪಕ ಓರಂದೇ ಇಲ್ಲತ ಕಾಯಿಲಕ್ ಕೇವ. ಅಂದಿತೂ ಲಾಚಾರಾಯಿತ್ ಕಾಟ್ವಾನ ಕಾಟ್ವಾನಲ್ಲಿ ಬುದ್ಧಿತ್ ಚಾವ. ಮನುಷ್ಯಂಡ ತಡಿಕ್ ಚೆನ್ನ ತಡ್‌ತವ ಶಕ್ತಿ ಇಪ್ಪ. ಪಕ್ಷಿಯಕೆಲ್ಲಿ ಇಪ್ಪ?

ಪೂವಿ : ಗೇನ ಮಾಡುವಕ್ ಪೋಚೆಂಗಿ ಎಂತೆಂತೆಲ್ಲ ಅನ್ಯಾಯ ಮಾಡ್ಯಂಡುಂಡಲ್ಲ ಮಾಚು, ನಂಗ?

ಮಾಚು : ಮೊನಿಯಾಂದ್ ನಂಗ ಪೇಪರ್‌ಲ್ ಓದ್‌ಚಿ ನೋಟ್. ಪುಳಿಕಂಜಿ ಪೀಂದಿತ್ ಕಡಾರ್ ಆನ ಆನೆರ ಕತೆ?

ಪೂವಿ : (ತೆಳಿ) ಪಾಪ! ಅದ್ ಎಂತೆಂದ್ ಗೇನ ಮಾಡಿತ್ ಕುಡ್‌ಚತೋ? ಎಚ್ಚಕ್ ಒದ್ದಾಡ್‌ಚೋ?

ಸಕಮೆ ಫ್ರೊಮ್ಯಾಲೆ

- ಮಾಚು : ಕುಡ್‌ಚಿತಾನದೂ ಮಾದಯ್ಯ ಅಂಕ್ಲರನ್ನಕೆ ನಾನುಳ್ಳ ನೀನ್ ಬೊತ್ತತ್ತೇಂದ್ ಎಣ್ಣೆ ತಿಕ್ಕು.
- ಪೂವಿ : ಏದ್ ಮಾದಯ್ಯ ಅಂಕ್ಲ ಮಾಚು?
- ಮಾಚು : ನೀಡ ಕೂಟ್‌ಕಾರ್ತಿ ಉಂಡಲ್ಲ ರಾಣಿ? ಅವಡ ಮಾಂವೊ!... ಮಾದಯ್ಯ ಅಂಕ್ಲರ ತಡಿ ಚೆನ್ನ ಬಲ್ಬದಲ್ಲ? ಕೊಂಬ ಮೀಸೆ ಬೋರೆ. ನೋಟುವಕ ಎಂತವಂಗೂ ಪೋಡಿ ಆಂಡು ಅನ್ನನೆ ಉಂಡ್. ದಾರೋ ಒಬ್ಬ ಪಣ ವಸೂಲಾತಿ ಮಾಡುವಕಿಂಜತ್. ಸಾಲ ಕೊಡ್ತದ್ ಕ್ವಾಲ್‌ಲೇಂದ್ ಎಣ್ಣೆತ್, ಮಾದಯ್ಯ ಅಂಕ್ಲಕ್ ಚಾಯಿಲ್ ಕುಡ್‌ಪ್‌ಚಿಡುವಂಜಿ ಕೂಡೆ ಕೂಟಿಯ ಪೋಯಿತ್....
- ಪೂವಿ : ಈ ಮನುಷ್ಯ ಪೇಯಿ ಪರಿವಕ್ ಕೂಡ್‌ಚೆನ್ನೊ?
- ಮಾಚು : ಪೇಯಿ ಪರಿವದಿರಡ್, ಆ ಬಾಗಕ್ ಎತ್ತಣೆ ಕಡಾರ್!... ಬುದ್ ಪೋನಲ್ಲಿಂಚೇ ಒರೇ ಸಮ ಒದರುವಿಂಜತೊಲ್ಲೊ. "ನಾನುಳ್ಳ ರಾಜ. ನೀನ್ ಬೊತ್ತತ್ತೆ, ನಾನುಳ್ಳ ನೀನ್ ಬೊತ್ತತ್ತೇಂದ್! ನೆಲ ಕಡ್‌ಚಿಲ್ಲಿಯೇ ಎದೆಕ್ ಪೊಜ್ಜಂಡ್" ನಾನುಳ್ಳ ನೀನ್ ಬೊತ್ತತ್ತೆ! "(ತೆಳಿ)
- ಪೂವಿ : ಆನೆಯೂ ಅನ್ನನೇ ಪೇಯಿ ಪರ್‌ಂದಿತಿಕ್ಕು ಕೂಟ್‌ಕಾರಂಗಡ ಕೂಡೆ! (ತೆಳಿ).... ಅಲ್ಲ ಮಾಚೂ, ಅಕ್ಕಲೆ ನಾನ್ ಲಿಸ್ತ್ ಎಳೆದುವಕ ಪ್ಲಾಸ್ತಿಕ್‌ರ ಏದ್ ವಸ್ತುನೋ ಕೊಂಡ ಪೋಪಕಾಗಾಂದ್ ಅದ್‌ಂಗೇ ಎಣ್ಣುದಾ ಅಂದಕ?
- ಮಾಚು : ಅದ್‌ಂಗೇ ಪೂವಿ. ನಂಗ ಅರ್‌ಂಜಿತರ್‌ಂಜಿತೂ ಪ್ರಕೃತಿಕ್ ಎನ್ನಂಗ್ ದ್ರೋಹ ಕೆಯ್ಯಂಡು? ಕೊಡಗಲ್ ಬಾಳೆ ಎಲ್‌ಕಂಡಕ್ ಒಂದೂ ದರಿದ್ರ ಇಲ್ಲೆ. ಕೂಪದಿ ಅದ್‌ಲೇ ಕೆಟ್ಟಂಡಕ ಆಚಿ. ಬಾಕಿ ಉಳ್ಳಾನ ಪೇಪರ್‌ಲ್ ಸುತ್ತಿಯವಲು. ಪೇಪರ್ ತಿಂದಕ ಅತ್ತಕ್ ಒಂದೂ ಆಪುಲೆ. ಜೀರ್ಣ ಆಪ. ಜ್ಯೂಸ್ ಬಾಟ್ಟಿ, ನೀರ್ ಬಾಟ್ಟಿ ಕುಂದ್‌ರ ಕೊಡಿಕ್ ಕೊಂಡ ಪೋನಕಲೂ ವಾಪಾಸ್ ಕೊಂಡ ಬರೊಂಡು.
- ಪೂವಿ : ಎಚ್ಚೆಕ್ಲ ವಿಷ್ಯ ಗೇನ ಮಾಡುವಕ್ ಉಂಡಲ್ಲ ನಂಗ? ಪಾಪ! ಆ ಪ್ಲಾಸ್ತಿಕ್ ಮುಗ್ಗನ ಅತ್ತ, ಉಳಿಕೆ ಜ್ಯೂಸ್‌ನ ಕುಡ್‌ಚೆನ್ನೆತ ಪಕ್ಷಿಯ ಎದೆಲ್ಲ ಗೋಳ್ ಬುದ್ಧಿತ್ ಚೆತ್ತತೊ? ಗೇನ ಮಾಡ್‌ಚೆಂಗಿ ಕಣ್ಣಲ್ ನೀರ್ ಬಪ್ಪ. ಅಯಿಂಡ ಶಾಪ ಮನುಷ್ಯಂಗ್ ಪಡತಿಕ್ಕುವಾ ಮಾಚು?
- ಮಾಚು : ಪಡತಿಪ್ಪ ಪೂವಿ? ನಂಕ್ ಬದುವಕ್ ದೇವ ಎಲ್ಲಾ ಸೌಕರ್ಯತ್‌ನೊ ಭೂಮಿಲ್ ತಂದಿತ್. ಕೂಟ್‌ಕ್ ಬುದ್ಧಿ ಶಕ್ತಿನೊ ತಂದಿತ್. ಎಂತ

ಮಾಡ್ ಚೆಂಗಿ ಎಂತಾಕೂಂದ್ ಎಣ್ಣುವನ್ನತ ತಿಳುವಳಿಕೆನೊ ತಂದಿತ್.
ಅಂದಿತೂ ಅಂವೊ ಮಾಡುವೊ ನೋಟ್?

ಪೂವಿ : ಎಚ್ಚಕೇ ಕಾನೂನ್ ಕಾಯಿದೆ ಮಾಡ್ ನಕಲೂ ಎನ್ನ ಪ್ರಯೋಜನ ಮಾಚು?
ಅವಂಡ ಮನಸಾರೊಳ್ ಕೆಯ್ಯುವದ್ ಮಾತ್ರ ದ್ರೋಹ ಒಂದೇ!

ಮಾಚು : ನಾಕ್ ತೋಂದುವೊ ಎಂತ ಗೊತ್ತುಂಡಾ? ಪ್ಲಾಸ್ಟಿಕ್ ನುಂಡ್ ಏದೇದ್
ತೊಂದರೆ ಉಂಡ್? ಬೋರೆ ಬೋರೆ ಕೆಮಿಕಲ್ಸ್ ನುಂಡ್ ಎಂತೆಲ್ಲ ತೊಂದರೆ
ಉಂಡ್. ಇದ್ ನೆಲ್ಲ ಸ್ಕೂಲ್ ಮಟ್ಟತೇ ಮಕ್ಕಕ್ ಅರಿವಿಕೆ ಕೊಡ್ ಪನ್ನಕೆ
ಆಂಡು. ಅಂದಕ ಮಾತ್ರ ಚೆನ್ನ ಎಚ್ಚರ ಬಕ್ಕುವೊ ಎನ್ನೊ?

ಪೂವಿ : ಸ್ಕೂಲ್ ಕಾಲೇಜ್ ಮಾತ್ರ ಅಲ್ಲ ಮಾಚು. ನಂಗ ಅಪ್ಪವ್ವನೂ ಮಕ್ಕಕ್
ಅರಿವಿಕೆ ಕೊಡ್ತಂಡಿಕ್ಕೊಂಡು. ಆ ಪ್ರಾಣಿ ಪಕ್ಷಿಯಕೂ ಭೂಮಿಲ್
ನಂಗಡಚ್ಚಕೇ ಬದುಕುವಕ್ ಹಕ್ಕುಂಡ್ ಎಣ್ಣುವಾನ ಎಲ್ಲಾಕೂ ಅರಿವಿಕೆ
ಮಾಡಿಕೊಡ್ತೊಂಡು. ಎಂತೆಂಗಿ ಅನ್ಯಾಯ ಆಪಕ ನಂಗಲ್ಲ ಕೂಡಿತ್ ಸ್ಟ್ರೈಕ್
ಮಾಡುವ. ನ್ಯಾಯ ಪಡ್ಂದವ. ಆ ಬಾಯಿ ಬಕ್ಕತ ಮೂಕ ಪ್ರಾಣಿಯ
ಎಂತ ಮಾಡೊಂಡು ಎಣ್ಣೆ?

ಮಾಚು : ನೇರೇ ಒರ್ ಕುಸಿರ ವಿಷ್ಯ ಎಂತ ಗೊತ್ತುಂಡ್? ಮಡಿಕೇರಿ ಪೇಟೆಲ್ ಇಕ್ಕ
ಪ್ಲಾಸ್ಟಿಕ್ ಬಳಕೆನ ಇಲ್ಲತೆ ಮಾಡಿತೊಲೊ. ಎಲ್ಲಾಕೂ ಅದೇ ಬುದ್ಧಿನ ದೇವ
ಕೊಡ್ತಕ ಎಚ್ಚಕೊ ನಲ್ಲದಾಕು.

ಪೂವಿ : ಮಾಚು, ತಕ್ಕನ ಕುಂದ್ ಪತ್ ಚಿಡುವಾತ್ ಎನ್ನೆಂಗಿ ಕಾಂಪಿಟಿಷನ್
ಇಂಜಿತಿಂಜಕ ನೀಕೇ ಫಸ್ಟ್ ಪ್ರೆಜ್ ಬಪ್ಪಿಂಜತ್. ಎಂತಾಂಗಣ್ಣೆ?

ಮಾಚು : ಅರೆ, ನೀಕೆಂತಾಂಚಿ ಪೂವಿ? ಎಂತೋ ತಕ್ಕ ಪರಂದಂಡಿಂಜವ ಇಂಇಂತೋ
ತಕ್ಕ ಸುರು ಮಾಡಿಟ್ಟಿ?

ಪೂವಿ : ಅದ್ ನೇ ನಾನೂ ನಿನ್ನ ಕೇಟಿಂಡುಳ್ಳ ಮಾಚು. ಬೋಜಿ ಅಣ್ಣಯ್ಯಂಡ ವಿಷಯ
ಪರಂದಂಡಿಂಜಂವೊ ವಿಷಯ ಬುಟ್ಟಿತ್ ಏಲೇಲೆ ಸುತ್ತಿ ಬಂದ್ ಟಿಯ
ನೋಟ್. ಹರಿಕತೆ ಮಾಡುವಂವೊ ಉಪಕತೆ ಎಣ್ಣುಂಡ್, ಎಣ್ಣುಂಡ್ ಮೂಲ
ಕತೆನೊ ಮರಂದ್ರತೊಲೊ ಅನ್ನನೆ ಆಚಿ ನೀಡ ಕತೆ.

ಮಾಚು : ಸೆರಿಯಪ್ಪ. ಹರಿಕತೆನ ಎಲ್ಲಿಕ್ ನಿಪ್ಪಾಚಿಟ್ಟಿತಿಂಜ ಅಕ್ಕಲೆ?

ಪೂವಿ : ಅಚ್ಚಕ್ ಬೆರಿಯ ಅದೂ ಮರಂದ್ ಪೋಚಾ ಮಾಚು? ಅದೆಂತೋರ್
ಮರಪು ನೀಡಾಂದ್? ಕಾಡ್ ರೊಳ್ ಲುಳ್ಳ ಬೋಜಿ ಅಣ್ಣಯ್ಯಂಡ ಮನೆರ
ಸುತ್ತ ಇರ್ಲ್ ಪುಳುವ ಜೀ, ಜೀಂದ್ ಸದ್ ಮಾಡ್ಯಂಡಿಂಜ ನೇರತ್ ಕಳ್ಳ

ಮೆಲ್ಲೆ ಪೊರಟ್ಟತೊಲೊ....

ಮಾಚು : ಸೆರಿ ಸೆರಿ. ಇಕ್ಕ ಗೇನ ಬಾತ್. ಮನೆರ ನಾಯಿಕ್ ಕೂಡಿ ಗೊತ್ತಾಕತನ್ನಕೆ ಮೆಲ್ಲೆ ಬಾತ್...

ಪೂವಿ : ನಾಯಿಕ್ಕೂ ಗೊತ್ತಾಕತನ್ನಕೆ ಎನ್ನನೆ ಬಪ್ಪೊ ಮಾಚು?

ಮಾಚು : ಆ ಮನೆಕಾರಕ್ ನೀಡ ಕೆಣ ಗೊತ್ತುಂಡೆಂಗೆನ್ನೆ? ಇಲ್ಲ್ ನಾಯಿರ ಕೆಲ ಬಿರಿವನ್ನಕೆ ಕೂಳ್ ಇಟ್ಟಿತಿಕ್ಕು. ಇಯಂಗಡ ಗೂಕೆಕೇ ಕಮಿ ಕೊಡ್ತಂಡ್ ನಾಯಿ ವರೀತಿಕ್ಕು...

ಪೂವಿ : ನೀನ್ ಎಂತಾನ ಎಣ್ಣುವಕಲ್ಲೂ, ಏದೇಂಗಿ ಒರ್ ವಿಷಯತ್ ನನ್ನ ದೂರತಿಂಜಕ ನೀಕ್ ಸಮಾಧಾನೇ ಇಲ್ಲೆಲ್ಲ ಮಾಚು?

ಮಾಚು : ಅದ್ ಪಿಂಞ ಚರ್ಚೆಕ್ ಎಡ್ತವನ. ಇಕ್ಕ ಕತೆ ಕೇಳ್. ಶೆಖೇಂದ್ ಮನೆರ ಕಿಟಕಿನ ತೊರ್ಂದಿತ್ ಬೆಚ್ಚಿತಿಂಜತೊಲೊ. ಗೂಕೆರ ಸದ್ಡ್ ಸೆರಿ ಆಯಿತ್ ಕಳ್ಳ ಇರ್ಂಬುರ ರಾಡ್ನ ಅರತ್ ಕಟ್ಪ್ ಮಾಡಿತ್.

ಪೂವಿ : ಅದೆನ್ನನೆ ಮಾಚು? ಗೂಕೆರ ಸದ್ಡ್ ಸೆರಿ ಆಯಿತ್ ರಾಡ್ ಕಟ್ಪ್ ಮಾಡುವೊ. ಅದ್ ಅಚ್ಚಕ್ ಸುಲ್ಭ ಪಣಿಯಾ?

ಮಾಚು : ಎನ್ನನೆ ಮಾಡ್ಚೀಂದ್ ಜೈಲೆಲುಳ್ಳ ಅಂವನೇ ಕೇಟಿತ್ ಬಪ್ಪಿ ಎಕ್ಕೇಂಗಿ. ಇಕ್ಕ ಎಣ್ಣುವಾನ ಕೇಳ್ ನೀನ್. ಮೆಲ್ಲೆ ಮಂಡೆನ ಒಳ್ಳೆಕಟ್ಟಿತ್. ಅಕ್ಕಣೆ ಎಂತಾಚೀ... ಪೊರ್ಮೆ ಬರಿಂಜ ಇಂವೊ ಪತ್ತನ ಒರ್ ದದ್ಡ್ ಸ್ಕೂಲ್ ಅಡಿಕ್ ಬುದ್ ಪೋಯಿತ್...

ಪೂವಿ : (ತೆಳಿ) ಓ ಮಂಡೆ ಮನೆರ ಒಳ್ಳೆಲ್ -ತಡಿ ಪೊರ್ಮೆಯಾ ಅಂದಕ?

ಮಾಚಿ : (ತೆಳಿ) ಅನ್ನನೇ ಆಯೆ! ಕೊರಿಕತೇಂದ್ ಎಣ್ಣೆಯೆ ಇದ್ಂಗೇ ನಾನಾ! ಕಪ್ಪಕ್ ಬಂದವಂಗ್ ಅಚ್ಚಕ್ ಬುದ್ ಬೋಂಡ? ಕೊರಿಯಡನ್ನಕೆ ಕಳ್ಚಕ?...

ಪೂವಿ : ಅಲ್ಲಿಂಜೆಂತಾಚಿ ಅದ್ನೆಣ್ಣ್ ಮಾಚು....

ಮಾಚು : ಎಂತಾಪೋ ಅವಂಡ ಬಾಯಿಂಜ ಓರ್ ಬಲ್ಯ ಕೂತ್ "ಅಯ್ಯೋಯೋ ಚತ್ತನೋಂದ್!"

ಪೂವಿ : ಪಾಪ! ಚತ್ತೋಪಿಂಜತಲ್ಲಪ್ಪ? ಅಲ್ಲಿಂಜ?

ಮಾಚು : ಅಕ್ಕಣೆ ಎಲ್ಲಾಡೊ ಗೂಕೆಯೂ ನಿಂದ್ ಪೋಯಿತ್, ಬಂತ್ ನೋಟುವ, ಅಸಾಮಿರ ಕಣ್ಣ್ ಪೊರ್ಮೆ ಬಪ್ಪಕಾಯಿತ್. ಗೋಡೆರ ಪೊರ್ಮೆ ಬರಿಲ್ ಕೈಕಾಲ್ ವದರಿಯಂಡ್ ಅವಂಡ ತಡಿ ಉಂಡ್!... ವರ್ಕ್ ಮಸ್ತಲ್ ಇಯಂಗಕ್ ಇದೆಂತೋರ್ ಕತೇಂದ್ ಮಂಡೆಕ್ ಪೋಯಿತ್ಲೆ.... ಒಬ್ಬೊ

ಚೀಪೆ ಪುಡಿ ತೇಡುವೊಲೊ.... ಇಂಇಸೊಬ್ಬೊ ಟಾರ್ಚ್ ತೇಡುವೊಲೊ... ಕರೆಂಟ್ ಬೋರೆ ಇಂಜಿಲೆಲೊ!.... ಅಕ್ಕಣೆ ಕಿಟಕೆಲ್ ಕೆಣ್ಂಜಂಡ ಅಸಾಮಿ "ದಮ್ಮಯ್ಯ ಒಮ್ಮ ನನ್ನ ಬುಡ್ತಿ. ಅದೆಲ್ಲ ಬಯ್ಯಂಜ ತೇಡೊಲೊಂದ್" ದಮ್ಮಯ್ಯ ಇಟ್ಟಿತೊಲೊ. ಅವಂಡ ಪಾಡ್ ನೋಟುವಕಯ್ಯತೆ ಕಿಟಕೆರ ರಾಡ್ನ ಇಂಇಚ್ಚಕ್ ಬಗ್ಗ್ಚಿಡುವಂಜಿ ಅವಂಡ ಮಂಡೆನ ಪೊರ್ಮೆ ಉಂದ್ಚೊಲೊ. ಅಸಾಮಿ ಧಡಾರ್ಂದ್ ಅಡಿಕ್ ಬುದ್ದಿತ್! (ತೆಳಿ)

- ಪೂವಿ : (ತೆಳಿ) ಉಯಿ ರಾಮಾ! ನಲ್ಲ ಸಿನಿಮಾ ಕತೆರನ್ನೆಕೆ ಉಂಡಲ್ಲ ಮಾಚು ಇದ್?
- ಮಾಚು : ಅಖೀರಿಕ್ ಇವನ ಪುಡ್ಚಿತ್ ಪೊಲೀಸಕ್ ಒಪ್ಪ್ಚಿಟ್ಟಿತ್. ಕತೆ ಆಯೆ ಎಂತೆಂದೆಣ್ಣಕ ಮತ್ಯವಂಡ ಪೊಟ್ಟೆ ಚೆನ್ನ ಬಲ್ಯದ್. ಅವಂಡ ಕಳ್ಳ ಗುರು ಅವಂಗ್ "ಮಂಡೆ ಒಳ್ಳಕ್ ನುಗ್ಗುವನ್ನೆಕೆ ಜಾಗ ಮಾಡ್ಯಂಡಕ ಮದಿ. ತಡಿಯೂ ಆ ಜಾಗಕಾಲೆ ಒಳ್ಳಕ್ ಕಡ್ಪಾಂದ್" ಪೊಟ್ಟೆ ಉಪ್ಪು ಮೂಟೆ ಆನಾನುಂಡ್ ತಡಿರ ಭಾರಕ್ ಸ್ಕೂಲ್ ಪೊಟ್ಟಿ ಪೋಚಾ? ಅಸಾಮಿ ಕಿಟಕೆಲ್ ಕೆಣ್ಂಜಂಡತ್!
- ಪೂವಿ : ಶೆಖೇಂದ್ ಕಿಟಕೆ ತೊರಂದಿತ್ ಬೆಚ್ಚಂಡ್ ಧೈರ್ಯತಿಪ್ಪದೂ ಕಷ್ಟಾದಾಚಿಲ್ಲ ಅಂದಕ? ಎಂತೆಲ್ಲ ನಡಪಕುಂಡೋ ಲೋಕತ್?
- ಮಾಚು : ಲೋಕತ್ ಎಂತೆಂಗಿ ನಡಕಡ್. ಆಂಡ ಬಾಯಿಕಿಚ್ಚಕ್ ಪೊಡಿ ಮಣ್ಣ್ ಬೂವಡ್. ಇಕ್ಕ ಬೈಟೆಕುಳ್ಳ ಏರ್ಪಾಡ್ ಎನ್ನೋ?
- ಪೂವಿ : ಕೈಕೂ ಬಾಯಿಕೂ ಉಳ್ಳದ್ ರೆಡಿ ಉಂಡ್ ಮಾಚು. ಅದತೂ ಏದೇಂಗಿ ಕೊರವು ತೇಡತೆ. ನೀನ್ ಕೈಕಾಲೆ ಕತ್ತಿಯಂಡ್ ಬಪ್ಪದೇ ಬಾಕಿ ಉಳ್ಳ. ಮಕ್ಕಕ್ ಟಿ.ವಿ. ಆಫ್ ಮಾಡಿತ್ ಬಪ್ಪಕೆಣ್ಣ್.
- ಮಾಚು : ಗೋಡೆಕೂ ಕಿಮಿ ಇಕ್ಕೊಂದ್ ಓರಬ ಎಣ್ಣುವದುಂಡಲ್ಲ? ಅಚ್ಚಕೆನ್ನಂಗ್? ಕಿಟಕೆಲ್ ಮಂಡೆಯೂ ಇಕ್ಕು! (ತೆಳಿ).. ಬಾರಿ ಮಕ್ಕಳೆ, ಉಂಗನ....

ಬೆತ್ತಲೆ ಪುರ್ಕ

- ಪೂವಿ : ಮಾಚೂ, ಉಳ್ಳಿಯಾ ಮನೆಲ್?
- ಮಾಚು : ಓಹೋ ಪೂವಮ್ಮಕ್ಕ! ಚಾಯಿಲುಳ್ಳಿರಾ? ಮನೆಲೆಲ್ಲಾ ಚಾಯಿಲುಂಡಾ?
- ಪೂವಿ : ಎಂತಾಚಿ ಮಾಚು ನೀಕ್?
- ಮಾಚು : ಆಪದೆಂತ? ತಾಮನೆ ಕೂಡಿಟಕ ಬಾಮನೆ ಗೇನೇ ಇಪ್ಪುಲೆ ಈ ಪೊಂಗಕ್! ಅಲ್ಲಿಂಜ ಮನೆಕ್ ಬಂದಂಡ್ "ಉಳ್ಳಿಯಾ ಮನೆಲ್!"
- ಪೂವಿ : ಎಂತ ಮಾಡುವೊ ಮಾಚು? ವಾರಂಡೆಕೊಮ್ಮೆಂಗಿ ಮೂಡಿ ಮಕ್ಕ ತಾಮನೆಕ್ ಪೋಯಿತ್ ಗುರು ಕಾರೊಣನ ತೊತ್ತಂಡ್ ಬಕ್ಕಂಡ್?... ತಮಾಷಿ ಇವಂಗ್!
- ಮಾಚು : ಆಚಪ್ಪ. ನಿಂಕ್ ಓರಾಂಡೆಕೊಮ್ಮೆ ಪೋಪಕ್ ತಾಮನೆಂಗಿ ಉಂಡ್. ಈ ಆಣಾಳಡದೇ ಪಾಪಿ ಜನ್ಮ!
- ಪೂವಿ : (ತೆಳಿ) ಎಂತಾಚಿ ಮಾಚು ಅಂತದ್?
- ಮಾಚು : ತೆಳಿ ಬೋರೆ ಕೇಡ್!..... ಕೇಪೊ ನೋಟವ! ಓರಾಂಡೆಕೊಮ್ಮೆ ಆರಾಮ್‌ಲ್ ಪೋಪಂಜಿ ಪುರ್ಕ ಕೇತಿತ್, ತುಳ್ಳಿ ಕಳ್ಳಚೆಂಡ್ ಬಪ್ಪಿರ. ನಂಗ ಆಣಾಳ ಎಂತ ಮಾಡೊಂಡು?
- ಪೂವಿ : ಎಣ್ಣಕ? ನೀಕೂ ತಾಮನೆಕ್ ಪೋಪ ಆಸೆಯ ಮಾಚು? (ತೆಳಿ)
- ಮಾಚು : ಅದ್‌ಂಗೂ ಯೋಗ ಬೋಂಡುವಲ್ಲ? ಚಾಣ ಎಡ್‌ಪೊ, ಅಡಿಗೆ ಮಾಡುವೊ ನಾಡ ಮಂಡಲ್ ಎಳ್ಳಿತಿಂಜಕ ಅದ್‌ನ ತಪ್ಪುಚಿಡುವವು ದಾರ್?
- ಪೂವಿ : ಪಾಪ! ಮಾಚುಕ್ ತಾಮನೆ ಇಂಞೋರ್ ಜನ್ಮಕ್ಕೆಂಗಿ ಕ್ಕೆಟ್ಟಡಪ್ಪಾ ದೇವಳೇ!(ತೆಳಿ)
- ಮಾಚು : ತಾಮನೆಕ್ ಆಳೀಟಕ ಮದಿ. ವಡಿಯಂಗಡ ಗೇನ ಕೂಡಿ ಇಪ್ಪುಲೆ ಈ ಪೊಂಗಕ್!
- ಪೂವಿ : ಎಂತಾಂಗ್ ವಡಿಯಂಗಳ ಗೇನ ಮಾಡಂಡಿಯೆ ಮಾಚು? ಬೀವಮಾನ ಇಡೀ ಕೂಡೇ ಇಪ್ಪುಲಿಯೆ?
- ಮಾಚು : ಅಂದಿತೂ, "ಮನೆಲ್ ಒಬ್ಬನೇ ಬುಟ್ಟಿತ್ ಬಂದಿತುಳ್ಳ. ಉಂಡತಾ-ಕುಡ್‌ಚ ತಾಂದ್ ಒರ್ ತಕ್ಕಾ ಬೊಂಡ್?.. ಪೋನೆಂಗಿ ಮಾಡಂಡ್?
- ಪೂವಿ : ಅರೆ, ವಡಿಯ ಎನ್ನ ಚೆರಿಯ ಕುಂಞಿಯಾ? ಉಂಬ ನೇರಕ್ ಉಂಬ. ಕುಡಿಪ್ಪ ನೇರಕ್ ಕುಡಿಪ್ಪ. ಅದ್‌ನ ಎಂತ ಗೇನ ಬಪ್ಪುಚಿಡುವಕ್ ಉಳ್ಳ?
- ಮಾಚು : ಅಂದಿತೂ ಚೆನ್ನೆಂಗೇಂಗಿ ಕನಿಕರ ಉಂಡಾ ನೋಟವಕ್? ಇಲ್ಲಿ ಕಾಂಬ? ಕೈಲ್

ತೋಲ್ ಜಾರಿ ಪೋಯೆ?

ಪೂವಿ : ಉಯಿ ರಾಮಾ? ಎಂತ ಮಾಡಿಯಂಡಿಯ ಮಾಚೂ? ಸಕತ್ ನೊಂಬಲ ಆಯಿತ್ ಕಾಂಬಲ್ಲ? ಬಂದನ್ನಕೆ ಎಂತಾಂಗ್ ಎಣ್ಣತದ್ ನೀನ್?

ಮಾಚು : ಆಪದಾಯಿತ್. ಬಂದನ್ನಕೆ ಎಣ್ಣೆತಿಂಜಕ ಮಾತ್ರ ನೀನ್ ಎಂತ ಮಾಡುವಕುಳ್ಳ? ನೀಕ್ ಕರ್ಕರೆ ಉಂಡೆಗೆನ್ನೆ?

ಪೂವಿ : ನಾಕೆನ್ನ ಅಚ್ಚಕ್ ಕರ್ಕರೆ ಇಲ್ಲೆಂದ್ ಗೇನ ಮಾಡಿತುಳ್ಳಿಯಾ? phone ಸೆರಿ ಇಲ್ಲತಾಂಗ್ ನಾನೆನ್ನ ಮಾಡುವಕಾಪ? ಮೊನಿಯಾಂದ್ ತೆಡ್‌ಬಡ್‌ಚೆಲ್ಲಿಂಜ phone ಚತ್ತೇ ಪೋಯಿತ್. ಮೊಬೈಲ್ ರೇಂಜ್ ಕ್‌ಟ್ಟುಲೆ. ಎಂತ ಮಾಡೊಂಡು ಎಣ್ಣೆ?

ಮಾಚು : ಪೂರ್ಮ್ ದಾಡೇಂಗಿರಲ್ಲಿ ಬಂತ ಪೋನ್ ಮಾಡೊಲಿಂಜತ್. ವಡಿಯಂಡ ಗೇನ ಉಂಡೆಗೆನ್ನೆ?

ಪೂವಿ : ಮದಿ ಮಾಚು ನೀಡ. ನನ್ನ ಕಣ್ಣಲ್ ಚೋರೆ ಇಲ್ಲತವಾಂದ್ ಗೇನ ಮಾಡತೆ. ಶಂಭು ಇಂಞೂ ದಂಡ್ ದಿನ ಇರ್ಂದ್ ನನ್ನ ಎಚ್ಚಕ್ ಜುಲೈ ಮಾಡ್‌ಚಿ ಗೊತ್ತುಂಡ್? ಪಾಪ ಮಾಚು ಒಬ್ಬನೇ ಮನೆಲುಳ್ಳ ಕೈ ಬಾಯಿ ಚುಟ್ಟುಂಡ್ ಪೊರಟಿತ್ ಬಂದವ.

ಮಾಚು : ಅಯ್ಯೋ ಪಾಪ! ನೀನ್ ಎಣ್ಣಾನ ನಂಬಿರೊಂಡು. ಸತ್ಯ ಹರಿಶ್ಚಂದ್ರನೂ ನೀನೂ ಕ್ಲಾಸ್ ಮೇಟ್ಸ್ ನೋಟ್!

ಪೂವಿ : (ತೆಳಿ) ಅಕ್ಕು ಮಾಚು. ಸತ್ಯ ಹರಿಶ್ಚಂದ್ರ ಎದಿಕ್ಕೆ ಬೆಂಚಿಲ್ ಅಳಾಪಿಂಜತ್. ನಾನ್ ದಂಡನೇ ಬೆಂಚಿಲ್! ಅಚ್ಚಿಕೇ ವ್ಯತ್ಯಾಸ!... ಪಾಪ ಇಕ್ಕ ಎಂತ ಮಾಡ್ಯಂಡುಂಡೊ! (ತೆಳಿ)

ಮಾಚು : ತೆಳಿ ನೋಟವಡ! ಅದೋಂದಾಂಗೇ ಲಾಯಕ್ಕು!

ಪೂವಿ : ನೀನೂ ಚೆನ್ನ ತೆಳಿ ಮಾಚು! ಗುಮ್ಮಂಡನ್ನಕೆ ಮೂಡ್‌ನ ಉಪ್ಪ್ ಮಾಡ್ಯಂಡ್ ಅಳಾಕತೆ. ತೆಳಿಪ್ಪದ್ ತಡಿಕೂ ನಲ್ಲದೊಲೊ!

ಮಾಚು : ಓಹೋ ಉಪದೇಶ ಬೋರೆ! ಫುಲ್ ಚಾರ್ಜ್ ಆಯಿತ್ ಬಂದಿತುಳ್ಳಿಯ ತಾಮನೆಂಜ!

ಪೂವಿ : ಅಲ್ಲ ಮಾಚು, ನೀನ್ ತೆಳಿಪ್ಪಕ್ ನಾನ್ ಎಂತ ಮಾಡೊಂಡು ಎಣ್ಣೆ ಇಕ್ಕ?

ಮಾಚು : ಇದಾ! ಈ ಟೇಬಲ್‌ರ ಕೊಡಿಲ್ ಪತ್ತಿತ್ ನಿಂದಂಡ್ ಒರ್ ಡ್ಯಾನ್ಸ್ ಮಾಡಿರ್!

ಪೂವಿ : ಮಾಚೂ! ನೀಡ ಚೊಡಿನ ಬುಡವ್ವ ಮದಿ!

ಮಾಚು : ತೆಳಿಪ್ಪ ಪೂಣ್ಣೋನೋ ಮೊರಡುವ ಆಣ್‌ನೊ ನಂಬುವಕಾಗೊಲೊ ಗೊತ್ತುಂಡ

ನೀಕ್?

ಪೂವಿ : ಇಕ್ಕ ಗೂತ್ತಾಚಿ ಮಾಚು. ನೀನ್ ಇಚ್ಚಕ್ ನೇರ ಎಂತಾಂಗ್ ತೆಳಿಕ್ಕತೇಂದ್? ತೆಳಿಕ್ಕಂಡ ಅಂದಕ. ಮೊರಡೊಲುವಲ್ಲ? ಅದಿರಡ್, ಎಂತೆಲ್ಲ ಮಾಡಿಯ ಈ ದಂಡ್ ದಿನತ್?

ಮಾಚು : ನಾಡ ಕತೆ ಇಕ್ಕಡ್ ನೀಡ ಕತೆ ಎಣ್ಣ್ ಮಿಂಞ!

ಪೂವಿ : ಸದ್ಯ! ಮಿಡಿಯಂ ರೇಂಜ್‌ಕ್ ಬಂದಿಯಲ್ಲ? ಅಚ್ಚಕ್ ಮದಿ.. ಓರಬ್ಬಡ ಕತೆನ ಕೇಟಕ!....

ಮಾಚು : ಎಂತ ಕತೆ? ತೆಳಿಪ್ಪನ್ನತದಾ? ಮೊರಡುವನ್ನತದಾ?

ಪೂವಿ : ದಂಡೂ ಊಂಡ್. ನೀಕ್ ಏದ್ ಬೋಂಡು ಎಣ್ಣ್, ಎಣ್ಣುವಕ್ ನಾನ್ ರೆಡಿ!

ಮಾಚು : ಓ ಹೊಟೇಲ್ ಡ್ಯೂಟಿ ಕಾಂಬ! ಬಳಂಬುವಕ್ ರೆಡಿ!

ಪೂವಿ : ಅಕ್ಕು ಮಾಚು. ಉಂಬಕ್ ನೀನ್ ರೆಡಿ ಇಂಜಕ ನಾಕೆಂತ ಕಷ್ಟ? ಬಳಂಬುವಕ್ ರೆಡಿ!

ಮಾಚು : ಏದೋ ಒರ್ ಹೋಟೆಲ್‌ಲ್ ಮಜ್ಜಾಣವೂ ಅದೇ ಕರಿಯೊಲೊ. ಬೈಟೆಕೂ ಅದೇ ಕರಿಯೊಲೊ! ಪೆದ ಮಾತ್ರ ಬೋರೋ ಬೋರೆ! (ತೆಳಿ)

ಪೂವಿ : ಅದೆನ್ನನೆ ಮಾಚು? ಪೆದ ಬೋರೆ ಬೋರೆ ಎಣ್ಣಕ?

ಮಾಚು : ಮಜ್ಜಾಣ ಹೋಟೆಲ್‌ಕ್ ಬಂದವು ಸಾಂಬಾರೇನಪ್ಪಾಂದ್ ಕೇಟಕ ಅಲೂಗಡೆ-ಈರುಳ್ಳಿ" ಸಾರ್‌ಂದ್ ಎಣ್ಣಕ, ಬೈಟ್ ಉಂಬಕ್ ಬಂದವು ಕೇಪಕ, ಈಲುಗಡ್ಡೆ-ಆರುಳ್ಳಿ ಸಾರ್‌ಂದ್ ಆನ್ನರಲೊ! (ತೆಳಿ)

ಪೂವಿ : ಪಾಪ! ಅವಂಡ ಗ್ರಾಚಾರ ಪಾಳಾನಂವೊ ಅಲ್ಲಿಕ್ ಉಂಬಕ್ ಪೋಪದಾಯಿತಿಕ್ಕು!

ಮಾಚು : ಕತೆ ಅಚ್ಚಿಕೇ ಅಲ್ಲ. ಬೈಟೆತರ ಕೂಳ್ ಮಿಕ್ಕಚೇಂದ್ ಬೆಚ್ಚ. ಪಿತ್ಯಾಂದ್ ಆ ಹೋಟೆಲ್‌ಲ್ ಮೊಸರನ್ನ ಗ್ಯಾರಂಟಿ!... ಇಲ್ಲೆಂಗಿ ಚಿತ್ರಾನ್ನ!

ಪೂವಿ : ಅಂದೆಂತೊ ಎಣ್ಣಂಡಿಂಜಿಯ? ಮಸಾಲೆ ವಡೆ, ಉದ್ದಿನ ವಡೆನ ಎಂತೋ ಮಾಡುವಾಂದ್!

ಮಾಚು : ಮಸಾಲೆ ವಡೆ, ಉದ್ದಿನ ವಡೆ, ಅಲೂಗಡ್ಡೆ ಬೋಂಡ ಇದೆಲ್ಲಾನೊ ಮಿಕ್ಕಿಲ್ ಟರ್,.... ಮಾಡಿತ್, ಓರಿಚ್ಚಕ್ ಈರುಳ್ಳಿ, ಕಡ್ಲೆಪೊಡಿ ಮಿಕ್ಸ್ ಮಾಡುವಂಜಿ... ಎದ್ದಾ ಬಿಸಿಬಿಸಿ ಪಕೋಡಾ ರೆಡಿ!... ಕ್ಯೂಲ್ ನಿಂದಂಡ್ ಕೇತುವ! ಒಳಗಿನ ಕತೆ ಶಿವನೇ ಬಲ್ಲ! (ತೆಳಿ)

ಪೂವಿ : ನೀಕ್ ಇದೆಲ್ಲ ಎನ್ನನೆ ಗೂತ್ ಮಾಚು? ನೀನ್ ಎಲ್ಲಿಯೇಂಗಿ ಹೋಟೆಲ್‌ಲ್ ಇಂಜಿಯಾಂದ್? (ತೆಳಿ)

- ಮಾಚು : ಅಂಗೆನ್ನಂಗ್ ಹೊಟೇಲ್‌ಲ್ ಇಕ್ಕಂಡಿಯೆ? ಅದೆಲ್ಲ ತನ್ನಾಲೆ ಗೊತ್ತಾಪ... ಅದಿಕ್ಕಡ್, ಅದೆಂತದೋ ಕತೆಂದೆಣ್ಣೆಯಲ್ಲ? ಅದಾನ ಎಣ್ಣೆ ಕೇಕನ.
- ಪೂವಿ : ಅದೋರ್ ಬಲ್ಲಾದೆ ಕತೆ ಮಾಚು. ಬೆತ್ತಲೆ ಪುರ್ಕಂಡ ಧಾರಾವಾಹಿ... ಅದಾನ ಎಚ್ಚಕ್ ಎಪಿಸೋಡ್‌ಲ್ ಎಣ್ಣೊಂಡೂಂದೇ ಗೊತ್ತಾಯಂಡಿಲ್ಲೆ! (ತೆಳ)
- ಮಾಚು : ಬೆತ್ತಲೆ ಪುರ್ಕ? ಅನ್ನನಣ್ಣಕ?
- ಪೂವಿ : ಈs.... ಅಚ್ಚಕೂ ಗೊತ್ತಾಪುಲಿಯ ಮಾಚು? ಬೆತ್ತಲೆ ಪುರ್ಕಂದೆಣ್ಣಕ ಮೇಲ್‌ಲ್ ಬಟ್ಟೆ ಎಲ್ಲತಂವೋಂದ್!
- ಮಾಚು : ಅದ್ ನಾಕೂ ಗೊತ್ತಾಚಿ. ಕತೆ ಎಂತೆಂದ್ ಗೊತ್ತಾಂಡುವಲ್ಲ? .
- ಪೂವಿ : ಎಣ್ಣುವಿ ಕೇಳ್. ಕಲರ್‌ಲ್ ಎಣ್ಣಡಾ ಬ್ಲಾಕ್ ಅಂಡ್ ವೈಟ್‌ಲ್ ಮದಿಯಾ?
- ಮಾಚು : ಓಹೋ ಅದತೂ ಆಫರ್ ಬೋರೆ ಉಂಡಾ? ಅಕ್ಕನ ಮಂಗಲ ಕೈಚಂಡಕ ತಂಗೆ ಫ್ರೀಂದ್ ದಾರೋ ತಮಾಷಿ ಮಾಡುವಿಂಜತ್. ಅನ್ನನೆ!
- ಪೂವಿ : ಅದೋರ್ ಕತೆನ ಗೇನ ಮಾಡ್‌ಚಿಂಗಿ ನೇರಾಯಿತೂ ಈ ಭೂಮಿಲ್ ಇನ್ನತವು ಕೂಡಿ ಉಂಡಾಂದ್ ಅಶ್ಚರ್ಯ ಆಪ ಮಾಚು.
- ಮಾಚು : ಅರೆ, ಅದೆಂತ ಕತೆ ಅಂದಕ?
- ಪೂವಿ : ಸುರುಲ್ ಅದನೇ ಎಣ್ಣೆರುವಿ ಅಂದಕ. ನೀಕ್ ಗೊತ್ತುಂಡ ಅದ್ ಅಂದಕ?
- ಮಾಚು : ನಾಕೆನ್ನ ಗೊತ್ತ್? ನಾನೆಂತದೊ ಲೋಕಾರೂಡಿ ಪರ್ಂದ ಕತೆಂದೆಣ್ಣವ ನೀನ್. ನೀನ್ ಎಣ್ಣೊಂಡುವಪ್ಪ.
- ಪೂವಿ : ಸರೂ ಮೂಡಿನ ನೀಕ್ ಗೊತ್ತುಂಡಲ್ಲ ಮಾಚೂ? ಆ ಮೂಡಿರ ಗೋಳ್‌ರ ಕತೆ ಇದ್. ಅಕ್ಕಂಡ ಬಾಳ್‌ಲ್ ತಂಗೆಯೇ ಮುಳ್ಳಾಯಿಟಕ ಎನ್ನನೆ ಆಕು ಗೇನ ಮಾಡ್!
- ಮಾಚು : ನೀನ್ ಪೂರ್ತಿ ಎಣ್ಣ ಪಿಂಞ ಅಳ್‌ತಂಡ್ ಗೇನ ಮಾಡಂಗ. ಇಕ್ಕ ಸುರೂಂಜೇ ಎಣ್ಣೆ. ಬೋಂಡೆಂಗಿ ಇಂಟರ್‌ವಲ್ ಆನ ಪಿಂಞ ಗೇನ ಮಾಡನ.
- ಪೂವಿ : ಕೇಳ್ ಅಂದಕ ಸೆನ್ನಾರ್ ಸೆರ್ಟಿಫಿಕೇಟ್, ಸೈಡ್ ರೀಲ್ ಒಂದಾನೊ ಇಡತೆ ಡೈರೆಕ್ಟ್ ಸ್ಟ್ರೀನ್ ಪ್ಲೇ ಸುರು ಮಾಡುವಿ.
- ಮಾಚು : ಎಡೆಲ್ ಕರೆಂಟ್ ಕೈ ಕೊಡ್ಕಿಂಜಕ ಮದಿ. (ತೆಳ)
- ಪೂವಿ : ಜನರೇಟರ್ ಉಂಡಲ್ಲ ಮಾಚು? ಆನ್ ಮಾಡಿಟಕ ಆಚಿ. ನೀನ್ ಎಡೆಲ್ ಬಾಯಿ ಇಟ್ಟಕ ನಾಡ ಕತೆ ತಮಿಳ್ಳಾಡ್‌ಂಜ ಆಂಧ್ರಕತ್ತಟ ಪೋಯಿರುವ.
- ಮಾಚು : ಕರ್ನಾಟಕತೇ ಬೋಂಡಿಯಚ್ಚಕ್ ಮೂಲೆ ಮುಡ್ಕ ಇಪ್ಪಕ ನೀಕೆನ್ನಂಗ್ ತಮಿಳ್ಳಾಡ್ ಆಂಧ್ರ? ನೇರೇ ಸುರು ಮಾಡ್. ಕೇಕನ.

ಷಕಮೆ ಪೊಮ್ಮಾಲೆ

- ಪೂವಿ : ಸರೂ ಮೂಡಿ ವಡಿಯಂಡ ಕೂಡೆ ಚಾಯಿಲ್ ಜೀವಮಾನ ಕೈಚಂಡ್ ಇಂಜತ್.
- ಮಾಚು : ಅಯಿಂಗ ಬೆಂಗ್ಕೂರ್ಲಲ್ಲ ಉಳ್ಳೆ?
- ಪೂವಿ : ಬೆಂಗಳೂರ್ಲಲ್ ಇಂಜಿಯೆ. ಇಕ್ಕ ಸರೂ, ಮಕ್ಕಳೂ ಮಾತ್ರ ಉಳ್ಳೆ ಬೆಂಗ್ಕೂರ್ಲಲ್!
- ಮಾಚು : ಅವಡ ವಡಿಯ ಪುಣ್ಯಾತ್ಮೆ?
- ಪೂವಿ : ಆ ವಡಿಯ ಪುಣ್ಯಾತ್ಮೆಂಡ ಕತೆನೇ ಇಕ್ಕ ನೀಕ್ ಎಣ್ಣುಂಡುಳ್ಳೆ!
- ಮಾಚು : ನೀನ್ ಎಣ್ಣುವದ್ ನೋಟುವಕ ಸರೂಕೂ, ರಾಜಂಗೂ ಸೆರಿ ಇಲ್ಲೆ. ಅಂವೊ ಬೋರೆ ಇವ ಬೋರೇಂದ್ ಕಂಡಂಡುಂಡಲ್ಲ?
- ಪೂವಿ : ಅಕ್ಕು ಮಾಚು. ಇಕ್ಕಿಕ್ಕ ಫಾರೀನ್ ಸಂಸ್ಕೃತಿ ನಂಗಡ ಸಂಸ್ಕೃತಿನ ಕೊಂದಂಡುಂಡ್.
- ಮಾಚು : ಎಂತ ಇದ್ ನೀಡ ತಕ್ಕೂರ್ ಅರ್ಥ?
- ಪೂವಿ : ನೀನ್ ಎಣ್ಣುವಕ್ ಬುಟ್ಟಿಕ್ಕಲ್ಲ ನಾನ್ ಎಣ್ಣುವೊ?
- ಮಾಚು : ಎಣ್ಣುಪ್ಪ. ನಾನೆನ್ನ ನೀಡ ಬಾಯಿನ ಪೊತ್ತಿಯಂಡುಳ್ಳನಾ? ಎಣ್ಣುವದೆನ್ನೆ?
- ಪೂವಿ : ಗೀತ ಮಾಡಿಕ್ ಅದೇದೋ ಒರ್ ಸಾಪ್ಲಾವೇರ್ ಕಂಪೆನಿಲ್ ಚಾಕ್ರಿಕ್ ಇಂಟರ್ವ್ಯೂ ಬಾತ್. ಅದತ್ ಸೆಲೆಕ್ಟೂ ಆಚಿ. ರಾಜ ಎಂತೂ ಮಾಮೂಲ್ ಅದೇ ಬಟ್ಟೆಕಾಲೆ ಡ್ಯೂಟಿಕ್ ಪೊಪೋ. ಮನೆ ಅಕ್ಕಂಡದೇ ಇಪ್ಪಕ ಬೋರೆ ಮನೆ ಎನ್ನಂಗ್ಂದ್ ಗೀತಂಗ್ ಬೋರೆ ಏರ್ಪಾಡ್ ಮಾಡ್ಲೆ. ಪೊಲಾಕ ದಂಡಾಳೂ ಕೂಪದಿ ಎದ್ದುಂಡ್ ರಾಜಂಡ ಗಾಡಿಲ್ ಪೋಪಿಂಜತ್. ಗೀತನ ಅವಡ ಕಂಪೆನಿರಲ್ಲಿ ಉಳ್ಳಾಪಿತ್ ಅಂವೊ ಅವಂಡ ಕಾರ್ಬಾರ್ಕ್ ಪೋಪಿಂಜತ್.... ಅಖೀರಿಕ್ ಕತೆ ಎಂತಾಚಿ?... ತಿತ್ತೆನೊ ಬೊಣ್ಣೊನೆಯಿನೊ ಒಂದ್ ಕೂಟ್ನಕ ಎಂತಾಪ ಎಣ್ಣು? ಅನ್ನನೆ ಆಚಿ.
- ಮಾಚು : ಇದೆಂತ ಪೂವಿ ಎಡೆಲ್? ಈಗ ಜಾಹೀರಾತು. ನಂತರ ಪ್ರದೇಶ ಸಮಾಚಾರ ಮುಂದುವರಿಯುವುದು ಎಣ್ಣುಟ?
- ಪೂವಿ : ಇಕ್ಕ ಅಂಡದೇ ಯುಗ ಮಾಚು. ಸಂಜು ಕ್ಕೊಣ್ಣ ಅಂದೊಮ್ಮೆ ಎಣ್ಣುದ್ ಗೇನಾಪ ನೀಕ್? "ನಾಕ್ ಅಂದ್ ಟಿ.ವಿಲ್ ಕಾಟ್ಚೆಲ್ಲ ಅದೇ ಚಡ್ಡಿ ಅಂಡುಂಡ್!"
- ಮಾಚು : ಚಡ್ಡಿಂಜ ಪುಡ್ಚಕ ಪ್ರತಿಯೊಂದೂ ಅನ್ನನೆ ಆಯಿಪೋಯಿತ್ ಎನ್ನೆ ಮಾಡಂಗ? ಕಾಲ ಬಂದನ್ನೆಕೆ ಕೋಲ ಕೆಟ್ಟಿಯಂಡ್ ಪೋಪೊ.... ಎಣ್ಣು ಪೂವಿ...
- ಪೂವಿ : Advertisement ಆಚಿ. ಇಕ್ಕ ಪುನಾದ್ಯ ಸ್ಪೋರಿಕೇ ಬಂದಂಡುಳ್ಳೆ. ಸುರು

ಸುರುಲ್ ಸರೂ ಮೂಡಿಕ್ ವಿಷ್ಯ ಗೊತ್ತಾಯಿತ್ಲೆ. ಅದಲ್ಲತೆ ತಂಗರೆ ಮೀದಾಡ್, ವಡಿಯಂಡ ಮೀದಾಡ್ ಅವ ಸಂಶಯ ಪಟ್ಟಿತೂ ಇಂಜಿಲೆ....

ಮಾಚು : ಎಂತ ಎಣ್ಣುವೊ ನೀನ್? ರಾಜಂಗೂ ಗೀತಂಗೂ ಸಮ್ಮಂದ ಅಡ್ಕುವನ್ನಕೆ ಕಾಂಬ?

ಪೂವಿ : ನಾನೆನ್ನಂಗ್ ಅಯಿಂಕ್ ಸಮ್ಮಂದ ಅಡ್ಕಡ್? ಅಯಿಂಗಳೇ ಸಮ್ಮಂದ ಅಡ್ಕಂಡಿತ್. "ಅಕ್ಕಂಡ ಕೂಡೆ ತಂಗೆನೊ ಸಮ್ಮಂದ ಕೊಡ್ಪಿರಾ" ಎಣ್ಣುವನ್ನಕೆ! ಸರೂಕ್ ಮಕ್ಕಳ ಸ್ಕೂಲ್ ಅಯೆಪೊ, ವಡಿಯಂಗೂ -ತಂಗಿಕೂ ಕೊಪೊದಿ ಕೆಟ್ಟಿತ್ ಕೊಡ್ಪೊ, ಅಡಿಗಿ ಮಾಡುವೊ ಇದೇ ಆಯಿರ್ತ್. ಒಮ್ಮೆ ಅವಡ ಪ್ರೆಂಡ್ ಮನೆಕ್ ಬಂದವ "ವೊನ್ನೆ ನೀನ್ಯಾಕೆ ಫಿಲಂಗೆ ಬರ್ಪಿಲ್ಲಾ? ಹುಷಾರಿಲ್ಪಾಂದ್" ಕೇಟಿತೊಲೊ!.... "ಏದ್ ಫಿಲಂ"ದ್ ಇವ ಕೇಟಿತ್. ಅಕ್ಕ ಅವ ಎಣ್ಣಿತ್. ಎಲ್ಲಾ ಕೇಟಿತಾಪಕ ಸರೂರ ಎದೆ ಒಡ್ಂದನ್ನಕೆ ಆಯಿರ್ತೊಲೊ!

ಮಾಚು : ಓ ಅವು ದಂಡಾಳೇ ಇವಳ ಬುಟ್ಟಿತ್ ಫಿಲಂಕ್ ಪೋನದಾ? ಅದ್ಲೆಂತ ಬಲ್ಯ ವಿಷ್ಯ ಉಳ್ಳ? ಪೋಪಕ್ ಆಗಾಂದ್ ಉಂಡಾ?

ಪೂವಿ : ಪೋಪಕ್ ಆಗಾಂದಿಲ್ಲೆ ಮಾಚು. ಆಚೆಂಗಿ ಆ ವಿಷ್ಯತೆನ ಸುರುರ ಕೂಡೆ ಒಳ್ಪೆಚಿಟ್ಟಿತ್ ಬೆಪ್ಪಕಾಗಲ್ಲ? ಅವಳ ಬೋರೇಂದ್ ಗೇನ ಮಾಡ್ನನ್ನಕೆ ಆಪುಲಿಯಾ? ನೀನೇ ಎಣ್ಣ್? ಇಕ್ಕ ನೀನೇ ... ಆನದ್ ಪೋನದ್ ಪ್ರತಿಯೊಂದಾನೊ ನಾಡ ಕೂಡೆ ಎಣ್ಣುವಿಯ. ಅನ್ನನೆ ಎಣ್ಣೆತಿಂಜಕ ಆಪಿಂಜಿಲಿಯಾ?

ಮಾಚು : ಎಲ್ಲಾ ವಡಿಯಂಗಳೂ ಪೋಣ್ಣಾಳಳೂ ಒರೇ ತರ ಇಪ್ಪಾ ಪೂವಿ?

ಪೂವಿ : ಇನ್ನನೆ ಒಮ್ಮೆ ಇಮ್ಮೆ ಅಲ್ಲ. ಸುಮಾರ್ ಕುರಿ ಮಾಡಿತ್. ಬೋರೆ ಬೋರೆ ಜನ ಸರುರ ಕೂಡೆ ಇದ್ನ ಎಣ್ಣುವಕ್ ಕೂಡಿತ್. ಅಕ್ಕನ ಅವ್ವಂಡ ಸಮಾನ, ಬಾವನ ಅಪ್ಪಂಡ ಸಮಾನಾಂದ್ ಗೇನ ಮಾಡೊಂಡೊಂದ್ ಪೆರಿಯವು ಎಣ್ಣೆಕೊಡ್ಪ. ಅದ್ ಬುಟ್ಟಿತ್ ಬಾವನ ವಡಿಯಂಡ ಸಮಾನಾಂದ್ ಗೇನ ಮಾಡುವಕಾಗಲ್ಲ?

ಮಾಚು : ಅದ್ ಸೆರಿ, ಈ ಮನುಷ್ಯನೂ ಪೋಣ್ಣಾರ ತಂಗೆ ಮೋವಡನ್ನಕೇಂದ್ ಗೇನ ಮಾಡೊಂಡಿಂಜತಲ್ಲ?

ಪೂವಿ : ದಂಡಾಂಗಡೆ ಕಾರಳೂ ಗೇನ ಮಾಡೊಂಡಿಜತ್. ಆಚೆಂಗಿ ಅದಾಯಿಲೆ. "ನಾನ್ ಆಣ್, ನೂರ್ ಕಳಿ ಕಳಿಪ್ಪಿ ನೀನ್ ದಾರ್ ನನ್ನ ಕೇಪಕ್ಂದ್ ರಾಜ ಪೋಣ್ಣಾಕ್

ಏಂಗಿತ್. ಅವಂಡ ಕತೆ ಅನ್ನನೆ ಆಚೆಂಗಿ, ಇವಳೆಂಗಿ ಮುಂಡತಿಪ್ಪದೆನ್ನೆ? ಇವಡದೂ ಅವಂಡ ಕೊಟ್ವಾಕ್ ತಾಳ!.... ತಡ್ತವಚ್ಚಕ್ ತಡ್ತಂಡತ್ ಮಾಚೂ, ಸರೂ ಮೂಡಿ. ಅಲ್ಲಿಂಜ ಸಹಿಸಿಯವಕ್ ಕಯ್ಯತೆ ಆಪಂಜಿ ಕತೆ ಡೈವರ್ಸ್ಕೆತ್ತನೆ ಎತ್ತಿತ್.

ಮಾಚು : ಅಲ್ಲಾ, ರಾಜಂಡ ಅಪ್ಪವ್ವ, ಸರೂರ ಅಪ್ಪವ್ವ ಮದ್ಯಸ್ಥಿಕೆ ಮಾಡಿತ್ ಇಯಂಗಳ ಏದೇಂಗಿ ಬಟ್ಟೆಕ್ ಕೊಂಡ ಬಕ್ಕೊಲಿಂಜತಲ್ಲ?

ಪೂವಿ : ಈಂಡ ಎಡಲೇ ಇಂಇಶೋರ್ ಕತೆ ನಡ್ಂದಿತ್. ಗೀತನ ಏದೋ ಒರ್ ದೇವಸ್ಥಾನಕ್ ಕೂಟಿಯ ಪೋಪಂಜಿ ದೇವಡೆದಿಕ್ಕೆ ಮಾಲೆ ಇಟ್ಟುಂಡ್ ಮಂಗಲ ಕೈಚಂಡತೂಲೊ ರಾಜ. ಈ ವಿಷ್ಯ ಎಕ್ ಸರೂಕ್ ಗೊತಾಚೋ ಅವ ಬಾವ ಆಸನೇ ಕಳ್ಂದಂಡಿತ್.... ಮದ್ದ್ ಕುಡಿಪ್ಪಕೂ ಗೇನ ಮಾಡಿತಿಂಜತೂಲೊ.

ಮಾಚು : ಚತ್ತಕ ಇಂಇಶೂ ಚಾಯಾಚಲ್ಲ? ಇಂಜಂಡ್ ಗೆದ್ದಿತ್ ಕಾಚೊಂಡು.

ಪೂವಿ : ದಂಡ್ ಮಕ್ಕ ಉಂಡಲ್ಲ ಮಾಚು? ಚತ್ತಾಟಕ ಆ ಮಕ್ಕಡ ಪಾಡ್? ಸರು ಮೂಡಿ ಧೈರ್ಯ ಎಡ್ತಂಡದೇ ಆಂಗಾಯಿತ್ಲೊ.

ಮಾಚು : ಅಲ್ಲಿಂಜ ಎಂತಾಚಿ ಕತೆ?

ಪೂವಿ : ಕತೆ ಎಂತಾಪೊ? ಪ್ರೀತಿಯೇ ಬೋರೆ ಆಕರ್ಷಣೆಯೇ ಬೊರೆ. ಓರಬ್ಬಕ್ ಈಂಡ ನಡುಲುಳ್ಳ ವ್ಯತ್ಯಾಸ ಎಂತೇಂದೇ ಅರ್ಚಿತಿಪ್ಪುಲೆ. ಪ್ರೀತಿ ಬೋರೀ ತಡಿನ ಮಾತ್ರ ಇಷ್ಟ ಪಡುವದಲ್ಲ. ಮನಸ್ನೋ ಇಷ್ಟ ಪಟ್ಟಿತಿಪ್ಪ. ಆಚೆಂಗಿ ಆಕರ್ಷಣೆ ಅನ್ನನೆ ಅಲ್ಲ. ತಡಿರ ಬೋಜ ಕುಂದ್ಚೀಂದಾಪಕ ಅದ್ ತನ್ನಾಲೆ ಕಮ್ಮಿ ಆಯಂಡ್ ಪೋಪ.

ಮಾಚು : ನೀನ್ ಥಿಯರಿ ಎಣ್ಣತೆ. ಕತೆ ಎಂತಾಚೀಂದ್ ಎಣ್ಣೆ.

ಪೂವಿ : ಕತೆಲ್ ಥಿಯರಿ- ಪ್ರಾಕ್ಟಿಕಲ್ಂದ್ ಎಂತ ಉಳ್ಳ ಮಾಚು? ಕತೆ ಕತೆಯೇ! ಅನ್ನನೆ ನೋಟುವದಾಚೆಂಗಿ ಇದ್ ನಡ್ಂದ ಕತೆ.

ಮಾಚು : ಸೆರಿ ಮಾರಾಯತಿ. ಅದ್ಂಗೂ ಒರ್ ಅಖೀರೀಂದ್ ಇಪ್ಪಲ್ಲ? ಅದ್ನ ಎಣ್ಣತೆ ಮುಂಡತೇಂಗಿ ಕ್ರಿಟಿಸಿಸ್ ಮಾಡಿಯಂಡುಂಡೆಂಗಿ?

ಪೂವಿ : ನೀಡ ಬಲ್ಯ ಕಷ್ಟಾಚಲ್ಲ ಮಾಚು? ಒರ್ ವಿಷ್ಯ ಎಣ್ಣುವಕ ಬೋರೀ ಆಂಡ ಥೀಮ್ನ ಮಾತ್ರ ಎಣ್ಣುವಕಾಪ ಮಾಚು? ಅದ್ಂಡ ಸಾಧಕ ಬಾಧಕ ನಂಗಡ ದೃಷ್ಟಿಲ್ ಎನ್ನನೇಂದೂ ಪರಿಯಂಡ?

ಮಾಚು : ಆಚಪ್ಪ, ನೀನ್ ಬಲ್ಯೋರ್ ಸಮಾಜ ಶಾಸ್ತ್ರಕಾರ್ತಿ. ಅಯಿಂಡ ಕತೆರ ಬಗಲ್ ಓರ್ ಡಿಸಿಶನ್ ಎಡ್ತ ಅಂದಕ! (ತೆಳ) ಎಲ್ಲಾ ನೀನೇ ತೀರ್ಮಾನ ಮಾಡಿತ್

ತೀರ್ಪು ಕೊಡ್!

ಪೂವಿ : ಡಿಸಿಶನ್ ನಾನೆನ್ನಂಗ್ ಎಡ್‌ಕಡ್ ಮಾಚು? ವಿಷ್ಯ ಆಖೀರಿಕ್ ಎಂತಾಚಿಂತ್ ಎಣ್ಣೆರುವಿ ಕೇಳ್. ನೀನ್ ಎಡೆ ಎಡೆಲ್ ಕೊರೀಸ್ ಇಡತೆ.

ಮಾಚು : ಸದ್ಯ! ಮೂಂದ್ ದಿನಕ್ ಎಣ್ಣೆತ್ ತೋಪಿಯಾಂದ್ ಗೇನ ಮಾಡಿತಿಂಜ. ಇಂದೇ ತೋಂದ್ ಪೋಪಾ? (ತಳಿ)

ಪೂವಿ : ಆದ್ ನೀನ್! ಎಂತೆಂಗಿ ಒಂದಾನ ಎಣ್ಣೆರುವಂಜಿ, ನನ್ನ ಕೈವಚ್ಚಕ್ ಸತಾಯಿಚಿಟ್ಟಿತ್ ಮಕ್ಕಕ್ ಮಿಠಾಯಿ ಕಾಟುವನ್ನಕೆ ಕಾಟ್ಯಂಡ್ ನನ್ನ ಗೋಳ್ ಬೂಕುವಂವೊ!

ಮಾಚು : ಅಲ್ಲ ಪೂವಿ, ನಿಂಗಡ ಮಹಿಳಾ ಸಮಾಜತ್‌ರ ಮೀಟಿಂಗ್ ಎಕ್ಕ್?

ಪೂವಿ : ಅದೆಂತಾಂಗ್ ಮಾಚು ನೀಕಿಕ್ ಗೇನ ಬಂದ್‌ಚ್ಚೆ? ಎಕ್ಕಲೂ ಇಲ್ಲತದ್ ...

ಮಾಚು : ಎಂತಾಂಗ್ ಗೊತ್ತುಂಡಾ? ಅಂದ್ ಒನ್ನಾಂದ್ ಆಲೆ ಬಂದ. ಎನ್ನಂಗೋ ನಾಡ ಕೆಮಿ ಬೋಂಡ ಬೋಂಡಾಂದೆಣ್ಣಕಲೂ ಅತ್ತಟಿಯೇ ಪೋಚಿ. ಓರ್ ಬರಿಂಜ ಒಬ್ಬ ತಾಂಡ ವಡಿಯನ ದೂರ್‌ನಕ, ಇಂಇೋರ್ ಬರಿಂಜ ಇಂಇೋಬ್ಬ ತಾಂಡ ವಡಿಯನ ಕೊಂಡಾಡುವಿಂಜತ್. ಆಖೀರಿಕ್ ಒರ್ ತೀರ್ಮಾನ ಎನ್ನನೇಂದೆಣ್ಣಕ 'ಈ ವಡಿಯಂಗಳ ಏದ್ ಕಾಲಕೂ ನಂಬುವಕಾಗ' ಎಣ್ಣುವನ್ನತದ್! (ತಳಿ)

ಪೂವಿ : ಅಲ್ಲೆಂಗೂ ಅನ್ನನೇ ಆಚಲ್ಲ ಮಾಚು, ಸರುರ ವಿಷ್ಯತ್! ವಡಿಯನೇ ದೇವಾಂದ್ ನಂಬನವಕ್ ಅಂವೊ ಸೆರಿಕ್ ಬತ್ತಿ ಬೆಚ್ಚಿರ್‌ತಲ್ಲ. ಆಚಿಂಗಿ ಅದ್‌ಂಗೂ ಒರ್ ಅಂತ್ಯ ಇಂಜತ್ ನೋಟ್.

ಮಾಚು : ನಾಕೂ ಅದೇ ಬೋಂಡಿಯೆ. ಆ ಕತೆರ ಕ್ಲೆಮ್ಯಾಕ್ಸ್ ಎಂತಾಚಿಂತ್! ಬೆರಿಯ ಎಣ್ಣೆ!

ಪೂವಿ : ಎಣ್ಣುವಿ ಕೇಳ್. ಈಂಡೆಡೆಲ್ ಗೀತನ ಕೂಟಿಯಂಡ್ ರಾಜ ಬೋರೆ ಮನೆಲ್ ಇಪ್ಪಕ್ ಕೂಡಿತ್. ಈ ಮನೆ ಸರುರ ಪೆದತೇ ಇಂಜಾನುಂಡ್ ಬಚಾವು. ಸರು ಏದೋ ಬ್ಯೂಟಿ ಪಾರ್ಲರ್‌ಕ್ ಕೂಡಿಯಂಡ್ ಮಕ್ಕಳನೊ ಸ್ಕೂಲ್‌ಕ್ ಅಯಿಚೆಂಡ್ ಜೀವನ ಮಾಡ್ಯಂಡಿಂಜತ್. ಇಚ್ಚಕಾಪಕ ಅಲ್ಲಿ ಎಂತಾಚಿ....

ಮಾಚು : ಡೆಂಡೆಣೇ... ಎಂತಾಚಿಂದೆಣ್ಣಕ... ಒನ್ನಾಂದ್.

ಪೂವಿ : ಧೂ, ಮುಂಡತ್ತಿರ್ ಮಾಚು. ನಾನ್ ವಿಷ್ಯತ್‌ನ ಎಣ್ಣೆತ್ ತೋತೆರುವಿ. ಅಲ್ಲಿಂಜ ನೀಡ ಕೋಡ ಕಳಿ.

ಮಾಚು : ಅಯ್ಯೋ ಪಾಪ! ಪೂವಿಕ್ ಕೋಡಂಡ ಕೂಡೆ ಸಂಸಾರ ಆಯೋಚಿ ! (ತಳಿ)

ಪೆಚೆಮೆ ಪೊಮ್ಮಾಲೆ

- ಪೂವಿ : ಕೋಡನೋ ಕುರ್ಕನೋ.... ವಡಿಯ ವಡಿಯನೇ ಅಕ್ಕುವಲ್ಲ? ಎಂತ ಮಾಡುವಕಾಪ ಮಾಚು? ಬಾಲ್ ಆಟಿಯಂಡ್ ಜೀವನ ಮಾಡುವೊ! (ತೆಳಿ)
- ಮಾಚು : ನೀನಿಕ್ಕ ವಿಷ್ಯ ಎಂತಾಚೀಂದ್ ಎಣ್ಣ್ ಮಿಂಞಾ. ಕಾಲ ಕೈಕತೆ.
- ಪೂವಿ : ಇಚ್ಚಕಾಪಕ ವಿಧಿ ಲೀಲೆ ಬೋರೆಯೇ ಇಂಜಿತ್ ಮಾಚು. ಗೀತನ ಕಂಪೆನಿಕಾರ ಫಾರೀನ್ ಟೂರ್ಕ್ ಅಯಿಚಿತ್. ಅಲ್ಲಿ ಅದೇದೊ ಒರ್ ಕಂಪೆನಿಲ್ ಚಾಕ್ರಿಲುಳ್ಳ ಓರ್ ಕ್ಣ್ಣ ಪ್ರಪೋಸ್ ಮಾಡಿತ್. ಅಲ್ಲಿಕ್ ಗೀತ ಮೂಡಿ ರಾಜಂಗ್ ಟಾಟಾ ಎಣ್ಣೆತ್. ಇವಂಡ ಸ್ಥಿತಿ.. ಅಡಿಯೂ ಇಲ್ಲೆ- ಆಕಾಶವೂ ಇಲ್ಲೆ.
- ಮಾಚು : ಎಣ್ಣೆಕೆ? ಪುನಾದ್ಯ ಹಳೆ ಹೆಂಡತಿಯೇ ಗತೀಂದ್ ಸರುರ ಪಕ್ಕ ಬಾತಾ?
- ಪೂವಿ : ಮೊನಿಯಾಂದ್ ಎಕ್ಕಲೊ ಬಂತ "ನಾಡ ಸರ್ವ ತಪ್ಪಾಚಿ. ನನ್ನ ಮಾಪು ಮಾಡಿರ್ಂದ್" ಎಣ್ಣೆತೊಲೊ. ಆಚೆಂಗಿ ಸರು ಇಕ್ಕ ಪುನಾದ್ಯ ಇವನ ಮನೆರೊಳ್ ಕೆ ಬುಟ್ಟವದಾ ಬೋಂಡಾವಾಂದ್ ಮಿಂಞಾ ಬಯ್ಯ ಗೇನ ಮಾಡ್ಯಂಡುಂಡೊಲೊ.
- ಮಾಚು : ಓ.. ಅಂದಕ ಕತೆ ಇಲ್ಲಿಕೇ ತೇಂದ್ ಪೋಚಾ? ಸರು ಎಂತ ಡಿಸಿಶನ್ ಎಡ್ತಂಡತ್. ಎನ್ನ್ ಮಾಡ್ಚೀಂದ್ ಗೊತ್ತಾಯಿಲಿಯಾ? ಪುಲ್ ಸೆಸ್ಟೆನ್ಸ್‌ಲ್ ಬೆಚ್ಚಿರ್ತಲ್ಲ?
- ಪೂವಿ : ಅದ್ ಇಂಞಾ ಗೊತ್ತಾಂಡು ಮಾಚು. ಮೊನಿಯಾಂದ್ ಅವ ಕಾರೋಣಂಗ್ ಮೀದಿ ಬೆಪ್ಪಕ್ ಬಂದಲ್ಲಿ ಎಣ್ಣೆ ಕತೆ ಇದ್. ಇಂಞಾಚೋರ್ ಕತೆ ನಲ್ಲ ರಸ ಉಳ್ಳದ್ (ತೆಳಿ)
- ಮಾಚು : ಅದೆಂತದೋ ಬೆತ್ತಲೆ ಪುರ್ಕಂದ್ ಎಣ್ಣೆಯಲ್ಲ ಅದಾ? (ತೆಳಿ)
- ಪೂವಿ : ಅದೇ! ಮೊನಿಯಾಂದ್ ನಂಗ ನಾಲಂಜಾಳ್ ಬೇಲ್ ಬಾಣೆಕಾಲೆ ತಿರಿಯಂಡ್ ಪೋಚಿ. ಪಂಡ್ ನೀನೂ ನಾನೂ ಕಾಯಿ ಕಟ್ಟಿತ್ ಕೊಯ್ಯುವಿಂಜತ್ ನೋಟ್ ಆ ಕಾಯಿ ಮರ, ಅಲ್ಲಿಕೆತ್ತುವಕ ಒರ್ ಬೆತ್ತಲೆ ಪುರ್ಕ ಒರ್ ಜಿಗ್ಗೊರೊಳ್ಂಜ ಓಡ್ನನ್ನೆಕೆ ಕಂಡತ್.
- ಮಾಚು : ಬೆತ್ತಲೆಂದೆಣ್ಣೆಕ ಮೇಲ್ಲ್ ಚೆನ್ನಂಗೂ ಬಟ್ಟೆಯೆ ಇಂಜಿಲಿಯಾ?
- ಪೂವಿ : ಒರ್ ಚೆಡ್ಡಿ ಮಾತ್ರ ಇಂಜತ್ ಮಾಚು. ಕಣ್ಣ್ ಇರಾಟ್ ಅಪ ನೇರ. ನಂಗಲೂ ಇದೆಂತದಪ್ಪಾಂದ್ ಬೇರ ಪಡಣೆ ಅವೊ ಕಾಂಗತೆ ಆಯಿರ್ತಾ! ಪಿತ್ಯಾಂದ್ ಪೊಲಾಕಲ್ಲ ಗೊತ್ತ್ ಕತೆ! (ತೆಳಿ)
- ಮಾಚು : ಅದೆಂತ ಕತೆ? ಬೆತ್ತಲೆ ಪುರ್ಕಂದ್?

ಪೂವಿ : ಈ ಪ್ರಣ್ಯಾತ್ಮ ಮಾಂದಲಪಟ್ಟಿಕ್ ಟೂರ್ ಬಂದಂವೊ. ಬಟ್ಟೆಲ್ ಒರ್ ಜಾಗತ್ ಪೊಳೆ ಕಂಡತಾ? ಬಾಕಿ ಉಳ್ಳವು ಒರ್ ಬರಿಲಾಚಿ ಇಂವೊ ಒರ್ ಬರಿಲಾಚಿ. ಇವಂಗ್ ನೀರ್ ಕಂಡಲ್ಲಿ ಕುಳಿಪ್ಪ ಪೂದಿ. ಶರ್ಟ್ ಪ್ಯಾಂಟ್‌ನ ಪೊಳೆಕರೆಲ್ ಉತ್ತಿ ಬೆಪ್ಪಂಜಿ ಕುಳೆಚಂಡೇ ಆಯಿರ್‌ತ್. ಬಾಕಿ ಉಳ್ಳವು ಅಯಿಂಡ ಪಾಡ್‌ಕ್ ಮಾಂದಲಪಟ್ಟಿಕ್ ಪೋಯಿತ್. ಕುಳೆಚಿತ್ ಬಂತ ನೋಟುವಾ.... ಒರ್ ಎಮ್ಮೆ ಇವಂಡ ಪ್ಯಾಂಟ್‌ನ ತಿಂದಂಡುಂಡ್. ಶರ್ಟ್‌ನ ಸುರೂಲೇ ತಿಂದಿತಾಯಿತ್!(ತೆಳಿ)

ಮಾಚು : (ತೆಳಿ) ಪಾಪ! ಇಂವೊ ಬೆತ್ತಲೆ ಪುರ್ಕನಾಯಿರ್‌ತಾ?

ಪೂವಿ : ಅಲ್ಲಿ ದಾಡ ಕೂಡೆ ಬಟ್ಟೆ ಕೇಪೊ? ಜೋಬುಲಿಂಜ ಮೊಬ್ಬೆಲ್ ಪೊಳೆರೊಳ್‌ಲ್ ಏಲೆ ಕಾಂಗತೆ ಆಯಿತಿಂಜತೊ! ಇಂಇ ಒರೇ ಬಟ್ಟೆ ಉಳ್ಳ. ಎಂತ ಎಣ್ಣೆ? (ತೆಳಿ)

ಮಾಚು : ಪೊವ್‌ಲ್‌ಡೀ ಕಾಡ್‌ರೊಳ್‌ಲ್ ಉಂಬ್‌ಳ್, ಸೊಳ್ಳೆ ಕಡ್‌ಪ್‌ಚಿಟ್ಟುಂಡ್ ಇರ್ಲ್ ದಾಡೆಂಗಿರ ಮನೆಕ್ ಪೋಪಂಜಿ ಸಂಗತಿ ಇನ್ನನಿನ್ನನೇಂದ್ ಎಣ್ಣೆತ್ ಇಡುವಕುಳ್ಳ ಬಟ್ಟೆ ಕೇಪದ್!

ಪೂವಿ : ಕರೆಕ್ಚ್ಚೆ ! ಅನ್ನನೆ ಮಾಡಿತಂವೊ! ಒರ್ ಮನೆಲ್ ಇವನ ಬೆತ್ತಲೆ ಕಾಂಬಂಜಿ ಬೊತ್ಯಂಡಿತ್. ಇಂಇಶೋರ್ ಮನೆಲ್ ಪುಚ್ಚುಂಡ್ ಪಡಿ ಇಟ್ಟುಂಡಿತ್. ಇಂಇಶೋರ್ ಒರ್ ಮನೆಲ್ ಇವಂಡ ಅರೆಮೊರೆ ಕಾಂಬಂಜಿ ಒರ್ ಲುಂಗಿನೊ ಶರ್ಟ್‌ನೊ ಕೊಡ್ತಿತ್. ಉಂಬಕೂ ಇಡುವಂಜಿ ಒಳಿವಕ್ ಜಾಗ ಕೊಡ್ತಿತ್... ವಿಷ್ಯ ಅಖೀರಿಕ್ ಎಂತ ಗೊತ್ತುಂಡಾ?

ಮಾಚು : ಎಂತೊಲೊ? ಅಂತದ್?

ಪೂವಿ : ಇವಂಡ ಬಟ್ಟೆನ ತಿಂದತಲ್ಲ? ಅದೇ ಎಮ್ಮೆರ ಒಡೆಕಾರಂಡ ಮನೆ ಅದ್! (ತೆಳಿ)

ಮಾಚು : ಕರ್ಮ ಕರ್ಮ! ಪೊಲಾಕೆದ್ಡಿತ್ ಎಮ್ಮೆನ ಕಂಡಿತ್ ಬೆರಿಯ ಜಾಗ ಖಾಲಿಮಾಡಿತಿಕ್ಕು ಅಸಾಮಿ! (ತೆಳಿ)

ಪೂವಿ : ಆಯಿತಿಕ್ಕು!... ಕತೆ ಇಂಇನೊ ಸುಮಾರುಂಡ್ ಮಾಚು. ಕೈಕಾಲ್ ಕತ್ತಿಯಂಡ್ ಬಾ. ಉಂಡಿತಾಡ್.....

ಪೀಪಿ ಸಾಬು

- ಪೂವಿ : ಅರೆ, ಎಂತಾಂಗ್ ಮಾಚು ಒಬ್ಬನೇ ಅಳತಂಡ್ ತೆಳಿಪ್ಪಿಯಲ್ಲ?
- ಮಾಚು : ಎಂತದೋ ಗೇನ ಬಾತ್.. ತೆಳಿಯೂ ಬಾತ್!
- ಪೂವಿ : ತೆಳಿಪ್ಪನ್ನತದಾಚೆಂಗಿ ನಾಕೂ ಎಣ್ಣೆಲುಪಲ್ಲ? ಮಕ್ಕ ಒಳಿಮರೆ ಮಾಡ್ಯಂಡ್ ಪೆಪ್ಪಿ ತಿಂಬನ್ನಕೆ ಒಬ್ಬನೇ ಎನ್ನಂಗ್, ನೀಡ ತೆಳಿಲ್ ಪಾಲ್ ಕೊಡ್ತೆ ಉಳ್ಳಿಯ?
- ಮಾಚು : ಓರಂದ್ ವಿಷ್ಯ ಅನ್ನನೆ ಇಪ್ಪ ಪೂವಿ. ಒಬ್ಬನೇ ಗೇನ ಮಾಡಿ, ಗೇನ ಮಾಡಿ ತೆಳಿಪ್ಪನ್ನಕೆ ಇಪ್ಪ ! (ತೆಳಿ)
- ಪೂವಿ : ಅದ್‌ಂಗೇ ನಾನೂ ಎಣ್ಣೆಂಡುಳ್ಳ. ನಾಕೂ ಚೆನ್ನ ಎಣ್ಣೆ ತಾಂದ್!
- ಮಾಚು : ಕೊಡಿ ಮನೆ ತಾತ ಮೊನಿಯಾಂದ್ ರೇಡಿಯೊ ಆನ್ ಮಾಡ್‌ಚಿ. ಅದತ್ ಎಂತ ಬಂದಂಡಿಂಜತ್ ಗೊತ್ತುಂಡಾ? (ತೆಳಿ)
- ಪೂವಿ : ಎಂತೊಲೊ?
- ಮಾಚು : ಶ್.... ಶ್.... ಶ್.. ಅಚ್ಚಿಕೆ! (ತೆಳಿ)
- ಪೂವಿ : ಅನ್ನನೆಣ್ಣಕ?
- ಮಾಚು : ಅನ್ನನೆಣ್ಣಕ ನೀಡ ಮಂಡೇಂದ್! ನೀಕ್ ಎಣ್ಣುವಕ್ ಬಂದಲ್ಲ ನಾನ್? ಅದ್‌ಂಗೇ ನಾನ್ ಒಬ್ಬನೇ ತೆಳಿಪ್ಪದ್ ಚಾಯೀಂದ್ ಮುಂಡತಿಂಜಿಯೆ!
- ಪೂವಿ : ಥೂ!.... ಚೊಡ್‌ಂಜವತೆ ಮಾಚು. ಅನ್ನನೆಣ್ಣಕ ಎಂತೇಂದ್ ನೀನ್ ಎಣ್ಣತೆ ಇಂಜಕ ನಾಕೆನ್ನನೆ ಗೊತ್ತಾಂಡು ಎಣ್ಣೆ!
- ಮಾಚು : ಅಚ್ಚಕೂ ಗೊತ್ತಾಯಿಲಿಯ ಪೂವಿ? ಮೂಂದನೇ ಕ್ಲಾಸ್ ಮಕ್ಕಳ ಕೇಟಕಲೂ ಎಣ್ಣುವ ಅನ್ನರ್! ಅಂತಲ್ಲಿ ನೀಕ್ ಗೊತ್ತಾಲೆಲ್ಲ?... ಎಣ್ಣುವಿ ಕೇಳ್ ಅಂದಕ... ಶ್.... ಶ್... ಶ್.... ಅಚ್ಚಿಕೆ! (ತೆಳಿ)
- ಪೂವಿ : ಶ್‌ಂದ್ ಒರ್ ಕನ್ನಡ ಪಿಕ್ಚರ್ ಇಂಜತಲ್ಲ ಅದ್‌ಂಡ ಪಾಟೆನ್ನೊ?!
- ಮಾಚು : ಅಯ್ಯೋ ಅಯ್ಯೋ ಅಯ್ಯೋ.... ನಾಡ ಚಪ್ಪಲ್ ಎಲ್ಲಿಯ ಎಣ್ಣೆ?
- ಪೂವಿ : ಅರೆ, ಚಪ್ಪಲ್ ಎಂತಾಂಗ್ ಮಾಚು ಇಕ್ಕ?
- ಮಾಚು : ಅದ್‌ನ ದಂಡ್ ಕೈಲೂ ಎಡ್‌ತಂಡ್ ತಟಪಟ ತಟಪಟ ತಟಪಟಾಂದ್ ನಾಡ ಮಂಡೆಕ್ ಪೊಜ್ಜವಕ್! (ತೆಳಿ)
- ಪೂವಿ : ಅಯ್ಯೋ ರಾಮಾ, ನೀಕೆನ್ನಂಗ್ ಬಾತ್ ಮಾಚು ಈ ಆಸೆ?
- ಮಾಚು : ಪಿಂಇಂತ ಎಣ್ಣೆಂಡು ನೀಕ್? ತಮಾಪಿನ ಎಂಜಾಯ್ ಮಾಡುವಕೂ ಗೊತ್ತ ಬೋಂಡು. ಇಲ್ಲೆಂಗಿ ಚಪ್ಪಲೆಂಗಿ ಪಕ್ಕಲಿರೊಂಡು! (ತೆಳಿ)

- ಪೂವಿ : ನೀನ್ ಮುಂಡತೆ ಇಂಡೈರೆಕ್ಟಾಯಿತ್ ನನ್ನ ದೂರುವದೊಂದೂ ಬೋಂಡ. ವಿಷ್ಯ ಎಂತೆಂದ್ ಎಣ್ಣೆ. ಒಬ್ಬನೇ ತೆಳೆಚಕ ಅಂತಯಿನ ಎಂತ ಎಣ್ಣುವ ಎಣ್ಣೆ.
- ಮಾಚು : ಪುಚ್ಚಾಂದ್ ಎಣ್ಣುವಾಂದ್ ನಾಡ ಬಾಯಿಲ್ ಬಪ್ಪಾಚಿಡುವಂಜಿ ಒಮ್ಮೆ ನನ್ನ ನೋಟಿತ್ ಪಲ್ಲ ಬುಡೊಂಡು ನೀಕ್. ಅಚ್ಚಿಕೆ!... ಜೋಕ್ ಎಣ್ಣುಕಲೂ ತೆಳಿಕತಯಿನ ಎಂತೆಂದ್ ಎಣ್ಣುವಾಂದ್ ನೀನೆಣ್ಣೆ ಅಂದಕ!
- ಪೂವಿ : ಮಾಚುರನ್ನತ ಪೆದ್ದಾಂದ್ ಎಣ್ಣುವ ಅಚ್ಚಿಕೆ! ನೀನ್ ಜಂಬ ಕಳಿಕ್ಕತೆ ಮಾಚು. ಎಣ್ಣುವಕ್ ನಾಡ ಪಕ್ಕಲೂ ಬೋಂಡಿಯಚ್ಚಕ್ ವಿಷ್ಯ ಉಂಡ್. ಅದೊನ ನಾನಾ ನೀಕ್ ಎಣ್ಣುಲೆ ಅಚ್ಚಿಕೆ!
- ಮಾಚು : ಓಹೋ ಇದ್ ಚಾಯುಂಡ್ ಕೇಸ್! (ತೆಳಿ).... ಮುಂಡತೇಂಗಿ ನಿನ್ನ ಎನ್ನಂಗ್ ಸತಾಯಿಚಿಡಡ್? ಎಣ್ಣುವಿ ಕೇಳ್!...
- ಪೂವಿ : ಎಣ್ಣುಪ್ಪಾ ಮಹಾನುಭಾವ....
- ಮಾಚು : ಮಹಾನುಭಾವಂಡ ಮಂಗಲ ಕೈಂಜಿತ್ ಅವೊ ಇಕ್ಕ ದಂಡ್ ಮಕ್ಕಡ ಅಪ್ಪ. ವಿಷ್ಯಕ್ ಬಕ್ಕನ . ಕೈಂಜ ಚೊವ್ವಾಚಿ ಪೊಲಾಕ ಒಯಿಂಬದರೆ ಗಂಟೆರ ನೇರ.... ಪೊಲಾಕತಾರ ಒಟ್ಟಿ ಕಾಪಿ ಆನದೂ ತಾತಂಗ್ ರೇಡಿಯೋ ಆನ್ ಮಾಡುವದ್ ಒರ್ ಅಭ್ಯಾಸ. ಆರಾಮ್ಲ ಕೈ ಕತ್ತಿತ್ ಟವಲ್ಲ್ ಮೂಡ್ ಕೈನ ತೇಟಿಯಂಡ್ ಬಾತ್.
- ಪೂವಿ : ಎಲ್ಲಿಕ್ ಬಾತ್?
- ಮಾಚು : ಡೆಲ್ಲಿಕ್ ಬಾತ್.... ಎಣ್ಣುವದ್ ಕೇಳ್.... ಎಡಲ್ ಬಾಯಿಟ್ಟಕ? ನಾನಾ ಎಂತಾನ ಎಣ್ಣುಂಡಿಂಜ ... ಎಲ್ಲಿಕೆತ್ತನೆ ಎಣ್ಣುಂಡಿಂಜ.. ಒಂದೂ ಗೊತ್ತಿಪ್ಪುಲೆ....
- ಪೂವಿ : ಆಚಿಪ್ಪ.... ಎಣ್ಣೆ ಎಣ್ಣೆ....
- ಮಾಚು : ಈಸಿಚೇರಲ್ ಅಳತಂಡ್ ರೇಡಿಯೋ ಆನ್ ಮಾಡ್ಚಿ. ಅಕ್ಕ ಅದತ್ ಶ್.... ಶ್... ಸುರು ಆಚಿ. "ನಿನ್ನ ಪಾಳಾಯಿ ಪೋಪಕ್ ನಾಕೆಂತ ನೀನ್ ಶ್"ಂದ್ ಎಣ್ಣುವೊ?ಕೈವೆಂಗಿ ಎದೇಂಗಿ ನಲ್ಲ ಪಾಟ್ ಪಾಡ್. 'ಶ್'ಲೊ ಶ್!" ಎಣ್ಣುಂಡ್ ಅಪ್ಪರ ಇಪ್ಪರ ತಿರ್ಕುವಕ್ ಕೂಡ್ಚಿ! (ತೆಳಿ)
- ಪೂವಿ : ಓ ಇಕ್ಕ ಗೊತ್ತಾಚಿ. ಮೊನಿಯಾಂದ್ ದಂಡ್ ದಿನ ರೇಡಿಯೋ ಸ್ಟೇಷನ್ ಕಾರಡ ಸ್ಟೈಕ್ ಇಂಜತ್. ಅಂದ್ ನಡಂದದಾ ಇದ್?
- ಮಾಚು : ಸದ್ಯ ಇಕ್ಕ ಗೊತ್ತಾಚಿಲ್ಲ ಮದಿ. ಟ್ಯೂಬ್ ಲೈಟ್ ಅಖೀರಿಕೂ ಕತ್ತಾಚಿಲ್ಲ!

ಪೆಕೆಮೆ ಪೂಮ್ನಾಲೆ

ಗ್ರೇಟ್!

ಪೂವಿ : ನೀನ್ ಎಣ್ಣೆ ಮಾಚು ಮುಂಡತೆ.

ಮಾಚು : ದುಂಡ್ ಈ ಬಣ್ಣ ಆಯಿರತೊಲೊ ತಾತಂಡ. "ಈ ಮುದಾಕಿ ಇದಾನ್ ತಿರಾಕಿತ್ ಬೋರೇದೋ ಸ್ಪೇಷನ್‌ಕ್ ಬೆಚ್ಚಿತಿಕ್ಕೊಂಡು. ಈಂಡ ಕೈಕ್ ಪಾಂಬು ಕೊರಿಪ್ಪಕ್"ಂದ್ ತಿರಾಕುವಕ್ ಸುರು ಮಾಡ್‌ಚಿ. ಏದ್ ಸ್ಪೇಷನ್‌ಕ್ ಇಟ್ಟಕಲೂ ಶ್... (ತೆಳಿ)

ಪೂವಿ : ಅಲ್ಲಿಂಜ ಮುದಾಕಿಕ್ ಮಂಗಳಾರತಿ ಮಾಡಿತಿಕ್ಕು! (ತೆಳಿ)

ಮಾಚು : "ಪಾಲೀ"ಂದ್ ಮೇಮಾಡಾರ ಹಂಚಿ ಬೂವನ್ನೆ ಕೊತಟ್ಟಿತ್" ಮರ್ಯಾದಿಲ್ ಇದಾನ್ ಪಾಡುವನ್ನೆ ಮಾಡಿ ತಂದಿಯ ಬಚಾವು. ಇಲ್ಲೆಂಗಿ ಇಂದೆಕ್ ಪನ್ನೆರಂಡಾಂಗ್ ನೀಡ ಮಾದ ಕಾಗದ ಬಳಂಬುವೀಂ"ದ್ ಜೋರಾಟ್ಟಿ ತೊಲೊ.... ಮುದಾಕಿಕ್ ಮಿಂಞಾಲೆ ಕೆಮಿ ಚೆನ್ನ ದೂರ. ಪಾಲೀಂದ್ ಕಾಕ್‌ನದ್ ಆಂಗ್ ಖಾಲೀ"ದ್ ಕೇಟಿತ್...

ಪೂವಿ : ಓಡಿಯಂಡ್ ಬಂತಿಕ್ಕು. ಮುದಾಕಿಂಗ್ ಎಂತಾಚಪ್ಪಾಂದ್! (ತೆಳಿ)

ಮಾಚು : ಬಂತ ನೋಟುವೊಲೊ! ಮುದಾಕಿ ಬ್ಯಾಟರಿನೆಲ್ಲ ಉತ್ತಿತಿಟ್ಟಂಡ್ ಅದಾನ್ ಚಾಯಿಲ್ ತೇಟಿ ತೇಟಿತ್ ರೇಡಿಯೊತ್‌ರೊಳ್‌ಕ್ ಬೆಪ್ಪೊಲೊ. "ಬೆರಿಯ ಇದಾನ್ ಪಾಡುವನ್ನೆ ಮಾಡಿ ತಾ. ಇಲ್ಲೆಂಗಿ ಎಂತ ಮಾಡುವಿ ನೋಟ್‌ಂದ್" ಚೊಡಿಲ್ ಪಾರಿ ಕಳಚತೊಲೊ!... ಮುದಾಕಿಕ್ ತಾತಂಡ ಕಳಿ ಕಂಡಿತ್ ತೆಳಿ ಬಾತೊಲೊ. "ಅಯ್ಯೋ ಮುದಾಕಿ, ಬ್ಯಾಟರಿನ ಉತ್ತಿತ್‌ಟ್ಟಂಡ್ ಪಾಡ್" ಎಣ್ಣೆಕ ಅದೆನ್ನೆ ಪಾಡುವ? ನಿಂಕ್ ಪಿರಾಂದ್ ಉಂಡಾಂದ್ ತೆಳಚಂಡ್, ತಾನ್ ರೇಡಿಯೊತ್‌ನ ತಿರಾಕಿತ್! (ತೆಳಿ)

ಪೂವಿ : ಚೆರಾಮಣ್ಣಯ್ಯಂಡ ಕತೆಯೂ ರಸ ಉಂಡ್ ಮಾಚು!.. ಇದಾನ್ ಮಿಂಞ ಎಣ್ಣೆ. ಅಲ್ಲಿಂಜ ಅದಾನ್ ಎಣ್ಣೆವಿ. (ತೆಳಿ)

ಮಾಚು : ದಂಡಾಳೂ ಕುತ್ತ ಮರಿಯ ತಿರಾಕಿ ತಿರಾಕಿತ್, ನೀನ್ ಪಾಳ್ ಮಾಡಿಯೆ, ನೀನ್ ಪಾಳ್ ಮಾಡಿಯೇಂದ್ ಪೊಜ್ಜ ಬೂವದೊಂದ್ ಬಾಕಿ. ಅಕ್ಕಣೆ ಚೋಂದು ಆಂಟಿ ಮನೆಕ್ ಬಂದಿತ್. ಅವ ಬಂದಿಯೆ ಎಂತಾಂಗ್ ಗೊತ್ತುಂಡಾ? ನಂಗಡಲ್ಲಿ ರೇಡಿಯೊ ಪಾಟ್ ಪಾಡ್ಯಂಡಿಲ್ಲೆ. ನಿಂಗಡ ರೇಡಿಯೊ ಸೆರಿ ಉಂಡಾಂದ್" ನೋಟನಾಂದ್!

ಪೂವಿ : ಅಕ್ಕ ತಾತಂಗ್ ಗೊತ್ತಾಯಿತಿಕ್ಕು. ಇದ್ ರೇಡಿಯೊ ಪ್ರಾಬ್ಲಂ ಅಲ್ಲಾಂದ್! (ತೆಳಿ)

ಚೆರ್‌ಮಣ್ಣಯ್ಯಂಡ ಕತೆ ಕೇಟಕ!... ಮುಖ್ಯಮಂತ್ರಿ ಡೆಲ್ಲಿಕ್ ಪೋಯಿತ್. ರಾಜ್ಯ ಸರ್ಕಾರತ್ ಭವಿಷ್ಯ ಎಂತಾಂಚೆಂದ್ ಅಣ್ಣಯ್ಯಂಗ್ ಆತುರ.. ಬಂತ ರೇಡಿಯೊ ಆನ್ ಮಾಡ್‌ನಕ ಅದತೂ ಇದೇ ಕಾಯಿಲೆ ಶ್... (ತೆಳಿ)

ಮಾಚು : ಎಂತ ಮಾಡ್‌ಚೋ?

ಪೂವಿ : ಮಾಡುವದಾ? ತಿರ್‌ಕಿ ತಿರ್‌ಕಿತ್ ನೋಟಿತ್. ಏದ್ ಸ್ಪೇಷನ್‌ಕ್ ಇಟ್ಟಕಲೂ ಇದೇ ಕಾಯಿಲೆ. ರೇಡಿಯೋತ್‌ನ ಜೋರಾಯಿತ್ ಕಟ್ಪರ ಕಾಲ್‌ಕ್ ಕನ್‌ಚಿತ್! ಪಾಪ, ರೇಡಿಯೋ ಪೋಯಿತ್ ಬುದ್ದಲ್ಲಿ ಕೂಡಿ ಉಸ್‌ರ್ ಬುಟ್ಟಿತ್‌ಲೆ!.. (ತೆಳಿ)

ಮಾಚು : ಶ್... ಸದ್ ಮಾಡ್‌ತೇಂದ್ ಎಣ್ಣೆತಿಕ್ಕು! (ತೆಳಿ)

ಪೂವಿ : ಚೋಡಿ ಕಮ್ಮಿಯಾನ ಪಿಂಞ ಅದ್‌ನ ಪೋರ್‌ಕಿಯಂಡ್ ಬಂದಿತ್ ಮಾಮೂಲಿ ಜಾಗತ್ ಬೆಪ್ಪಂಜಿ ಪುನಾದ್ಯ ಪುನಾದ್ಯ ಟ್ರೈ ಮಾಡಿತ್, "ಹೇ ಪಾಪರ್ ಕೆಟ್ಟದೇ... ನೀಕ್ ದೊಡ್ಡರೋಗ ಇಕ್ಕಲೇ ಬರೊಂಡುವಾ?"ಂದ್ ಆಫ್ ಮಾಡಿತ್ ಬೆಚ್ಚಿತ್! (ತೆಳಿ) ಕಾಯಿಲೆಕ್ ಕಾರಣ ಗೊತ್ತಾಯೆ ಪಿತ್ತಾಂದ್!... ಬಸ್‌ಕ್‌ಂದ್ ಪೋಪಲೋ... ಸುಮಾರ್ ಜನ ಬ್ಯಾಗ್‌ಲ್ ರೇಡಿಯೋ ಎಡ್ತಂಡ್ ಪೋಯಂಡುಂಡ್! ರಿಪೇರಿಕ್! (ತೆಳಿ)

ಮಾಚು : ತಮಾಷಿ!... ಇಂಞೋರ್ ವಿಷ್ಯ ಗೊತ್ತುಂಡ್? ರೇಡಿಯೋ ರಿಪೇರಿ ಕಾರಂಗ ರೇಡಿಯೋ ರಿಪೇರಿ ಮಾಡಿಯೇಂದ್ ಎಣ್ಣೆತ್ 50 ಉರ್‌ಪಿಯ ಚೊಟ್ಟಂಡಿತೊಲೊ! ಅಲ್ಲ ಪೂವಿ, ನೇರಾಯಿತೂ ಗೇನ ಮಾಡುವದಾಚೆಂಗಿ ನಂಗಲ್ಲ ರೇಡಿಯೋಕ್ ಎಚ್ಚಕ್ ಡಿಪೆಂಡ್ ಆಯಿತುಂಡಲ್ಲಾಂದ್ ಆಶ್ಚರ್ಯ ಆಪ.

ಪೂವಿ : ಒರ್ ಲೆಕ್ಕತ್ ಇನ್ನನೆ ಆನದೂ ನಲ್ಲದೇ ಆಚಿ ಮಾಚು. ರೇಡಿಯೋತ್‌ರ ಬೆಲೆ ಎಂತದ್‌ಂದ್ ಎಲ್ಲಾಕೂ ಗೊತ್ತಾಪನ್ನಕೆ ಆಚಿ. ಮೊನಿಯಾಂದ್ ದಂಡ್ ದಿನ ಕೊಡಗ್‌ಲ್ ಚತ್ತಯಿಂಗ ನೇರಾಯಿತೂ ಅದ್ಯಷ್ಟ ಇಲ್ಲತವೂಂದ್ ರಾಣಿ ಆಂಟಿ ಎಣ್ಣೆಂಡಿಂಜತ್. ಪಾಪ ಚಾವು ಸುದ್ದಿ ರೇಡಿಯೋತ್ ಇಲ್ಲತೆ ಪೆರ್ತ್ ಕಷ್ಟ ಪಟ್ಟಿತೊಲೊ, ಅಂದ್ ಚತ್ತಯಿಂಡ ಒಕ್ಕಕಾರ.

ಮಾಚು : ಚಾವು ಸುದ್ದಿಂಂದಲ್ಲ ಪೂವಿ, ಕೊಡಗ್‌ಲಂತೂ ಮಡಿಕೇರಿ ಆಕಾಶವಾಣಿ ಕೇಕತ ಜನಳೇ ಇಲ್ಲೆ. ಮಡಿಕೇರಿ ಆಕಾಶವಾಣಿ ಪ್ರತಿಯೊರ್ ಮನೆಲೂ ಮನೆ ಸಂಸಾರತ್‌ರನ್ನಕೇ ಆಯಂಡಿತ್. ಸುದ್ದಿ ಸಮಾಚಾರ ಆಯಿತಿಕ್ಕು. ಚಾವು ಸುದ್ದಿ ಆಯಿತಿಕ್ಕು, ಬೋರೆ ಬೋರೆ ಪ್ರೋಗ್ರಾಂ ಆಯಿತಿಕ್ಕು. ಪ್ರತಿಯೊಂದಾನೊ ಜನ

ಪೆರ್ತ್ ಇಂಟರೆಸ್ಟ್ ಕೇಪ.

ಪೂವಿ : ಅಲ್ಲ ಮಾಚೂ, ಎಚ್ಚಕೋ ಜನ ಟಿ.ವಿರ ಎದಿಕ್ಕೆ ಅಳತಂಡ್ ಎಚ್ಚಕೋ ಟೈಂ ವೇಸ್ಟ್ ಮಾಡಿರುವ. ರೇಡಿಯೋ ದಾರ್ನೋ ಪಾಳ್ ಮಾಡುಲೆ. ಒಮ್ಮೆ ಆನ್ ಮಾಡಿತ್ ಬೆಚ್ಚಿಟಕ ಆಂಡ ಪಾಡ್ಕ್ ಅದ್ ತಾಂಡ ಕೆಲಸ ಮಾಡ್ಯಂಡಿಪ್ಪ. ಟಿ.ವಿರನ್ನಕೆ ತಿಂಗಕ್ ಇಚ್ಚಕಂದ್ ಪಣ ಕೆಚ್ಚೊಂಡೊಂದಿಲ್ಲೆ. ಕೇಬಲ್ಕಾರಕ್ ದುಡ್ಡ್ ಕೊಡೊಂಡೊಂದಿಲ್ಲೆ. ಅದ್ ನಂಗಳುಂಡ್ ಕೇಪಂತದ್ ಒಂದೂ ಇಲ್ಲೆ. ಆಚೆಂಗಿ ಪ್ರತಿಯೊಂದಾನೋ ನಂಗಕ್ ತಪ್ಪ.

ಮಾಚು : ಒರ್ ತಮಾಷಿ ಕೇಳ್, ಒರ್ ಪುಣ್ಯಾತ್ಮ ಮಡಿಕೇರಿ ಆಕಾಶವಾಣಿರ ಟಿವರ್ ಬುದ್ಧ್ ಪೋಯಿತ್ಂದ್ ಸುದ್ದಿ ಪಬ್ಲಿಚಿಟ್ಟಿತಿಂಜತ್. ಜನಳೂ ಆಯಿತಿಕ್ಕು ಕಾಂಬಾಂದ್ ನಂಬ್ನೆಂಗಳೂ ಉಂಡ್! (ತೆಳ)

ಪೂವಿ : ಏದೆಲ್ಲ ಸುದ್ದಿ ಪಬ್ಲಿರುವಲ್ಲ? ಜನಡ ಸ್ವಭಾವವೇ ಅನ್ನನೆಲ್ಲ ಮಾಚು? ಕಾಂಗತ ನರಿನ ಕಂಡೇಂದ್ ಸುದ್ದಿ ಪಬ್ಲಿಚಿಡುವ. ಕೂಡ ಪೋಚೇಂಗಿ ಓಡಿ ಪೋಚೇಂದ್ ಸುದ್ದಿ ಹುಟ್ಟಾಕುವ.

ಮಾಚು : ಜಾನು ಮೂಡಿರ ವಿಷಯತೂ ಅನ್ನನೇ ಆಯೆ. ಅವ ಚೆನ್ನ ಬೋಲ್ಡ್ ಮೂಡಿ. ಅವಕ್ ಕ್ಲಿಪ್ಪುಮಕ್ಕ- ಮೂಡಿ ಮಕ್ಕ ಎಣ್ಣು ವನ್ನತ ವ್ಯತ್ಯಾಸೇ ಇಲ್ಲೆ. ಎಲ್ಲಾಡೋ ಕೂಡೆಯೂ ಒರೇ ತರ ಇಪ್ಪ. ಆಂಗ್ ಎಂತೆಲ್ಲ ಸುದ್ದಿ ಪುಟ್ಟಿರ್ತ್ ನೋಟ್!

ಪೂವಿ : ಜನಡ ನಾವು ಎಂತಾನ ಪರಿಯೊಲೊಂದ್ ಪಾರಕಾತಂಡಿಪ್ಪ ಮಾಚು. ಓರಬ್ಬಕ್ ಅದೇ ಒರ್ ಚಾಳಿ ಆಯಿತಿಪ್ಪ. ದಾಡ ಸುದ್ದಿನ ಪರಿಯನಾಂದ್ ನಾವು ಚಪ್ಪರ್ಚಿಟ್ಟಂಡಿಪ್ಪ. ಎಣ್ಣುವಾನ ಎಲ್ಲ ಎಣ್ಣೆತಾನ ಪಿಂಚ್ "ಅಯ್ಯೋ ಬಾ ನಂಕೆನ್ನಂಗ್ ಕಂಡವಂಡ ಸುದ್ದೀಂದ್ ತಕ್ಕ್ ಬೋರೆ!"

ಮಾಚು : ನಾಕೆನ್ನೊ ಡಾಟ್ ಪೂವಿ. ಈ ವಿಷ್ಯ ಪರಿವಕ ದಾರೋ ಒರ್ ವ್ಯಕ್ತಿ ನೀಡ ಮನಸ್ಸುಳ್ಳದ್ ನೇರ್. ಅಕ್ಕುವಾ?

ಪೂವಿ : ಅಕ್ಕು ಮಾಚು. ಅವ ನಂಗಡ ವಿಷಯತೇ ಎಚ್ಚಕೋ ಕಳಿ ಕಳ್ಚಿಲಿಯಾ?... ಎಚ್ಚಕ್ ಮನೆ ಪಾಳ್ ಮಾಡುವಕುಂಡೋ ಅವ!

ಮಾಚು : ಅವ ಎಣ್ಣಕ?

ಪೂವಿ : ನೀಕೂ ಗೊತ್ತುಂಡ್ ಮಾಚು. ಗೊತ್ತಿಲ್ಲತವಂಡನ್ನಕೆ ಕಳಿಕ್ಕತೆ. ನಾಡ ಬಾಯಿಂಜೇ ಅವಡ ಪೆದ ಬಕ್ಕಡ್ಂದ್ ಕೆಣ ಕಳ್ಚಂಡ್ ಉಳ್ಳಿಯ ಅಚ್ಚಿಕೆ!

ಮಾಚು : ದಾರ್ ದಾರ್ ಏದೇದ್ನ ಎಣ್ಣೊಂಡುವೊ ಅದದ್ನ ಎಣ್ಣಕ ಚಾಯಿ!

ಪೂವಿ : ಓಹೋ ಅಖೀರಿಕ್ ನಾಡ ಮಂಡೆಕ್ ಎಲ್ಲಾನೊ ತೇಟಿತ್ ನೀನ್ ಮಾತ್ರ

- ಒಂದೂ ಅರಿಯತ ಕುಟ್ಟಿ ಪೂಂಞಿರನ್ನಕೆ ಆರಾಮ್ಲ ಇಂಜಿರ್! (ತೆಳ)
- ಮಾಚು : ಆಚಪ್ಪ, ನಾನೇ ಎಣ್ಣೆರುವಿ ಅವಡ ಪೆದ..... ಬೋಂಡ ಬುಡ್. ನೀಕೂ ಗೊತ್ತುಂಡ್ ನಾಕೂ ಗೊತ್ತುಂಡ್ಂದ್ ಆನ ಪಿಂಞ ಆ ಪದೇಸಿರ ಪೆದ ಎಣ್ಣೆತ್ ನಂಗೆನ್ನಂಗ್ ನಾವುನ ಹೊಲಸ್ ಮಾಡಿಯವ?... ಇವಡ ಒಂದುಳ್ಳ ಪುಲಿಪುತ್ರ ಜಾನು ಮೂಡಿನ ಕೆಣಕುವಕ್ ಪೂಪಂಜಿ ಚಪ್ಪಲಿ ಪೂಯ್ತ್ ಕೇಟಂಡದ್ ಇಡೀ ಊರ್ಕೇ ಗೊತ್ತುಂಡ್!
- ಪೂವಿ : ಆಂಡ ಉರಿಕೇ ಮಾಚು. ಇವ ಕತೆ ಕೆಟ್ಟಂಡ್ ಊರ್ಡೀ ಟಾಂಟಾಂ ಮಾಡ್ಯಂಡ್ ತಿರುವೊ. ಅಲ್ಲ ಇಂತ್ಯೆಂಗಕ್ ಬೋರೆ ಕೆಯಿಮೆ ಒಂದೂ ಇಪ್ಪುಲಿಯಾಂದ್?
- ಮಾಚು : ಅದೋರ್ ಸ್ವಭಾವ ಪೂವಿ. ಪೊಲಾಕ ಎದ್ದಿತ್ ದೇವಳ ಬೋಂಡಂಗೂ ತೊಕ್ಕತೆ ಇಕ್ಕು. ದೂರುವಾನ ಮಾತ್ರ ತಪ್ಪುಚಿಡುಲೆ. ಪಕ್ಕತ ಮನೆಕಾರ ಮೀನ್ ಚುಟ್ಟಕ ಈ ಮನೆಕಾರ ಆಂಡ ವಾಸನೆಲೇ ದಂಡ್ ಚುತ್ತೆ ಕೂಳ್ ಜಾಸ್ತಿ ಉಂಬಿಂಜ ತೊಲೊ ಅನ್ನನೆ!
- ಪೂವಿ : ಅಲ್ಲ ಮಾಚೂ, ಸಾಬು ಬಾವನ ಆಸ್ಪತ್ರೆಕ್ ಕೂಟಿಯ ಪೋಯಿಂಜತ್ಂದ್ ಒರ್ ವರ್ತಮಾನ ಕ್ಕೆಟ್ಟಿಚಿ. ನೇರಾ?
- ಮಾಚು : (ತೆಳ) ಆಸ್ಪತ್ರೆಕ್ಂದ್ ಪೋನದೂ ಆಚಿ. ವಾಪಾಸ್ ಬಂದ ಬಟ್ಟೆಕ್ ಸುಂಕ ಇಲ್ಲೆಂದ್ ಮನೆಕ್ ಬಂದದೂ ಆಚಿ!
- ಪೂವಿ : ಅರೆ, ಎಂತ ಎಣ್ಣುವೊ ಮಾಚು ನೀನ್? ಆಸ್ಪತ್ರೆಲ್ ಆಪುಲೇಂದ್ ಆಯಿರ್ತಾ?
- ಮಾಚು : ಆಸ್ಪತ್ರೆಲ್ ಆಪುಲೇಂದಲ್ಲ. ಆಸ್ಪತ್ರೆಕ್ ಪೋಕಂಡಿಯ ಆವಶ್ಯಕತೆ ಬಂದ್ಲೆ!
- ಪೂವಿ : ಅದೇ, ಎಂತಾಂಗ್ಂದ್ ಕೇಪ ನಾನ್!
- ಮಾಚು : ಅಂದಕ ನೀಕ್ ಕತೆನ "ಒಂದಾನೊಂದು ಕಾಲದಲ್ಲಿ ಒಂದೂರಲ್ಲಿಂದ್ ಸುರೂಂಜೇ ಎಣ್ಣೊಂಡು ಕಾಂಬ!
- ಪೂವಿ : ಅಲ್ಲೆಂಗಿ ಮಾತ್ರ ನಾಕೆನ್ನನೆ ಗೊತ್ತಾಂಡು ಮಾಚು? ಬಸ್ಲ ಪೋಪಕ ದಾರೋ ತಕ್ಕ ಪರ್ಂದಂಡಿಂಜಾನ ಕೇಟಿಯೆ ಅಚ್ಚಿಕೇ.
- ಮಾಚು : ಅದ್ಂಗೆ ಎಣ್ಣುವೊ ಪೂವಿ. ಅರೆಪಾಟ್ ಎಡ್ತಂಡ್ ಅಂಬಲಕ್ ಪೋಪಕಾಗಾಂದ್! ಒಂದೋ ವಿಷ್ಯತನ ಪೂರ್ತಿ ಕೇಟವಂಡು. ಇಲ್ಲೆಂಗಿ ಹೇಳಿಕೆ ಮಾತಿಗೆ ಹೆಂಡ್ತಿ ಬಿಟ್ಟಾಂದ್ ಆಯಿಪೋಪ!
- ಪೂವಿ : ಪೂರ್ತಿ ವಿಷ್ಯ ಸದ್ಯಕ್ ನೀಕೇ ಗೊತ್ತುಂಡ್ಂದ್ ನಾಕ್ ಗ್ಯಾರಂಟಿ ಆಯಿತ್. ಎಲ್ಲಾ ಒಡ್ತಿತ್ ಎಣ್ಣುವದೆನ್ನೆ? ಸತಾಯಿಚಿಡುವೊ ಎನ್ನಂಗ್ ಮಾಚು?

ಪಳೆಮೆ ಪೊಮ್ಮಾಲೆ

- ಮಾಚು : ಅಂದಕ ಸುರೂಂಜೇ ಎಣ್ಣುವಿ ಕೇಳ್.. ಪೀಪಿ ಸಾಬುರ ಕತೆ! (ತೆಳಿ)
- ಪೂವಿ : ಪೀಪಿ ಸಾಬು? ಅನ್ನನೆಣ್ಣಕ? ಎಂತ ಮಾಚು ಇದ್ ವಿಚಿತ್ರ?
- ಮಾಚು : ಮಕ್ಕ ಕಳಿಕೂ ಒರ್ ಲಿಮಿಟ್ ಬೋಂಡು. ಕಳ್ಚದಲ್ಲ ಕಳಿ ಆಚೆಂಗಿ ಇನ್ನನೇ ಆಪೋ! (ತೆಳಿ)
- ಪೂವಿ : ನೀನ್ ಮುಂಡತೆ ಸೈಡ್ ರೀಲ್ ಮಾತ್ರ ಕಾಟತೆ ಮಾಚು.
- ಮಾಚು : ಸಾಬುಕ್ ಎಕ್ಕಂಜ ಪೀಪಿರ ಪುಚ್ಚ್ ಪುಡ್ಚತಂದೇ ಗೊತ್ತಿಲ್ಲೆ ಪೂವಿ. ತೋಟಕ್ ಪೋಪಕಲೂ ಪೀಪಿ, ಬೇಲ್ಕ್ ಪೋಪಕಲೂ ಪೀಪಿ. ಚಟ್ ಪಾತಿಕ್ ಪಕ್ಷಿಯ ಬಪ್ಪಾಂದ್ ಮಜ್ಜಾಣ ನೇರಕ್ ಚಟ್ ಪಾತಿರ ಒಳ್ಲ್ ಅಳ್ತಂಡ್ ಪಕ್ಷಿಯ ಬಪ್ಪಕ ಒಮ್ಮಕೇ (ಪೀಪಿ ಶಬ್ದ) (ತೆಳಿ)
- ಪೂವಿ : ಅರೆ, ನೀಕ್ ಇದೆಲ್ಲಿ ಕಾಟ್ಚಿ ಮಾಚು ? (ತೆಳಿ) ಪೀಪಿ?
- ಮಾಚೂ : ನಾನ್ ನೀಕ್ ಈ ಕತೆನ ಎಣ್ಣುವಕಾಯಿತೇ ಸರು ಕಾಣ್ಣಂಡ ಕೈಂಜ ಇದ್ನ ಕೇಟ ಬಂದಿಯೆ. ನಾನ್ ಎಣ್ಣುವಕ್ ಸುರು ಮಾಡುವಕ್ ಮಿಂಗಳೇ ನೀನ್ ಮೊಳಿ ಇಟ್ಟಿಯೆ.
- ಪೂವಿ : ಸರಿ ಸರಿ! ಎಣ್ಣಕ್ಕ!
- ಮಾಚು : ಮೊನಿಯಾಂದ್ ಚೀತೆ ಮಾಯಿ ತೋಟತ್ಂಜ ಮನಕತ್ತಟಿ ಬಂದಂಡಿಂಜ ತೊಲೊ. ಈ ಪುಣ್ಯಾತ್ ಒಮ್ಮಕೆ ಬಯ್ಯಂಜ ಬಂತೆ! (ಪೀಪಿ ಶಬ್ದ!) (ತೆಳಿ)
- ಪೂವಿ : ಕರ್ಮ ಕರ್ಮ! ಬೊತ್ತಿ ಪೋಯಿತಿಕ್ಕು ಕಾಂಬ ಚೀತೆ ಆಂಟಿ!
- ಮಾಚು : ಬೊತ್ತತೆ ಇಪ್ಪ? ಸಡನ್ನೆ ಪೋಯಿತ್ ಪೀ ಸದ್ ಮಾಡ್ನಕ? ಕತೆ ಉಳ್ಳ ಆದಲ್ಲ. ಮಕ್ಕ ಕೇಟಕಲೂ ಇದ್ನ ಕೊಡ್ತಿತ್ಲೆ ಇಂವೊ! (ತೆಳಿ)
- ಪೂವಿ : ಅಲ್ಲ ಮಾಚು, ಸಾಬುನ ಆಸ್ಪತ್ರೆಕ್ ಕೂಟಿಯ ಪೋನ ವಿಷ್ಯ ಎಣ್ಣಂದೆಣ್ಣಕ ನೀನ್ ಪೀಪಿರ ಕತೆ ಎಣ್ಣಂಡುಳ್ಳಿಯಲ್ಲ?
- ಮಾಚು : ನೀನಿಕ್ಕ ಎಣ್ಣಾನ ಮುಂಡತೆ ಕೇಳ್. ಇಲ್ಲೆಂಗಿ ಇದ ಇದ್ನ ಪುರಾಸತ್ತಾ ಇಲ್ಲತೆ ನೀಡ ಕೆಮಿರ ಪಕ್ಕ (ಪೀಪಿ ಸದ್) ಇನ್ನನೆ ಉರ್ಪುವಿ!
- ಪೂವಿ : ಥೂ! ಮದಿ ಮಾಚು ನೀಡ ಮಕ್ಕಕಳಿ! ನಾಡ ಕೆಮಿ ಪಾಳಾಯಿರ್ತೆ! (ತೆಳಿ)
- ಮಾಚು : ಇವಂಗ್ ಅದೆಂತದೊರ್ ಪುಚ್ಚಿ ಪುಡ್ಚಿತಿಂಜತೋ?.. ಬುದ್ಧವಕ ಕೂಡಿ ಮಂಡೆರ ಅಡಿಲೇ ಅದ್ನ ಬೆಚ್ಚವಿಂಜತೊಲೊ ಅಸಾಮಿ!... ಮೊನಿಯಾಂದ್ ಎಂತಾಯಿತ್? ಮಕ್ಕಕ್ ಇದ್ನ ಎನ್ನನೆ ಉರ್ಪಾನಕ ಎನ್ನನೆನ್ನನೆ ಸದ್ ಬಪ್ಪಾಂದ್ ಎಣ್ಣೆ ಕೊಡ್ತಂಡಿಂಜತೊಲೊ. ಅಕ್ಕ ನಡಂದಿತ್ ಮಲಾಮತ್ತಾ!
- ಪೂವಿ : ಮಲಾಮತ್ತೆ? ಎಂತಾಚಿ?

- ಮಾಚು : ಅಪದೆಂತ? ಪೀಪಿ ಪೋಯಿತ್ ಲಟಿಕ್ಕೊಂದ್ ತೊಂಡೆಲ್ ಕೆಣ್ಂಜಂಡಿತ್! ಇಂವೊ ಉಸರ್ ಎಡ್ಪಕ ಪೀಪಿ (ಸದ್); ಉಸರ್ ಬುಡುವಕಲೂ ಪುನಾದ್ಯ (ಸದ್) (ತೆಳಿ)
- ಪೂವಿ : (ತೆಳಿ) ಆಯ್ಕೊಯ್ಕೊ! ಎಂತೋರ್ ಅವಸ್ಥೆ ಮಾಚು?... ಅಲ್ಲಿಂಜ ಅವನ ಆಸ್ಪತ್ರೆಕ್ ಕೂಟಿಯ ಪೋನದಾ?
- ಮಾಚು : ಆಸ್ಪತ್ರೆಕ್ ಕೂಟಿಯ ಪೋಪಕ್ ಮಿಂಞ ಸುಮಾರೆಲ್ಲ ಕತೆ ಆಯಿತ್... ಪೀಪಿ ಮುಗ್ಗುವಕ ಇಂವೊ ಮಕ್ಕಡ ಕೂಡೆ ಚೆಟ್ ಪಾತಿರಲ್ಲಿ ಇಂಜತ್. ಪೀಪಿ ತೊಂಡೆರೊಳ್ ಕೆಣ್ಂಜಿತಾಪಕ ಇವಂಡ ಕಣ್ಣ್ ಪೊರಟ್ಟೋಯಿತ್! ಆಚಿ ನಾಡೆ ಕತೆಂದ್!... ಪೋಯಿತ್ ಅಮ್ಮನ ಕೂಟಿಯ ಬಾಂದ್ ಮಕ್ಕಕ್ ಎಣ್ಣೆತ್! ಪೀಪಿ ಸದ್ಲಾ! (ತೆಳಿ)
- ಪೂವಿ : ಮಕ್ಕ ಪೋಯಿತ್ ಅಮ್ಮನ ಕೂಟಿಯ ಬಾತಾ? (ತೆಳಿ)
- ಮಾಚು : ಎಲ್ಲಿ ಕೂಟಿಯ ಬಪ್ಪ? ಮಕ್ಕಕ್ ತೆಳಿಯೋ ತೆಳಿಯೊಲೊ! ಅಪ್ಪ ಬೋಂಡೊಂದೇ ಇನ್ನನೆಲ್ಲ ಕಳಿಪ್ಪೆಂದ್ ಮಕ್ಕಡ ಗೇನ! ಇವಂಗ್ ಒರೇ ಸಮ ಬೆವರ್ ಬಂದಂಡುಂಡ್! ಕಣ್ಣ್ ಚೋಂದ್ ಪೋಯಿತ್. ಉಸರ್ ಎಡ್ಪಕ ಇದೋರ್ ಪಾಳಾನ ಪೀಪಿ ಸದ್. ತಕ್ಕ ಪರಿವಕ್ ಕಯ್ಯಲೆ... ಆ ಪರಿಸ್ಥಿತಿನ ಗೇನ ಮಾಡ್!... "ಬೆರಿಯ ಪೋಯಿತ್ ಅಮ್ಮನ ಇಲ್ಲಿಕ್ ಕೂಟಿಯ ಬಾ"ಂದ್ ಎಣ್ಣೊಂಡುಂದ್ ಇವಂಡ ಪ್ರಯತ್ನ! ಆಚಿಂಗಿ ಬಾಯಿಂಜ ಪೊರಡುವೊ ಮಾತ್ರ (ಪೀಪಿ ಸದ್).... ಮಕ್ಕಕ್ ತೆಳಿಯೋ ತೆಳಿ! (ತೆಳಿ)
- ಪೂವಿ : (ತೆಳಿ) ದಾಕೇಂಗಿ ತೆಳಿ ಬಪ್ಪಲಿಯ? ಎಂತೆಲ್ಲ ಜನ ಇಪ್ಪಾಂದ್!
- ಮಾಚು : ಅಲ್ಲಿಂಜ ಈ ಪುಣ್ಯಾತ್ಮನೇ ಮೆಲ್ಲೆ ಕಣ್ಣ್ಲಾ ನೀರ್ ಉಳ್ಳಪಿಯಂಡ್ (ಪೀಪಿಸದ್)... ಪೀಪಿ ಸದ್ ಮಾಡ್ಯಂಡ್ ಮನೆಕ್ ಬಂದಿತ್. ಕೂಡೆ ಮಕ್ಕಳೂ ಕೈ ಕೊಟ್ಟಿ ತೆಳ್ಚಂಡ್ ಬಂತ. ಬೆರಿಯ ದಾಡೇಂಗಿರ ಜೀಪುನ ಬಪ್ಪಕೆಣ್ಣೊಂದ್ ಎಣ್ಣುವಕ್ ಪೇಚಾಡ್ನ ಸದ್ ಮಾತ್ರ (ಪೀಪಿ ಸದ್) ಈ ಪಾಡ್!
- ಪೂವಿ : ಪೊಣ್ಣೊ ತೆಳ್ಚಿತಿಕ್ಕು! (ತೆಳಿ)
- ಮಾಚು : ಸುರುಲ್ ಅವಳೂ ಇವಂಡ ಪಾಡ್ನ ನೋಟಿತ್ ತೆಳ್ಚಿತ್! ಅಲ್ಲಿಂಜ ಗೊತ್ತಾಯಿತ್!
- ಪೂವಿ : ಸಾಬು ಬಾವ ಚೆತ್ತೋಪಿಂಜತಲ್ಲ ಮಾಚು?... ಅಲ್ಲಿಂಜ?
- ಮಾಚು : ಅಲ್ಲಿಂಜ ಎಂತ? ಇವಂಡ ಅವಸ್ಥೆ ನೋಟಿತಾಪಕ ಅವಕ್ ಮೊರೆ ಸುರು ಆಯಿತ್! ನೀಡ ಮೊರೆರ ಬಾಯಿಕ್ ಮಣ್ಣ್ಡಡ್. "ಬೆರಿಯ ಒಮ್ಮೆ ಜೀಪು

ಮಾಡಿಯುಂಡ್ ಬಾಂದ್" ಇಂವೊ ಪೀಪಿ ಸ್ವರತ್ ಪೀಪಿ ಪೀಪಿಪೀ-ಪೀಪಿ ಪೀಪಿಪಿ, ಪೀಪಿಪೀ ಪೀಪಿ ಪೀಪಿಪೀಂದ್ ಎಂಗಿತ್! (ತೆಳಿ) ಇದ್ನೆಲ್ಲ ನೋಟಿಯುಂಡಿಂಜ ಮಕ್ಕಕೂ ಆಖೀರಿಕ್ ಇದೆಂತದೋ ಬಲ್ಲಾದೆ "ಪೀಪಿ ಕಾಯಿಲೇಂದ್"ಗೊತ್ತಾಯಿತ್! (ತೆಳಿ)

ಪೂವಿ : (ತೆಳಿ) ನೀನ್ ಎಣ್ಣುವದ್ ಕೇಪಕ ತೆಳಿಯೂ ಬಪ್ಪ. ಬೇಜಾರೊ ಆಪ. ಈ ಪಾಳ್ ಕೆಮಿಲ್ ಇಂಞೂ ಎಂತೆಂತೆಲ್ಲ ಕೇಪಕುಂಡೊ? ಚೆರಿಯ ಮಕ್ಕಕೆಲ್ಲ ಆಯಿ ಪೋಪದುಂಡ್. ಬಲ್ಯಯಿಂಗಳೇಂಗಿ ಎಚ್ಚರ ಬೋಂಡ?

ಮಾಚು : ಎಚ್ಚರ ಎಣ್ಣಕ ಅದೇ ಗೇನ ಇಪ್ಪ ಪೂವಿ? ತಮ್ಮಿ ಬಾವ ಮರತ್ ಕೊಂಬು ಉಳ್ಪುವಾಲ್ ಅಚ್ಚಕ್ ಎಕ್ಸ್‌ಪೆಟ್. ಅವಂಡ ಪಾಡ್‌ನ ಗೇನ ಮಾಡ್?

ಪೂವಿ : ಅದೇ ಅಲ್ಲ? ಮರ ಪತ್ತಿತ್ ಎಲ್ಲಾ ಕೊಂಬುನೊ ಉಳ್ಪುಚಿಲೊ! ಕೊಡಿಯತ ಕೊಂಬುನ ಉಳ್ಪುಕ ಮಾತ್ರ ಆ ಪರಿಸ್ಥಿತಿ ಆಯಿಟ್ಕೆ! (ತೆಳಿ) ಬಾಕ್ ಆ ಬರಿಕ್ ಉಂಡಲ್ಲಾಂದ್ ಈ ಬರಿಕ್ ಕೆತ್ ಕೊಡ್ತತ್! ಗ್ರಾಚಾರಕ್ ಅದೇ ನೇರಕ್ ಸೆರಿ ಆಯಿತ್ ಆ ಬರಿಂಜ ಬಲವಾನ ಗಾಳಿ ಬೀಜ್‌ಚಿಲೊ. ಕೊಂಬು ಎದೆಲ್ ಬಂತ್ ಅಳ್ತಂಡತ್. ಕಾಕನಾಂದೆಣ್ಣಕ ಸೊರವೂ ಪೊರಡುಲೆ! ಅನ್ನನೇ ಆಚಿಲ್ಲ ಸಾಬು ಬಾವಂಡ ಪಾಡೊ! (ತೆಳಿ)

ಮಾಚು : ಮುಂಡತೆ ಅಲ್ಲ ಎಣ್ಣುವೊ "ಗ್ರಾಚಾರ ಪುಡಿಕ್ಕುಂಚೊ ಎರೆಪುಳು ಪಾಂಬಾಯಿ ಕಡಿಕ್ಕೊಂದ್"! ಎಲ್ಲ ಓರಂದ್ ಟೈಮ್ ಅಚ್ಚಿಕೆ.

ಪೂವಿ : ಅಲ್ಲಿಂಜೆಂತಾಚೀಂದ್ ಎಣ್ಣದೇ ಇಲ್ಲೆಲ್ಲ ಮಾಚು. ಕಾವೇರಿ ಎಕ್ಸ್‌ಪ್ರೆಸ್‌ರನ್ನಕೆ ಡಿಟೈಲ್ಸ್ ಎಣ್ಣುವದೆನ್ನೆ?

ಮಾಚು : ಉಫ್ ಅಂತೂ ಇಂತೂ ಇವ ಸುದ್ದಿ ಸಮಾಚಾರ, ಕಾವೇರಿ ಎಕ್ಸ್‌ಪ್ರೆಸ್, ಕೊಡವ ಸಿರಿ, ಹಳ್ಳಿರೇಡಿಯೋಂದ್ ಫುಲ್ ಮಡಿಕೇರಿ ಆಕಾಶವಾಣಿಯೇ ಆಯಿ ಪೋಯಿತ್!

ಪೂವಿ : ನೀನ್ ಮಾತ್ರ ಎಂತ ಕಮ್ಮಿ? "ಚಾವು ಸುದ್ದಿ ದಾಡದುಂಡ್‌ಂದ್ ನೋಟನ. ಬೆರಿಯ ರೇಡಿಯೊ ಆನ್ ಮಾಡ್‌ಂದ್ ಬಾಯಿ ಬಡಿಪ್ಪಿಯ. ಹಳ್ಳಿ ರೇಡಿಯೊ ಕೇಟಂಡ್ ಒಟ್ಟಿ ಎಚ್ಚಕ್ ತಿಂದೇಂದೇ ನೀಕ್ ಗೇನ ಇಪ್ಪುಲೆ. ಕೆಲ ಪಯಿಚಿ ತಿಂಜಕಲೂ ಕೊಡವ ಸಿರಿ ಕೇಕತೆ ಉಂಬಕ್ ಬಪ್ಪುಲೆ.

ಮಾಚು : ಎಂತ ಮಾಡಂಗ ಎಣ್ಣ. ಎಚ್ಚಕಾಚೆಂಗೂ ಅದ್ ನಂಗಡದ್. ಅದ್‌ನ ಬುಟ್ಟಿತ್ ಬದುಕುವೊ ಮಾತ್ರ ಎನ್ನನೆ?

ಪೂವಿ : ನೀನ್ ತಕ್ಕ ತಪ್ಪುಚಿಡತೆ ಮಾಚು. ಮೈನ್ ಪಾಯಿಂಟ್ ಇಂಞೂ ಎಣ್ಣೆತ್‌ಲೆ

ನೀನ್. ಸಾಬು ಬಾವಂಡ ಪೀಪಿ ಆಖೀರಿಕ್ ಎನ್ನಾಚೀಂದ್! (ತೆಳಿ)

ಮಾಚು : ಸಾಬು ಬಾವಂಡ ಪೀಪಿ ಅಲ್ಲ. ಸಾಬು ಮುಗ್ಗನ ಪೀಪಿ! (ತೆಳಿ) ಕರ್ಮಕರ್ಮ!
ಪೊಣ್ಣ್ ಪೋಪಂಜಿ ರಾಜಂಡ ಜೀಪುನ ಬರುಮಾಡ್‌ಚಿ. "ಪೀಪಿ ಸಾಬು"ನ
ನೇತಿತ್ ಜೀಪುಕ್ ಇಟ್ಟಂಡ್ ಆಸ್ಪತ್ರೆಯರತ್ತಿ ಪೋಯಂಡಿಂಜತ್. ಪಾಪ! ಅವಂಡ
ಪೀಪಿಕ್ ಪುರಸತ್ತೇ ಇಲ್ಲೆ. ಪೀಪಿರ ಸದ್ ನಿಂದ್‌ಪೋಪ ಸಂದರ್ಭ!

ಪೂವಿ : ಅಯ್ಯಯ್ಯ! ಚತ್ತೇ ಪೋಪಿಂಜತಾ?

ಪೂವಿ : ನೀನ್ ಎಡೆಲ್ ಬಾಯಿಡತೇಂದಲ್ಲ ಎಣ್ಣೆಯೆ? ನೀಡ ತೊಂಡೆಕೂ ಪೀಪಿ
ತುರ್‌ಕುವಿ ನೋಟ್! ಬಲ್ಯ ಬಾಣೆ ಕಯಿಂಜದೂ ಒರ್ ಟರ್ನ್ ಉಂಡಲ್ಲ
ಅಲ್ಲಿ ಒರ್ ಬಲ್ಯ ಕುಂಡ್! ಜೀಪುಕಾರಂಗ್ ಗೊತ್ತಾಯಿಲೆ. ಜೀಪು
ದಡ್‌ಕ್‌ಂದ್ ಕುಂಡ್‌ಕ್ ಬುದ್ಧತ್. ಅಕ್ಕಣೆ ಒರ್ ವಿಶಿಲ್ ಕೇಟತ್!
ಜೋರಾಯಿತ್! (ಪೀಪಿ ಸದ್) ಅಸಾಮಿ "ಪೆರೇಡ್ ಸಾವ್‌ಧಾನ್" ಎಣ್ಣುವಲ್ಲ
ಅನ್ನನೆ, ಪೀಪಿನ ತುಪ್ಪಿತ್ ಎದ್ದಿತ್ ಅಳ್‌ತತ್! (ತೆಳಿ)

ಪೂವಿ : ಪಾಪ! ಅಂತೂ ಇಂತೂ ಚಾಯಾಚಲ್ಲ? "ಪೀಪಿ ಸಾಬುರ" ಕತೆ ಎಣ್ಣು "ಪೀಪಿ
ಮಾಚುಕ್" ಕಾಪಿ ಕೊಂಡ ಬಪ್ಪಿ ಇರ್!... (ವಿಶಿಲ್ ಸದ್)

ಆಳ್ವಾ - ಗೋಳ್ವಾ

- ಪೂವಿ : ಅರೆ, ಎಂತಾಚಿ ಮಾಚು ನೀಕ್? ಎನ್ನಂಗನ್ನನೆ ಗೋಡೆನೇ ನೋಟ್ಯಂಡ್ ಅಳ್ವಾತ್‌ಚ್ಯೆ?... ಉಸ್‌ರೇ ಬುಡುಲೆಲ್ಲ!.... ನಾಕಂತೂ ಆ ಗೋಡೆಲ್ ಒಂದೂ ಕಂಡಂದಿಲ್ಲೆಪ್ಪ. ಪುತ್ರರಿಕ್ ವೈಟ್‌ವಾಶ್ ಮಾಡಿತ್ ಆಯಿತ್!.... ದೇವ ಎನ್ನೆಂಗಿ ಕಂಡಂಡುಂಡಾಂದ್? (ತಳಿ)
- ಮಾಚು : ನೀಕಿಲ್ಲಿ ತಮಾಷಿ. ನಾಡ ಪಾಡ್ ನಾಕ್! ಮುಂಡತೇಂಗಿ ಪೊಲಾಕಂಜ ಸುತ್ತಾನದೇ ಬಾತ್. ಒರ್ ನಾಯಿ ಕೂಡಿ ಕೊಟ್ಲೆ....
- ಪೂವಿ : ಅದ್‌ಂಗ್ ನಾಡ ಮೇಲೆ ಚೆಡ್‌ಂಜಂಡಕ? ನಾನೆಂತ ಮಾಡ್‌ನ ನೀಕ್?
- ಮಾಚು : ನೀನಲ್ಲ ಎಣ್ಣವ? "ಅಲ್ಲಿಕ್ ಪೋ ಮಾಚು-ಇಲ್ಲಿಕ್ ಪೋ ಮಾಚೂಂದ್!
- ಪೂವಿ : ಎಣ್ಣದ್ದೆನ್ನೋ ನೇರೇ ಅದ್‌ಂಗ್ ಅನ್ನನೆ ದುಂಡ್‌ನ ಉಪ್ಪಾಂದ್ ಮಾಡ್ಯಂಡ್ ಗೋಡೆ ನೋಟ್ಯಂಡ್ ಅಳ್ವಾತಂಡಕ ನಾನೆಂತ ಗೇನ ಮಾಡಡ್?
- ಮಾಚು : ಯಾವಂಗ್ ಬೋಂಡು ಈ ನಾಯಿಪಾಡ್? ಅನಾವಶ್ಯ ಓರ್ ದಿನತಾರ ಪಣಿ ಪಾಳ್. ಪೊಲಾಕಂಜ ನಂಗಳೇ ಕೊಜ್ಜಿ ತಿಂಜಕ ಪತ್ತಿರುವದ್" ಗಿಡ ಆಯಿಪೋಪಿಂಜತ್.
- ಪೂವಿ : ನೀಕ್ ಸುಲ್‌ಭ ಆಡ್‌ಂದ್ ಎಣ್ಣಪ್ಪ. ಚೆನ್ನ ಚೆನ್ನೆಂಗೇ ಕೊಜ್ಜಂಡ್ ಎಕ್ಕ ಆಪ? ಅದ್‌ನ ಒಣ್ಣೆಕೊಡುವಕೂ ಕಷ್ಟ. ಉಪಕಾರಕ್ ಎಣ್ಣಕ ಈ ಕಾಲತ್ ಅದೇ ಇಲ್ಲೆ!.... ಅದಿರಡ್, ಎಂತಾಚಿ ಪೋನಲ್ಲಿ? ಅದ್‌ನ ಎಣ್ಣೆ!
- ಮಾಚು : ಎಂತಾಪ? ನಾನ್ ನಾಯಿನ ತೇಡಿಯಂಡ್ ಪೋಪಕ ನಾಯಿ ಬಾಲ್‌ನ ತೇಡಿಯಂಡ್ ಪೋಯಿತ್ ಅಚ್ಚಿಕೆ!
- ಪೂವಿ : ಚೆನ್ನ ಬುಡ್‌ತಿತ್ ಎಣ್ಣೆ ಮಾಚು....
- ಮಾಚು : ಓರ್ ಪೇಪರ್ ಪೆನ್ನ್ ಎಡ್‌ತ ಬಾ ಅಂದಕ....
- ಪೂವಿ : ಎಂತಾಂಗ್ ಪೇಪರ್ ಪೆನ್ನ್?...
- ಮಾಚು : ಬುಡ್‌ತಿತ್ ಕಾಟಿತಪ್ಪಿ....
- ಪೂವಿ : ಎಣ್ಣೆ ಮಾಚು ನೀನ್, ತಮಾಷಿ ಕಳಿಕತೆ!....
- ಮಾಚು : ತಮಾಷಿ ಕಳಚಿಯೆ ನಾನಲ್ಲ ನೀನ್! ನಾನೆಣ್ಣ ನಂಗಳೇ ಕಾಫಿ ಕೊಯ್ಯನಾಂದ್. ಬರೆಲ್ ಕಯ್ಯಲೆ. ಅಲ್ಲಿ ಉರ್‌ಪು ಉಂಡ್, ಇಲ್ಲಿ ಅದ್ ಉಂಡ್-ಇದ್ ಉಂಡ್‌ಂದ್ ಕೊರಗಿ ಕಳಚಿಯೆ. ಇಕ್ಕ ನೋಟ್ ಪಾಡ್!
- ಪೂವಿ : ಎಂತ ಪಾಡ್‌ಂದ್ ನೀನೆಣ್ಣೆತ ನಾಕೆನ್ನನೆ ಗೊತ್ತಾಂಡು?... ಉರ್‌ಪು ಕಡ್‌ಚಕ

ಮೇಲ್‌ಡೀ ಕಡಿಪು ನಾಕ್ ಗೊತ್ತುಂಡಾ ನೀಕ್? ಕಾಫಿ ಪರಿಪ್ಪಾನ ಬುಟ್ಟಿತ್ ತೋಟತ್ ಮಾಂದಿಯಂಡ್ ಅಳತವಕಾಪ?... ಕೈಂಜಕಾಲ ಗೇನ ಉಂಡಾ? ನಾಕ್ ಕಯ್ಯಾಂದೆಣ್ಣಕಲೂ ಬರೆಕರೆಕ್ ಕೂಟಿಯ ಪೋಯ. ಕುಕ್ಕೆ ಅಡಿಕ್ ಉರ್‌ಂಡಿತ್ ಒರ್ ದಿನ ಇಡೀ ಆ ಕಾಫಿನ ಆಯುವದೇ ಆಚಿ. ಕೂಟ್‌ಕ್ ನೀಡ ಬೈಗಳ ಬೋರೆ!

ಮಾಚು : (ತಳಿ) ಉರ್‌ಂಡ್‌ನ ಚಾಯಿನ ಗೇನ ಮಾಡ್‌ನಕ ಇಕ್ಕಲೂ ತಳಿಬಪ್ಪ. ಅದೋರ್ ಕಟ್ಟಿಂಗ್‌ಗ್ಸರ ಬೇಲಿ ಇಲ್ಲತಿಂಜಕ ಡೈರೆಕ್ಟ್ ಬೇಲ್‌ಕ್! ಅಲ್ಲಿಂಜ ಎದ್ದಿತ್ ಆ ಬರಿಕೊಮ್ಮ ಈ ಬರಿಕೊಮ್ಮ ನೋಟುವ ಸ್ವೆಲ್‌ನ ನೋಟೊಂಡಿಂ ಜತ್. ಬುದ್ದದ್ ಬೇಜಾರಲ್ಲ ಇವಕ್! ದಾರೇಂಗಿ ನೋಟ್‌ಚಾಂದ್ ಬೇಜಾರಾಯಿಟ್ಟೆ!

ಪೂವಿ : ಥ್ಯಾಂಕ್ಸ್ ಮಾಚು. ನಾನ್ ಬೂವಕ ನೀಕ್ ಕುಶಿ ಆಚಲ್ಲ ಥ್ಯಾಂಕ್ಸ್!

ಮಾಚು : ಚೆಡಿ ಬಪ್ಪ ನೋಟವಕ್? ಉಳ್ಳಾನ ಎಣ್ಣೆಟಕ?

ಪೂವಿ : ನಾಕೆನ್ನಂಗ್ ಚೆಡಿ ಬರಂಡಿಯೆ? ನೀನ್ ಕಾಫಿ ಗಿಡ ಪತ್ತಿರುವಂಜಿ ನೇಂದ್ ಕಳಚಂಡಿಂಜದ್? ಗೇನೇ ಇಲ್ಲೆ ಪಾಪ!

ಮಾಚು : ಅದ್‌ಂಗೆಂತ ಮಾಡುವಕಾಪ? ಕೊಂಬೆ ಪೊಟ್ಟಿ ಪೋಚೆಂಗಿ ಮಾತ್ರ ನೀಕ್ ಬಲ್ಯ ವಿಷ್ಯ ಆಯಿಪೋಪ. ಕೊಂಬೆ ಪೊಟ್ಟಿತ್ ಬಾವಲಿ ಪಕ್ಷಿರನ್ನೆಕೆ ಕಾಫಿ ಗಿಡತ್ ನೇಂದ್‌ಕಳಚಂಡಿಪ್ಪಕ ನಿನ್ನ ಬಂತ ನಾನೇ ಬುಡ್‌ತಿಯೆ. ಮರ್‌ಂದ್ ಪೋಚಾ?

ಮಾಚು : ಅದೆಲ್ಲ ಇರಡಲ್ಲಿ. ದಂಡಾಳೂ ಬೂವಾತ್ ನಿಸ್ಸೀಮಂಗಳೇ ಬುಡ್. ನೋಟ್ ಆಳ್ ತೇಡುವಕ್ ಪೋಕಲಾಯಿತ್ ಎಚ್ಚೆಕೆಲ್ಲ ವಿಷ್ಯ ಬಾತ್ ತಕ್ಕ್‌ಲ್?

ಪೂವಿ : ಎಂತಾಚಿ ಮಾಚು, ಪೋನ ವಿಷ್ಯ?

ಮಾಚು : ಅದೇ ಎಣ್ಣೆಲ್ಲ ಪೂವಿ? ನಾಯಿನ ತೇಡಿಯಂಡ್ ಪೋಕಣೆ ನಾಯಿ ತಾಂಡ ಬಾಲ್‌ನ ತೇಡಿಯ ಪೋಯಿತ್‌ಂದ್. ಬಿದ್ದು ಬಾವಂಡಲ್ಲಿ ಆಳ್ ಉಂಡೆಗೆನ್ನೆ? ಅಂವೊ ಎಕ್ ಗಾಡಿ ಬುಟ್ಟಿತಾಯಿತೊ? ಬಿದ್ದು ಬಾವ ಆಳ್ ತೇಡುವಕ್‌ಂದ್ ಮನೆ ಬುಟ್ಟಿತ್ ಮೂಂದ್ ದಿನ ಆಯಿತೊಲೊ! (ತಳಿ)

ಪೂವಿ : ಉಯಿ ರಾಮಾ! ಅಚ್ಚಕ್ ಚಾಯಿಲಿಂಜತಲ್ಲ ಅಯಿಂಗ ವಡಿಯನೂ ಪೊಣ್ಣೂ ಅಯಿಂಕೆಂತಾಯಿರ್‌ತ್ ಅಂದಕ? ನಾಲ್ ಕಾಲತ್‌ಂಜ ಅಲ್ಲಿಯೇ ಇಂಜತಲ್ಲ?

ಮಾಚು : ಅದ್ ಸುಮಾರೆಲ್ಲ ಕತೆ ಉಂಡ್ ಪೂವಿ. ಸುರೂಲ್ ವಡಿಯ ಪತ್ತಾಯಿರ ಉರ್‌ಪಿಯ ಆಂಡೊಂದ್ ಬಿದ್ದು ಬಾವನ ಕೇಟಂಡ್ ಪೋಚೊಲೊ. ಅಲ್ಲಿಂಜ

ಓರ್ ವಾರತ್ ಓರ್ ಕಾಗದ ಬಾತೊಲೊ ಪೊಣ್ಣಾಕ್. ನಾಕ್ ಸೀರಿಯಸ್ ಆಯಿತ್ ಆಸ್ಪತ್ರೆಕ್ ಅಡ್ಮಿಟ್ ಆಯೆ. ಆರ್ಜಂಟ್ ಪತ್ತಾಯಿರ ಉರ್ಪಿಯ ಕೇಟಂಡ್ ಬಾಂದ್.

ಪೂವಿ : ಅಲ್ಲಿಂಜ?... ಕೊಡ್ತಿತಾ ಬಿದ್ದು ಅಣ್ಣಯ್ಯ?

ಮಾಚು : ಅಂಜಾಯಿರ ಉರ್ಪಿಯ ಕೊಡ್ತಿತ್ ಅಯಿಚಿತ್. ಪಾಪ ಕಾಯಿಲಾಂದ್ ಎಣ್ಣುವಲ್ಲ. ಬದ್ಕಿಯವಡ್ಂದ್. ಪೋನಯಿಂಗ ದಂಡ್ ತಿಂಗ ಆಚೆಂಗೂ ಪತ್ತೇ ಇಲ್ಲೆಲೊ.

ಪೂವಿ : ಅಯಿಂಡ ಅಡ್ರೆಸ್ ಗೊತ್ತಿಂಜಿಲಿಯ ಬಿದ್ದು ಅಣ್ಣಯ್ಯಂಗ್?

ಮಾಚು : ಅಡ್ರೆಸ್ ಕೇಟಂಡಿಂಜಕೆನ್ನೆ? ಊರ್ ಪೆದ ಮಾತ್ರ ಗೊತ್ತಿಂಜಿಯೊಲೊ... ಅಲ್ಲಿಕ್ ಪೋಯಿತ್ ಕೇಪಕ "ಅಂತ ಪೆದಕಾರಂಗ ಈ ಊರ್ಲ್ ದಾರೊ ಇಲ್ಲೆಂದ್" ಎಣ್ಣೊಚೊಲೊ.

ಪೂವಿ : ಅಂದಕ ಮುಂಡತೇಂಗಿ ಎಣ್ಣೆಟ್ಟಿಯದಾ ಅವು?

ಮಾಚು : ಆಯಿತ್ತಿರೊಂಡು. ದಾರ್ನೊ ನಂಬುವಕಯ್ಯುಲೆ ಈ ಕಾಲತ್....

ಪೂವಿ : ಅಲ್ಲ, ಪೋಲೀಸ್ ಕಂಪ್ಲೇಂಟ್ ಕೊಡ್ಕೊಲಿಂಜತಲ್ಲ ಮಾಚೂ?

ಮಾಚು : ಅದ್ನೋ ಕೇಟ ನಾನ್, ಬಾವನ. ಅಡ್ರೆಸ್ ಸೆರಿಕ್ ಕೇಟೋವತದ್ ನಾಡದೇ ತಪ್ಪು. ಅಂತಲ್ಲಿ ಕಂಪ್ಲೇಟ್ ಕೊಡ್ತಕ ನಾಡ ಮಂಡಕೇ ಬಕ್ಕೊಂದ್ ಮುಂಡತೆ ಆನೇಂದ್ ಎಣ್ಣೊಚಿ.

ಪೂವಿ : ಅಲ್ಲೆಂಗಿ ಮಾತ್ರ ಕುಲಗೋತ್ರ ಗೊತ್ತಿಲ್ಲತಯಿಂಗಳ ಏದ್ ಧೈರ್ಯತ್ ಮನೆಲ್ ಆಕಿಯಂಡಿತಿಕ್ಕೊಂದ್? ಆಳ ಕ್ವೆಟ್ಚೇಂದ್ ಒಮ್ಮಕೇ ಆಕಿಯೋವದಾ?

ಮಾಚು : ನೀನ್ ಬಾಕಿ ಉಳ್ಳಯಿಂಗಳ್ ಎಣ್ಣುವಿಯ. ನೀಕೂ ಓರಮ ಅಯ್ಯೋ ಪಾಪಾಂದ್ ಆಯಿತ್ ನೀನೂ ಅನ್ನನೇ ಮಾಡಿತಿಲ್ಲಿಯಾ?

ಪೂವಿ : ಅಂವೊ ಆಚೆಂಗಿ ಚೆರಿಯ ಕ್ವೆಣ್ಣು.

ಮಾಚು : ಚೆರಿಯಂವನೊ, ಬಲ್ಯವನೋ ಕುಲಗೋತ್ರ ನೀಕ್ ಮಾತ್ರ ಗೊತ್ತಿಂಜತಾ? ಅನ್ನನೇ ಬಿದ್ದು ಬಾವಂಗೂ ಆಯಿತಿಕ್ಕು. ಪಾಪಾಂದ್ ಗೇನ ಮಾಡ್ನಕ ಪಾಪತ್ ಬಂದ್ ಪೋಕು. ಅಂತ ಕಾಲ ಇದ್.

ಪೂವಿ : ಸುರಿರಲ್ಲಿಕ್ ಪೋಯಿತಿಂಜಿಯಾ?

ಮಾಚು : ಅವಂಡಲ್ಲಿ ಇಂಇಸೋರ್ ಕತೆ. ಸುರೇಶಂಡ ಅವ್ವ ಒಬ್ಬಳೇ ಕಾಫಿ ಕೊಜ್ಜಂಡ್ ಇಂಜತ್. ನಾನ್ ಪೋಪಕ. ಅಂವೊ ಪಿರಿಯಾಪಟ್ಟಿತ್ಂಜ ಆಳ್ ಕೂಟಿಯಂಡ್ ಬಪ್ಪೇಂದ್ ಪೋನಂವೊ ಮೂಡ್ ತೇಟಿಯಂಡ್ ಬಂದ

ಬಟ್ಟೆಕ್ ಸುಂಕ ಇಲ್ಲೇಂದ್ ಬಯ್ಯಕ್ ಬಾತೊಲೊ. ಇಕ್ಕ ನೆರೆಮನೆಕಾರಕ್ ಕೂಡಾಳಾಯಿತ್ ಪೋಯಿತೊಲೊ?

ಪೂವಿ : ಕಾಲೋದಿ ಪರಿಯಾಪಟ್ಟಿತ್ಂಜ ಜನ ಕೂಟ್ಟಿಬಪ್ಪಿಂಜತ್ ಸುರಿ. ಈಯಾಂಡ್ ಎಂತಾಯೆಲೊ?

ಮಾಚು : ನಾನೂ ಅದ್ನೇ ಕೇಟ ಮುದ್ದಾಕಿನ. ಮುದ್ದಾಕಿ ಬೊಚ್ಚು ಬಾಯಿನ ಇಚ್ಚಕಗಲ ಮಾಡ್ಯಂಡ್ ತೆಳ್ಚತ್. ಒರೇ ಸಮ! (ತೆಳಿ)

ಪೂವಿ : ಎಂತಾಂಗ್? (ತೆಳಿ) ಮಿಂಞಲೇ ತೆಳಿಪ್ಪಕ್ ಗೊತ್ತಿಲ್ಲೆ ಅದ್ಂಗೆ!....

ಮಾಚು : ಇಂವೊ ಪಿರಿಯಾಪಟ್ಟಿಕ್ ಪೋಪಕ ಇವಂಡನ್ನೇ ಕೊಡಗ್ಂಜ ಬಂದವು ಪದ್ನೇಟ್ಟಾಳ್ ಬಸ್ಲಿಂಜತೊಲೊ.....

ಪೂವಿ : ಪದ್ನೇಟ್ಟಾಳ್ ಕೊಡಗ್ಂಜ ಪೋನವಾ?

ಮಾಚು : ಅಕ್ಕು ಪೂವಿ. (ತೆಳಿ) ಎಲ್ಲಾಕೂ ಒರೇ ಸಮಸ್ಸೆ. ಕಾಫಿ ಕೊಯ್ಯುವಕ್ ಜನ ಇಲ್ಲೆ.

ಪೂವಿ : ಅಲ್ಲಿ ಎಂತಾಚೊಲೊ?

ಮಾಚು : ಅಲ್ಲಿ ಎಂತಾಪ? ಈ ಸಲಿ ಮಾತ್ರ ನಾವ್ ಬರಾಕಿಲ್ಲ ಬುದ್ಧಿ. ನಮ್ಗೆ ಇಲ್ಲೇ ಬೇಜಾನ್ ಕೆಲ್ಪ ಐತೆ. ಒಂದಿನಕ್ಕೆ ಇನ್ನೂರೂಪಾಯಿಕೊಡ್ತಾರೆ. ಆ ಮ್ಯಾಕ್ ಎರಡೊತ್ತು ಟೀ, ಉಟಾನೂ ಕೊಡ್ತಾರೆ"ಂದ್ ಎಣ್ಣೆಚೊಲೊ! ಇಲ್ಲಿಂಜ ಪೋನವು ಒಬ್ಬಂಡ ಮೂಡ್ನ ಒಬ್ಬೊ ನೋಟ್ಯಂಡತೊಲೊ (ತೆಳಿ)

ಪೂವಿ : ವಾಪಾಸ್ ಬಸ್ ಪತ್ತನದೇ ಕಾಂಬ?

ಮಾಚು : ಅದ್ನೇ ಮುದ್ದಾಕಿ ಎಣ್ಣೆಯಂಡ್ ತೆಳ್ಚಿಯೆ. "ಬೋಂಡ ಕುಂಞಿ... ನಾಲ್ ದಿನ ತಡ ಆಚಿಂಗೂ ಪರೋಲೆ. ನಂಗಳೇ ಕಾಫಿ ಕೊಯ್ಯನಾಂದ್ ಎಣ್ಣೆ. ಕೇಟತಾ ಇಂವೊ? ಬಸ್ಸಲ್ ಪದ್ನೇಟ್ಟಾಳ್, ಇಂವೊ ಒಬ್ಬೊ. ಅಲ್ಲಿಕ್ ಪತ್ತೊಯಿಂಬ ದಾಳ್. ಪತ್ತೊಯಿಂಬದ್ ಜಾಗತ್ ಎಲ್ಲಾರೂ ಒನ್ನಾಂದೊನ್ನಾಂದ್ ಕಾಫಿ ಕೊಜ್ಜಕಲೂ ಎಲ್ಲಾಡದೂ ಆಯಿಪೋಪಿಂಜತ್. ಪೆದ್ದಂಗ ಪೆದ್ದಂಗಾಂದ್" ತೆಳ್ಚತ್ ಮುದ್ದಾಕಿ! (ತೆಳಿ)

ಪೂವಿ : ನೇರೇ ಅಲ್ಲ? ಆಚಿಂಗಿಕ್ಕ ದಾಡದೂ ಮೇಲ್ ಬಗ್ಗುವದೇ ಇಲ್ಲೆಲ್ಲ ಮಾಚೊ? ಎಲ್ಲಾಕೂ ಅಭ್ಯಾಸ ಆಯಿಪೋಯಿತ್ ಆಳಡ ಕೈಲ್ ಮಾಡ್ಚಿಟ್ಟಿತ್....

ಮಾಚು : ಕಾಲ ಎಕ್ಕೊಲೂ ಒರೇ ಸಮ ಇಪ್ಪುಲೆ ಪೂವಿ. ಕುಂಡ್ ಪೋಯಿತ್ ಪರೆಪೆ ಆಕು. ಪರೆಪೆ ಪೋಯಿತ್ ಕುಂಡ್ ಆಪ... ಪಿರಿಯಾಪಟ್ಟಿತ್ಂಜ ಬಪ್ಪಿಂಜತಲ್ಲ ಆಳ? ಆಯಿಂಕಿಕ್ಕ ಕೈದುಂಬ ಪಣಿ ಅಲ್ಲಿಯೇ ಕ್ಕಟ್ಟುವ. ರಸ್ತೆ ಅಗಲ

ಮಾಡ್ಯಂಡುಂಡ್. ಇಂಞಿ ಓರಾಂಡ್ ದಂಡ್ಕಾಲ ಅದೇ ಪಣಿ ಕ್ಕಟ್ಟುವ.

ಪೂವಿ : ಅದೆಲ್ಲ ಏದ್ ಶಾಶ್ವಿತ ಮಾಚೂ?

ಮಾಚು : ಶಾಶ್ವಿತ ಅಲ್ಲ ನೇರೇ. ಇಂದ್ ಚಾಯಿಲ್ ದಿನ ಕೈವಾ? ನಾಳೆತದ್ ನಾಳೆ ಗೇನ ಮಾಡ್ನಕ ಆಚಿ. ದಿನಕ್ ಇರೂರ್ ಉರ್ಪಿಯ ಅಳ್ತಲ್ಲಿಯೇ ಕ್ಕಟ್ಟುವಂದಾಪಕ ದೂರಕ್ ಪೋಯಿತ್ ಎನ್ನಂಗ್ ನೈಕೊಂಡು?

ಪೂವಿ : ಇನ್ನನೆ ಆಚೆಂಗಿ ಆಳಳ ನಂಬಿಯಂಡ್ ತೋಟ ಮಾಡ್ನಯಿಂಗಡ ಗತಿ ಎನ್ನಾಕು ಮಾಚು? ಎಲ್ಲಾ ಪಾಳ್ ಬುದ್ದೊಪುಲಿಯಾ?

ಮಾಚು : ನೋಟ್ ಪೂವಿ, ಉಂಬಕಳ್ಪಕಲೇ ಗೇನ ಮಾಡೊಂಡು. ನಾಡ ತಳಿಯತ್ ಇಚ್ಚೆಕೆಲ್ಲ ಕೂಳ್ ಇಚ್ಚಿಂಡಿಯೆಲ್ಲ - ಉಂಬಕ್ ಕಯ್ಯುವಂದ್...

ಪೂವಿ : ನೀನೆಂತ ಎಣ್ಣೆವೊ ಅಂದಕ? ತೋಟ ಮಾಡುವದೇ ಬೋಂಡಾಂದಾ?

ಮಾಚು : ತೋಟ ಮಾಡುವದ್ ಬೋಂಡಾಂದಲ್ಲ. ಮಾಡ್ನ ತೋಟತ್ನ ಚಾಯೋಡೆ ಪೋತುವಕ್ ಕಯ್ಯುವಂದ್ ಗೇನ ಮಾಡಂಡು.

ಪೂವಿ : ಅದೆನ್ನೊ ನೇರೇಂದೆಣ್ಣಂಗ. ಆತೇಂಗಿಕ್ಕ ಮಾಡ್ನ ತೋಟತ್ನ ಪಾಳ್ ಬುಡುವಕ್ ಕಯ್ಯುವಾ? ಎನ್ನನೆಂಗಿ ಮಾಡತೆ ಆಪಾ?

ಮಾಚು : ಓರ್ ಗಾದೆ ಕೇಟಿತುಳ್ಳಿಯಲ್ಲ? ಅಗಲ ಮಾಡತೆ ಆಳ ಮಾಡ್ಂದ್ ಅಂಡ ಅರ್ಥ ಎಂತ ಎಣ್ಣೆ ನೋಟನ?

ಪೂವಿ : "ನೀಕ್ ಎಚ್ಚಕ್ ಸಾದ್ಯ ಉಂಡೋ ಅಚ್ಚಕ್ ಮಾತ್ರ ಮಾಡ್ ಅಕ್ಕುವಾ?"

ಮಾಚು : ಪರೋಲೆಲ್ಲ ನಂಗಡ ಪೂವಿಕೂ ಗಾದೆರ ಅರ್ಥ ಗೊತ್ತುಂಡಲ್ಲ ಅಂದಕ!

ಪೂವಿ : ಅದೆಂತಾಂಗ್ ಮಾಚು ನೀನ್ ಅದ್ನ ಒತ್ತಿತ್ ಎಣ್ಣೆವೊ? ನಾಕೆನ್ನ ಅಚ್ಚಕ್ ಮಂಡೆ ಇಲ್ಲೆಂದ್ ನೀಡ ಗೇನ ಕಾಂಬ. ನಾಡ ಪಪ್ಪ ಗಾದೆರ ಗೂಡ್ ಗೊತ್ತಿರಡ್!

ಮಾಚು : ಅಯ್ಯೊಯ್ಯೊ ಮಾಪು ಮಾಡೊಂಡು ಪೂವಮ್ಮಕ್ಕ ಎಂತೋ ರಾಹುಕಾಲತ್ ಅರಿಯತೆ ಪರಂದ್. ನಿಂಗಡ ಕೇಳಿ ಗೊತ್ತಿಂಜಿತೂ ಪರಂದಾಂಗ್ ಮಾಪು ಮಾಡ್ಕೊಳಿ!

ಪೂವಿ : (ತೆಳಿ) ಐಲಾಟ ಕಳಿಪ್ಪಾಂಗೂ ಓರ್ ಮಿತಿ ಬೋಂಡು ಮಾಚು. ಅಲ್ಲ, ರಘು ಬಾವಂಡಲ್ಲಿಕ್ ಪೋಪೀಂದೆಣ್ಣೆತಿಂಜಿಯಲ್ಲ ಪೋಯಿತ್ಲ್ಲಿಯ ನೀನ್ ಅಲ್ಲಿಕ್?

ಮಾಚು : ಓ ಅದೋರ್ ಕತೆ ಬಾಕಿ ಇಂಜತ್ ನೋಟ್ ಎಣ್ಣುವಕ್.....

ಪೂವಿ : ಅಲ್ಲಿಯೂ ಓರ್ ಕತೆ ಎಂತ ಉಳ್ಳೊ?

- ಮಾಚು : ಕತೆಕೆನ್ನೊ ಬರ ಪೂವಿ? ಬಗ್ಗಿತ್ ನೇರಣೆ ನೂಯಿಟ್ಟೋರ್ ಕತೆ ಈ ಕಾಲತ್.
- ಪೂವಿ : ಎಣ್ಣೊ ಮಾಚು. ಅದ್ನೋ ಕೇಕನ ಅಂದಕ...
- ಮಾಚು : ಬೈಟೆಕ್ ಕೂಳ್ ಕರಿ ಎಲ್ಲಾ ರೆಡಿ ಉಂಡಾ?
- ಪೂವಿ : ಎಲ್ಲಾ ರೆಡಿ ಉಂಡ್. ಕರಿನ ಚೆನ್ನ ಬಿಸಿ ಮಾಡ್ಯಂಡಕ ಆಚಿ. ಪಾಲ್ ಕಾಚಿತ್ ಅಕ್ಕಲೇ ಆಯಿತ್. ಮಕ್ಕಳ ಕೊಡಿಮನೆಂಜ ಕೂಟ್ಟಿ ಬಪ್ಪದೂ ಉಂಬದೂ!
- ಮಾಚು : ಸರಿ, ಕೇಳ್ ಅಂದಕ. ನಾನ್ ಪೋಪಕ ರಘು ಮಂಡೆಕ್ ಕೈ ಬೆಚ್ಚಂಡ್ ಅಳ್ತೀತ್.
- ಪೂವಿ : ಎಂತಾಂಗೊಲೊ? ಆಳಡ ವರೀಸ್ ಕಾಂಬ...
- ಮಾಚು : ಅದೇ ವರೀಸ್ ಪಿಂಞಂತ? ಪಂಡೇ ಜೀನೆ ಬುದ್ದಿಕಾರ. ಅಂಡ ಕೂಟ್ಕ್ ಇಂತದೋರ್ ಕೇತರೆ ಆಯಿಟ್ಟಕ ದೇವಳೇ ಕಾಪಾಡೊಂಡು!
- ಪೂವಿ : ಎಂತ ಕೇತರೆ?....
- ಮಾಚು : ಕೈಂಜ ಕಾಲ ಪದ್ನಂಜಿ ಬ್ಯಾಗ್ ಶುಂಠಿ ನೆಟ್ಟಿಂಜದ್ ಗೊತ್ತುಂಡಲ್ಲ ನೀಕ್?....
- ಪೂವಿ : ಅಕ್ಕು ರಾಣೆ ಎಣ್ಣೆತಿಂಜತ್...
- ಮಾಚು : ಅಂದಕ ಬಾಕಿ ಸಂಗತಿನೋ ಎಣ್ಣೆತಿಕ್ಕೊಂಡುವಲ್ಲ?....
- ಪೂವಿ : ಅದೆಂತ ಮಾಚು? ಬಾಕಿ ಸಂಗತೀಂದೆಣ್ಣೆಕ್? ಅದೊಂದೂ ಗೊತ್ತಿಲ್ಲೆ ನಾಕ್!
- ಮಾಚು : ಅವ ಬಂದಂಡಿಲ್ಲಿಯ ನಿಂಗಡ ಮೀಟಿಂಗ್ಕ್?
- ಪೂವಿ : ಬಂದಂಡುಂಡ್ ಅವ ಅಂತದೊಂದು ಎಣ್ಣೆತ್ಲೆಲ್ಲ? ಎಂತ ಮಾಚು?
- ಮಾಚು : ಪೊಣ್ಣಾಳ್ ಮಕ್ಕಡ ಅಡ್ಕ ಪತ್ತ್ ಪನ್ನೆರಂಡಾಳ್ ರಘುರಲ್ಲಿಕ್ ಅಯಿಂಗಾಯಿತೇ ಬಾತೊಲೊ. ಪಣೆ ಉಂಡಾಂದ್ ಕೇಟಂಡ್...
- ಪೂವಿ : ನಲ್ಲದೇ ಆಚಲ್ಲ? ತೇಡಿಯಂಡ್ ಪೋನ ಬಳ್ಳಿ ಕಾಲಕೇ ಕೆಣ್ಂಜನ್ನೆ ಆಚಿ!
- ಮಾಚು : ಅನ್ನನೇ ಆಚೊಲೊ ರಘುಕ್. ಆಚೆಂಗಿ ಇಕ್ಕ ಕಾಲಕ್ ಕೆಣ್ಂಜಂಡ ಬಳ್ಳಿ ಬೋಳೆಕೂ ಕೆಣ್ಂಜಂಡಿತ್ ಅಚ್ಚಿಕೇ!
- ಪೂವಿ : ಎಂತ ಎಣ್ಣೆಂಡುಳ್ಳ ನೀನ್?
- ಮಾಚು : ವಿಷ್ಯ ಒಡ್ತಿತ್ ಎಣ್ಣೆವಿ ಕೇಳ್. ಬಂದ ಆಳಳ ಆಕಿಯಂಡಿತ್ ಮನೆಲ್. ಕೈಂಜ ಕಾಲ ಅಳ್ಕತೆ ಬುಟ್ಟಿ ಶುಂಠಿ ಇಂಜತಲ್ಲ? ಅದ್ನ ಅಳ್ಕಿರೀಂದ್ ಎಣ್ಣೆಚೊಲೊ ಒನ್ನಾಂದ್. ಅದ್ನ ಅಳ್ಕಿತ್.
- ಪೂವಿ : ಶುಂಠಿಕ್ ರೇಟೇ ಇಲ್ಲೆಲ್ಲ ಮಾಚು? ಪಿಂಞಂತಾಂಗ್ ಅಳ್ಕಿಯೆ?
- ಮಾಚು : ಅದ್ಂಗೇ ಎಣ್ಣೆವೊ ಜೀನೇ ಬುದ್ದೀಂದ್. ಕಾಫಿ ಪಣ್ಣಾಯಿತ್ ಕರೋಯಿತ್. ಅದ್ನ ಬುಟ್ಟಿತ್ ಶುಂಠಿ ಅಳ್ಕಿವಕ್ ಎಣ್ಣೆಚೊಲೊ. ಪಿತ್ಯಾಂದ್

ಪಕನು ಪೂಮ್ನಾಲೆ

ಎಂತಾಚೀ.... ಅಯಿಂಡ ಇಂಞೊಬ್ಬೊ ಕೂಟ್ಕಾರ ಇಯಂಗಳ ತೇಡಿಯ ಬಾತೊಲೊ.

ಪೂವಿ : ಇದೆಂತದೋ ಕತೆ ಸುಮಾರ್ ಉದ್ದ ಉಂಡ್ ಕಾಂಬಲ್ಲ?

ಮಾಚು : ಅದ್‌ಂಗೇ ಎಣ್ಣೆಯೆ ನೀಕ್. ಕರಿ- ಕೂಳ್ ಎಲ್ಲಾ ಆಯಿತಾಂದ್?...

ಪೂವಿ : ಎಲ್ಲಾ ರೆಡಿ ಉಂಡ್‌ಂದ್ ಎಣ್ಣೆಲ್ಲ. ನೀನ್ ಎಣ್ಣೆಕ್ಕ್ ವಿಷ್ಯ....

ಮಾಚು : ಅಂದ್ ಬೈಟ್ ಆಳ ಇರ್ಲೂಡೀ ಗುಸ ಪಿಸಾಂದ್ ನಡ್‌ಪಾದ್ರೆಕೆತ್ತನೆಯೂ ತಕ್ಕ್ ಪರಂದೊಂಜಿಜತೊಲೊ. ಬೊಳಿಯಾನದೂ ಒಬ್ಬೊ ಬಂತ್ ರಘುಕ್ ಓರಿಚ್ಚಕ್ ಉದ್ದತ್‌ರ ಪೊನ್ನ್ ಕಟ್ಟಿನ ಕಾಟ್‌ಚೊಲೊ!

ಪೂವಿ : (ಆಶ್ಚರ್ಯ) ಎಂತ ಪೊನ್ನ್ ಕಟ್ಟಿಯಾ? ಅಯಿಂಗಡ ಕೈಲ್?

ಮಾಚು : ಅಕ್ಕು ಪೂವಿ. "ನಂಗಡ ಊರ್‌ಲ್ ಓರ್ ಜಾಗತ್ ನಂಗ ಪಣಿಕೆಜ್ಜಂಡಿಪ್ಪಕ ನಂಕ್ ಸುಮಾರ್ ಪೊನ್ನ್‌ಕಟ್ಟಿ ಕೊಟ್ಟಿತ್. ಅದ್‌ನ ನಂಗ ಅಲ್ಲಿ ಮಾರ್‌ನಕ ನಂಗಳ ಪೊಲೀಸ್‌ಕಾರ ಮುಂಡತೇಂಗಿ ಕೇಸ್ ಇಡುವಂಜಿ ಇದ್‌ನ ಬಲ್‌ಚಿರೊಂದ್ ನಂಗ ಇದ್‌ನ ಇಲ್ಲಿಕ್ ಎಡ್‌ತ ಬಂದಿತ್‌ಂದ್ ಎಣ್ಣೊಚೊಲೊ ರಘುರ ಕೂಡೆ.

ಪೂವಿ : ಕೆಮಿ ನೇರೆ ಆಯಿತಿಕ್ಕು ರಘು ಬಾವಂಗ್! ಪಿಂಞೊಂತ ಮಾಡ್‌ಚೊಲೊ?

ಮಾಚು : ಅಂದಾಜಿ ಪತ್ತ್ ಕೇಜಿರಚ್ಚಕ್ ಉಂಡ್. ನಂಕ್ ನಿಂಗ ಬೊರೀ ದಂಡ್ ಲಕ್ಕ ಉರ್‌ಪಿಯ ತಾತೆಂಗಿ ಮದೀಂದೆಣ್ಣೊಚೊಲೊ. ಈ ಪೊನ್ನರ ಚೂರ್‌ನ ಪೇಟೆಕ್ ಕೊಂಡಪೋಯಿತ್ ನೋಟಣೆ ಇದ್ ನೇರಾನ ಪೊನ್ನೇಂದ್ ಗೊತ್ತಾಪಕ ರಘು ಬಾವಂಗ್ ಅಂದ್‌ಡೀ ವರ್‌ಕ್ ಬಂದ್‌ಲೆಲೊ!

ಪೂವಿ : ಉಯ್ಯವ್ವಯ್ಯೊ! ಪತ್ತ್ ಕೇಜಿರಚ್ಚಕ್ ಪೊನ್ನಕ್ ಬೊರೀ ದಂಡ್‌ಲಕ್ಕ ಉರ್‌ಪಿಯವಾ? ನಂಗಳೇ ಎಡ್‌ತವಲಿಂಜತಲ್ಲ ಮಾಚೊ?... ಓರಂದ್ ಕೈಕ್ ನನ್ನಾಲ್ ಬಳೆ, ಪತ್ತ್ ಪವನ್‌ರ ಒರ್ ಕರ್ತಮಣಿ.... ಕಾಚೈನ್ ಸತಾ ಪೊನ್ನರದೇ ಮಾಡ್ತೊವಲಿಂಜತ್.... ಎಂತಾ ಚ್ಯಾನ್ಸ್ ಆಲ್ಲಾ?

ಮಾಚು : ಥತ್! ಸುರು ಆಯಿರ್‌ತ್ ಇವಡ.. ಈ ಪೊಣ್ಣಾಳಡ ಹಣೇಬರೇ ಇಚ್ಚಕ್! ಪೊನ್ನಂದ್ ಎಣ್ಣೆಟಕ ಮದಿ ಓರಂದ್ ಲೀಟರ್ ನೀರ್ ಬಂದ್ರುವ ಬಾಯಿಲ್! ನಾನಿಂಞೂ ಕತೆ ಎಣ್ಣೆತೇ ಆಯಿತ್‌ಲೆ. ಸುರು ಆಯಿರ್‌ತ್ ಇವಡ ಮಾಲ್ ಲಿಸ್ತ್....

ಪೂವಿ : (ಊಜಳೆ) ಎಣ್ಣೊ ಮಾಚು. ಎಂತೋ ಆಸೆ ಆಯಿರ್‌ತಪ್ಪ. ಅದ್‌ಲೆಂತ ತಪ್ಪುಳ್ಳೆ? ನಂಕೂ ಓರ್ ಮೂಡಿ ಕುಂಞೊ ಉಂಡ್ ಗೇನ ಉಂಡಾ ನೀಕ್? ಅವಕ್

ಕೊಡ್ತಕ ಪೋರ. ನಂಗಳೂ ಓರಚ್ಚಕ್ ಮಾಡಿತ್ ಬೆಚ್ಚೋವೊಂಡೂ. ನಾಳೆ ಕಾಲಾವಸ್ಥೆ ಎನ್ನನೆ ಬಪ್ಪಾಂದ್ ದಾಕ್ ಗೊತ್ತುಂಡ್? ಮಾಯಿರ ಕೈಕಾಲ್‌ಲ್ ಚೆನ್ನ ಪೊನ್ನ ತೂಂಗಿ ಕಳಚಂಡಿಂಜಕ ಮೈಮಳೂ ಚೆನ್ನ ಚಾಯಿಲ್ ನೋಟೋವ, ಚಾವ ಕಾಲಕ್.....

ಮಾಚು : ಆಚಾ ನೀಡ ಹರಿಕತೆ?

ಪೂವಿ : ನೀಕೆಕ್ಕೊಲೂ ನಾಡದ್ ಹರಿಕತೆಯೇ. ನೀಡದ್ ಮಾತ್ರ ಒರಿಜಿನಲ್ ಕತೆ.... ಮಾಡಿತಪ್ಪಕಂತೂ ಕಯ್ಯಲೆ. ಬಾಯಿಲ್ ಎಣ್ಣೆತಾಚೆಂಗೂ ಆಸೆ ತ್ತೇತವ ನಾಂದ್ ಗೇನ ಮಾಡ್‌ನಕ ಹರಿಕತೆಲೊ!

ಮಾಚು : ಆಚೆಲ್ಲ ಇಕ್ಕ? ನಾನಿಕ್ಕ ಬಾಕಿ ಕತೆನ ಎಣ್ಣೊಂಡುವಾ- ಬೋಂಡಾ?

ಪೂವಿ : ಎಣ್ಣೆ ಮಾಚು. ಒಮ್ಮ ಅದ್‌ಂಗೂ ಕಾಲನೇರ ನೋಟೊಂಡುವಾ?

ಮಾಚು : ಏಲಿಕ್ಕೆತ್ತ್ ಚಿ ನಾನ್ ಎಣ್ಣೆ ಕತೆ? ಮರ್‌ಂದೇ ಪೋಚೆಲ್ಲ.....

ಪೂವಿ : ಅದೇ ದಮ್ಮಯ್ಯ, ಪತ್ತ್ ಕೇಜಿ ಪೊನ್ನ!

ಮಾಚು : ನೀನ್ ಚೆನ್ನ ಬಾಯಿರ ನೀರ್‌ನ ಎರ್‌ಕಿಯ. ಕತೆ ಕೇಳ್... ದಂಡ್ ಲಕ್ಷ ಉರ್‌ಪಿಯ ಚರ್ಚೆ ಆಯಿತ್ ಒಂದರೆ ಲಕ್ಷಕ್ ಇಳೊಂಜತೊಲೊ. ಒಂದರೆ ಲಕ್ಷ ಅಲ್ಲಿಂಜ - ಇಲ್ಲಿಂಜ ಸಾಲಸೋಲ ಮಾಡ್ಯಂಡ್ ಅಯಿಂಗಡ ಕೂಡೆ ಅಯಿಂಗಡ ಊರ್‌ಕ್ ಪೋಯಿತ್ ರಘು.... ಅಲ್ಲಿ ಅಯಿಂಗ ದುಡ್ಡ್ ಕೇಟಂಡ್ ಓರ್ ಬ್ಯಾಗ್‌ಲ್ ಪೊನ್ನ ಕಟ್ಟಿನ ರಘುಕ್ ಕೊಡ್ತಿತ್....

ಪೂವಿ : ಆ ರಾಣಿರ ಹಾಂಕಾರ ಇಂಞಿ ತಡ್‌ಪಕೇ ಕಯ್ಯ ಕಾಂಬ. ಮಿಂಞಲೇ ಅವ ಮಂಡಲ್ ನಡ್‌ಪಿಂಜತ್. ಇಂಞಿ ಕೇಪದೇ ಬೋಂಡ.

ಮಾಚು : ನಾನೆಂತೋ ಎಣ್ಣೆಯಂಡಿಂಜಕ ಇವಡ ಕತೆಯೇ ಬೋರೆ. ವಿಷ್ಯ ಕೇಳ್ ಚಾಯಿಲ್!

ಪೂವಿ : ಆಚಿ ಮಾಚು. ಎಣ್ಣೆಕ್ಕ. ನಾನ್ ಎಡೆಲ್ ಬಾಯಿ ಇಡುಲೆ.

ಮಾಚು : ರಘು ಇರ್‌ಕಿರ್‌ಕ್ ಬಸ್ ಪತ್ತಿರುವಂಜಿ ಬಂತ ಮನೆಕ್. ಪೊಣ್ಣಾರ ಕುಸಿ ತಡ್‌ಪಕೇ ಕಯ್ಯೊಲೊ!.... ದಾಕೂ ಈ ವಿಷ್ಯ ಎಣ್ಣೊಂಡಾಂದ್ ಪೊಣ್ಣಾಕ್ ಇಂವೊ ತಾಕೀತ್ ಮಾಡಿತಿಂಜತೊಲೊ. ಈ ಪೊಣ್ಣಾಳಡ ಬಾಯಿ ಎಕ್ಕೇಂಗಿ ಮುಂಡತೆ ಇಪ್ಪಾ? ಸಾರಿಯಂಡ್ ಬಂತ ಮನೆ ಮನೆ.....

ಪೂವಿ : ಈ ಪೊಣ್ಣಾಳಾಂದ್ ಇಂದೈರಕ್ಕಾಯಿತ್ ನೀನ್ ನಾಕೂ ಎಣ್ಣೆತೆ ಮಾಚು..... ಕಷ್ಟತಿಪ್ಪಕ ಹಂಗ್‌ಚಿಟ್ಟಿತಿಪ್ಪ ಜನ. ಸುಖಿ ಬಪ್ಪಕ ನಾಲಾಳ್‌ಕ್ ಅದ್‌ನ ಎಣ್ಣೊವಂಗಾಂದ್ ಆಪದ್ ಉಳ್ಳದೇ... ಅಲ್ಲಿಂಜೆಂತಾಚೊಲೊ?

ಪಳನು ಪೂನುಲೆ

- ಮಾಚು : ಇಕ್ಕೆನ್ನ ರಘುಕ್ ಸುಖ ಬಾತ್ಂದ್ ಗೇನ ಮಾಡ್ತಾ?
- ಪೂವಿ : ಒಂದರೆ ಲಕ್ಷ ಉರ್‌ಪಿಯಕ್ ಪತ್ತ್ ಕೇಜಿ ಪೂನ್ನ ಕೊಟ್ಟೆಚೆಂದಾಪಕ ಅದ್‌ಂಗ್ ಪಿಂಇಂತ ಎಣ್ಣುಪೂ ಮಾಚು? ಕಷ್ಟಾಂದೆಣ್ಣುವದಾ?
- ಮಾಚು : ಪತ್ತ್ ಕೇಜಿ ಪೂನ್ನ ಕೊಂಡ ಬಾತಲ್ಲ ವಡಿಯ? ಅಂಡ ಸುತ್ತ ಅಡಿ ಕಳಚಿತ್ ದಂಡಳೂ. ಅಕ್ಕಣೆ ರಾಣಿಕ್ ಎಂತೋ ಡಾಟ್ ಬಾತೊಲೊ.
- ಪೂವಿ : ಎಂತ ಡಾಟ್?
- ಮಾಚು : ಇದ್ ನೇರಾನ ಪೂನ್ನೇ ಅಕ್ಕುವಾಂದ್ ಪೇಟೆಕ್ ಕೊಂಡ ಪೋಪಂಜಿ ತಟ್ಟಂಗ್ ಕೊಡ್‌ಪಕಲೇ ಗೊತ್ತ ಇದ್ ಪಿಚ್ಚೊಳೆ ಕಟ್ಟೆಂದ್!
- ಪೂವಿ : ದೇವಳೇ! ಇಂತ ಮೋಸಕಾರಂಗಳೂ ಇಪ್ಪಾ ಮಾಚೂ?
- ಮಾಚು : ಇಪ್ಪ ಅಲ್ಲ ಉಂಡ್. ಇಕ್ಕ ವಡಿಯನೂ ಪೂಣ್ಣೂ ಮಂಡೆಕ್ ಕೆ ಬೆಚ್ಚೆಂಡ್ ಅಳ್ಳಿತ್.
- ಪೂವಿ : ಪೂಲೀಸ್‌ಕ್ ಕಂಪ್ಲೆಂಟ್ ಕೊಡ್ಪೊಲಿಂಜತಲ್ಲ? ಕೊಡ್ತಿತ್‌ಲೆಲೊ? ಕೇಟಿಯಾ?
- ಮಾಚು : ದಾಡ ಮೀದಾಂದ್ ಕೊಡ್ಪೊ ಕಂಪ್ಲೆಂಟ್? ಆಳಡ ಪೆದ, ಕುಲ, ಗೋತ್ರ ಒಂದೂ ಗೊತ್ತಿಲ್ಲೆ. ಊರ್‌ರ ಅಡ್ರೆಸ್ಸೇಂಗಿ ಉಂಡಾ? ಅದೂ ಇಲ್ಲೆ. ಎಂತೆಂದ್ ಕೊಡ್‌ಪೂ ಕಂಪ್ಲೆಂಟ್?
- ಪೂವಿ : ಇದ್ ಮಾತ್ರ ಬಲ್ಯ ಅನ್ಯಾಯ ಮಾಚು. ಇನ್ನನೆ ದಾರೂ ಮೋಸ ಮಾಡುವಕಾಗ.
- ಮಾಚು : ಅರೆ, ಮಾಡುವಕಾಗಾಂದೆಣ್ಣುಕ ದಾಡ ಅಪ್ಪಂಗ್ ಎಣ್ಣುಪೂ? ಪಡಿಪ್ಪು ಉಂಡೇಂಗಿ ಪೋರ. ಆ ಪಡಿಪ್ಪುನ ಎನ್ನನೆ ಇಪಯೋಗ ಮಾಡೊಂಡೊಂದೂ ಗೊತ್ತಿರೊಂಡು. ಇಲ್ಲೆಂಗಿ ಇನ್ನನೇ ಆಪೊ!... ಇಕ್ಕ ಎಣ್ಣೆ, ಪೂನ್ನ ಪೂನ್ನೆಂದ್ ತುಳ್ಳಿ ಕಳಿಪ್ಪಿಯಲ್ಲ? ನಾನೂ ಕೊಂಡ ಬರಡಾ ಪತ್ತ್ ಕೇಜಿ?
- ಪೂವಿ : ದಮ್ಮಯ್ಯ! ನಾಕ್ ರಾಣಿನ ಗೇನ ಮಾಡ್‌ವಕ ಪಾಪಾಂದಾಪ ಮಾಚು. ಎಚ್ಚೆಕ್ ಮೋರಟ್ಟಿತಿಕ್ಕುವಲ್ಲ ಅವ? ಸದ್ಯ ನಂಕ್ ಆಳ ಬಾಳಡ ಸಾವಾಸ ಬೋಂಡ ಮಾಚು. ದೇವ ತಂದ ಆರೋಗ್ಯ ಉಂಡ್. ಉಂಬಕುಳ್ಳ ಕಂಜಿ ಉಂಡ್. ನಂಗಡ ಪಣಿನ ನಂಗಲೇ ಕಯ್ಯುವಚ್ಚೆಕ್ ಕೆಜ್ಜೆಂಡ್ ಮುಂಡತಿಕ್ಕ....
- ಮಾಚು : (ತೆಳಿ) ಅಲ್ಲ ಪೂವಿ, ಆಳಳ ಕಾಕಿಯ ಬಾರಿ, ನನ್ನಂಗುಂಡ್ ಕಯ್ಯಾಂದ್ ಏಂಗಿ ಕಳಿಪ್ಪವಳೂ ನೀನೇ. ಇಕ್ಕ ದಾರೂ ಬೋಂಡಾಂದ್ ಪ್ಲೇಟ್‌ನ ತಿರ್‌ಕಿತ್ ಇಡುವವಳೂ ನೀನೇ. ಎಂತ ಇದ್ ನೀಡ ಕತೆ? (ತೆಳಿ)

- ಪೂವಿ : ಇಂಞೋಬ್ಬಂಡ ಪರಿಸ್ಥಿತಿನ ನೋಟುವಂಜಿ ನಂಗಳೂ ಬುದ್ಧಿ ಪಡಿಕೊಂಡು ಮಾಚು. ಇಲ್ಲೆಂಗಿ ಮಂಡೆಕ್ ಕಲ್ಲಾಯಿಪೋಕು. ಏಳ್, ಮಕ್ಕಳ ಕೂಟಿಯ ಬಾ. ಉಂಗನ...
- ಮಾಚು : ನಂಗಡ ಮಂಡೆಕ್ ನಂಗಡ ಕಯ್ಯೋ ತಾಲಿಲೆಲ್ಲೆಲಾ ನಂಗಡ ಬಟ್ಟತ್ ನಂಗಡ ಕೂಳೋ ತಾಲಿ...

ಸೂಪರ್ ಬಡ್ಡೆಟ್....

- ಪೂವಿ : ಅಯ್ಯೋಯ್ಯೋ!.... ಯಾವಂಗ್ ಬೋಂಡು ಈ ಪಾಳಾನ ಲೆಕ್ಕ!.... ಒಂದ್ ಸೆರಿ ಬಾತೆಂಗಿ ಒಂದ್ ಸೆರಿ ಬಂದಂಡಿಲ್ಲೆ.... ಮಾಚುನ ಕೇಟಕ "ಇಕ್ಕ ಗೊತ್ತಾಚಾ"ಂದ್ ಹಂಗ್‌ಚಿಡು. ಅಂತವೊ ಅಂವೊ! ರಾಮಾಯಣ! ಎಂತ ಮಾಡುವಪ್ಪ ಇಕ್ಕ?.... ಅಲ್ಲ. ಇಡೀ ದೇಶತ್‌ರ ಬಡ್ಡೆಟ್‌ನ ಎಚ್ಚಕೋರ್ ಸುಲ್‌ಭತ್ ಮಾಡಿರುವಲ್ಲ?.... ನಾಕ್ ಓರ್ ಸಂಸಾರತ್‌ರ ಬಡ್ಡೆಟ್‌ನೇ ಸೆರಿ ಕೂಟುವಕ್ ಆಯಂಡಿಲ್ಲೆಲ್ಲ? ಥತ್! ಪಾಳಾಯಿ ಪೋಡ್!
- ಮಾಚು : ಎಂತಾಚಿ ಪೂವಿ? ಎಂತ ಪಾಳಾಯಿ ಪೋಡ್? (ತೆಳ)
- ಪೂವಿ : ಓ ಬಂದ್ಯಾ ಬಾ... ನೀಕ್ ಒಂದೂ ಎಣ್ಣೆಯೆ ಅಲ್ಲಪ್ಪ! ಎಂತದೋ ನಾಡ ಪಾಡ್‌ಕ್ ಎಣ್ಣೆಂಡ ಅಚ್ಚಿಕೇ.... ಕಾಫಿ ಕೊಂಡ ಬರಡಾ ಮಾಚು?
- ಮಾಚು : ಕಾಫಿಯೂ ಬೋಂಡ ಒಂದೂ ಬೋಂಡ. ಇಕ್ಕ ರಮೇಶಂಡಲ್ಲಿ ಕುಡ್‌ಚಿತ್ ಬಂದ. ಎಂತ ಇದ್? ಪೇಪರ್ ಗುಡ್ಡೆ? Exam ಎನ್ನೇಂಗಿ ಉಂಡಾ?ನೀಕ್!
- ಪೂವಿ : ಒರ್ ಬರಿಲ್ ಮಕ್ಕಡ Exam ಇಂಞೋರ್ ಬರಿಲ್ ನಾಕೂ ಓರ್ ತರ Examರನ್ನಕೇಂದ್ ಬೆಚ್ಚ.
- ಮಾಚು : ಮಕ್ಕ ಅಯಿಂಡ ಪಾಡ್‌ಕ್ ಅವು ಓದಿಯಂಡಿಪ್ಪ. ನೀಕೊಂದು ತೊಂದರೆ ಮಾಡುಲೆ ಬುಡ್. ಅಂತಲ್ಲಿ ನೀಕೇದ್ Exam ನಡ್‌ಂದಂಡುಳ್ಳದೊ?

ಸಚಮೆ ಫೊಮ್ಮಾಲೆ

- ಪೂವಿ : ತಾರೀಕ್ ಎಚ್ಚಕ್ ಮಾಚು ಇಂದೆಕ್?
- ಮಾಚು : ತಾರೀಕ್ ಎಚ್ಚಕಪ್ಪ? ನಿನ್ನಾಂದ್ ಇರುವತ್ತೆಟ್ತ್- ಇಂದ್ ಇರುವ ತ್ತೊಯಿಂಬದ್!
- ಪೂವಿ : ಈಸ! ಮಾಚುಕ್ ಎಪ್ಪೆ ಸೋಡಾ! (ತೆಳಿ) ಇದ್ ಏದ್ ತಿಂಗ ಮಾಚು?
- ಮಾಚು : ಇದ್ ಏದ್ ತಿಂಗ? ಫೆಬ್ರವರಿ! ಓ ನೇರೇ, ಈ ಕುರಿ ಇರುತ್ತೆಟ್ಟೇ ತಾರೀಕಲ್? ಸೆರಿ ಅಂದಕ ಇಂದ್ ಮಾರ್ಚಿ ಒಂದ್!.... ಓ ಹೋಹೋ ಇಕ್ಕ ಗೊತ್ತಾಚಿ. ಪೂವಮ್ಮಕ್ಕಂಡ ಬಡ್ಡೆಟ್ ಮಂಡನೆ ಲೆಕ್ಕಾಚಾಕ ರೆಡಿ ಆಯಂಡುಂಡ್. ಎಣ್ಣಾಟ ಎಲ್ಲಿಕೆತ್ತನೆ ಬಾತ್?
- ಪೂವಿ : ಅಯ್ಯೋ ಬುಡ್ ಮಾಚು! ಬೋಳೆಕೆತ್ತನೆ ಬಾತ್!
- ಮಾಚು : ನಲ್ಲದೇ ಆಚಲ್? ಮಂಡಕ್ ಎತ್ತುವಕ್ ಇಂಞಾ ಚೆನ್ನಂಗೇ ಉಳ್ಳೊ! (ತೆಳಿ)
- ಪೂವಿ : ನೀಕ್ ತೆಳಿ!... ನಾಡ ಗೋಳ್ ಇಲ್ಲಿ!
- ಮಾಚು : ನೀಡ ಗೋಳ್ ಎಣ್ಣಕ?
- ಪೂವಿ : ಅದೇ ಮಾಚು! ಪಾಳಾನ ಲೆಕ್ಕ ಉಂಡಲ್ಲ ಮಂಡೆತಿಂಬ ನಾಡ. ಒಂದಾನ ಸೆರಿ ಕೂಟಿತಾಕಣೆ ಇಂಞಾಂದ್ ಪಾಳಾಯಿಪೋಯಿತಿಪ್ಪ. ಅಕ್ಕಲೆ ಒಮ್ಮ ಎಲ್ಲ ಕೂಟಿತ್ ಕಳಂದಿತ್ ಮಾಡಿತಾಕಣೆ ಎಲ್ಲಾ ಉಲ್ಬಾ ಆಯಿ ಪೋಚಿ. ಇಡೀ ಪೇಪರ್ ಗುಡ್ಡೆನ ಕೊಂಡಪೋಯಿತ್ ಗುಡ್ಡೆತರ ಒಲೆಕ್ ಇಟ್ಟಿತ್ ಬಂದ.
- ಮಾಚು : ಬೈಟೆಕ್ ಕುಳಿಪ್ಪಕ್ ನೀರ್ ಕಾಚೊಂಡೊಂದೇ ಇಲ್ಲೆ ಅಂದಕ. ನೀಡ ಬಡ್ಡೆಡ್ ಮಂಡನೆ ಆಕಣೆ ಒಲೆಕ್ ಪುಳ್ಳಿ ಬೋಂಡ ಕಾಂಬ!.... ಪಂಡೇ ಲೆಕ್ಕತ್ ಅಚ್ಚಕ್ ಉಶಾರ್. ಕೈ ಬೆರ ಲೆಕ್ಕ ಇಟ್ಟಿತಾಪದೂ ಮೊರಡುವಯಿಂಜಿಯಲ್ಲ? ಇಂಞಾ ಎಂತಾನ ಲೆಕ್ಕ ಇಡುವೋಂದ್! (ತೆಳಿ)
- ಪೂವಿ : ನೀಕೆಕ್ಕೊಲೂ ತಮಾಷಿ ಮಾಚು. ನಾನ್ ದಡ್ಡಿ ಆಯಿತಿಕ್ಕು. ನೀನ್ ಮಾತ್ರ ಎಚ್ಚಕ್ ಬುದ್ಧಿವಂತ? ನಾಕೆನ್ನ ಗೊತ್ತಿಲ್ಲತದಾ ನೀಡ ಬೇಳೆಕಾಳ್! (ತೆಳಿ)
- ಮಾಚು : ಸೆರಿಯಪ್ಪ "ದಡ್ಡ ದಡ್ಡಿ ಜೋಡಿ -ಕೈಕೈ ಪುಡ್ಚಂಡ್ ಓಡಿ! (ತೆಳಿ)
- ಪೂವಿ : ಮದಿ ಮಾಚು ನೀಡ ಮಕ್ಕಕಳಿ. ಕೈವೆಂಗಿ ಚೆನ್ನ ಲೆಕ್ಕ ಮಾಡುವಕ್ ನಾಡ ಕೂಡ ಕೂಡ್...
- ಮಾಚು : ಕೈಂಜ ಕಾಲ ಎಂತ ಎಣ್ಣೆಯ ಪೂವಿ ನೀನ್? ಗೇನ ಉಂಡಾ?
- ಪೂವಿ : ಎಂತ ಎಣ್ಣ ನಾನ್?
- ಮಾಚು : "ಸ್ವಸಾಯ ಸಂಘತ್ ನಾನ್ ಖಿಜಾಂಜಿ ಆಯಿತುಳ್ಳ. ಅದೊಂಡ ಲೆಕ್ಕತನೇ ಮಾಡಿತ್ ನೀಸಿತುಳ್ಳ. ಅಂತಲ್ಲಿ ಇದೇದ್ ಬಲ್ಯ ಬ್ರಹ್ಮವಿದ್ಯೆ?" ಗೇನ ಬಾತಾ?

- ಪೂವಿ : ಅದೆಲ್ಲ ಬುಡ್ ಮಾಚು. ಮನೆರ ಮೇಲೆ ಅದೆಚ್ಚಕ್ ಕಾತ್ ಬೀಜಿತ್ ಪೋಯಿತಿಪ್ಪೊ? ಪೊಳೆಲ್ ಅದೆಚ್ಚಕ್ ನೀರ್ ಒಕ್ಕಿತ್ ಪೋಯಿತಿಪ್ಪೊ?
- ಮಾಚು : ಓಹೋ, ನೀನಾಚೆಂಗಿ ಅನ್ನನೆ ಉಂಡ್. ಫಾರ್ಮಾಲಿಟಿ. ನಾನ್ ಆಚೆಂಗಿ ಮಾತ್ರ ಬೋರೆ ತರ ಅಲ್ಲಾ?
- ಪೂವಿ : ನೀನ್ ಮುಂಡತೇಂಗಿ ವಾದ ಮಾಡಿಯಂಡ್ ಅಳಕತೆ ಮಾಚು. ಇಕ್ಕೆನ್ನಾ ಆಪಾ ಇಲ್ಲಿಯಾ ಎಣ್ಣೆರ್ ಅಚ್ಚಿಕೆ!
- ಮಾಚು : ಆಪಾದೆಣ್ಣೆಟಕ ಇಡೀ ಲೆಕ್ಕ ನಾಡ ಮಂಡಕ್ ಬುದ್ದ ಲೆಕ್ಕ. ಆಪಾಲೆಂದೆಣ್ಣೆಕ ಅಂದಕ ಅಡಿಗೇ ನೀನೇ ಮಾಡ್ಯಂದೆಣ್ಣೆಟಕಲೊ?
- ಪೂವಿ : ನೀನ್ ಬಾರಿ ಕುರಿ ಅಡಿಗೇ ಮಾಡ್‌ನಂವೊ! ಎಣ್ಣು ವೊ ನೋಟಂವೊ?... ಎಕ್ಕಲೊ ಒಮ್ಮೆ-ಇಮ್ಮೆ ಮಾಡಿತಿಕ್ಕು. ಅಚ್ಚಕಾಂಗ್ ಇಚ್ಚಕ್ ಬಡಾಯಿ!
- ಮಾಚು : ಬಡಾಯಿ ಬಡಾಯಿ ಕೀರೆತೊಪ್ಪು- ಕರಿಕ್ ಚಾಯಿ ಕಾಕೆ ತೊಪ್ಪು ತೋಡ್ ಕರೆಲ್ ತೆರ್ಮತೊಪ್ಪು-ಮರಂದ್ ಪೋಚಿ ಇಡುವಕ್ ಉಪ್ಪು!
- ಪೂವಿ : ಮದಿ ಮಾಚು ನೀಡ ಕೊಣಕಳಿ! ಇಕ್ಕೆನ್ನಾ ಚೆನ್ನ ಲೆಕ್ಕ ನೋಟುವಕ್ ಬಪ್ಪಿಯಾ ಇಲ್ಲಿಯಾಂದೆಣ್ಣೆ!
- ಮಾಚು : ತಾ ಇಲ್ಲಿ ನೀಡ ಪೇಪರ್ ಗುಡ್ಡೆನ. ಪಾರ್ಲಿಮೆಂಟ್‌ಲ್ ಬಡ್ಡೆಟ್ ಮಂಡನೆ ಮಾಡುವಕ ಕೂಡಿ ಇಚ್ಚಕ್ ಪೇಪರ್ ಇಪ್ಪುಲೆ.
- ಪೂವಿ : ಅದೆಲ್ಲ ವೇಸ್ಟ್ ಪೇಪರ್. ಅಂದ್ ಸ್ಕೂಲ್‌ಂಜ ಬಪ್ಪಕ ಮಕ್ಕ ಕೊಂಡಬಂದದ್ ಗೊತ್ತಾಚಾ? ದುಡ್ಡ್ ಕೊಡ್ತದೊಂದೂ ಅಲ್ಲ.
- ಮಾಚು : ಅಲ್ಲ ಪೂವಿ, ಕೊಡಿಮನೆ ತಾತ ಅದೆಂತದೋ ಒಂದ್ ಎಣ್ಣುವಿಂಜತಲ್ಲ? ಗೇನ ಉಂಡಾ ನೀಕ್?
- ಪೂವಿ : ಎಂತೆಂದ್ ಎಣ್ಣುವಿಂಜಿಯೆ?
- ಮಾಚು : ಅದೇ ಪೂವಿ, ಕಂಡಾನೆಲ್ಲ ಕೊಂಡಬಾತೆಂಗೀಂದ್ ಎಂತೋ ಎಣ್ಣುವಿಂಜತಲ್ಲ?
- ಪೂವಿ : ಅದಾ? "ಕಂಡಾನೆಲ್ಲ ಕೊಂಡಂಡಕ ಕೊಂಡವಂಡ ಕೊಡಿ ನೇರುವಾ ಕುಂಇ!"
- ಮಾಚು : ಅಂ ಅದೇ! ಎಚ್ಚಕೋರ್ ಅರ್ಥ ಉಳ್ಳ ತಕ್ಕ ನೋಟ್!
- ಪೂವಿ : ನಾಕ್ ಅದ್ ಎಣ್ಣುದ್ ಬಾಯಿಪಾಠ ಉಂಡ್ ಅಚ್ಚಿಕೇ. ಆಂಡ ಅರ್ಥ ಮಾತ್ರ ಮರಂದ್ ಪೋಯಿತ್ ಬಾ!
- ಮಾಚು : 'ಕಂಡಾನೆಲ್ಲ ಕೊಂಡಂಡಕಾಂದೆಣ್ಣೆಕ, ಕಣ್ಣ್ ಕ್ ಕಂಡಾನೆಲ್ಲ ಕ್ರಯಕ್ ಕೊಂಡ ಬಂದಕಾಂದ್. ಕೊಂಡವಂಡ ಕೊಡಿ ನೇರುವಾಂದೆಣ್ಣೆಕ ಕ್ರಯಕ್ ಕೊಂಡ ಬಂತೆ ಇಟ್ಟಂಡಂವೊ ಉದ್ದಾರ ಆಪುಲೆಂದ್ ಗೊತ್ತಾಚಾ?

ಪಳಸು ಪ್ರೊಮ್ಯಾಲೆ

- ಪೂವಿ : ಎಂತಾಂಗ್ ಕಂಡಾನೆಲ್ಲ ಕೊಂಡ ಬರಂಡೆ?
- ಮಾಚು : ಓರಬ್ಬಕ್ ಅದೇ ಅಭ್ಯಾಸ ಪೂವಿ. ಕಂಡದೆಲ್ಲ ಬೋಂಡು ಅಯಿಂಕ್ ಅದೊಂಡ ಉಪಯೋಗ ಇರಡ್ ಇಲ್ಲತ್ತಿರಡ್ ಆಯಿತೇ ಆಂಡು. ಕಣ್ಣಾಸೆಕ್ ಕೂಳ್ಳಾಟ್ಪಂಡ್ ಉಂಬಕ್ ಕಯ್ಯತೆ ಬುಸ್‌ಬಾಯಿ ಬುಡುವಲ್ಲ ಅನ್ನನೆ!
- ಪೂವಿ : ನಾಕ್ ಎಂತೇಂದೇ ಅರ್ಥ ಆಯಂಡಿಲ್ಲೆ ಮಾಚು. ಕಂಡಾನೆಲ್ಲ ಎಂತಾಂಗ್ ಕೊಂಡ ಬರಂಡಿಯೇಂದ್?
- ಮಾಚು : ಓರ್ ಉದಾಹರಣೆ ತಪ್ಪಿ ನೀಕ್ ಪೊಟ್ಟಿಲ್ ನುಪ್ಪತ್ತೆಟ್ಪ್ ಪೊಡಿಯ ಉಂಡ್. ಅಂದಿತೂ ಅಂಗಡಿಲ್ ಕಾಂಬಕ ಅದೂ ಒಂದ್ ಇರಡ್‌ಂದಾಪಲ್ಲ ಅನ್ನನೆ!
- ಪೂವಿ : ಅಂತೂ ನೀಕ್ ನಾಡ ಪೊಡಿಯತಾರ ಮೇಲೇ ಕಣ್ಣ್ ಮಾಚು... ತಕ್ಯಾಕೊಮ್ಮ ಹಂಗ್‌ಚಿಡತೆ ನೀಕ್ ಉಂಡ ಕೂಳ್ ಮೇಲ್‌ಕ್ ಪತ್ತುಲೆಪ್ಪ....
- ಮಾಚು : ನೀಡ ಮಂಡೆಕ್ ಹೊಕ್ಕತಾಂಗ್ ಒರ್ ಉದಾರಣೆ ಎಣ್ಣಿ ಅಚ್ಚಿಕೇ ನಾಕೆನ್ನಂಗ್ ನೀಡ ಪೊಡಿಯತಾರ ಮೇಲೆ ಕಣ್ಣ್? ನಾನೆನ್ನೊ ಉಡ್ತೊವಡಾ?
- ಪೂವಿ : ನೀನ್ ಉಡ್‌ಪನ್ನನೆ ಆಯಿತಿಂಜಕ ನೀನೂ ಅನ್ನನೆ ಕಳಿಪ್ಪಿಂಜಿಯ. ಸುತ್ತ್ ಮುತ್ತ್ ಉಳ್ಳವು "ಇದಾ ಪೂವಿ, ಪೊಡಿಯ ಚಾಯುಂಡಾಂದ್" ಕೇಟಂಡ್ ಬಪ್ಪಕ ನಾಕೂ ಕೆಲ ಬೇವುಲಿಯ ಮಾಚೂ?
- ಮಾಚು : ದಮ್ಮಯ್ಯ! ಕೆಲ ಬೇವತೆ? ಅವಡಲ್ಲಿ ಉಳ್ಳದ್ ನೀಡಲ್ಲಿ ಇಂಜಿಲೆಂಗಿ ನೀನ್ ಬದ್‌ಕ್‌ನ ಕಾಲ ಉಂಡಾ?
- ಪೂವಿ : ನಿಂಕ್ ಆಣಾಳ್‌ಕ್ ಅದೆಲ್ಲ ಎನ್ನನೆ ಅರ್ಥ ಆಂಡು ಎಣ್ಣ್? ನಂಗಡ ಗೋಳ್ ನಂಕೇ ಗೊತ್ತ್. ಅಯಿಂಗೆಲ್ಲ ದಿನಕೋರ್ ಪೊಡಿಯ ಉಡ್‌ತಂಡ್ ಮೆರೊಂದಂಡ್ ಬಪ್ಪಕ ನಂಗಡ ಪಕ್ಕ ವಾರಕೊಂದ್ ಉಡ್‌ಪಕೇಂಗಿ ಬೋಂಡ ಮಾಚು?....
- ಮಾಚು : ಎಂತಾಂಗವ್ವ ಇಣಾಣಕೇಡ್? ನಾನ್ ಪೊಡಿಯ ಉಡ್‌ಕತಾಂಗಾ? (ತೆಳಿ)
- ಪೂವಿ : ನೀಕೆಲ್ಲ ತಮಾಷಿಯೆ ಮಾಚು. ಒಬ್ಬಂಡ ಪಕ್ಕ ಓರ್ ವಸ್ತು ಇಂಜಿತ್ ಅದ್ ನಂಗಡ ಪಕ್ಕ ಇಂಜಿಲೆಂಗಿ ಎಚ್ಚಕ್ ಕಮ್ಮಿ ತರತ್ ನಂಗಳ ಕಾಂಬ ಗೊತ್ತುಂಡಾ? ಮಾಚುರ ಪೊಣ್ಣ್‌ಕ್ 'ಬಣ್ಣೆ ಬಾಯಿ ಬಡಾಯಿ' ಮಾತ್ರ. ಮನೆಲ್ ಮೂಂದ್ ಕಾಸಾರ ಬೇಳೆ ಕಾಳೂ ಇಲ್ಲೆಂದ್ ಹಂಗ್‌ಚಿಡುವ. ಅದೊಂಗೇ ಎಣ್ಣೆಯೆ ನಾನ್. ನೀಡ ಮಾನ ಪೋಪಾಂದ್. ಗೊತ್ತಾಚಾ?
- ಮಾಚು : ಇದೊಂಗೇ ಎಣ್ಣೆಯೆ ಕೊಡಿಮನೆ ತಾತ. ಕಂಡಾನೆಲ್ಲ ಕೊಂಡಂಡಕ ಕೊಂಡವಂಡ ಕೊಡಿ ನೇರುವಾಂದ್? ಆಂಡ ಅರ್ಥ ಇಚ್ಚಿಕೇ. ಓರ್ ವಸ್ತು ನಂಗಡಲ್ಲಿ ಇಲ್ಲೆ.

ಅಯಿಂಗಡಲ್ಲಿ ಉಂಡ್‌ಂದ್ ಬೆಚ್ಚೋವನ. ಅದಾಲೆಂತ ಇಾಣಕೇಡ್? ನಂಗನ್ನ ಚತ್ತ್ ಪೋಪುಲೆಲ್ಲ?

ಪೂವಿ : ಕಮ್ಮಿತರಕ್ ಅಯಿಪೋಪಕ ಚತ್ತ್ ಲೆಕ್ಕೇ ಅಲ್ಲ ಮಾಚು?

ಮಾಚು : ನೋಟ್ ಪೂವಿ, ಒಬ್ಬೊ ಮೂಂದ್ ಸೇರಾರ ಕೂಳಾನ್ ಒರೇ ನೇರಕ್ ಉಂಗು. ಅವಂಡ ಪೊಟ್ಟೆ ಬಲ್ಯದಿಕ್ಕು. ಅರ್‌ಗಣೆ ಮಾಡ್ಕೋವ ಶಕ್ತಿಯೂ ಅವಂಗಿಪ್ಪ. ನಂಗಡನ್ನತ ತೋಯಂಗ ಮೂಂದ್ ಸೇರಾರ ಕೂಳಾನ್ ಒಮ್ಮಲೆ ಉಂಡಕ ಕೇರಾಫ್ 'ಕೇಕೊಳ'ಗೊತ್ತಾಚಾ?

ಪೂವಿ : ಅಂದಕ ಉಂಬಕೇ ಆಗಾಂದಾ ನೀನೆಣ್ಣುವೊ?

ಮಾಚು : ಉಂಬಕೇ ಆಗಾಂದಲ್ಲ. ಕೆಲತ್‌ರ ಆಳತೆ ನೋಟ್ಟುಂಡ್ ಉಂಗೊಂಡು. ನಾಲ್ ಚೀಲ ಕಾಪಿ ಆಪವಂಗ್ ನಾನ್ನೂರ್ ಚೀಲ ಕಾಪಿ ಆಪವಂಡೆ ಮಿಂಞಲ್ ತೂಂಗುವಕಾಪ? ಅವಂಡವಂಡ ಅಳತೆನ ಅವು ಅವು ಅರ್ಥ ಮಾಡ್ಕೋವೊಂಡು. ಓರ್ ಕತೆ ಗೇನ ಆಯಂಡುಂಡ್.

ಪೂವಿ : ಎಂತ ಕತೆ ಅಂತದ್?

ಮಾಚು : ಓರ್ ನರಿ ಓರಾಂಡ್‌ಡೀ ಬೋಟೆ ಆಡುವ ಕಷ್ಟಕ್, ಒಮ್ಮೆಕೆ ಬೋಟೆ ಆಡಿತ್ ಜಾತಿಯಳ ಕೊಂದಿತ್ ತಾಂಡ ಗುಹೆಲ್ ಗುಡ್ಡೆ ಇಟ್ಟಂಡತೊಲೊ. ನಾಲ್ ದಿನ ಕೈಂಜಿತಾಪಕ ಗುಹೆ ಇಡೀ ಜಡ್ಡ್ ನಾರುವಕ್ ಸುರು ಆಚೊಲೊ. ಅಲ್ಲಿಂಜ ಅದ್‌ಂಗ್ ತಾಂಡ ತಪ್ಪು ಗೊತ್ತಾಚೊಲೊ.

ಪೂವಿ : ಅದೆಲ್ಲ ಅತಿಯಾಸೆರ ಕಳೆಂದಾಚಿ....

ಮಾಚು : ಪ್ರತಿಯೊಂದೂ ಅನ್ನನೇ ಪೂವಿ. ಪ್ರತಿಯೊಂದಾಂಗೂ ಓರ್ ಮಿತಿಂದಿಪ್ಪ. ಅದದ್ ಮಿತಿಲಿಂಜಕ ಮಾತ್ರ ಎಲ್ಲಾ ಚಾಯಿ. ಇಲ್ಲೆಂಗಿ ಎಲ್ಲ ಜಡ್ಡ್ ನಾರುವದೇ!

ಪೂವಿ : ಅದ್‌ಂಗೂ, ಇದ್‌ಂಗೂ ಎಂತ ಸಮ್ಮಂದ ಮಾಚು? ನೀಡದೋರ್ ಕತೆಯೂ!

ಮಾಚು : ನರಿ ಜಡ್ಡ್ ಗುಡ್ಡೆ ಇಟ್ಟಂಡನ್ನಕೆ ಮನುಷ್ಯನೂ ಕಣ್ಣಕ್ ಕಂಡಾನೆಲ್ಲ ಕೊಂಡ ಬಂತ್ ಮನೆ ಇಡೀ ಗುಡ್ಡೆ ಇಟ್ಟವ. ಅದ್ ಪಣವೇ ಆಯಿತಿಕ್ಕು, ಮಾಲೇ ಆಯಿತಿಕ್ಕು. ಅಲ್ಲೆಂಗಿ ಬಟ್ಟೆಬರಿ ವಸ್ತುವೇ ಆಯಿತಿಕ್ಕು. ಚಾವಕಾಲಕ್ ಕಾಲ್ ನೋಟಿತ್ ಬುದ್ಧಂಡ್ ಮರಕೆಟ್ಟಿಪೋಪ. ಆ ಚಾವುರೆದಿಕ್ಕೆ ಎಂತಾನ ದಾರ್ ಕೊಂಡ ಪೋನಕಲೂ ಅವಂಗನ್ನ ಗೊತ್ತಿಪ್ಪ?

ಪೂವಿ : ಅದ್ ಮಾತ್ರ ನೇರೆಪ್ಪ. ಚೋಂದಕ್ಕಿರ ಮಾಂವೊ ನೋಟ್. ಅಚ್ಚಕ್ ಚಾಯಿಲ್ ಅರೋಗ್ಯತ್ ಇಂಜ ಮನುಷ್ಯ ಇರ್ ಪೊಲಣೆ ಚತ್ತೇ ಪೋಚಲ್ಲ? ಜೀವತಿಪ್ಪಕ

ಪಳಮೆ ಪ್ರೊಮ್ಯಾಲೆ

ಎಚ್ಚಕೆಲ್ಲ ಜನಡ ರುಣ ತೀಂದತ್. ಕಡೆ ಕಾಲತ್ ಎಂತ ಚಾವು?

ಮಾಚು : ಪ್ರಾಣಿಯಳ ನೋಟ್ ಪೂವಿ. ತಂಗಡ ಕೆಲ ಪೈಪುಕ್ ಎಚ್ಚಕ್ ಬೋಂಡುವೊ ಅಚ್ಚಕಾನ ಮಾತ್ರ ತಿಂದಂಡ್ ಜೀವನ ಕೈಪ. ನಂಗ ನರ ಮನುಷ್ಯಂಗ ಮಾತ್ರ ದಾಡ ರುಣ ಆಚೆಂಗೂ ಸರಿ. ತಿಂಬದೊಂದೇ!

ಪೂವಿ : ಅಲ್ಲ ಮಾಚು. ಕಾಫಿ ತೋಟತ್‌ಂಜ ಬಂದಂವೊ ಎಚ್ಚಕ್ ಕಾಫಿ ಗಿಡ ಕಪಾತ್ ಆಚೀಂದ್ ಎಣ್ಣದೇ ಇಲ್ಲೆ ನೀನ್!

ಮಾಚು : ಆ ಬಲ್ಯ ಚೆಕ್ಕೆ ಮರ ಉಂಡಲ್ಲ ಅಲ್ಲಿ ಕೆತ್ತನೆ ಆಚಿ. ಗಾಡ ಎಲ್ಲ ಚೌರ ಆಯಿತ್ ಬೆತ್ತಲೆ ಬೆತ್ತಲೆ ಕಾಂಬಪ್ಪ. ಕಾಲಕ್ ಕಾಫಿ ಎನ್ನನೆಯೊ?

ಪೂವಿ : ಪಿಂಞಂತಾಂಗ್ ಅಚ್ಚಕ್ ಮಟ್ಟಿಕೆ ತಾಪಾತ್ ಮಾಡಂದಿಯೆ? ಚೆನ್ನ ಚೆನ್ನ ಮಾಡಿತಿಂಜಕ ಮದಿಯಿಂಜಿಲಿಯಾ?

ಮಾಚು : ನೀಕ್ ಅದೆಲ್ಲ ಅರ್ಥ ಆಪಕುಳ್ಳದಾ? ಕೈಂಜಕಾಲ ಫಸಲ್ ತಂತ್ ಒಂದ್ ದಂಡ್ ಪೂ ಬುಟ್ಟಂಡಿಪ್ಪ ರೆಕ್ಕೆನ ಬೆಚ್ಚಂಡ್ ಎನ್ನ ಪ್ರಯೋಜನ?

ಪೂವಿ : ಅದ್‌ನ ಮಾತ್ರ ಎಡ್‌ತಕ ಮದಿಯಪ್ಪ. ಬಾಕಿ ಉಳ್ಳಾನ ಕೂಡಿ ನೀನ್ ಎಡ್‌ತಿತ್ತಿಲ್ಲಿಯಾ? ಅಚ್ಚಕ್ ಖಾಲಿ ಮಾಡಿಟ್ಟಕ?

ಮಾಚು : ನೂಲ್ ರೆಕ್ಕೆನ ಬುಟ್ಟಂಡಕ ಅದ್‌ಲೆನ್ನ ಪೂ ಆಪಾ? ಕಂಬ ಸುಳಿನ ಬುಟ್ಟಂಡಕ ಗಿಡಕೇ ಧಕ್ಕೆ. ಕಾಂಜಿ ಪೀಂಜಿ ಅಡ್ಡ ರೆಕ್ಕೆನ ಬುಟ್ಟಂಡಕ ಕಾಫಿ ಬಣ್ಣ ಇಪ್ಪುಲೆ. ಗೊತ್ತಾಚಾ? ಮಂಡೆಕ್ ಪೋಚಾ?

ಪೂವಿ : ಅಮ್ಮಪ್ಪ, ಅದೆಲ್ಲ ನೀಕೇ ಗೊತ್ತ್. ಆಂಡ ಬಗೆಲ್ ಅರೆಗಂಟೆ ಬೋಂಡೆಂಗೂ ಲೆಕ್ಕರ್ ಅಳಾಕಿರುವಿಯ ನೀನ್. ಕಷ್ಟ ಸುಖ ಪರಿಯನಾಂದೆಣ್ಣಕ ನೀಕ್ ಪುರುಸೊತ್ತೇ ಇಪ್ಪುಲೆ.

ಮಾಚು : ನೀಕ್, ಅದ್‌ಂಗೇ ಎಣ್ಣವೊ ಬುದ್ಧಿ ಬೊಳಂದದ್ ಪೋರಾಂದ್....

ಪೂವಿ : ಅಕ್ಕು ಮಾಚು. ನಾಕ್ ಬುದ್ಧಿ ಬೊಳಂದದ್ ಕಮ್ಮಿ. ನೀಕ್ ಬೊಳಂದಿತ್. ಅದ್ ಕಂಡೆ ಕಟ್ಟಿ ಪೋಯಿತ್ ಅಚ್ಚಿಕೇ ವ್ಯತ್ಯಾಸ!

ಮಾಚು : ಆಚವ್ವ ಒತ್ತಂಡ. ಇಕ್ಕ ಕಾಫಿ ಗಿಡತ್‌ರ ವಿಷ್ಯತ್‌ನೇ ನೋಟಂಗ. ಅದ್‌ಂಗೂ ನಂಗಡ ಜೀವನಕೂ ಎಚ್ಚಕ್ ಹೋಲಿಕೆ ಉಂಡ್ ಗೊತ್ತುಂಡಾ?

ಪೂವಿ : ಅಯ್ಯೊಯ್ಯೋ! ಇದೋರ್ ಪುದಿಯ ಥಿಯರಿ ನಾನ್ ಕೇಟಿತೇ ಇಂಜಿಲೆಪ್ಪ!

ಮಾಚು : ಕಾಫಿ ಗಿಡತ್‌ರ ಸುಳಿ ಇಾಂಡತೆ ಇಂಜಕ ಎಂತಾಪ ಎಣ್ಣ ನೋಟನ?

ಪೂವಿ : ನೀನೇ ಅದ್ ಬೋಂಡು, ಇದ್ ಬೋಂಡೂಂದ್ ಕಂಡಾನೆಲ್ಲ ಗುಡ್ಡೆ ಕೂಟುವ ಈ ದುರಾಸೆ ಉಂಡಲ್ಲ? ಅದ್‌ನೊ ಅಕ್ಕಾಕ ಇಾಂಡಿತ್ ಎಡ್‌ತಂಡಿರೊಂಡು.

ಇಲ್ಲೆಂಗಿ ಅದ್ ನಂಗಡ ತಡೀಂದೆಣ್ಣುವ ಗಿಡ ಉಂಡಲ್ಲ? ಅದ್‌ನೇ ಪಾಳಾಕಿರುವ.

ಪೂವಿ : ಅಂದಕ ಆಸೆಯೇ ಇಪ್ಪುಕಾಗಾಂದ್ ಎಣ್ಣುವದಾ ನೀನ್? ಕೆಲಕ್ ಕೂಳೂ ಬೋಂಡ ಅಂದಕ. ಎಕ್ಕೇಂಗಿ ಒಮ್ಮೆ ಚಾವ ತಡಿಕ್ ಕೂಳ್ ಎನ್ನಂಗ್?

ಮಾಚು : ನೀಡ ಮಂಡೆ! ಬದುಕೊಂಡೊಂದಾಚೆಂಗಿ ಕೂಳ್ ನೀರ್ ಬೋಂಡು ನೇರೇ. ಅನ್ನನೇಂದೆಣ್ಣೆತ್ ಕಂಡವಂಡ ಸೊತ್ತನ ಬಲ್‌ಚಿಕೊಟುವನ್ನತ ದುರಾಸೆ ಎಂತಾಂಗ್ ಬೋಂಡ್ಯ?

ಪೂವಿ : ಬದುಕುವಕ್ ಉಳ್ಳಚ್ಚಕ್ ಸಂಪತ್ತ್ ಉಂಡೆಂಗಿ ಮದಿ. ಅದೂ ಇಲ್ಲತಯಿಂಗ ಎಚ್ಚಕೋ ಜನ ಇಲ್ಲಿಯ ಮಾಚು?

ಮಾಚು : ಅದ್‌ನೇ ನಾನೂ ಎಣ್ಣುಂಡುಳ್ಳ. ಕಾಫಿ ಗಿಡತ್‌ರ ನೆತ್ತಿ ಬುಡ್‌ತ್‌ಚೆಂಗಿ ಗಿಡಕ್ ಬೋಂಡಿಯಾನ ಬೊಳಿ, ಗಾಳಿ ಎಲ್ಲಾ ಕೊಟ್ಟುವ. ಗಿಡಕ್ ಉಸರ್ ಎಡ್‌ಪಕೂ ಚಾಯಾಪ. ಗಿಡವೂ ಬಾಳಿಕೆ ಬಪ್ಪ.

ಪೂವಿ : ಅರೆ, ಪುನಾದಿಯ ಕಾಫಿ ಗಿಡತ್‌ರ ವಿಷ್ಯಕ್ಕೆ ಬಂದ್‌ಟ್ಟಲ್ಲ?

ಮಾಚು : ಕಾಫಿ ಗಿಡತ್‌ರ ನೆತ್ತಿ ಬುಡ್‌ತುವೊಂದೆಣ್ಣಲ್ಲ. ಆಂಡ ಅರ್ಥ ಇಚ್ಚಿಕೇ. ನಂಗ ನೈಪ ಬಟ್ಟೆ ಉಂಡಲ್ಲ? ಅದ್‌ನ ನಲ್ಲರಿಕೆಲ್ ಬೆಚ್ಚೋವೊಂಡೊಂದ್ ಆಂಡ ಅರ್ಥ. ದುಡ್ಡ್ ಬೋಂಡು ನೇರೆ. ಆದಿಲ್ಲತೆ ಏದೂ ನಡ್‌ಪುಲೆ. ಆಚೆಂಗಿ ಅದ್‌ನ ಸಂಪಾದನೆ ಮಾಡುವ ಬಟ್ಟೆ ಉಂಡಲ್ಲ. ಅದ್‌ನ ಚಾಯಿಲ್ ಬೆಚ್ಚೋವೊಂಡು.

ಪೂವಿ : ಇಕ್ಕ ಗೊತ್ತಾಚಿ ನೀಡ ಪುದಿಯ ಥಿಯರಿ, ಇಕ್ಕ ನಾನೇ ಎಣ್ಣುವಿ ಕೇಳ್. ದುರಾಸೇಂದೆಣ್ಣುವ ಅಡ್ಡ ರೆಕ್ಕೆ, ಸುಳಿನೆಲ್ಲ ಎಡ್‌ತಿತ್, ನಲ್ಲರಿಕೆರ ಗಾಳಿ, ಬೊಳಿ ಬೂವನ್ನಕೆ ನಂಗಡ ಜೀವನಾಂದೆಣ್ಣುವ ಕಾಫಿ ಗಿಡತ್‌ನ ನಂಗ ಶುದ್ಧತ್ ಬೆಚ್ಚೋವೊಂಡು... ನಲ್ಲಾ ಮೆರ ಗೊಬ್ಬರ ಕೊಡ್ತಂಡ್, ನಲ್ಲ ನೈಪುರ ಫಲತ್‌ನ ನಲ್ಲೋಣೆ ಉಂಗೊಂಡು....

ಮಾಚು : (ಚಪ್ಪಾಳೆ) ಶಾಬಾಷ್ ಪೂವಿ. ಇದೇ ವಿಷ್ಯತ್ ಓರ್ ಪ್ರಬಂಧ ರೆಡಿ ಮಾಡುವಂಜಿ ನಿಂಗಡ ಸ್ತ್ರೀ ಶಕ್ತಿ ಸಂಘತ್‌ರ ಮೀಟಿಂಗ್‌ಲ್ ಓದಿರ್. ನೀಕ್ ಫಸ್ಟ್ ಪ್ರೈಜ್ ಗ್ಯಾರಂಟಿ! (ತೆಳಿ) ಎಲ್ಲಿ ಪಡ್‌ಚಿಟಿಯ ಎಣ್ಣೆ?

ಪೂವಿ : (ತೆಳಿ) ಎಲ್ಲಾ ನೀಡದೇ ದಯೆ ಮಾಚು! ನಾಲ್ ದಿವಸ ನೀಡ ಕೂಡೆ ಇಂಜಕ ನಂಗಡ ಕಳತುಂಡಲ್ಲ ಬೋಟಿ? ಅದೂ ಭಾಷಣ ಸುರ ಮಾಡಿರು!

ಮಾಚು : ಓಹೋ, ಇನ್ನನೆಯ ವಿಷ್ಯ? ನಾನೆನ್ನೋ ಇವ ನನ್ನ ಹೊಗಳಿಯುಂಡುಂಡ್‌ಂದ್

ಪಳಮೆ ಪ್ರೊಮ್ಯಾಲೆ

- ಗೇನ ಮಾಡ್‌ಚೆಂಗಿ ಇಂಡೆರಕ್ಟಾಯಿತ್ ನನ್ನೇ ಕೋರುವಕ್ ಸುರುಮಾಡಿತ್.
- ಪೂವಿ : ಅಲ್ಲೆಂಗಿ ಇಂಞಾಂತ ಮಾಚು ನೀನ್? ಅಕ್ಕಲೆಂಜ ಎಣ್ಯಂಡುಳ್ಳ. ನಂಗಡ ಕಾಲತ್‌ರ ಲೆಕ್ಕ ಪಕ್ಕ ಒಮ್ಮೆ ಸೆರಿ ಕೂಟನ ಬಾಂದ್!.... ನೀನ್ ಎಂತೆಂತದೊ ಪರಂದಂಡ್ ಕಾಲ ಕೈಚೆಂಡುಳ್ಳಿಯ.
- ಮಾಚು : ಆರೆ, ನಾನ್ ಅಕ್ಕಲೆಂಜೇ ರೆಡೀ ಉಳ್ಳ. ನೀಡದೇ ನಿಧಾನ. ಇಕ್ಕ ಎಂತೆಂತ ಎಳೆದಿತ್ತುಳ್ಳಿಯೋ ಅದ್‌ನೆಲ್ಲ ಒಮ್ಮೆ ಓದಿರ್. ಅದಾನದೂ ಏರ ಕೊರು ಇಂಜಕ ಸೆರಿ ಕೂಟಂಡಕ ಆಚಿ. ಇದಾ ಓದಿರ್ ಒಮ್ಮೆತೆ.....
- ಪೂವಿ : ಈ ಪೇಪರ್‌ನೆಲ್ಲ ತಾರಾಮಾರಾ ಕಲ್‌ಂದ್‌ಟಿಯ ನೀನ್. ಇಕ್ಕ ಎಂತಾನ ಸುರೂಲ್ ಓದಂಡಿಯೆ? ಜಮ -ಖರ್ಚಿನ ಓದಿರಡಾ?... ಇದೆಂತ ಇದ್?...ಇದ್ ಇಲ್ಲಿರಡ್.
- ಮಾಚು : ಎಂತ ಅದ್? ಕಾಗದ?
- ಪೂವಿ : ಅದ್ ಮಕ್ಕ ಎಳೆದ್‌ನ ಬೋಡಿಕೆ ಕಾಗದ! ನೀಕ್ ಸೆರಿಯಾನ ಮಕ್ಕಳೂ!
- ಮಾಚು : ಎಂತೆಂದ್ ಎಳೆದಿತ್ ಅದಲ್ ಓದ್ ನೋಟನ?
- ಪೂವಿ : ಓದುವಿ ಕೇಳ್ ... (ತೊಂಡೆ ಸೆರಿಕೂಟಲ್) ಸನ್ಮಾನ್ಯಂಗಳೇ, ನಿಂಗ ದಂಡಾಳೂ ಕೂಡ್ಯಂಡ್ ಬಡ್ಡೆಟ್ ಮಂಡನೆ ಮಾಡುವದ್ ನಂಕ್ ಗೊತ್ತಾಯಿತ್. ಕೈಂಜ ಕಾಲ ಬಡ್ಡೆಟ್ ಮಂಡನೆ ಮಾಡ್‌ನಾನಂಗುಂಡ್ ಈ ಕುರಿ ನಂಗ ಎಚ್ಚರ ಎಡ್‌ತಂಡ್ ಈ ಬೋಡಿಕೆ ಕಾಗದತ್‌ನ ಎಳೆದ್‌ನದಾಯಿತುಂಡ್. ನಾಕ್ ಎಣ್ಣಕ ರಂಜು ಕಣ್ಣಂಗ್ - ಓರ್ ಜೊತೆ ಲೆದರ್ ಶೂ, ದಂಡ್ ಜೊತೆ ಕ್ಯಾನ್ವಾಸ್ ಶೂ, ಓರ್ ಕ್ರಿಕೆಟ್ ಕಿಟ್‌ಸೆಟ್, ಅಲ್ಲತೆ ರಜತ್ ಟೂರ್ ಪೋಪಕ್ ದಂಡಾಯಿರ ಉರ್‌ಪಿಯ ಅವಶ್ಯ ಉಂಡ್. ಸುಮಿ ಮೂಡಿರ ಬೋಡಿಕೆ ಇನ್ನೆ ಉಂಡ್. ದಂಡ್ ಜೊತೆ ಡ್ರೆಸ್ ಮೆಟೀರಿಯಲ್, ಓರ್ ಜೊತೆ ಹೈ ಹೀಲ್ಡ್ ಚಪ್ಪಲ್, ದಂಡ್ ಜೀನ್ಸ್ ಪ್ಯಾಂಟ್, ಅಲ್ಲತೆ.....
- ಮಾಚು : ಪೂವಿ, ಪೂವಿ, ನಿಪ್ಪಾಚಿಡ್ ನಿಪ್ಪಾಚಿಡ್... ಉಫ್! ದೇವಳೇ ಕಾಪಾಡಪ್ಪ!
- ಪೂವಿ : ನಾಡ ಓದಿತೇ ಆಯಿತ್‌ಲೆ. ಎಂತಾಚಿ ಮಾಚು ನೀಕ್?
- ಮಾಚು : ಇಂಞಾ ಎಂತ ಆಪಕುಳ್ಳ? ನಾಡ ಜೀವಮಾನತ್ ಇಂತೋರ್ ಬೋಡಿಕೆ ಅರ್ಜಿನ ಕಂಡಂವೊ ಅಲ್ಲ ನಾನ್! ಮಕ್ಕಕೂ ಈ ಮಾದ್ರಿ ಮಂಡೆ ಬಂದ್ರತಾ?
- ಪೂವಿ : ಇದ್ ನಲ್ಲ ಕಷ್ಟಾಚಿಲ್ಲ ನೀಡ. ಸಂಸಾರಾಂದೆಣ್ಣ ಪಿಂಞ ಮಕ್ಕಕೂ ಅದಲ್ ಪಾಲ್ ಉಂಡಲ್ಲ ಮಾಚು?
- ಮಾಚು : ಅಯ್ಯೋ ಬುಡಪ್ಪ. ಅದ್‌ನ ದಾರ್ ಇಲ್ಲೆಂದೆಣ್ಣವು? ಅಲ್ಲೆಂಗಿ ಈ ಮಾದ್ರಿ

ಬೋಡಿಕೆನ ಮಿಂಞಾಕ್ ಬೆಚ್ಚಂಡ್ ಕಾಗದ ಎಳೆದುವಚ್ಚಕ್ ಮಂಡೆ ನಂಗಡ ಮಕ್ಕಕ್ ಎಕ್ಕ ಬಂದ್‌ಟಿಯೇಂದ್? ಅದ್‌ನ ಗೇನ ಮಾಡಿತ್ ಆಶ್ಚರ್ಯ ಆಯಂಡುಳ್ಳ ನಾಕ್! ಲೆದರ್ ಶೂವೊಲೊ. ಕ್ಯಾನ್ವಾಸ್ ಶೂವೊಲೊ, ಹೈಹೀಲ್ಡ್ ಚಪ್ಪಲೊಲೊ, ಜೀನ್ಸ್ ಪ್ಯಾಂಟೊಲೊ! ನಾನೆನ್ನ ದುಡ್ಡಾರ ಗಿಡ ನೆಟ್ಟಿಯನಾ? ಎಟ್ ಚೀಲ ಕಾಫಿರ ದುಡ್ಡ್ ಇದ್‌ಂಗೇ ಆಯಿ ಪೋಚಲ್ಲ?

ಪೂವಿ : ಅರೆ, ನೀನೆಂತಂಗ್ ಮಾಡು, ಅದ್‌ಂಗಲ್ಲ ಅಚ್ಚಕ್ ಟೆನ್‌ಷನ್ ಮಾಡ್ಕೊವೊ? ಬೋಡಿಕೇಂದೆಣ್ಣಕ ನಂಗಡ ಮಕ್ಕ ಎನ್ನ ಆಯಿತೇ ಆಂಡೊಂದ್ ಹಠ ಪುಡ್‌ಚಂಡ್ ಅಳತಿತಾ? ಸಂಸಾರತಾರ ಕಷ್ಟ ಸುಖ ಅಯಿಂಕೂ ಅರ್ಥ ಆಪಕ್ ಆಯಿತಿಲ್ಲಿಯಾ? ಅದ್ ಆಪ್ಪರಾಲ ಓರ್ ಬೋಡಿಕೆ ಅಚ್ಚಿಕೆ. ಆಚೆಂಗಿ ಎಡ್‌ತ್ ಕೊಡ್ಕ. ಇಲ್ಲೆಂಗಿ ಇಲ್ಲೆ.

ಮಾಚು : ನೀಡ ಧೈರ್ಯ ಪರೊಲೆಪ್ಪ. ನೀಡ ಬೋಡಿಕೆ ಕೇಟಿತೇ ಮಂಡೆ ಬಿಸಿ ಆಪಿಂಜಿತ್ ನಾಕ್. ಇಕ್ಕ ಮಕ್ಕಡ ಬೋಡಿಕೆ ಬೋರೆ. ಅಲ್ಲ ಗೇನ ಮಾಡುವೊ ನಾನಾ! ಒಂದ್ ಪತ್ತನೇ ಕ್ಲಾಸ್. ಇಂಞೊಂದ್ ಎಟ್ಟನೇ ಕ್ಲಾಸ್. ಇಕ್ಕಲೇ ಇಯಂಗಡ ಬೋಡಿಕೆ ಈ ಮಾದ್ರಿ ಆಚೆಂಗಿ ಮಿಂಞಾಕೆನ್ನೆ ಪೂವಿ?

ಪೂವಿ : ಮಾಚೂ, ನೀನ್ ಚೆನ್ನ ಸಮಾಧಾನ ಎಡ್‌ತವಿಯೆ? ಆ ಕಾಗದ... ಆ ಕಾಗದ....

ಮಾಚು : ಎಂತ ಆ ಕಾಗದ?

ಪೂವಿ : ಅದ್‌ನ ನಾನೇ ರಂಜು ಕೊಂಡ ಕೈಲ್ ಎಳೆದ್‌ಚಿಟ್ಟೆ! (ತೆಳಿ)

ಮಾಚು : ಎಂತ ಎಣ್ಣೆ? ನೀನೇ ಎಳೆದ್‌ಚಿಟ್ಟಿದಾ? ಎಂತಾಂಗ್?

ಪೂವಿ : ನೀಡ ಕಳಿ ಎನ್ನನಿಪ್ಪಾಂದ್ ನೋಟುವಕ್! (ತೆಳಿ)

ಮಾಚು : ಬೆಪ್ಪಿ ನೋಟ್ ದವಡೆಕ್! (ತೆಳಿ) ಎಲ್ಲಾಲ್ತೂ ತಮಾಷಿಯೆ ನೀಕ್! ಅಲ್ಲೆಂಗಿ ಮಾತ್ರ ವಿಷ್ಯವೂ ನೇರೇ. ಎಲ್ಲಾ ಮಕ್ಕಳೂ ಅಂತಾನೆಲ್ಲ ಇಡುವಕ ನಂಗಡ ಮಕ್ಕಕೂ ಆಸೆ ಆಪದ್ ಉಳ್ಳದೇ ಅಲ್ಲ ಪೂವಿ? ಪಾಪ!...ಆಚೆಂಗಿ ಎನ್ನ ಮಾಡಂಗ ಎಣ್ಣೆ! ಪೊದಪ್ಪು ಉಳ್ಳಚ್ಚಕೇ ಕಾಲ್ ನೋಟೊಂಡುವಚ್ಚಿಕೇ!

ಪೂವಿ : ಸ್ವಾರಿ ಮಾಚು. ಬೇಜಾರಾಚಾ?

ಮಾಚು : ನೀನ್ ಎಣ್ಣಾಂಗ್ ನಾಕೊಂದೂ ಬೇಜಾರಿಲ್ಲೆ ಆಚಾ? ನೀಡ ಕೆನನ ಗೇನ ಮಾಡುವೊ ನಾನಾ! ಏದ್ ಪಡಿಪ್ಪು ಇವಡಾಂದ್! (ತೆಳಿ)

ಪೂವಿ : ಪಿಂಞೆಂತ ಮಾಡುವೊ ಮಾಚು? ಚಿರ್‌ಪತ್ ನಂಗ ಅಪ್ಪರಿಪ್ಪರ ಕೊಂಡ ಚೂದಲ್ ಕುತ್ತಿಯೋವಿಂಜತ್. ಇಕ್ಕ ಇನ್ನನೇಂಗಿ ಓರಮ್ಮ ಚಿರ್‌ಂಜನೆ ಕುತ್ತಿಟಕ ಮಜ ಇಪ್ಪ! (ತೆಳಿ)

ಸಕಮೆ ಪೂಮ್ನಾಲೆ

- ಮಾಚು : ಮಜ ಇಪ್ಪ ನೀಕ್! ಇಕ್ಕೆನ್ನ ಬಡ್ಡೆಟ್‌ರ ಕತೆ?
- ಪೂವಿ : ಬಡ್ಡೆಟ್‌ರ ಬಾಯಿಕ್ ಮಣ್ಣ್ ಬೂವಡ್. ಖರ್ಚಿಕ್‌ಂಜ ಅದಾಯ ಜಾಸ್ತಿ ಉಂಡ್ ಅಚ್ಚಕ್ ಮದಿಯಾ?
- ಮಾಚು : ಎಂತ ಎಣ್ಣೆಯ? ಓರಾಂಡೆತ್‌ಂಜ ಓರಾಂಡೆಕ್ ಲೆಕ್ಕ ಇಟ್ಟಿತೂ ಆದಾಯೇ ಜಾಸ್ತಿ ಉಂಡಾ? ಅದೆನ್ನೆ?
- ಪೂವಿ : ಅದ್‌ಂಗೇ ಎಣ್ಣುವೊ ಪೊಂಗಡ ಗುಟ್ಪಂದ್! ನೀಡ ಕೈಂಜ ಅದ್‌ಂಗ್ ಇದ್‌ಂಗ್‌ಂದ್ ನಾನ್ ಚೊಟ್ಪನಕಲೂ ಅದೆಲ್ಲ ನಂಗಡ ಸಂಸಾರ ನೀಸುವಕೇ. ಗೊತ್ತಾಚಾ?... ಒರೇ ಓರ್ ಪೈಸ ಪಾಳಾಕತೆ ಅಡ್‌ಕ ಮಾಡ್‌ನಾಂಗುಂಡ್ ಸಂಸಾರ ಚಾಯಿಲೇ ನಡ್‌ಂದಂಡುಂಡ್. ಪಿಂಞಂತಾಂಗ್ ಲೆಕ್ಕಪಕ್ಕ?
- ಮಾಚು : ಪಿಂಞ ಪೊಡಿಯ, ಮಾಲ್‌ಂದ್ ಕೂತ್‌ಡ್‌ವಿಂಜಿಯಲ್ಲ ಅದ್?
- ಪೂವಿ : ಈ ರೇಟ್‌ಲ್ ಯಾವಂಗ್ ಬೋಂಡು ಮಾಚು ಮಾಲ್? ಪೊಡಿಯ ಬೋಂಡಿ ಯಚ್ಚಕ್ ಇಪ್ಪಕ ನಾಕೆನ್ನಂಗ್ ಪೊಡಿಯ? ಮಕ್ಕಡ ಖರ್ಚಿನ ಚಾಯಿಲ್ ನೋಟನ ಬಾ.
- ಮಾಚು : ಪರಮಾತ್ಮಾ! ಸೂರ್ಯ ಏದ್ ಬರಿಲ್ ಉದ್‌ಚತಪ್ಪ ಇಂದ್? ಬಡ್ಡೆಟ್ ಸೂಪರ್ ಸಕ್ಸಸ್! (ತೆಳೆ)

ಬಟ್ಟೆ ತಪ್ಪಿನ ಮಾಚು

- ಪೂವಿ : ಅರೆ, ಎಚ್ಚಕ್ ನೇರಕ್ ಬಂದ್ರು ಮಾಚೂ?
- ಮಾಚು : ಎಚ್ಚಕೋ ನೇರಕ್ ಬಂದ. ಎನ್ನಂಗಿಕ್ಕ?
- ಪೂವಿ : ನೀನೆಂತಾಂಗಿನ್ನನೆ ಬಂದನ್ನಕೆ ಜಗಳಕ್ ಮೊಳಿ ತೇಡುವೊ ಮಾಚು? ಕಾಫಿ ಮಾಡಿತ್ ಕೊಂಡ ಬಕ್ಕಡಾ?
- ಮಾಚು : ಒಂದೂ ಬೋಂಡ. ಕಾಫಿ ಮಾಡ್ಯಂಡ್ ಕುಡ್ಚ.... ಅಲ್ಲ ಪೂವಿ. ವಡಿಯನಾನಂವೊ ಮನೆಕ್ ಬಪ್ಪ ನೇರತ್ ಮನೆಲ್ ಇಕ್ಕೊಂಡೂಂದಾಚೆಂಗೂ ತೋಂದುಲಿಯ ನೀಕ್?
- ಪೂವಿ : ಎನ್ನಂಗ್ ಮಾಚು, ನೀನ್ ಅನ್ನನೆ ಕೇಪೊ?... ಪಯ್ಯು ಒರೇ ಸಮ ಅರ್ಂದಂಡಿಂಜತ್. ಒರ್ ಗಳಿಗಲ್ ಕೊಟ್ಟ್ ಕೂಟಿತ್ ಬಂದ್ರುವೀಂದ್ ಪೋನ. ಅಕ್ಕಣೆ ಆನ ಕತೆಯೇ ಬೋರೆ.....
- ಮಾಚು : ಅದೆಂತ ಬಲ್ಲಾದೆ ಕತೆ ನೀಡದ್? ಲೋಕತಿಲ್ಲತದ್?
- ಪೂವಿ : ಅದೆಲ್ಲ ಬಯ್ಯಂಜಿ ಎಣ್ಣುವಿ. ನೀಡ ಕತೆ ಎಣ್ಣ್ ಮಿಂಞ. ಎಂತ ಮಾಡ್ಯಂಡುಂಡ್ ಸಂಜು?
- ಮಾಚು : ಸಂಜು ಚಾಯಿಲುಂಡ್. ಒಂದೂ ತೊಂದರೆ ಇಲ್ಲೆ. ಬಪ್ಪವಾರ ಮಕ್ಕೆಲ್ಲ ಕೂಡಿತ್ ಅದೆಲ್ಲಿಕೋ ಟೂರ್ ಪೋಪೊಲೊ. ಎಲ್ಲಿಕಪ್ಪಾ..... ಕನ್ಯಾಕುಮಾರಿಕ್.
- ಪೂವಿ : ಸಮುದ್ರ ಕರೆಲ್ ಎಚ್ಚರತಿಪ್ಪಕ್ ಎಣ್ಣೆಯಾ ಮಾಚು?..... ಮಕ್ಕ ಕಳಿಲ್ ಎಂತೆಂತೋ ಆಯಿಟ್ಟಕ್ಕಾಂದ್ ಪೋಡಿ ಆಯಂಡುಂಡ್ ನಾಕ್!
- ಮಾಚು : ನೀನ್ ಮಿಂಞಲೇ ಪುಕ್ಕೊಲಿ. ನೀಕ್ ಎಣ್ಣಲ್ಲ ನಾನ್? ಅಂವೊ ಎನ್ನ ಚೆರಿಯ ಕುಂಞಿಯ ಪೂವಿ? ಈಯಾಂಡ್ ಪಾಸಾಯಿಟ್ಟಕ ಡಿಗ್ರಿ ಕ್ಲಾಸ್ಕ್ ಪೋಪಕುಳ್ಳಂವೊ!
- ಪೂವಿ : ನಾಕ್ ಅದೇ ಪೋಡಿ ಮಾಚು... ಓರಮ ಗೇನ ಮಾಡುವಕ ಎಚ್ಚಕ್ ಬೇಜಾರಾಪ ಗೊತ್ತುಂಡಾ ನೀಕ್? ಅಪ್ಪವ್ವ ಎಲ್ಲಿಯೋ, ಮಕ್ಕ ಎಲ್ಲಿಯೋ. ಅಕಸ್ಮಾತ್ ಎನ್ನೇಂಗಿ ಕಯ್ಯತಾಯಿಟ್ಟಕ ಕೂಡಿ ಅಚ್ಚಕ್ ದೂರಕ್ ಪೋಪಕೂ ಕಯ್ಯಲೆ. ಈ ಜೀವಮಾನೇ ರೋಸಿ ಪೋಪ ಓರಮ.
- ಮಾಚು : ಆಚಿ. ಮೊರೆ ಸುರು ಮಾಡ್ ಅಂದಕ. ಮಕ್ಕಳ ಕಾಕೆಕೊಂಡ ಪೋಯಿಟ್ಟಕಾಂದ್

ಪೂಡಿಯ ನೆರಿರ ಸೆರೆಲ್ ಒಳ್ಳಾಪ್ಪಚಿಟ್ಟಿ. ಅನ್ನನೆ ಚಾಕಿತೇ ಮಕ್ಕ ಪುಕ್ಕಲ್ ಕಳಿ ಕಳಿಪ್ಪೊ!

ಪೂವಿ : ಅವ್ವಂಗಡ ನೊಂಬಲ ಅವ್ವಂಗಕ್ ಅರ್ಥ ಆಪನ್ನತದಲ್ಲ ಮಾಚು. ಪತ್ತ್ ತಿಂಗ ಕೆಲತ್ ಬೆಚ್ಚಂಡ್ ಪೆತ್ತಿತ್ ಚಾಕಿತ್ ಬಲ್ಂಜನೆ ಮಾಡಣೆ ಅವ್ವಂಗ ಎಚ್ಚಕೆಲ್ಲ ಬೇಜಾರ ಪಟ್ಟಿತಿಪ್ಪಾಂದ್ ಆಣಾಳ್ಕ್ ಎನ್ನನೆ ಗೊತ್ತಾಂಡು ಎಣ್ಣೆ?

ಮಾಚು : ಆಚಪ್ಪ ಮಾತಾಯಿ. ನೀನೇ ಎಲ್ಲ ಮಾಡ್ನವ. ನಾನ್ ಇದ್ನಲ್ಲ ಕೈಟ್ಟಿಯಂಡ್ ನೋಟಿಯಂಡ್ ಅಳ್ತಂಡಿಂಜ. ನಾನ್ ಒಂದೂ ಮಾಡಿತಿಲ್ಲೆ.

ಪೂವಿ : ನೋಟಿಂವೊ! ಪುನಾದ್ಯ ಜಗಳಕೇ ಬಪ್ಪಕ್ ಕಳಿಪ್ಪೊ! ನೀನ್ ಒಂದೂ ಮಾಡಿತಿಲ್ಲೆಂದ್ ನಾನ್ ಎಣ್ಣನಾ ಮಾಚು? ನಾಡ ಮನಸ್ಕ್ ಎಂತ ತೋಂದ್ಚೋ ಅದ್ನ ಎಣ್ಣೆಟಪ್ಪ. ನೀಡ ಕೂಡೆ ಎಣ್ಣೆತೆ ಇಂಞಿ ದಾಡ ಕೂಡೆ ಎಣ್ಣವಡ್ ಮಾಚು?

ಮಾಚು : ಆಣಾಳ್ಕ್ ಎಂತ ಅರ್ಥ ಆಪ ಅವ್ವಂಗಡ ನೊಂಬಲಾಂದ್ ಪರಿವದೂ ನೀನೇ. ಅದೇ ವಡಿಯ ಆಣಾಳ್ಕ್ ಮರ್ಂದಿತ್ ಪುನಾದ್ಯ ಅವಂಡ ಕೂಡೇ ಕಷ್ಟ ಸುಖ ಪರಿವದೂ ನೀನೇ!

ಪೂವಿ : (ತೆಳಿ)ಸದ್ಯ! ನೀಡ ಮೂಡ್ಂಜ ತೆಳಿ ಪಾಂಜತಲ್ಲ!.... ಅಲ್ಲ ಮಾಚೂ, ಎಕ್ಕೊಲೂ ಸೀರಿಯಸ್ ಆಯಿತ್ ಉಂಡೆಂಗಿ ಆ ಮನೆಲ್ ಎಂತ ನೆಮ್ಮದಿ ಇಪ್ಪ ಎಣ್ಣೆ ನೋಟಿನ. ಮಕ್ಕ ಓದುವ ನೆವನತ್ ಮನೆಂಜ ಪೊರ್ಮೆ ಇಪ್ಪ. ವಡಿಯನೂ 'ಗುರ್' ಎಣ್ಣಂಡಿಂಜಕ ಆ ಪೊಣ್ಣಾರ ಪಾಡ್ ಎಂತಾಂಡು?

ಮಾಚು : (ತೆಳಿ) ವಡಿಯ 'ಗುರ್' ಎಣ್ಣವಕ್ ಮಿಂಞೇ ಬಿಸ್ಕೆಟ್, ಪಾಲ್ ಕೊಡ್ತಟಕ ಅಂವೊ ಎಂತಾಂಗ್ 'ಗುರ್' ಎಣ್ಣವ ಪೂವಿ?

ಪೂವಿ : ಅಲ್ಲ ಮಾಚು? ನಂಗಡ ತಕ್ಕನ ದಾರೇಂಗಿ ಕೇಟಕ ಎಂತಾಂದ್ ಗೇನ ಮಾಡು ಗೊತ್ತುಂಡಾ? ಪಾಪ ಇವ ವಡಿಯಂಗ್ ನೇರ ನೇರಕ್ ಸೆರಿ ಆಯಿತ್ ಕೆಲಕ್ ಮಾಡಿತ್ಡುಲೇಂದ್ ಗೇನ ಮಾಡು! (ತೆಳಿ)

ಮಾಚು : ಅಲ್ಲೆಂಗಿ ಮಾತ್ರ? ಇಕ್ಕ ನಾನೇ ಕಾಫಿ ಮಾಡಿತ್ ಕುಡಿಕ್ಕಂಡಿಯಾಚಿ.

ಪೂವಿ : ನಾನೆನ್ನ ಮಾಡಡ್ ಮಾಚೂ? ಪಯ್ಯು ಒರೇ ಸಮ ಅರ್ಂದಂಡುಂಡಲ್ಲಾಂದ್ ಬೇಲ್ಕ್ ಪೋನ. ಅಕ್ಕಣೆ ಅದ್ ಕೇರ್ ಬಲ್ಚಂಡ್ ಓಟ್ ಮುರ್ಕಿಟಕ ಏಲೇಲೊ. ಆಂಡ ಕೂಡೆ ನಾಕ್ ಓಡುವಕ್ ಕಯ್ಯುವಾ?... ನೋಟಿಲ್ಲಿ ನಾಡ ಕೈನ ಒಮ್ಮ. ಕಾಂಬ ಇಲ್ಲಿ? ತೋಲ್ ಉಳಿಪೋಯಿತ್!

ಮಾಚು : ನೀನ್ ಎನ್ನಂಗ್ ಕೇರ್ನ ಕೈಲ್ ಪುಡ್ಚಂಡಿಯೆ? ಬುಟ್ಟೊಂಡಿಂಜತ್!

- ಪೂವಿ : ಉಳ್ಳಯಿಂಡ ಬೇಲೆಕ್ ಪೋಯಿತ್ ಇಳೊಂಜಕ ಉಂಡಾ ಮಾಚು? ಅಯಿಂಡ ಬಾಯಿಂಜೋ ಕೇಕೊಂಡು. ನೀಡ ಬಾಯಿಂಜೋ ಕೇಕೊಂಡು. ಅನ್ನನೆ ಗೇನ ಮಾಡಿತ್ ಮುರ್ಕ ಪುಡ್ಚೆಂಡ. ಪುಣ್ಯಕ್ ಕೇರಾನ ಕೈಕ್ ಸುತ್ತಿತ್ ಪುಡ್ಚಿತಿಂಜಿಲೆ. ಅನ್ನನೆ ಮಾಡಿತುಂಡೆಂಗಿ ಇಕ್ಕ ನೀಡ ಕೂಡ ತಕ್ಕ ಪರಿಯುವಕ್ ಪೂವಿ ಇಪ್ಪಿಂಜಿಲೆ! (ತಳಿ)
- ಮಾಚು : ಅಲ್ಲಿಂಜೆಂತಾಚಿ? ಪಿಂಇನ್ನನೆ ಕೆಟ್ಟಿತಿಟ್ಟಿಯಾ?
- ಪೂವಿ : ದೇವಡ ದಯತ್ ಆ ಬರಿಂಜ ದಾಡದೋ ಓರ್ ಜೀಪು ಬಂದಂಡಿಂಜತ್. ಈಂಗ್ ಅಂಡ ಸದ್ವಕ್ ಪೋಡಿ ಆಚೋ ಎನ್ನೋ, ಬಯ್ಯಕ್ ಓಡಿಯಂಡ್ ಬಾತ್. ಕೊಟ್ಟಕ್ ಕೂಟಿತ್ ಬಪ್ಪಕ ಇಚ್ಚಕ್ ನೇರಾಚಿ.... ಅದಿರಡ್ ಎಂಗೇಜ್‌ಮೆಂಟ್‌ಲ್ ಎಚ್ಚಕ್ ಜನ ಇಂಜತ್ ಮಾಚು?
- ಮಾಚು : ದಮ್ಮಯ್ಯ ದೇವಳೆ! ಇಂಇ ಮಿಂಇಕ್ ಎಂಗೇಜ್‌ಮೆಂಟ್‌ಕ್ ಪೋಪಕಾಗ. ಎಲ್ಲಾ ಬೊರೀ ಪೊಣ್ಣಾಳೆ. ಕಣ್ಣ ಮೊಣ್ಣಂದ್ ಒರ್ ಪತ್ತಾಳ್ ಆಣಾಳ ಇಂಜಿತಿಕ್ಕು.... ಬಸ್‌ಲ್ ಪೋಪಕ ಒರ್ ಕತೆ!
- ಪೂವಿ : ಎಂತ ಕತೆ?
- ಮಾಚು : ಬಪ್ಪಕ ಬಸ್‌ಲ್ ದುಂಬಾ ರೆಶ್ ಇಂಜತ್. ಒರ್ ಪೊಣ್ಣಾಳ್ ಓರ್ ಕುಂಇನ ಕಿಟಕೈಕಾಲೆ ತಾತ್. ಒಮ್ಮ ಪುಡ್ಚೊಳಿ ಪ್ಲೀಸ್. ಒರ್ ಸೀಟ್ ಬೆಚ್ಚೊಳೆಂದ್.
- ಪೂವಿ : ಅಯ್ಯೋ, ಬಸ್‌ರ ಕಿಟಕೈಕಾಲೆ ಕುಂಇನ ತಾತಾ?
- ಮಾಚು : ಅಕ್ಕು ಪೂವಿ. ಅಚ್ಚಕ್ ರೆಶ್ ಇಂಜತ್ ಬಸ್‌ಲ್!
- ಪೂವಿ : ಏದ್ ಧೈರ್ಯ ಇಕ್ಕೊಂದ್? ಅಕಸ್ಮಾತ್ ಕುಂಇನ ಒಳ್‌ಕ್ ಕೊಡ್ತಿತ್ ಅವ ಒಳ್‌ಕ್ ಬಕ್ಕಣೆ ಬಸ್ ಪೋಯಿತಿಂಜಕಲೊ?
- ಮಾಚು : ವಿಷ್ಯ ಕೇಳ್. ಅನ್ನನೆ ಒಂದೂ ಆಯಿತಿಲೆ. ಇವ ಬೆಂಬರತ ಕಂಡಿಕಾಲೆ ಬಸ್‌ಕ್ ಪತ್ತುವಾನ ನೋಟಿಯೆ ನಾನ್. ಆಚೆಂಗಿ ಅವಕ್ ಸೀಟ್ ಬೆಪ್ಪಕ್ ಅಲ್ಲಿ ಸೀಟ್ ಇಂಜಕೆನ್ನೆ?
- ಪೂವಿ : ಪಿಂಇಂಜೆಂತಾಚಿ?
- ಮಾಚು : ಆಪ ಎಂತ? ಈ ಕುಂಇಂ ಒರೇ ಸಮ ಕುಯ್ಯೋ ಮರ್ರೊಂದ್ ಮೊರೆ ಸುರು ಮಾಡ್‌ಚಿ. ಅಕ್ಕಣೆ ಬಸ್‌ಲ್ ಮಂಡೆಕೋರಂದ್ ತಕ್ಕು.....
- ಪೂವಿ : ಎಂತೆಂದ್ ತಕ್ಕು ಮಾಚೊ?
- ಮಾಚು : "ಕುಂಇನ ಅಪ್ಪಂಡ ಪಕ್ಕು ಬುಟ್ಟಿತ್ ಅವ್ವ ಆರಾಮ್‌ಲ್ ಅಲ್ಲಿತಿಕ್ಕು. ಅವ

ಎಂತೋರ್ ಅವ್ವನೋಂದ್" ಒಬ್ಬೊ. "ಕುಂಞಿ ಅನ್ನನೆ ಮೊರಟ್ಟುಂಡುಂಡ್. ಅಪ್ಪ ನೋಟ್, ಕಲ್ಲ ಗೂಟತರನ್ನಕೆ ಅಳ್ತೆಂದ್" ಇಂಞೊಬ್ಬ "ಅವ್ವಂಗ ಎಚ್ಚಕಾಚೆಂಗೂ ಇಚ್ಚಿಕೆ. ಕನಿಕರ ಇಂಜಕಲ್ಲಾ"ಂದ್ ಇಂಞೊಬ್ಬೊ.

ಪೂವಿ : ಅಯ್ಯೊಯ್ಯೊ! ಇವು ಈ ತಕ್ಕನ ನಿನ್ನ ನೋಟ್ಟುಂಡ್ ಎಣ್ಣುಂಡಿಂಜದಾ ಮಾಚು? ನಾನ್ ಇಕ್ಕೊಂಡಿಂಜತ್ ಬಸ್‌ಲ್ ಇಯಂಗಡ ಮೂಡ್‌ಂಜ ನೀರ್ ಉಳ್‌ಪುವಿಂಜ. ಅಚ್ಚಕೂ ಗೊತ್ತಾಪುಲಿಯ ಪರ್ದೇಸಿಯಕ್? ಉಪಕಾರ ಮಾಡ್‌ನೈಂಗಕೇ ಅನ್ನತ ತಕ್ಕ ಎಣ್ಣುವದಾ ಅಂದಕ?

ಮಾಚು : (ತೆಳಿ) ಸದ್ಯ ನೀನಿಲ್ಲತದೇ ನಲ್ಲದಾಚಿ. ಅಯಿಂಕ್ ಮಾತ್ರ ಎನ್ನನೆ ಗೊತ್ತ್? ನನ್ನ ಕುಂಞಿರ ಅಪ್ಪಾಂದೇ ಗೇನ ಮಾಡ್‌ಂಡಿತ್.

ಪೂವಿ : ದಾಡ ದಾಡೋ ಕುಂಞಿಕ್ ನೀನೆನ್ನಂಗ್ ಅಪ್ಪ ಆಂಡು. ಮಾಚು?... ಅಚ್ಚಕ್ ಸೊಯ ಇಲ್ಲಿಯ ಅಯಿಂಕ್?

ಮಾಚು : ಎನ್ನನೆ ಗೊತ್ತಿಪ್ಪ? ಜೀವಮಾನತ್ ಒಮ್ಮಲೂ ನೋಟತಯಿನ? ಇದ್ ವಡಿಯನಾ ಇದ್ ಪೊಣ್ಣಾಂದ್ ಎನ್ನನೆ ಮಾತ್ರ ಗೊತ್ತಾಪೊ?

ಪೂವಿ : ಅಲ್ಲೆಂಗೂ ಅನ್ನನೇ ಆಯಿತ್ ಇಕ್ಕ. ಕೊಡಗ್‌ರ ಪಾಡ್. ಎಲ್ಲೆಲ್ಲಿಂಚೋ ಬಪ್ಪ ವಡಿಯ ಪೊಣ್ಣಾರನ್ನಕೆ ಉಳ್ಳ ಉಳ್ಳಲ್ಲಿ ಒಳಿವ. ಎಣ್ಣುವವೂ ಇಲ್ಲೆ ಕೇಪವೂ ಇಲ್ಲೆ. ಅಯಿಂಡ ಬಾಯಿಕ್ ಮಣ್ಣೊಡಡ್. ಅಲ್ಲಿಂಚೆಂತಾಚಿ?

ಮಾಚು : ಅದೇ ಉಳ್ಳ ರಸ. ಏದೋ ಒರ್ ಬಸ್ ಸ್ವಾಪ್ ಬಾತ್. ಬಸ್‌ಸ್ವಾಪ್ ಬಪ್ಪಕ ಇವ ಕೂತ್‌ಟ್ಟಿತ್ ಎಣ್ಣೊಚಿ. ನಾಕ್ ಅಪ್ಪರ ಬಪ್ಪಕ್ ಜನ ಬುಟ್ಟುಂಡಿಲ್ಲೆ. ಪುನಾದ್ಯ ಕುಂಞಿನ ಅಕ್ಕಲೆತರನ್ನಕೆ ಕೊಟ್ಟಿಕೆಕಾಲೆ ತಾರೀಂದ್. ಅಕ್ಕ ಜನಕೂ ಗೊತ್ತಾಚಿ ಕಾಂಬ. ಇಂವೊ ಕುಂಞಿರ ಅಪ್ಪೊ ಅಲ್ಲಾಂದ್! (ತೆಳಿ)

ಪೂವಿ : ಸದ್ಯ! ಮರ್ಯಾದಿ ಉಳಿಕೆ ಆಚಲ್ಲ? ಅಲ್ಲಿಂಜ ಕೊಟ್ಟಿಕೆಕಾಲೆ ಕೇಟಂಡತಾ ಕುಂಞಿನ?

ಮಾಚು : ಅದನೇ ಎಣ್ಣುಂಡುಳ್ಳಲ್ಲ? ಕೇಳ್, ಇವ ಬಸ್ ಇಳಿವದೂ ಇವಡ ಮೊಬೈಲ್‌ಕ್ ಒರ್ ಕಾಲ್ ಬಪ್ಪದೂ ಸರಿ ಆಚಿ! ಇವ ಮೊಬೈಲ್‌ಲ್ ತಕ್ಕ ಪರಂದಂಡೇ. ನಾನ್ ಇಕ್ಕ ಬಕ್ಕು, ಇಕ್ಕ ಬಕ್ಕೊಂದ್ ಕುಂಞಿನ ಕೈಲ್ ಎಡ್ತೆಂದ್ ಪಾರಕಾತದೇ ಬಾತ್.

ಪೂವಿ : ಅಯ್ಯೋ ದೇವಳೇ, ಅವ ಕುಂಞಿನ ಕೇಟಂಡಲಿಯ ಅಂದಕ? ಎಂತೋರ್ ಪರ್ದೇಸಿ ಅವ್ವ ಅವಾಂದ್!

ಮಾಚು : ಕಂಡೆಕ್ಕರ್ ರೈಟ್ ಎಣ್ಣೊಚಿ. ಬಸ್ ಪೊರಟ್ಟತೇ ಪೊರಟ್ಟತ್. ಅಕ್ಕಣೆ ಬಸ್‌ಲ್

ಗುಸು ಗುಸು ಸುರು ಆಚಿ. ಜನಡ ಸ್ವಭಾವ ಗೇನ ಮಾಡ್. ಚೆನ್ನ ಜನ ಈ ಘಟನೆಕೂ ನಂಕೂ ಸಮ್ಮಂದ ಇಲ್ಲೆಂದ್ ಅಳತಿಂಜತ್. ಇಂಞಿ ಚೆನ್ನ ಜನ "ಕುಂಞಿನ ಎಲ್ಲಿಂಜೋ ಕಟ್ಟಿ ಬಂತಿಕ್ಕು ಕಾಂಬ. ದಂಡಾಳೂ ಕೂಡಿತ್ ಎಂತೋ ನಾಟಕ ಕಳಚಂಡುಂಡ್ಂದ್" ತಕ್ಕ ಪರಿವಕ್ ಕೂಡ್ಚಿ.

ಪೂವಿ : ಛೇ ಛೇ! ನಿನ್ನ ಕಳ್ಳಂಗಡ ಕೂಟ್ಕ್ ಕೂಟಿರ್ತಾ ಮಾಚು? ನೀನೆಂತಾಂಗ್ ಮುಂಡತೆ ಇಂಜಿಯೆ? ಬಸ್ ನಿಪ್ಪಚಿಡೀಂದ್ ಕೂತ್ ಕೊಡ್ಕೊಂಡಿಂಜತ್!

ಮಾಚು : ಕುಂಞಿ ಮೊರಟ್ತ್ ಮೊರಟ್ತ್ ವರೀರ್ತ್. ಬಸ್ಲ್ ಎಚ್ಚಕ್ ರಶ್ ಇಂಜತ್ಂದೆಣ್ಣಕ ನಾನಿಂಜ ನಾಲನೇ ಸೀಟ್ಂಜ ಡ್ರೈವರ್ನ ನಾಕ್ ಕಾಂಬಿಂಜಿಲೆ. ಕಂಡೆಕ್ಕರ್ ಬಯ್ಯಲ್ ಇಂಜತ್. ಅದಲ್ಲತೆ ವರ್ನ ಕುಂಞಿರ ಮೂಡ್ ಕಾಂಬಕ ಪಾಪ ವರ್ನ ಕುಂಞಿನ ಎನ್ನನೆ ಒಪ್ಪಡ್ಂದ್ ಬೇಜಾರೋ ಆಚಿ. ಇಚ್ಚಕೆಲ್ಲ ಗೇನ ಮಾಡಿತಾಕಣೆ ಬಸ್ ಸುಮಾರ್ ದೂರ ಬಂದಿತೂ ಆಯಿತ್. ಕುಂಞಿರ ಅವ್ವಂಗೇ ಇಲ್ಲತೆ ಕರಕರೆ ನಾಕ್ ಎನ್ನಂಗ್ಂದೂ ತೋಂದ್ಚಿ. ಪುನಾದ್ಯ ಗೇನ ಮಾಡಣೆ ಅಯ್ಯೊಯ್ಯೊ ನಾಕೇದ್ ಹಣೆಬರ ಬಾತಪ್ಪಾಂದೂ ಆಚಿ!

ಪೂವಿ : ನೀನೆಕ್ಕೊಲೂ ಅನ್ನನೇ. ದಾಡ ಮಕ್ಕ ಆಚೆಂಗೂ ಪರೋಲೆ ಬಸ್ಲ್ ಪತ್ತಿಟಕ ವದಿ. ಕಾಕಿತ್ ಮಡಲ್ ಅಳಪ್ಪಚಿಟ್ಟಿವಿಯ. ಇಕ್ಕ ನೋಟ್ ಎಂತಾಂಚೀಂದ್? ಓರಮ ಗ್ರಾಚಾರತನ ಬಲ್ಚಿ ಕೂಟ್ಟಿವೊ ನೀನೇ!

ಮಾಚು : ಅನ್ನನೇ ಆಚಿ ಪೂವಿ. ಎಂಗೇಜ್ ಮೆಂಟ್ಕ್ ಮಂದು ಬಾವನೂ ಬಂದಿತಿಂಜತ್. ಇನ್ನನೇ ಲೋಕರೂಡಿ ಪರ್ಂದಂಡ್ ಇಕ್ಕಣೆ, ಎಂತಾಂಗೋ ಕೊಡಗ್ನ ಪಂಡ್ ಅಳನ ರಾಜಂಗಡ ವಿಷ್ಯ, ಅಲ್ಲಿಂಜ ಇಕ್ಕತಾರ ಪರಿಸ್ಥಿತಿ ಇದ್ನೆಲ್ಲ ಪರ್ಂದತ್. ಅಕ್ಕಣೆ ಮಂದು ಬಾವೊ ಕೊಂಗ ಮಲೆ ಕಾಡ್‌ರೊಳ್‌ಲ್ ಉಳ್ಳ ಒರ್ ಕಲ್ಲರ ವಿಷ್ಯ ಎಣ್ಣೆಚಿ.

ಪೂವಿ : ಉಯಿ ರಾಮಾ! ಕೊಂಗ ಮಲೆ ಬಾರೀ ಭಯಂಕರ ಕಾಡ್‌ಲೊ ಮಾಚು. ಆಂಡ ಒಳ್‌ಕ್ ಪೋಚೆಂಗಿ ಅದೆಂತದೋ ಬಟ್ಟೆ ತಪ್ಪಚಿಡುವೊಲೊ. ಕೊಂಗ ಮಲೆ ಈರುಳ್ಳಿ ಬನಕ್ ಪೋಪಕ ಸೆರಿಯಾನ ಕೂಟ್‌ಕಾರ ಇಂಜಿಲೆಂಗಿ ಪೋನವು ಬಯ್ಯಕ್ ಬಪ್ಪಲೇಂದ್ ಪಪ್ಪ ಎಣ್ಣುವಿಂಜತ್ ಮಾಚೊ!

ಮಾಚು : ಆಯಿತಿಕ್ಕು. ಅದ್ನ ಎಣ್ಣುವಕ್ ಪೋಚೆಂಗಿ ಅದೇ ಒರ್ ಬಲ್ಯ ಕತೆ! ಆ ಕತೆಕ್ ಕಾಡ್‌ರೊಳ್‌ಲ್ ಬಟ್ಟೆ ತಪ್ಪನ ಮಾಚೊಂದ್ ಪೆದ ಇಡೊಲು ಕಾಂಬ! (ತೆಳಿ)

ಪಳವೆ ಪೊನ್ನಾಲ್

- ಪೂವಿ : ಅಯ್ಯೋಯ್ಯೋ! ಕಾಡ್‌ಲ್ ಬಟ್ಟೆ ತಪ್ಪಿಯಾ?... ನೀಕ್ ಚೆನ್ನಂಗೂ ಬುದ್ಧಿ ಇಲ್ಲೆ ಮಾಚು. ಮನೆಲ್ ಪೊಣ್ಣ್ ಮಕ್ಕ ಉಂಡ್‌ಂದಾಚೆಂಗೂ ಗೇನ ಬೋಂಡ ನೀಕ್?
- ಮಾಚು : ಎಂತಾಚೀಂದ್ ಇನ್ನನೆ ಕೂತ್ ಕೊಡ್‌ಪೊ ನೀನ್?
- ಪೂವಿ : ನಾಕೆಲ್ಲ ಗೊತ್ತುಂಡ್. ಎಲ್ಲಿಕ್ ಪೋಡ್, ಎಂತೆಂಗಿ ಒರ್ ಕೇತರೆ ಮಾಡ್ಯಂಡ್ ಬಪ್ಪಿಯ ನೀನ್. ಸಮುದ್ರ ಕರೆಕ್ ಪೋಚೆಂಗಿ ಕೂಡೆ ಉಳ್ಳಯಿನ ಕೂಟಾಕತೆ ಅಚ್ಚಕ್ ದೂರ ನೀರ್‌ಕ್ ಇಳಿಯುವಿಯ. ಮರ ಕಂಡಕ ಆಂಡ ಕೊಡೀಲ್ ಕೋಡಂಡನ್ನೆಕೆ ಪತ್ತಿತ್ ನಾನೇ ಬಲ್ಯ ಶೂರಂದ್ ಉಜೂರ್ತ ಕಾಟುವಿಯ. ಈಂಗೇ ನಾನ್ ನೀನ್ ಪೋನಲ್ಲಿಕೆಲ್ಲ ಬಾಲ್ ಪುಡ್‌ಚಂಡ್ ಕೂಡೇ ಬಪ್ಪೋ!... ಚೆನ್ನ ಎರ -ಕೊರು ಆಚೆಂಗಿ ಎನ್ನಾಕು ಪರಿಸ್ಥಿತೀಂದ್ ಗೇನ ಬೋಂಡ ನೀಕ್?
- ಮಾಚು : ಆಚಾ ಇಕ್ಕ ನೀಡ ಪುರಾಣ? ಇಕ್ಕೆನ್ನೆ ವಿಷ್ಯ ಎಣ್ಣೆಡಾ. ಮುಂಡತಿಕ್ಕಡಾ?
- ಪೂವಿ : ನೀನ್ ಓರಮ ಎಲ್ಲಾರ್‌ನೋ ಬೊತ್ತ್‌ಚಿಟುವಿಯ ಮಾಚು. ಅದತೂ ನನ್ನ ಬೊತ್ತ್‌ಚಿಡುವೊಂದೆಣ್ಣೆಕ ನೀಕ್ ಪೆರ್ತ್ ಕುಶಿ.... ಎಣ್ಣೆಕ್ಕ ಎಂತ ಮಾಡ್ಯಾಂದ್!
- ಮಾಚು : ಇದ್ ನಲ್ಲ ಕಷ್ಟಾಚಿಲ್ಲ ಇವಡ? ಅಂತದ್ ಎಂತಾಚೀಂದ್ ಇಕ್ಕ ನೀಡ ಕಳಿ?
- ಪೂವಿ : ಪಿಂಞಂತೆ ಮಾಚು? ಕಾಡ್‌ರೊಳ್‌ಕ್ ಎಂತಾಂಗ್ ಪೋಯೆ ನೀನ್?
- ಮಾಚು : ಚೆನ್ನ ಎಣ್ಣುವಾನ ಮಿಂಞ ಕೇಳ್ ಪೂವಿ. ಅಲ್ಲಿಂಜ ನೀಡ ರಭಸ ಕಾಟ್.
- ಪೂವಿ : ಎಣ್ಣೆ. ಕೊಂಗಮಲೆ ಕೊಂಗಪ್ಪಂಡ ಕತೆನ!....
- ಮಾಚು : ಮಂದು ಬಾವೊ ಎಣ್ಣೆ ಕತೆ ಎಂತೆಂದೆಣ್ಣೆಕ, ಇಕ್ಕಾಕಣೆ ದಾಕೂ ಗೊತ್ತಿಲ್ಲತೆ ಒರ್ ಕಲ್ಲನ ಬೋಟೆಕ್ ಪೋಪಕ ಮಂದು ಬಾವಂಡ ಅಪ್ಪ ಮಂದು ಬಾವಂಗ್ ಕಾಟಿ ಕೊಡ್ತಿಂಜತೊಲ್ಲೊ. ಆ ಕಲ್ಲಲ್ ಮೀನಾರ ಗುರ್ತ್ ಪಿಂಞ ಅದೆಂತದೋ ಎಳ್ತ್ ಕೂಡಿ ಉಂಡ್‌ಲೊ. ಅದ್‌ನ ಇಕ್ಕಾಕಣೆ ದಾರೂ ಅರಂಜಿಲ್ಲೆಲೊ. ಆ ಕಲ್ಲಲ್ ಅಂಬು ಬಿಲ್ ಪುಡ್‌ಚಂಡ ಮನುಷ್ಯಂಡ ರೂಪು ಕೂಡಿ ಉಂಡೊಲೊಂದ್ ಮಂದು ಬಾವೊ ಎಣ್ಣೆತಾಪಕ ಎನ್ನೆಂಗಾಡ್ ಒಮ್ಮೆ ಆ ಕಲ್ಲನ ನೋಟೊಂಡೊಂದ್ ನಾಕಾಚಿ.
- ಪೂವಿ : ಅಂದಕ ಅದ್ ಶಾಸನ ಕಲ್ಲ ಆಯಿತಿಕ್ಕು ಕಾಂಬಲ್ಲ ಮಾಚು? ನೀನ್ ಎಣ್ಣುವದ್ ಕೇಪಕ ನಾಕೂ ಅದ್‌ನ ನೋಟೊಂಡೊಂದ್ ಆಯಂಡುಂಡ್!
- ಮಾಚು : ಪಿಂಞ ಇಚ್ಚಕ್ ನೇರ ಕಿರ್‌ಚ್ಯಾ? ಇಕ್ಕ ನೋಟ್!

- ಪೂವಿ : ಅಲ್ಲ ಮಾಚು. ಏದೋ ಒರ್ ಕಾಲತ್ ಪಂಡತೆಯಿಂಡ ಚರಿತ್ರನ ಕಲ್ಲ್ ಅ ಎಲ್ಲಿತ್ ಬೆಚ್ಚಿತ್ಂದೆಣ್ಣಕ ಅದ್ ಪೆರ್ತ್ ಇಂಟರೆಸ್ಪಿಂಗ್ ಆಯಿತಿಪ್ಪದೇ ಅಕ್ಕುವಲ್ಲ.
- ಮಾಚು : ಆಂಗಾಯಿತೇ ನಾಕೂ ಅದ್ನ ನೋಟನಾಂದ್ ತೋಂದಿಯೆ. ಸೆರಿ. ಅಂದೇ ಬೈಟ್ ಮಂದು ಬಾವಂಡಲ್ಲಿಕ್ ಪೋನ. ಮಂದು ಬಾವೊ ಅಕ್ಕಯ್ಯಂಗ್ ಪಿತ್ಯಾಂದೆಕ್ ಕೂಪೊದಿ ರೆಡಿ ಮಾಡುವಕ್ ಎಣ್ಣೆಚಿ. ಮುಮ್ಮೂಂದ್ ಒಟ್ಟಿ ಪಜ್ಜಿ ಕೆಟ್ಟುಂಡ್ ಕೊಂಗ ಮಲೆ ಪತ್ತುವಕ್ ಕೂಡ್ಚಿ!
- ಪೂವಿ : ಅಲ್ಲ ಮಾಚೂ, ಆನೆಯ ಇಂಜಿಲಿಯ ಅಲ್ಲಿ?
- ಮಾಚು : ನೀಕ್ ಓರ್ ಕತೆ ಗೊತ್ತಾಲೆ ಕಾಂಬ? ಮಂದು ಬಾವಂಗ್ ಆರೆನ ವಾಸನೆ ಗೊತ್ತಾಪ. ಆನೆಯ ಏದ್ ಬರಿಲುಂಡ್? ಎಚ್ಚಕ್ ದೂರತ್ ಉಂಡ್? ಇದೆಲ್ಲ ಗೊತಾಪೊಲೊ. ಈ ವಿಷ್ಯ ನಾಕೂ ಅಂದೇ ಗೊತ್ತಾಯೆ! (ತೆಳಿ)
- ಪೂವಿ : ಅರೆ! ಅದ್ಲೆಂತ ತೆಳಿಪಕುಳ್ಳ? ಬೋಟೆಕ್ ಪೋಪಯಿಂಗಕ್ ಜಾತಿಯಡ ವಿಷ್ಯ, ಅಯಿಂಡ ಜಾಡ್, ವಾಸನೆ ಇದೆಲ್ಲ ಅಂದಾಜಿಲೇ ಗೊತ್ತಿಪ್ಪ. ತೆಳಿಪ್ಪಕ್ ಎಂತ ಉಳ್ಳ?
- ಮಾಚು : ಕತೆ ಕೇಳ್ ನೀಕೇ ಗೊತ್ತಾಪ ಅಕ್ಕ.... ಪೊರಡುವಕ ಪೂಂಚಿ ಅಡ್ಡ ಬಾತ್. ಆಚಿ ಈಂಡ ಬಾಯಿಕ್ ಇಕ್ಕಲೇ ಮಣ್ಣ್ ಬೂವೊಂಡುವಾಂದ್ ಮಂದು ಬಾವೊ ಎಂಗ್ಚಿ. ಪಟ್ಟಿಕ್ ಇಳಿಯಣೆ ಖಾಲಿ ಬಿಂದಿಗೆ ಪುಡ್ಚಂಡ್ ಒರ್ ಪೊಣ್ಣಾಳ್ ಕಾಂಬಕ್ ಕ್ಲೆಚ್ಚಿ! (ತೆಳಿ)
- ಪೂವಿ : (ತೆಳಿ) ಅವಕೂ ಬಜ್ಜತಾ? ಮಂದು ಅಣ್ಣಯ್ಯ?
- ಮಾಚು : ಪೊಯ್ಯುವದೊಂದ್ ಬಾಕಿ! ಅವ ರಾಗತ್ ಎಲ್ಲಿಕ್ ಪೊಲಾಕ ನೇರ್ತೆ ಪೊರಟ್ಟಿರಾಂದ್ ರಾಗತ್ ಕೇಪಕ ಪರ್ದೇಸಿ ಕಾಡ್ಕ್ ಪೋಯಿತ್ ನೀಡ ಮಾದ ಕೈಚಿತ್ ಬಕ್ಕನಾಂದ್ ಪೊರಟ್ಟಿತ್!
- ಪೂವಿ : ಪಾಪ! (ತೆಳಿ) ಅವಕ್ ಎನ್ನನೆ ಗೊತ್ತ್? ನಿಂಗ ಕಾಡ್ಕ್ ಪೊರಟ್ಟಿತುಳ್ಳದ್? ಕಷ್ಟ ಸುಖ ಪರಂದಿತಿಕ್ಕು!
- ಮಾಚು : ಅಲ್ಲೆಂಗಿ ಮಾತ್ರ ದಾರ್ ಎಲ್ಲಿಕ್ ಪೋಚೆಂಗಿ ಅವಕೆನ್ನ? ಇನ್ನನೇ ಲೋಕಾರೂಡಿ ಕೇಟಿತ್ ಅಚ್ಚಿಕೇ. ಅಂದಿತೂ ಮಂದು ಬಾವಂಡ ಚೊಡಿ ನೀಕ್ ಗೊತ್ತಿಲ್ಲತದಾ?
- ಪೂವಿ : ಅಲ್ಲಿಂಜೆಂತಾಚಿ? ಕಲ್ಲ್ ಎಂತೆಂದ್ ಇಂಜತ್ ಮಾಚೂ?
- ಮಾಚು : ಪುಣ್ಯ ತಾಯಿ, ಅವಸರ ಮಾಡತೆ. ಅದ್ನೇ ವಿವರೋಡೆ ಎಣ್ಣುಂಡುಳ್ಳ.

ಸಕಮೆ ಪೊಮ್ಮಾಲೆ

- ರಾಮನೂ ಸೀತೆಯೂ ಆಖೀರಿಕ್ ಒಂದಾಚೀಂದ್ ಎಣ್ಣೊನಕ ಮದಿಯಾ?
ಇಡೀ ರಾಮಾಯಣತ್‌ನ ಬುಡ್‌ತಿ ಬುಡ್‌ತಿತ್ ಎಣ್ಣಡಾ?
- ಪೂವಿ : ಅದೆಲ್ಲ ಇಕ್ಕಡ್ ಮಾಚು. ನಂಗಡ ಹನುಮಂತ ಕಾಡ್‌ರೊಳ್‌ಲ್ ಎಂತೆಲ್ಲ
ಮಾಡ್‌ಚೀಂದ್ ಮಿಂಞಾ ಎಣ್ಣೊ. ಬಾಕಿ ರಾಮಾಯಣ ಪಿಂಞಾ ನೋಟನ.
(ತೆಳಿ)
- ಮಾಚು : ಎಲೈ ಪೂವಮ್ಮ ಮಹಾತಾಯಿಯೇ ಕೇಳುವಂತಳಾಗು. ಮಂದು ಬಾವನೂ
ಮಾಚುವೂ ದಂಡಕಾರಣ್ಯದಲ್ಲಿ ಹೀಗೇ ಹೋಗುತ್ತಿರಲಾಗಿ... ಏನಾಯಿತಪ್ಪಾ
ಎಂದರೆ.....
- ಪೂವಿ : ಥೂ!ಪೊ! ಮಾಚು ನೀನ್. ನೀಡ ಹರಿಕತೆ ನಾಕ್ ಬೋಂಡ. ಉಳ್ಳಾನ ಉಳ್ಳನ್ನೆಕೆ
ಎಣ್ಣೊಕ ಮದಿ.
- ಮಾಚು : ಪರದಿ ಒಪ್ಪ್‌ಚಿಡುವಾಂಗೂ ಕತೆ ಎಣ್ಣೊವಾಂಗೂ ವ್ಯತ್ಯಾಸ ಉಂಡ್ ಪೂವಿ.
ವರದಿಲ್ ಏದೇ ಚೋಡ್ ಇಪ್ಪುಲೆ. ಕ್ಕಣ್ಣಿನ ಕಂಡಿತ್ ಮೂಡಿಕ್ ಕುಶಿ ಆಚಿ
ಎಣ್ಣೊವಾನ ವರದಿಲ್ ಎಣ್ಣೊಕ ಎಂತ ರಸ ಇಪ್ಪು? ಏದೇದ್‌ನ ಎನ್ನನೆನ್ನನೆ
ಎಣ್ಣೊಂಡುವೊ ಅನ್ನನೆ ಎಣ್ಣೊಕಲೇ ಚೋದಿಪ್ಪೊ.
- ಪೂವಿ : (ತೆಳಿ) ಸರಿ ಮಾಚಯ್ಯ ಮಹಾ ಪ್ರಭುವೇ. ನೀಕ್ ಎನ್ನನೆಲ್ಲ ಎಣ್ಣೊಂಡೂಂದ್
ತೋಂದುವೋ ಅನ್ನನೆಲ್ಲ ಎಣ್ಣೊಂಡ್ ಬಾ. ಕೇಟ ಕೆಮಿ ಪಾವನ ಆಡ್!
- ಮಾಚು : ಆ ಪಾವತ ಪೊಣ್ಣಾಳ್‌ಕ್ ಬಜ್ಜಿತ್ ಕಾಡ್ ಬಟ್ಟೆಕಾಲೆ ನಡ್‌ಂದ್ ನಡ್‌ಂದ್
ನಡ್‌ಂದ್ ನಡ್‌ಂದ್....
- ಪೂವಿ : ಇದೆಂತ ಮಾಚೂ? ನಡ್‌ಂದಿತ್ ತ್‌ರುವದೇ ಇಲ್ಲೆ. ಇಂಞೂ ಎಚ್ಚಕ್ ದೂರ
ಇನ್ನನೇ ನಡ್‌ಂದೆಂದಿಪ್ಪಿಯೆ? (ತೆಳಿ)
- ಮಾಚು : ನಡ್‌ಪಕ್ ಅಚ್ಚಕ್ ಕಷ್ಟ ಆಯಿತ್ ಪೂವಿ. ಅಳ್‌ತಂಡ್ ಕತೆ ಕೇಟನ್ನೆಕೆ ಅಲ್ಲ.
ಈ ಕಾಲ್ ಮೊಣ್ಣೆಂಗಾಲ್‌ಂಜ ಕುತ್ತ ಇಕ್ಕಲೂ ಸೇದುವ. ಗೊತ್ತುಂಡ ನೀಕ್?
- ಪೂವಿ : ನಾನ್ ಎಣ್ಣೊನಾ ಮಾಚು ನೀಕ್? ಕಾಡ್ ತಿರುವಕ್? ಎಣ್ಣೆಕ್ಕ ಕತೆ!
- ಮಾಚು : ಪೊಲಾಕ ಏಳೇ ಮುಕ್ಕಾಲ್ ಗಂಟೆಕ್ ಮನೆ ಬುಟ್ಟವು ಪತ್ತರೆ ಗಂಟೆಕೆತ್ತನೆ
ಇನ್ನನೆ ನಡ್‌ಂದಿತಿಕ್ಕು. ಅಕ್ಕಲೇ ಕೆಲ ಪೈಪಕ್ ಸುರು ಆಚಿ.
- ಪೂವಿ : ಕೂಪದಿ ಕೂಡೇ ಇಂಜತಲ್ಲ. ಒಟ್ಟಿ ತಿಂಗೊಂಡಿಂಜತ್!
- ಮಾಚು : ಓಹೋ, ಅದ್‌ನ ನೀನ್ ಎಣ್ಣೆತೇ ಆಂಡೂಂದ್ ಗೇನ ಮಾಡಿಯೆ? ಒರ್
ಕೊಲ್ಲಿರಲ್ಲಿ ಅಳ್‌ತತ್. ಒಟ್ಟಿರ ಕೆಟ್‌ನ ಉತ್ತಿತ್ ಓರಂದ್ ಒಟ್ಟಿನ ಎಡ್ಡಿತ್
ಕೈಲ್ ಪುಡ್‌ಚಂಡಿತ್. ಅಚ್ಚಿಕೇ ಮಂದು ಬಾವೊ ಓಡ್‌ಂದ್ ಎಣ್ಣೊದೊಂದ್

ಕೇಟಿತ್. ಬಾವೊ ಏದ್ ಬರಿಕ್ ಓಡ್‌ಚೀಂದೇ ಗೊತ್ತಾಯಿಲೆ ನಾಕ್!.... (ತೆಳಿ)

ಪೂವಿ : ಉಯೀ, ಎಂತಾಂಗೊಲೊ ಮಾಚೂ? (ತೆಳಿ)

ಮಾಚು : ಎಂತಾಂಗ್‌ಂದ್ ಗೊತ್ತಾಯೆ ನಾಕ್ ಪಿತ್ಯಾಂದ್ ಪೊಲಾಕ. ಅಕ್ಕಲೇ ಗೊತ್ತಾಯಿತುಂಡೆಂಗಿ ಆ ಪಾಡ್ ಬಪ್ಪಿಂಜಿಲೆ. (ತೆಳಿ)

ಪೂವಿ : ಎಂತಾಯೆಲೊ ಮಾಚು? ಎನ್ನಂಗನ್ನೆ ಓಡಿಯೆ ಅಣ್ಣಯ್ಯ?

ಮಾಚು : ಒಂದಾಂಗೂ ಅಲ್ಲ. ನನ್ನ ಕಾಡ್ ಪಾಲ್ ಮಾಡೊಂಡೊಂದೇ ಆಯಿತಿಕ್ಕೊಂಡೊಂದ್ ತೋಂದ್‌ಚಿ ನಾಕ್. ಕೂತ್ ಕೊಡ್ತ. ಬಾವಂಡ ಸದ್ದೇ ಇಲ್ಲೆ. ಅಕ್ಕಣೆ ಕಣ್ಣಕ್ ಕಂಡತ್ ಆ ದೃಶ್ಯ!....

ಪೂವಿ : ಅಯ್ಯೋಯ್ಯೋ! ಎಂತ ದೃಶ್ಯ ಮಾಚು ಅದ್? ಎಂತಾಯೆ ಅಣ್ಣಯ್ಯಂಗ್?

ಮಾಚು : ಒರ್ ಒಂಟಿಗ ಆನೆ ತುಂಬಿಕ್ಕಿನ ನೇತಿಯಂಡ್ ನಾಡತ್ತಟಿ ಆರಾಮ್‌ಲ್ ಬಂದಂಡುಂಡ್!

ಪೂವಿ : (ಮೊರೆಸ್ವರ) ಇದ್‌ಂಗೇ.... ನಾನ್ ನಿನ್ನ ಒಬ್ಬನೇ ಪೋಪಕ್ ಬುಡತ್ತದ್!

ಮಾಚು : (ಮೊರೆಸ್ವರ) ಇಂಞಿ ಮಿಂಞಾಕ್ ನಾನೂ ಒಬ್ಬನೇ ಪೋಪುಲೆ. ಪೂವಿನ ಕೂಡೆ ಕೂಟ್ಯಂಡ್ ಪೋಪಿ. ಪೂವಿ ಆನೆರ ಕೂಡೆ ತಕ್ಕ ಪರಿವಂಜಿ ಮಾಚುನ ಬುಟ್ಕೊಂದ್ ಎಣ್ಣುವ! (ತೆಳಿ)

ಪೂವಿ : ನೀಕ್ ಪ್ರತಿಯೊಂದೂ ತಮಾಷಿ ಮಾಚು. ಎನ್ನೆಂಗಿ ಆಯಿತುಂಡೆಂಗಿ?

ಮಾಚು : ನೀನ್ ಚೆನ್ನ ಮುಂಡತೆ ಇಪ್ಪಿಯ ಇಕ್ಕ?... ಇದಾ ನೀಡೆದಿಕ್ಕೆ 'ಇಡಿಲೆ' ಉಳ್ಳ ನಾನ್!

ಪೂವಿ : ಅಲ್ಲಿಂಜೆಂತಾಚಿ? ಅದ್‌ನೇಂಗಿ ಎಣ್ಣೊ ಒಮ್ಮೆ!... ಬೆರಿಯ ಎಣ್ಣೊ ಮಾಚು!

ಮಾಚು : ತಡ ಆಯಿತ್ ಗೊತ್ತಾನ ವಿಚಾರ ಎಂತೆಂದೆಣ್ಣಕ ಮಂದು ಬಾವಂಗ್ ಆನೆರ ವಾಸನೆ ಗೊತ್ತಾಯಿತ್. ಆಚೆಂಗಿ ಆಂಗ್‌ಂಜ ಮಿಂಞ ಆನೆಕ್ ಮಂದು ಬಾವಂಡ ವಾಸನೆ ಕೊಟ್ಟಿತ್. ಎಕ್ಕಲೊ ತೋಟಕ್ ಬಪ್ಪಕಾಪಕ ಮಂದು ಬಾವ ಬೊತ್ತ್ ಬೊಡಿ ಪೊಟ್ವೊಚಿಟ್ಟಿತಿಂಜತೊಲೊ. ಆನೆ ಮಂದು ಬಾವಂಡ ವಾಸನೆನ ಚಾಯಿಲ್ ಗೊತ್ತ್ ಮಾಡ್ಯಂಡಿತ್. ಇದ್ ನನ್ನ ಬೆಪ್ಪುಲೇಂದ್ ಗೊತ್ತಾನದೇ ತಡ ಮಂದು ಬಾವ ಮಾಯ ಆಯಿರ್‌ತ್! ಈ ವಿಷ್ಯ ನಾಕೆನ್ನೇಂಗಿ ಗೊತ್ತುಂಡ್?

ಪೂವಿ : ಪಿಂಞ ನೀನೆಂತ ಮಾಡ್ಯ?

ಮಾಚು : ನಾನೆಂತ ಮಾಡುವೊ? ಎಡ್ತ ಕೈಲಿಂಜ ಒಟ್ಟಿನ ಕನ್‌ಚದೂ ಓಟ್ ಮುರ್‌ಕ್‌ನದೂ. ಮಂದು ಬಾವ ಎಲ್ಲಿಯೋ? ನಾನೆಲ್ಲಿಯೋ? ಎಚ್ಚಕ್ ನೇರ ಏದ್ ಬರಿಕ್ ಓಡಿಯೇಂದೇ ಗೊತ್ತಿಲ್ಲೆ. ಓಡಿ ಓಡಿತ್ ಓರ್ ತೂರ

ಷಳಮೆ ಪ್ರೊಮ್ಯಾಲೆ

ಪಡತ್‌ರೊಳಿಯ ಚಿಕ್ಕಿ ಪೋನ. ಆನೆ ದವುತಿಯ ಬಂದಿತುಂಡೆಂಗಿ ಆಂಡ ಕೈಕ್ ಕೊಟ್ಟಿ ಪೋಪಿಂಜನೆನ್ನೊ?

ಪೂವಿ : ಆನೆ ದವುತಿಯ ಬಂದಿತಿಲ್ಲಿಯ ಅಂದಕ? ಸದ್ಯ!

ಮಾಚು : ಅದೆಂತಾಂಗ್ ದವುತುವ? ಆಂಡ ಹೊಟ್ಟೆಪಾಡ್ ಆಂಗ್. ನಂಗಳೇ ಅನಾವಶ್ಯ ಓಟ್ ಮುರ್‌ಕಿಯೆ ಅಚ್ಚಿಕೆ. ಎನ್ನನೆಯೊ ತೂರ ಪಡತ್‌ರೊಳೊಂಜ ಬುಡ್‌ತಿಯಂಡ. ಇಲ್ಲಿ ಕಾಂಬುಲೆ? ಒರ್ ಮುಳ್ಳು ಇಂಞೂ ಕಾಲೊರ ಒಳ್‌ಲೇ ಉಂಡ್.

ಪೂವಿ : ಆಚಿ ಉದ್ಬಾರ! ಎಂತೆಂಗಿ ಒಂದ್ ಮಾಡ್ಯಂಡೇ ಇಪ್ಪಿಯ ನೀನ್!.... ಚೂದ್ ಕೊಂಡ ಬಪ್ಪಿ ಮುಳ್ಳುನ ಇಕ್ಕಲೇ ಎಡ್ಕೊಂಡು. ಇಲ್ಲೆಂಗಿ ಚಲ ಆಕು.

ಮಾಚು : ಸದ್ಯಕ್ ಚೆನ್ನ ನೇರ ಮುಂಡತೆ ಅಳೆ ಪೂವಿ ನೀನ್. ವಿಷ್ಯ ಪೂರ್ತಿ ಕೇಟಿತಾನ ಪಿಂಞ ನೀಡ ಆಪರೇಷನ್ ಕಾರ್ಬಾರ್ ಸುರು ಮಾಡ್ ಮದಿ.

ಪೂವಿ : ಆಪರೇಷನ್‌ಲೊ ಇವಂಗ್! ನಾಡ ಜೀವಮಾನತ್ ನೀಡ ಕೈಕಾಲೊಂಜ ಅಂಞೂರ್ ಮುಳ್ಳು ಎಡ್ತಿಕ್ಕು ನಾನ್! ನುಗ್ಗುವದೇ ಕಾಡ್‌ರೊಳಕ್.... ಕಾಡ್ ಮನುಷ್ಯಂಡನ್ನಕೆ! (ತಳಿ) ಎಣ್ಣೆಕ ಅಲ್ಲಿಂಜಪ್ಪರ.

ಮಾಚು : ಆಚಪ್ಪ. ನಂಗಡ ಪೂವಿ ನಿಸೂರತಿ. ನಾನ್ ಮಾತ್ರ ಕಾಡ್ ಮನ್‌ಸ. ಅಲ್ಲಿಂಜ ಕತೆ ಎಂತಾಚಿ? ಆನೆ ದವುತಿಯಂಡ್ ಬಂದಂಡಿಲ್ಲೆಂದ್ ಗೊತ್ತಾನದೂ ಜೀವ ಬಾತ್. ಆಚೆಂಗಿ ಕೆಲ ಪಯಿಪು ಮಾತ್ರ ತಡ್‌ತವಕೇ ಕೈಂಜಂಡಿಲ್ಲೆ. ಕೂಪದಿ ಇಂಜಲ್ಲಿಂಜ ಅರೆಗಂಟೆಲ್ ಮೂಂದ್ ಮೈಲ್ ಓಡಿತಾಯಿತ್. ಕೊಂಗ ಮಲೆರ ದಿಕ್ಕು ದೆಸೆ ಏಲೇಂದ್ ನಾಕೆನ್ನ ಗೊತ್ತ?

ಪೂವಿ : ಮಂದು ಅಣ್ಣಯ್ಯ? ಕಾಂಬಕೇ ಕೊಟ್ಟಲಿಯ ನೀಕ್?

ಮಾಚು : ಎಣ್ಣುವಿ ಕೇಳ್. ಉಳ್ಳ ಕಾಡ್ ಬಟ್ಟೆಕಾಲೆ ಓಡಿತ್ ಮೇಲ್‌ಡಿ ಉಣ್ಣೆ ಕಡ್‌ಚಂಡಿತ್. ಮೇಲ್‌ಕೊಟ್ಟಿ ಬಟ್ಟೆ ದದ್ದ ಪಾರಿಯೋಯಿತ್. ಎಲ್ಲಿಯೋ ಒರ್ ಕೊಲ್ಲಿಲ್ ಕೆಲ ದುಂಬ ನೀರ್ ಕುಡ್‌ಚಂಡ. ನೇರ ಮಜ್ಜಾಣ ಕೈಂಜಿ ಪೋಯಿತ್. ಕುಂದ್, ಕಾಡ್, ಮೊಟ್ಟೆ, ಪತ್ತಿಯಂಡ್ ಒರ್ ಮೊಟ್ಟೆರ ಕೊಡೀಕ್ ಪತ್ತಿತ್ ವಿಷಲ್ ಇಟ್ಟ. ಮಂದು ಬಾವಂಡ ಸದ್ದು ಸುದ್ದಿ ಇಲ್ಲೆ.

ಪೂವಿ : ಎಂತಾಚಿ? ಅಣ್ಣಯ್ಯ ಚಾಯಿಲುಂಡ್ ತಾನೆ?

ಮಾಚು : ಇವಕ್ ಪ್ರತಿಯೊಂದಾಲೂ ಅವಸರೇ. ಎಣ್ಣುವಾನ ಮಿಂಞ ಕೇಟ. ಅಲ್ಲಿಂಜ ಎಂತಾಚೀಂದ್ ಕೇಳ್.

ಪೂವಿ : ನೀಡ ಕತೆ ಕೇಪಕ ಮೇಲ್‌ಡೀ ಗ್‌ಡ್‌ಪ ನಾಕ್. ಇನ್ನತ ಪುಟ್ಟಿ ಕಳಿ ಎಲ್ಲ

ಬೋಂಡುವಾ ನೀಕ್? ಇಂಞೂ ಬಾಲೆಕಾರ ಮಕ್ಕಡನ್ನಕೆ ಕಳಚಂಡುಳ್ಳಿಯ. ಎಂಗೇಜ್‌ಮೆಂಟ್‌ಕ್ ಪೋಯಿತ್ ಬಪ್ಪೀಂದ್ ಎಣ್ಣುವಂಜಿ ಕೊಂಗಮಲೆಲ್ ಕೋಡಂಡನ್ನಕೆ ಕಾಡ್ ಅಲ್‌ಂದಂಡ್ ಪೋಯ್ತೊಲೊ! ಚೆನ್ನಂಗೇಗಿ ಬೇರ್‌ಚೆಡಂಡಾ? ಅರ್‌ಪಂವೊ ಅರ್‌ಪ. ಕುಡಿಪ್ಪವಂಗೆ ಮಂಡೆಲ್ ಮೂಳೆ ಬೋಂಡಾ?

ಮಾಚು : ಆಚಾ ನೀಡ ಕಾಮೆಂಟ್ಸ್? ಕತೆ ಕೇಳ್ ಮಿಂಞ. ಬೈಟ್ ಅಂಜಿ ಗಂಟೆಕೆತ್ತನೆ ಕಾಡ್ ತಿರಿ ತಿರಿ ತಿರೀತ್ ಆನದೂ ಒರ್ ರೋಡ್ ಕಾಟ್ಚಿ. ಸ್ಕೂಲ್ ಮಕ್ಕ ಪಾಡಿಯಂಡ್ ಕಳಚಂಡ್ ಪೋಯಂಡುಂಡ್.

ಪೂವಿ : ಸದ್ಯ! ಕಾಡ್‌ರೊಳ್‌ಂಜ ಪೊರ ಬುದ್ಧಿಯಾ?

ಮಾಚು : ಅದ್ ಇಂಞೋರ್ ಕತೆಕ್ ಮೊಳಿ ಆಚಿ! (ತೆಳಿ)

ಪೂವಿ : ಇಂಞೋರ್ ಕತೆಂದೆಣ್ಣಕ? ಎಂತ ಮಾಚು ಇದ್ ನೀಡ ಅವಸ್ಥೆ?

ಮಾಚು : ಬಟ್ಟೆ ಎಲ್ಲ ಕೀತಿತ್ ನೋಟುವನ್ನಕೆ ಇಲ್ಲೆ. ಕಾಡ್ ಬುದ್ಧಿತೋಡಿತ್ ಮೇಲ್‌ಡೀ ಮಣ್ಣ್ ಧೂಳ್. ನನ್ನ ನೋಟಾನದೇ ತಡ ಮಕ್ಕ "ಕಳ್ಳ ಕಳ್ಳಂದ್" ಒರೇ ಓಟ್!

ಪೂವಿ : ಎಂತಾಂಗ್ ಮಾಚು? (ತೆಳಿ) ನಿನ್ನ ಅನ್ನನೆ ಕಂಡತೆನ್ನೊ ಅಯಿಂಗಕ್? ಕರ್ಮಕರ್ಮ!

ಮಾಚು : ವಿಷ್ಯ ಎಂತ ಗೊತ್ತುಂಡಾ? ಅಲೆಲ್ಲ ಒರ್ ಕತೆ ಪ್ರಚಾರ ಆಯಂಡಿತ್. ಮಕ್ಕಳ ಕಟ್ಟಿ ಪೋಪವು ಬಂದಿತ್. ಮಕ್ಕಳ ಕಟ್ಟಿ ಪೋಪಂಜ ಕೊಂದಿತ್ ಅಯಿಂಡ ಕಿಡಿ, ಕಣ್ಣ್ ಇಂತಾನೆಲ್ಲ ಮಾರಿರುವಾಂದ್ ಕೆಟ್ಪ್ ಕತೆ ಪ್ರಚಾರ ಆಯಿತ್. ಇಂವೊ ಮಕ್ಕಡ ಕಳ್ಳನೇ ಆಯಿತಿಕ್ಕೊಂದ್ ಮಕ್ಕ ಒರೇ ಓಟ್!

ಪೂವಿ : ಅದ್ ನೀಕೆನ್ನನೆ ಗೊತ್ತಾಚಿ?

ಮಾಚು : ಮಂದು ಬಾವೊ ಎಣ್ಣೊಚಿ.

ಪೂವಿ : ಅಲ್ಲಿಂಜ ಮಂದು ಅಣ್ಣಯ್ಯಂಡ ಮನೆಕ್ ಎನ್ನನೆ ಬಂದಿಯ?

ಮಾಚು : ಈ ಪುಣ್ಯಾತ್ಮ ನನ್ನ ಬುಟ್ಟಿತ್ ಓಡ್‌ನಂವೊ ನೇರೇ ಮನೆಕ್ ಪೋಯಿತ್. ಜೂಬಿ ಅಕ್ಕಯ್ಯಂಡ ಕೈಂಜ ಬೈಗಳ ಕೆಟ್ಟಂಡ್ ನನ್ನ ತೇಡುವಕ್ ದಾಡದೋ ಜೀಪ್‌ಲ್ ಫಾರೆಸ್ತ್ ರೋಡ್‌ಕಾಲೆ ಗಂಟೆಗಟ್ಟಿ ತಿರಿತ್. ಅಕ್ಕಣೆ ಬೈಟ್ ಬೈಟಾಪಕ ಆ ಜೀಪುರ ಸದ್ ನಾಕ್ ಕೇಟಿತ್. ಜೋರಾಯಿತ್ ಕೂತ್‌ಟ್ಟಿ ಜೀಪು ನಾಡ ಪಕ್ಕ ಬಾತ್. ಪತ್ಯಂಡ್ ಬಾವಂಡಲ್ಲಿಕ್ ಬಂದ. ಬಾವಂಗೆ ಇಲೂಡೀ ಜೂಬಿ ಅಕ್ಕಯ್ಯಂಡ ಮಂಗಳರಾತಿ.

ಪಳೆಮೆ ಪೂಮ್ನಾಲೆ

- ಪೂವಿ : ಪಿಂಞ, ಕಾಡ್‌ರೊಳ್‌ಲ್ ಇಂಜ ಕಲ್ಲ್‌ನ ನೋಟ್‌ನದೇ ಇಲ್ಲಿಯಾ ಮಾಚು?
- ಮಾಚು : ನೀಡ ಮಂಡೆ, ಕಲ್ಲ್ ತೇಡುವಕ್ ಪೋಯಿತ್ ಪಿಲ್ಲ್ ತಿಂಬ ಪರಿಸ್ಥಿತಿ ! (ತೆಳಿ)
- ಪೂವಿ : ಬೋಂಡುವಾ ಇಂಞಿ ? (ತೆಳಿ) ಕಾಡ್‌ಲ್ ಕೋಡಂಗಳೆ? (ತೆಳಿ)
- ಪೂವಿ : ತಮಾಷಿ ಅದಲ್ಲ. ಬಸ್‌ಲ್ ಬಪ್ಪಕ ಕುಂಞಿನ ಕೇಟಂಡಲ್ಲ? ಇಂವೊ ಮಕ್ಕಡ ಕಳ್ಳ ಕಾಂಬಾಂದ್ ಪೊಯ್ತ್ ಕಾಟ್ಟಿ ಪೋಪೆನ್ನೋಂದ್ ಆಯಿತಿಂಜತ್. (ತೆಳಿ)
- ಪೂವಿ : ಪಿಂಞ ಕುಂಞಿನ ಎಂತ ಮಾಡಿಯ?
- ಮಾಚು : ಈ ಪುಣ್ಯತಾಯಿ ಮೊಬ್ಬೆಲ್‌ಲ್ ತಕ್ಕ ಪರಂದಂಡಿಂಜವಕ್ ಇಚ್ಚಕಾಪಕ ಜ್ಞಾನೋದಯ ಆಯಿತ್. ದಾಡದೋ ಬೈಕ್‌ಲ್ ಮಿಂಞತ ಸ್ವಾಪ್‌ಲ್ ಬಪ್ಪಂಜಿ ಪಾರಕಾತಂಡಿಂಜತ್. ಕುಂಞಿನ ಕೇಟಂಡತ್? (ತೆಳಿ)
- ಪೂವಿ : ಅಲ್ಲ ಮಾಚು, ಅದನೇ ಒರ್ ಕತೆ ಎಳ್‌ದೊಲು ಕಾಂಬಲ್ಲ? ವಿಷ್ಯ ಪೆರ್ತ್ ಇಂಟರೆಸ್ಟಿಂಗ್ ಉಂಡ್! ಕತೆಕ್ ಪೆದ ಎಂತ ಗೊತ್ತುಂಡಾ?
- ಮಾಚು : ಎಂತ ಪೆದ?
- ಪೂವಿ : ನೀನೇ ಎಣ್ಣೆಯಲ್ಲ ಅಕ್ಕಲೆ? 'ಬಟ್ಟೆ ತಪ್ಪಾನ ಮಾಚು!' ಅಲ್ಲೆಂಗಿ ಕೊಂಬ್ ತಪ್ಪಾನ ಕೋಡ! (ತೆಳಿ)
- ಮಾಚು : ಬೆಪ್ಪಿ ನೋಟಿಕ್ಕ! ನಾಡ ಕಪ್ಪ ನಾಕಿಲ್ಲಿ! ಇವಕ್ ತೆಳಿ!
- ಪೂವಿ : ಏಳ್ ಮಿಂಞ ಬಟ್ಟೆ, ಬದಲ್ ಮಾಡ್ಯಂಡ್ ಕೈಕಾಲ್ ಕತ್ತಿಯಂಡ್ ಬಾ. ಬಿಸಿಬಿಸಿ ಕಾಫಿ ಮಾಡ್ಯಂಡ್ ಬಪ್ಪಿ. ಬಟ್ಟೆ ತಪ್ಪಾನ ಮಾಚು! (ತೆಳಿ)

ದ್ರೋ..... ಮೊಂವೊ

- ಪೂವಿ : ಎಂತೆಲ್ಲ ಆಚಿ ಮಾಚು ಪೋನ ಕಾರ್ಬಾರ್?
- ಮಾಚು : ಅಯ್ಯೋ ಬಾ. ಓರಮ ನಾಯಿ ಚತ್ತೆಕ್ ಪೋನನ್ನಕೆ ಆಯಿಪೋಪ ಪರಿಸ್ಥಿತಿ.
- ಪೂವಿ : ಅಜ್ಜಂಗೂ ತಾಯಿಕೂ ತಕ್ಕ ಬಾಕೇ ಇಲ್ಲೆ ಪೂವಿ! (ತಳಿ)
- ಪೂವಿ : ಅರೆ ಎಂತಾಂಗೋ? ನಿನ್ನಾದೆಕೆತ್ತನೆ ಚಾಯಿಲಿಂಜತಲ್ಲ?
- ಮಾಚು : ಮೊರೆ ಬಪ್ಪಕೂ ಮಳೆ ಬಪ್ಪಕೂ ಕಾಲ ನೇರ ಎನ್ನೇಂಗಿ ಉಂಡಾ?
- ಪೂವಿ : ಅನ್ನನೆಣ್ಣಕ?
- ಮಾಚು : ಅನ್ನನೆಣ್ಣಕ.... ಅಜ್ಜ ಪೇಟೆಕ್ ಪೋಪಕಾಪಕ ತಾಯಿ ಎಂತೋ ಒರ್ ವಸ್ತುನ ಕೊಂಡಬಪ್ಪಕ್ ಎಣ್ಣೆತ್. ಅಜ್ಜಂಗ್ ಅದೆಂತೆಂದ್ ಕೇಟತೋ ಇಂಞೆಂತಾನೊ ಕೊಂಡ ಬಂದಿತ್.
- ಪೂವಿ : ಸೆರಿಕ್ ಒಡ್ತಿತ್ ಎಣ್ಣೆ ಮಾಚು. ನೀನ್ ಒಳಿಮರೆ ಮಾಡ್ಯಂಡೆಣ್ಣಕ ನಾಕೆನ್ನನೆ ಗೊತ್ತಾಂಡು?
- ಮಾಚು : ಈ ವಡಿಯ ಪೊಣ್ಣರ ಜಗಳ ಉಂಡಲ್ಲ.... ಅದಾಂಗ್ ಏತುವೇ ಬೋಂಡ. ನೀನ್ ಓರಮ ನೆವನ ಅಲ್ಲತ ನೆವನತ್ ಜಗಳ ಸುರು ಮಾಡುವಿಯಿಲ್ಲ ಅನ್ನನೆ!
- ಪೂವಿ : ಮದಿ ನೀನ್ ನನ್ನ ದೂರ್ನದ್. ವಿಷ್ಯ ಎಂತೆಂದ್ ತೊರ್ಂದಿತ್ ಎಣ್ಣೆ.
- ಮಾಚು : ಕೊಡಿ ಮನೆಕ್ ಪೋನನಾ... ಮನೆಲ್ ಅನ್ನನೆ ಗಲಗಲ ಗಲಾಂದ್ ತಕ್ಕ ಇಪ್ಪದ್ ಸದ್ದೇ ಇಲ್ಲೆ.... 'ರೊಟ್ಟಿಗಾಗಿ ಸತ್ತದ್ದುಂದ್' ಒರ್ ಕತೆರನ್ನಕೆ ಆಯಿರ್ತಾಂದ್ ಆಚಿ ನಾಕ್!
- ಪೂವಿ : ಅದೆಂತ ಒರ್ ಕತೆ? ರೊಟ್ಟಿಗಾಗಿ ಸತ್ತದ್ದು?
- ಮಾಚು : ಓ ಅದೂ ಗೊತ್ತಿಲ್ಯಾ ನೀಕ್? ಅಂದಕ ಅಲ್ಲಿಂಜೇ ಸುರು ಮಾಡೊಂಡುಕಾಂಬ!
- ಪೂವಿ : ನೀಕ್ ಗೊತ್ತುಳ್ಳದೆಲ್ಲ ನಾಕ್ ಗೊತ್ತಿಂಜಿತೇ ಇಕ್ಕೊಂಡೊಂದ್ ಎನ್ನೇಂಗಿ ರೂಲ್ಸ್ ಉಂಡಾ? ಎಣ್ಣೆಮ್ಮ!
- ಮಾಚು : ಒರ್ ಊರ್ಲ್ ಒರ್ ವಡಿಯನೂ ಪೊಣ್ಣೊ ಇಂಜತೊಲೊ.....
- ಪೂವಿ : ವಡಿಯಂಡ ಪೆದ ಮಾಚು. ಪೊಣ್ಣರ ಪೆದ ಪೂವಿಯೊಲೊ.... (ತಳಿ)
- ಮಾಚು : ಅನ್ನನೇ ಇಕ್ಕಡ್ ಬುಡ್ ನಂಕೆನ್ನಾಂಡು? ಪೆರ್ತ್ ಗಾರೀಬಂಗ. ಒನ್ನಾಂದ್ ಪೂವಿಕ್ ಒಟ್ಟಿ ತಿಂಗೊಂಡೊಂದ್ ಆಸೆ ಆಚೊಲೊ. ಓರಾಣ ಎಡ್ತಂಡ್ ಅಂಗಡಿತ್ ಪೋಚೊಲೊ ಮಾಚು. ಅರೆ ಸೇರ್ ಅಕ್ಕಿ ಪೊಡಿ ಕೊಂಡಬಾತ್. ಅಕ್ಕಿ ಪೊಡಿ ಕೊಂಡ ಬಪ್ಪಕ್ ಮಾಚು ಒರ್ ಪುಂಡೆ ಬಟ್ಟೆನ ಕೊಂಡ

ಪೋಯಿತಿಂಜತೊಲೊ. ಅಕ್ಕಿ ಪೊಡಿರ ಗೋಣೆರ ಮೀದ ಪುಂಡೆ ಬಟ್ಟೆ ಬಿರ್ಚಿತಾಪಕ ಅದತೊ ಪೊಡಿ ಮೆತ್ತಿಯಂಡಿಪ್ಪಲ್ಲ? ಅಚ್ಚಕ್ಕೇಂಗಿ ಲಾಭ ಆಡ್‌ಂದ್ ಮಾಚುರ ಗೇನ...

ಪೂವಿ : ಅಂದಕ ಮಾಚು ಪೆರ್ತ್ ಜೀನೇಂದ್ ಕಾಂಬಲ್ಲ? (ತೆಳಿ)

ಮಾಚು : ಪೂವಿ ಆಸೆ ತೂರಿ ಆಯಿತಿಪ್ಪಕ ವಡಿಯ ಜೀನೆ ಆಯಿತಿಪ್ಪದ್ ಏದ್ ಬಲ್ಯ ವಿಷ್ಯ? (ತೆಳಿ)

ಪೂವಿ : ಬೋಂಡ, ಅಯಿಂಕ್ ವಡಿಯ ಪೊಣ್ಣೆಂದೇ ಪೆದ ಇಂಜವಡ್ ಮಾಚು. ಮುಂಡತೇಂಗಿ 'ಪೂವಿ ಮಾಚೂಂದ್' ಪೆದ ಇಡುವಂಜಿ ನಂಗೆನ್ನೆಂಗ್ ಕಡ್‌ಚ ಬೂವೊ?

ಮಾಚು : ಓಹೋ ಬೇರ್‌ಕೇ ಬಿಸಿನೀರ್ ಕಾಯುವಾಂದ್ ಆಪಕ ವಡಿಯ ಪೊಣ್ಣೆಂದೇ ಪೆದ ಇಕ್ಕಡ್‌ಂದಾಚಾ? (ತೆಳಿ)

ಪೂವಿ : ಕತೆ ಎಣ್ಣೆ ಮಾಚು ನೀನ್. ಕಾಲ ಕೈಕತೆ ಮುಂಡತೇಂಗಿ....

ಮಾಚು : ಕಾಲ ಕಲಿಯುಗ ಲೇಲಕ್ಕ ಮಾಯಿ. ತಾಲಿ ಲೆಲ್ಲೇಲಾ...

ಪೂವಿ : ನೀನೆಕ್ಕೊಲೂ ಇನ್ನನೇ ಮಾಚು. ಎಂತೋ ಒಂದಾನ ಎಣ್ಣುವಕ್ ಸುರು ಮಾಡುವಿಯ. ಅಲ್ಲಿಂಜ ಏಲೇಲೋ ಕುಂದ್ ಸುತ್ತುವಕ್ ಕೂಡಿರುವಿಯ.

ಮಾಚು : ಮೊನಿಯಾಂದ್ ಚೀತೆ ಮಾಯಿ ಒಬ್ಬಳೇ ಅಳ್‌ತಂಡ್ ಎಂತದೋ ಗೊಣಗುವಿಂಜತ್. ಕೆಮಿ ಕೊಡ್ತಿತ್ ಕೇಟ. ಎಂತಾ ಚಾಯಿಂಜತ್ ಗೊತ್ತುಂಡಾ? ನಾಡ ಕೈಲ್ ಮೊಬೈಲ್ ಇಂಜಾಂಗೂ.....

ಪೂವಿ : ರೆಕಾರ್ಡ್ ಮಾಡ್ಯಂಡಿಯಾ?

ಮಾಚು : ರೆಕಾರ್ಡ್ ಮಾಡ್ಯಂಡಿತೂ ಆಚಿ. ಬುಡತೆ ಎಟ್ತ್ ಪತ್ತ್ ಕುರಿ ಬಾಯಿಪಾಠ ಮಾಡಿತೂ ಆಚಿ.

ಪೂವಿ : ಎಂತ ಮಾಚು ಅಂತದೊರ್ ವಿಶೇಷ ಆದತ್?

ಮಾಚು : ಕೇಟಕ ನೀನ್ ಎಂತ ಎಣ್ಣುವಿಯೋ!

ಪೂವಿ : ಎಣ್ಣೆ ಕೇಕನ ಅಂದಕ. ಎನ್ನನೆ ಇಪ್ಪಾಂದ್!

ಮಾಚು : ಮಾಗುರುವೇ, ವಿನಾಶ ಕಾಲ- ವಿಪರೀತ ಬುದ್ಧಿ; ಅವ್ವನ ಪೊಯ್ಯು-ಅಪ್ಪನ ಬಯ್ಯು ಅರೆ ಓಲೆ ಕುತ್ತು-ಅರೆ ನ್ಯಾಯ ಪರೆಯು, ಅದ್ಲ್ ಕಲ್ಲ್ ಬಲಿಕ್ಕು, ಅಂಬಲ ಚುಡು ಮಳೆಯೂ ಬೊಳೆಯೂ ಕೊರಂದ್ ಬಕ್ಕು- ಭೂಮಿ ಬರಂದ್ ಬಕ್ಕು, ಮನುಷ್ಯ ಚುಂಡೆ ಮರಕ್ ಏಣೆ ಕೆಟ್ಟು, ಕಾಣತದ್ ಕಾಂಗು ಕೇಕತದ್ ಕೇಕು, ಉಣ್ಣತದ್ ಉಂಗು-ಕುಡಿಯತದ್ ಕುಡಿಕ್ಕು, ಮಕ್ಕಡ ಕ್ರಿಯೆನ ಅಪ್ಪನೂ

ಅವ್ವನೂ ಕೈಪನ್ನಕೆ ಆಕು. ಪೊಮ್ಮಕ್ಕೆಲ್ಲ ಪರಂದಳುಕು- ಅಣಾಳೆಲ್ಲ ಕೇಟಿ
ಳುಕು, ಮಲೆ ಪೋಯಿ ಬೊಳಿಯಾಕು ದೇವರೆಲ್ಲ ಕೈಲಾಸ ಕೂಡು. ಅಂದಿತೂ
ಕೇಳಪ್ಪು ಕುಂಞಿ... ಮಕ್ಕಳುಂಡೆಂಗಿ ಒಕ್ಕಾಮೆ, ಮಣ್ಣುಂಡೆಂಗಿ ಮನಸ್ಸಾನ.
ಪೊನ್ನುಂಡೆಂಗಿ ಅರಸ್ಸಾನ ಇದ್ ಎದೂ ಇಲ್ಲೆಂಗಿ ಗೆತಿಕೇಡ್ ನೋಟಪ್ಪಾ.....

ಪೂವಿ : ಅಯ್ಯೊಯ್ಯೋ! ಎಂತ ಮಾಚು ಇದ್ ನಲ್ಲ ಒಕ್ಕಣೆ ಕೆಟ್ಟಾನನ್ನಕೆ ಎಣ್ಣೆಟಕ
ಇದೆಲ್ಲ ನಾಕೆನ್ನನೆ ಅರ್ಥ ಆಂಡು? ಕೈವೆಂಗಿ ಚೆನ್ನ ಒಡ್ತಿತ್ ಎಣ್ಣೆ!

ಮಾಚು : ಪೂವಿ, ಎಲ್ಲಿಯೇಂಗಿ ಪಕ್ಕಲ್ ಮುಟ್ಟಿಯ ಉಂಡಾ?

ಪೂವಿ : ಎಂತಾಂಗ್ ನೀಕಿಕ್ಕ ಮುಟ್ಟಿಯ? ಮೊನಿಯಾಂದ್ ಕೊಟ್ಟಾಕ್ ಪೋಪಕ ನೀನೇ
ಕೊಂಡ ಪೋನಂವೊ!

ಮಾಚು : ಇದೊಂದಾಂಗ್ ತಮಾಷಿ ಎಂತ? ಕಾರ್ಯ ಎಂತೇಂದೇ ಗೊತ್ತಿಲ್ಲೆ. ಏದ್
ಸೀಮೆಂಜ ಬಾತೋ?

ಪೂವಿ : ದಾಕ್ ಎಣ್ಣುಂಡುಳ್ಳ ಮಾಚು ನೀನ್? ನಾಕಾ?

ಮಾಚು : ಓಹೋ, ಬಲ್ಲು ಬೋರೆ ಕತ್ತುಲೆ. ಲೋಡ್ ಶೆಡ್ಡಿಂಗ್ ಪ್ಲಾಬ್ಲಂ!

ಪೂವಿ : ಮಾಚು, ನೀನ್ ನಾಕೇ ಎಂತೆಂತೋ ಎಲ್ಲ ಅರ್ಥ ಅರ್ಥತ್ ಎಣ್ಣೆಯೆಂಡುಳ್ಳಿಯ
ಕಾಂಬ! ನಾನ್ ಮಾತ್ರ ಮುಂಡತ್ತಿಪ್ಪುಲೆ.

ಮಾಚು : ನಾನೆಂತ ಎಣ್ಣು ನೀಕ್? ಒಡ್ತಿತ್ ಎಣ್ಣೊಂದ್ ಎಣ್ಣಾಂಗ್ ಮುಟ್ಟಿಯ
ಕೊಂಡ ಬಾಂದ್ ಎಣ್ಣು, ಅದಲೆಂತ ಬಲ್ಯ ತೊಂದರೆ ಉಳ್ಳ?

ಪೂವಿ : ತೊಂದರೆ ಒಂದೂ ಇಲ್ಲೆ. ಕಾಲ ಎಲ್ಲಾಕೂ ಬಪ್ಪ. ಅಕ್ಕ ನೋಟಿಯವ. ಇಕ್ಕ
ಎಣ್ಣೊ ನೀನ್.

ಮಾಚು : ಎಂತಾನ ಎಣ್ಣೊಂಡು ನೀಕ್? ಅದ್ನ ಮಿಂಞ ಎಣ್ಣೊ. ಮುಂಡತೇಂಗಿ ಎಣ್ಣೊ
ಎಣ್ಣೊಂದೆಣ್ಣೆಟಕ?

ಪೂವಿ : ಕಳಿಪ್ಪ ನೋಟಂವೊ ಒಂದೂ ಗೊತ್ತಿಲ್ಲತನ್ನಕೆ? ಅದೇ "ಮಾಗುರುವೆ, ವಿನಾಶ
ಕಾಲ, ವಿಪರೀತ ಬುದ್ಧಿ. ಅವ್ವನ ಪೊಯ್ಯು-ಅಪ್ಪನ ಬಯ್ಯು.....

ಮಾಚು : ಅಬ್ಬಬ್ಬಬ್ಬ! ಸಾಮರ್ಥಿಕ ನೋಟವಡ. ನಾನ್ ಎಣ್ಣುದೇ ಒಮ್ಮೆ. ಅದತೂ
ಸ್ಪೀಡ್ಲ್ ಅಚ್ಚೆಕ್ ಬೆರಿಯ ಅದ್ ನೀಡ ನಾವುಲ್ ರೆಕಾರ್ಡ್ ಆನನ್ನಕೆ ಕಾಂಬ!

ಪೂವಿ : ಅದೆಂತ ಬಲ್ಯ ವಿಚಿತ್ರ? ನರಿ ಮೀಸೆ ನಾಣಯ್ಯಂಡ ಮೋವಳಾಯಿತ್, ಕಾರ್
ಮೀಸೆ ಶಂಬುಕ್ ಅಕ್ಕನಾಯಿತ್, ಬೊರ್ ಮೀಸೆ ಮಾಚಯ್ಯಂಡ ಪೊಣ್ಣಾಯಿತ್
ನಾಕೆನ್ನ ಅಚ್ಚೆಕೂ ಕಯ್ಯುಲಿಯಾ?

ಮಾಚು : (ತೆಳಿ) ನರಿ ಮೀಸೆ ನಾಣಯ್ಯ O.K. ಕಾರ್ ಮೀಸೆ ಶಂಭುವೊ O.K. ಇದೆಂತ

ಪಳಮೆ ಪೊಮ್ಮಾಲೆ

ಇದ್ ಬೊರ್ ಮೀಸೆ?

ಪೂವಿ : ಅದೇ ಮಾಚು, ನೀಕ್ ಚೊಡಿ ಬಪ್ಪಕ ನೋಟೊಂಡು. ನೀಡ ಅವತಾರ, ಮೀಸೆ ಪಟಿ ಪಟಿ ಪಟೀಂದ್ ಬೊರ್ತಂಡಿಪ್ಪ. ಅದ್ನ ನೋಟೊನಕ ನೀಕ್ ಚೊಡಿ ಬಂತುಳ್ಳದ್ ನೇರ್ಂದ್ ದಾಕೂ ಎಣ್ಣೊಲು!

ಮಾಚು : ಕರ್ಮಕರ್ಮ! ನೀನೆನ್ನಂಗ್ ಇನ್ನನೆ ಆಯಿಟ್ಟಿಯೋ?

ಪೂವಿ : ನಾಕೊಂದೂ ಆಯಿತ್ಲೆ. ಅದೆಂತದ್ ಅಚ್ಚಕ್ ಉದ್ದ ಎಣ್ಣೆಯಲ್ಲ? ಅಂಡ ಅರ್ಥ ಎಣ್ಣೆ ನಾಕೊಮ್ಮ.

ಮಾಚು : ಪಿಂಞ ನೀನೇ ಸುರು ಮಾಡಿತ್ತಿಂಜಿಯ ಇಕ್ಕ "ಮಾಗುರುವೇ ವಿನಾಶ ಕಾಲ ವಿಪರೀತ ಬುದ್ಧಿ ಅನ್ನನೆ ಇನ್ನನೇಂದ್!.... ನಾನ್ ಅಂತವಂಡ ಮೋವ. ಇಂತವಂಡ ಪೊಣ್ಣ್ -ಲಂಗ್ ಲಸ್ಕಂದ್!

ಪೂವಿ : ಎಂತ ಮಾಡುವೊ ಮಾಚು? ಒಂದೋ ಕೈ ಬೋಂಡು ಅಲ್ಲೆಂಗಿ ಬಾಯಿ ಬೋಂಡು. ದಂಡೂ ಇಲ್ಲೆಂಗಿ ಚಾವೊಂಡೂಂದ್ ಗಾದೆ ಕೇಟಿತಿಲ್ಲಿಯಾ ನೀನ್? ಅನ್ನನೇ ನಾಡ ಪರಿಸ್ಥಿತಿ.

ಮಾಚು : ದಮ್ಮಯ್ಯ! ಪಾಪ ಪೂವಿ! ಎಂತೋರ್ ಕಾಲ ಬಂದ್ರತ್ ನೀಕ್ಂದ್?

ಪೂವಿ : ನೀನ್ ಮುಂಡತೆ ಕಾಲ ಕೈಕತೆ ಮಾಚು. ನೇರೇ ವಿಷಯಕ್ ಬಾ.

ಮಾಚು : ಸೆರಿ ಅಂದಕ. ಕೇಳ್ ಓರಂದಾನೇ ಎಣ್ಣೆ ತಪ್ಪಿ. ವಿನಾಶ ಕಾಲ ವಿಪರೀತ ಬುದ್ಧಿಯೆಣ್ಣೆಕ ಎಂತೆಂದ್ ನೋಟಿನ..... ಕೊಡಗ್ ಇಚ್ಚಕ್ ಚಾಯಿಲುಳ್ಳ ಕಾತ್, ನೀರ್ನ ಬುಟ್ಟಿತ್ ಉಳ್ಳ ಬೇಲ್ ಬಾಣೆ, ತೋಟ ತೊಡಿಯತ್ನ ಮಾರಿತ್ ಅತ್ತಟಿ ಕೊಡಿಯೂ ಇಲ್ಲೆ ಇತ್ತಟಿ ಅಡಿಯೂ ಇಲ್ಲೆಂದ್ ಮಾಡಿಯಂಡ್ ಕುತ್ತ ಮರಿಯ ನೋಟುವೆಂಗಳನೇ ಗೇನ ಮಾಡ್.

ಪೂವಿ : ನೀನ್ ದಾಡ ವಿಷ್ಯ ಎಣ್ಣೆಯೆಂಜುಳ್ಳಿಯಾಂದ್ ನಾಕ್ ಗೊತ್ತಾಚಿ. ರೋಡ್ ಕರೆರ ಅಂತಾ ನಲ್ಲ ಆಸ್ತಿನ ಆರ್ ಕಾಸ್ಕ್ -ಮೂಂದ್ ಕಾಸ್ಕ್ ಮಾರಿತ್ ಪೋಚಲ್ಲ- ಅವಂಡ ಕತೆ!

ಮಾಚು : ಅದೇ ಪೂವಿ, ಆ ಮನುಷ್ಯಂಡ ಪೊಣ್ಣ್ ದುರಾಸೆಕ್ ಕೆಣ್ಂಜಿತ್ ಆನ ಕೇತರೆ ಇದ್. ನೆರೆಮನೆಕಾರ ಬಂಗ್ಗೆ ಕೆಟ್ವಿಚಿಟ್ಟಿತ್ತೇಂದ್ ಕೆಲ ಉರ್ಂಜತ್ ಇವಕ್. ಕೂಟ್ಕ್ ಕಾರ್ ಎಡ್ತಿತಾಪಕ ಇಂಞೂ ಕೆಲ ಉರ್ಂಜತ್. ಇಕ್ಕ ತ್ರಿಶಂಕು ಸ್ಥಿತಿ!

ಪೂವಿ : ತ್ರಿಶಂಕು ಎಣ್ಣೆಕ? ರಾಮಾಯಣ ಕತೆಲ್ ಬಪ್ಪಲ್ಲ ಅವನಾ?

ಮಾಚು : ತ್ರಿಶಂಕು ಮಾರಾಜ ತಾಂಡ ತಡಿಯೋಡೆ ಸ್ವರ್ಗಕ್ ಪೋಪಕ್ ಪೇಚಾಡ್ಚಿ.

ಇಂದ್ರ ಒತ್ತಂಡ್ಲೆ. ನೀನ್ ತಡಿನ ಭೂಮಿಲ್ ಬುಟ್ಟಿತ್ ಬಂದಕ ಮಾತ್ರ ನೀಕ್ ಇಲ್ಲಿ ಪ್ರವೇಶಾಂದ್ ಅವನ ಉಂದಿತ್ ಇಟ್ಟಿತ್. ಇದ್ನುಂಡ್ ಚೊಡ್ಂಜ ವಿಶ್ವಾಮಿತ್ರ ಋಷಿ ಅಡಿಯೂ ಅಲ್ಲತ ಕೊಡಿಯೂ ಅಲ್ಲತ ಜಾಗತ್ ಅವಂಗಾಯಿತ್ ಒರ್ ಸ್ವರ್ಗತ್ನ ಉಂಡಾಕಿತ್ ಅವನ ಅಲ್ಲಿ ನಿಪ್ಪಚಿಟ್ಟಿತ್. ಇಕ್ಕ ಇಲ್ಲಿ ಜಾಗ ಮಾರಿತ್ ಪೋನಯಿಂಡ ಸ್ಥಿತಿಯೂ ಇನ್ನನೇ.

ಪೂವಿ : ಸರಿ ಸರಿ, ನೀನ್ ದಾಕಾಯಿತ್ ಈ ಕತೆನ ಎಣ್ಣೆತುಳ್ಳಿಯೋ ಅವು ಚಾಯಿಲೇ ಇಲ್ಲಿಯಾ ಅಲ್ಲ?

ಮಾಚು : ಎಂತ ಚಾಯಿಲುಳ್ಳ? ಬೇರಿಲ್ಲತ ಮರ ಅಚ್ಚಿಕೇ. ಮಕ್ಕಕ್ ಕೈಲ್ಪೊಳ್‌ದ್ ಎಣ್ಣಕ ಎಂತೇಂದೇ ಗೊತ್ತಿಲ್ಲೆ. ಪುತ್ತರಿ ಅಂಡಪ್ಪರ ಗೊತ್ತಿಲ್ಲೆ. ಅಕಸ್ಮಾತ್ ಕೊಡಗ್‌ಕ್ ಬಾತೆಂಗಿ ದಾಡ ಕೂಡೋ ತಕ್ಕ ಬಾಕಿಲ್ಲೆ. ತಕ್ಕ ಪರಿವಕೂ ವಿಷ್ಯ ಬೋಂಡುವಲ್ಲ? ಈ ನೆಲತ್ ಆಚಾರ ವಿಚಾರೇ ಇಲ್ಲತೆ ಮಕ್ಕಳ ಬೊಳ್‌ತಾನಕ ಇನ್ನನೇ ಆಪೊ!

ಪೂವಿ : ಚಾಯಿಲ್ ಮನೆ ಕೆಟ್‌ಚಿಟ್ಟಿಂಡ್ ಬಾಡಿಗಕ್ ಕೊಡ್ತುಂಡುಂಡಲ್ಲ?

ಮಾಚು : ಎಂತ ಉಂಡೆಗನ್ನ ಪೂವಿ? ಅವಂಡ ಪೊಣ್ಣ್‌ಕ್ ಅಲ್ಲಿಯತ್‌ರ ಪೊಗೆ ಧೂಳ್‌ನುಂಡ್ ದಮ್ಮು ಕಾಯಿಲೆ ಸುರು ಆಯಿತ್. ಇವಂಗ್ ಕೊಡಗ್ ಬುಟ್ಟಿಲ್ಲಿಂಜ ಸುರು ಆನ ಕುಡಿ ದಿನ ದಿನಕ್ ಪೆರ್ತಂಡೇ ಉಂಡ್. ಅಪ್ಪಂಡ ಮೂಡೋರ್ ಬರಿಕ್-ಅಪ್ಪಂಡ ಮೂಡೋರ್ ಬರಿಕ್. ದಂಡೂ ಮೂಡಿ ಮಕ್ಕಳೇ. ಅವು ಕಳ್‌ಚದೇ ಕಳಿ. ಎಣ್ಣುವವೂ ಇಲ್ಲೆ. ಕೇಪವೂ ಇಲ್ಲೆ. ಆಡಿ ಕೂಡಿ ಮತ್ಯವಂಗ್ ತ್ರಿಶಂಕು ಸ್ಥಿತಿ!

ಪೂವಿ : ಕಾಲ ಒರೇ ಪೋಲೆ ಇಪ್ಪಲೆಲ್ಲ ಮಾಚು? ಓರಬ್ಬಡದ್ ಓರಂದ್ ಕಳಿ! ಅದಿಕ್ಕಡ್, ಅಜ್ಜಂಗೂ ಅಜ್ಜಿಕ್ಕೂ ತಕ್ಕ ಎಂತಾಂಗಾಯಿತ್ ಇಲ್ಲತದ್‌ಂದ್ ನಾಕ್ ಗೊತ್ತುಂಡ್.

ಮಾಚು : ಓ ಕೊಡಿಮನೆಕಾರಡ ಕತೆಯಾ? ನೀಕ್ ದಾರ್ ಎಣ್ಣೆಯೆ?

ಪೂವಿ : (ತೆಳಿ) ನಾಕೆಲ್ಲ ಜನ ಇಪ್ಪ ಎಣ್ಣುವವು! ವಿಷ್ಯ ಎಂತ ಗೊತ್ತುಂಡಾ?... ಅಜ್ಜ ಪೋಯಿತ್ ಸಾಮಾನ್ ಎಡ್‌ತ ಬಪ್ಪಕ್‌ಂದ್ ರೋಡ್‌ರ ಕರೆಲ್ ಬಸ್‌ಕ್ ನಿಂದಿತಿಂಜತೊಲೊ. ಜೋರ್ ಮಳೆ ಬಪ್ಪಿಂಜತೊಲೊ. ಬಸ್ ಬಂದಿತ್ ನಿಂದತ್. ಅಜ್ಜ ಕೂಡೆ ಮಡ್‌ಕ್‌ವಕ್ ಪೇಚಾಡುವೊಲೊ ಕೈಂಜಂಡಿಲ್ಲೆ. ಒಮ್ಮೆ ಬಸ್‌ಕ್ ಕೈ ಪುಡಿಪ್ಪೊಲೊ- ಒಮ್ಮೆ ಕೂಡೆ ಮಡ್‌ಕುವಕ್ ಪೇಚಾಡು ವೊಲೊ.... (ತೆಳಿ)

ಮಾಚು : (ತೆಳಿ) ಪಾಪ! ಬಸ್ರೊಳ್‌ಲ ಕೊಡೆ ಪುಡ್‌ಚೆಂಡ್ ಎನ್ನನೆ ಪೋಪೊ?

ಪೂವಿ : ಅನ್ನನೇ ಆಯೆ ಕತೆ! ಬಸ್ರೆ ಡ್ರೈವರ್ 'ಬಪ್ಪಿರಾ ಅಜ್ಜಾಂದ್' ಕಾಕಿತ್ ಕೇಟತೊಲೊ. ಅಕ್ಕಣೆ ಒಮ್ಮೆ ಬಂತೆ ಕೊಡೆ ಮಡ್‌ಕಿತ್ ತಾ ಮೋನೇಂದ್ ಅಜ್ಜ ಡ್ರೈವರ್‌ಕ್ ಎಣ್ಣೆತ್! ಚೊಡಿ ಬಂದ ಕಂಡೆಕ್ಕರ್ ರೈಟ್ ಎಣ್ಣೆತ್!

ಮಾಚು : ಅಯ್ಯೋ ಪಾಪ! ಅಲ್ಲಿಂಚೆಂತಾಚಿ?

ಪೂವಿ : ಆಪೆ ಎಂತೆ? ಬಂದ ಬಟ್ಟೆಕ್ ಸುಂಕ ಇಲ್ಲೇಂದ್ ಮನೆಕ್ ಬಂದಿತ್. ಬಕ್ಕಣೆ ತಾಯಿರ ದುಂಡ್ ಇಚ್ಚೆಕ್ ಬಣ್ಣ ಆಯಿತೊಲೊ. ವಡಿಯ ಮನೆಕ್ ಬಂದ ಪಿಂಞ ಅಡಿಗೆ ಮಾಡನಾಂದ್ ಮುಡತೆ ಅಳ್‌ತಿಂಜತೊಲೊ...

ಮಾಚು : ಎಂತಾಂಗೋ?

ಪೂವಿ : ಮಜ್ಜಾಣಕುಳ್ಳ ತರಕಾರಿ, ಉಪ್ಪು, ಮಳು ಏದೂ ಮನೆಲ್ ಇಂಜಿತ್‌ಲೆಲೊ! ಅಂದ್‌ಡೀ ತಕ್ಕಾ ಬಾಕಿಂಜಿಲೆ. ಪಿತ್ಯಾಂದ್ ಪೊಲಾಕ ನೇರ್ತೆ ಎದ್ದಿತ್ ಬಸ್ರೆಕ್ ಪೋಚೊಲೊ!.... (ತೆಳಿ) ಸದ್ಯೆ ಮಳೆ ಇಂಜಿಲೆ!

ಮಾಚು : ಓ... ಕೊಡೆ ಬೀತೊಂಡೊಂದೇ ಇಲ್ಲೆ! ತಮಾಷಿ ಉಂಡ್ ಕತೆ.... ಬದ್‌ಕ್‌ಲ್ ಎಂತೆದೇ ಕಷ್ಟ ಬಂದಕಲೂ ಪರೋಲೆ ವಯಸ್ ಮಾತ್ರ ಆಪಕಾಗಾಪ್ಪಾಂದ್ ಓರಬ ಎಣ್ಣುವಾನ ಕೇಪಕ ಅಕ್ಕುವಲ್ಲಾಂದ್ ಆಪೆ.

ಪೂವಿ : ದಾರ್ ಅನ್ನನೆ ಎಣ್ಣೆಯೆ ಮಾಚು?

ಮಾಚು : ಮೊನಿಯಾಂದ್ ಅಂಗಡಿರಲ್ಲಿ ಬಿದ್ದು ಅಂಕ್ಲ್ ಕೊಟ್ಪೆಚಿ. ಅವು ಎಣ್ಣೆದ್. ಲದತೂ ಪೊಣ್ಣ್ ಚತ್ತ ಪಿಂಞ ಮಾತ್ರ ಬದುಕುವಕೇ ಆಗಾಂದ್ ಅಯಿಂಡ ತಕ್ಕಾ. ನಲ್ಲ ನರಿರನ್ನೆಕೆ ಬದ್‌ಕ್‌ನ ಬಿದ್ದು ಅಂಕ್ಲ್ ಇಂದ್ ಚಪ್ಪೆ ಬುದ್ಲ್ ಪೋಯಿತ್. ಅಂದೆತೆರ ಬಿದ್ದು ಅಂಕ್ಲ್ ಇಯಂಗಳೇಯಾಂದ್ ಆಪೆ.

ಪೂವಿ : ಅದ್ ವಿಷ್ಯೆ ನಾಕೂ ದಾರೋ ಎಣ್ಣೆಚಿ. ದಂಡಾಳ್ ಮೋನಿಯಂಗಳೂ ಮಂಗಲ ಕೈಚೆತ್. ಅಚ್ಚಕಾಪಕ ಪಾಲಿ ಮಾಯಿ ಟಿ.ಬಿ. ಕಾಯಿಲೆಕ್ ಕೆಣ್‌ಂಜತ್. ಸುರೂಲ್ ಚೆನ್ನ ಉದಾಸೀನ ಮಾಡ್‌ಚೊಲೊ. ಅಖೀರಿಕ್ ಅದ್ ಪಾಲಿ ಮಾಯಿರ ಜೀವೆತನೇ ಕೊಂಡ ಪೋಯಿರ್‌ತ್. ಪಾಪ! ಬಿದ್ದು ಮಾಂವೊ ಒಬ್ಬಂಟಿ ಆಯಿರ್‌ತ್.

ಮಾಚು : ಆಯುಷ್ಯ ದಾಕ್ ದಾಕ್ ದೇವ ಎಚ್ಚೆಚ್ಚೆಕ್ ಇಚ್ಚಿತಿಪ್ಪಾಂದ್ ದಾಕೂ ಗೊತ್ತಿಪ್ಪುಲೆ ಪೂವಿ. ದೇವ ತಂದ ಆಯುಷ್ಯತನ ನಲ್ಲರಿಕೆಲ್ ಬಾಳೊಂಡು. ಅಂದಕ ಮಾತ್ರ ಅದೋರ್ ಬಾಳ್.

ಪೂವಿ : ಅದೇ ಪೂವಿ. ಬಿದ್ದು ಅಂಕ್ಲರ ಪರಿಸ್ಥಿತಿನೇ ಗೇನ ಮಾಡ್. ಮನುಷ್ಯ

ಮುಂಡತೇಂಗಿ ನೂಯಿಟ್ಟೋರ್ ಕಾಲ ಬದುಕುಚೆಂಗಿ ಪೋರ. ಬದುಕುವಚ್ಚಕ್ ಕಾಲ ಎನ್ನನೆ ಬದುಕುಚಿ ಎಣ್ಣುವನ್ನತದ್ ಮುಖ್ಯ.

ಪೂವಿ : ಅದನೇ ಕೇಟಿಯೆ ನಾನ್. ಎಂತಾಂಗನ್ನನೆ ಎಣ್ಣೆಯಂಡುಳ್ಳಿಯಾಂದ್! ವಿಷ್ಯ ಎಂತೇಂದ್ ಎಣ್ಣೆತಿಂಜಕ ನಾಕೆನ್ನನೆ ಗೊತ್ತಾಂಡು ಮಾಚು?

ಮಾಚು : ಪೂವೀ, ಮಕ್ಕ ಎಂತ ಮಾಡ್ನಕಲೂ ಎಚ್ಚಕೇ ಆನಕಲೂ ನಂಗಡ ಮಕ್ಕಳೇ ಅಕ್ಕುವಲ್ಲಾಂದ್ ಎಚ್ಚಕೋ ಅಪ್ಪವ್ವ ಮುಂಡತೆ ಕೂಡಿರುವ. ಅಖೀರಿಕಾಪಕ ಆ ಮಕ್ಕಳೇ ತಂಗಕ್ ತಿರಿತ್ ನಿಪ್ಪಕ ಇಯಂಗಕ್ ಬುದ್ಧಿ ಬಪ್ಪ.

ಪೂವಿ : ಸೆರಿಯಪ್ಪ ಅಂತದ್ ಎಂತಾಚೀಂದ್ ಎಣ್ಣುವಾನ ಎಣ್ಣುವದೇ ಇಲ್ಲೆಲ್ಲ ನೀನ್?

ಮಾಚು : ಎಣ್ಣುವಿ ಕೇಳ್. ಸುರು ಸುರುಲ್ ಅಪ್ಪಂಡ ಜೋಬುಂಜ ಮಕ್ಕ ದುಡ್ಡ್ ಎಡ್ಪಿಂಜತೊಲೊ. ಈ ವಿಷ್ಯ ಅವ್ವಂಗ್ ಗೊತ್ತಾಚಿ. ಮಕ್ಕಕಳೀಂದ್ ಅವ್ವ ಮುಂಡತಿಂಜಕ ಪೋಣ್ಲ್ ಎಡ್ತಿತ್ತಿಕ್ಕೊಂದ್ ಬಿದ್ದು ಅಂಕ್ ಮುಂಡತೆ ಆಚೊಲೊ. ಇನ್ನನೆ ಮನೆಂಜ ಸುರು ಆನ ಕಳ್ಳತನ ಪೋರ್ಮೆಯೂ ಜೊಳಿವಕ್ ಕೂಡ್ಚಿ. ಕಾಲೇಜ್ ಪೋಯಂಡಿಪ್ಪಕ ಎಳಿಯಂವೊ ದಾಡದೋ ಮೊಚ್ಚೆಲ್ ಚೊಟ್ಟಿಯಂಡ್ ಬಾತೊಲೊ. ಅಪ್ಪಂಗೂ ಅವ್ವಂಗೂ ಪೊಟ್ ಪರಿವಂಜಿ ಬುದ್ಧ್ ಕಾಟ್ವಾನದ್ ಲೊಟ್ಟೆ ಬುಟ್ಟತ್. ಪೆರಿಯಂವೊ ದಾಡದೋ ಬೈಕನೇ ಚೊಟ್ಟಿಯಂಡ್ ಬಾತ್. ಇನ್ನನೇ ಓರಂದೇ ಕಳ್ಳ ಮಾಲ್ ಮನೆಕ್ ಬಂತ ಕೂಡ್ನಕಲೂ ಅಪ್ಪನೂ ಮುಂಡತಿಂಜತ್. ಅವ್ವನೂ ಅದ್ನ ವಿರೋಧ ಮಾಡ್ಲೆ.

ಪೂವಿ : ಅಂದಕ, ಅಯಿಂಡ ಮನೆಲ್ ಅಚ್ಚಕೆಲ್ಲ ಐಶ್ವರ್ಯ ಉಳ್ಳದೆಲ್ಲ ದಾಡ ದಾಡದೋ ಕಟ್ಟಿ ಮಾಲಾ ಅಂದಕ?

ಮಾಚು : ಸಂಶಯೇ ಬೋಂಡ. ಈ ಪರಿಸ್ಥಿತಿ ಅಖೀರಿಕ್ ಎಲ್ಲಿಕ್ ಎತ್ತ್ಚೀಂದೆಣ್ಣಕ ಮಕ್ಕ ಎಂತೆಂತಾನೋ ಕಟ್ಟಿ ಬಂತ ಪೋಲೀಸಡ ಕೈಕ್ ಕೆಣಿವಕಲೂ ಅಪ್ಪೋ ದಾಡ ದಾಡದೋ ಕಾಲ್ ಪುಡಿಪ್ಪಂಜಿ ಮಕ್ಕಳ ಬುಡ್ತಿಯಬಪ್ಪಲ್ಲಿಕ್ ಎತ್ತ್ಚಿ. ಅಖೀರಿಕ್ ಒಬ್ಬೊ ಏದೋ ಕೇಸಲ್ ಜೈಲ್ ಕೂಡಿಪಕ ಅವ್ವ ಟಿ.ಬಿ. ಕಾಯಿಲೆಲ್ ಪರ ಲೋಕ ಕೂಡ್ಚಿ.

ಪೂವಿ : ಅಪ್ಪ ಅನ್ನನೆ ಆನಕಲೂ ಅವ್ವನೇಂಗಿ ಮಕ್ಕಳ ಬುದ್ಧಿ ಎಣ್ಣೆತ್ ತಿದ್ದಿತಿಂಜಕ ಆ ಪರಿಸ್ಥಿತಿ ಬಪ್ಪಿಂಜಿಲ್ಲೆ ಮಾಚು?

ಮಾಚು : ನೋಟ್ ಪೂವಿ, ಎಚ್ಚಕೋ ಮನೆರ ಕತೆ ಇದ್. ತಪ್ಪು ವಡಿಯನೇ ಮಾಡಡ್ ಪೋಣ್ಲೇ ಮಾಡಡ್. ಆಂಡ ಪರಿಣಾಮ ಉಂಡಲ್ಲ? ಅದ್ ಮಾತ್ರ ಇಡೀ

ಪಳಮೆ ಪೊಮ್ಮಾಲೆ

ಸಂಸಾರಕೇ ಪೊಯ್ಯಾಪನ್ನತದ್. ಓರಂದ್ ಮನೆಲ್ ಚಾಕ್ರಿಕಾರ ವಡಿಯಂಗಳ ಪೊಂಗಳೇ ಲಂಚ ಎಡ್ತವನ್ನಕೆ ಕೆಮಿ ಉರ್‌ಪಿತ್ ಅಯಿಪೊಲೊ.

ಪೂವಿ : ನೇರೇ ಎಲ್ಲರೂ ದುಡ್ಡ್ ಮಾಡ್ಯಂಡ್ ಕಾರ್‌ಲ್ ಜುಂ....ದ್ ಪೋಪಕ ನಾಡ ಪಾಡ್ ನೋಟ್. ಓರಾಂಡೇಕ್ ಓರ್ ಪೊಡಿಯ ಕೊಂಡ ಬಪ್ಪಕೂ ಲಾಯಕ್ಕಿಲ್ಲೆ ನಾಡ ವಡಿಯೇಂದ್" ಒರ್ ಪೊಣ್ಣಾಳ್ ಪರಿವಾನ ನಾನೇ ಖುದ್ ಕೇಟಿಯೆ ಮಾಚು. ಇನ್ನನೆ ವಡಿಯಂಗಳ ಹೀಯಾಳ್‌ಚಿಟ್ಟಿಂಡ್ ಇಪ್ಪಕ ಅಯಿಂಕೂ ಲಂಚ ಎಡ್ತವದೇ ನಲ್ಲದ್‌ಂದ್ ಆಯಿಪೋಪಕೂ ಮದಿ.

ಮಾಚು : ಅಲ್ಲ ಪೂವಿ, ಆಡಿ ಕೂಡಿ ನೀನೂ ಒರ್ ಪೊಣ್ಣಾಳಾಯಂಡ್ ಇನ್ನನೆ ಪೊಂಗಳನೇ ದೂರಿಟ್ಟಕೆ? ಜಾತಿಕ್ ಜಾತಿ ಪಗೇಂದ್ ಆಯಿಪೋಪುಲಿಯಾ?

ಪೂವಿ : ಉಳ್ಳಾನ ಉಳ್ಳನ್ನಕೆ ಪರಿಯೊಂಡು ಮಾಚು. ಆಣೋ ಪೊಣ್ಣೋ ನಾನ್ ದಾಡ ಪರೊ ಇಲ್ಲೆ. ವಿರೋಧೊ ಇಲ್ಲೆ.

ಮಾಚು : ಓಹೋ ಇದಿಕ್ಕ ಇಂಟರೆಸ್ಟಿಂಗ್ ಸಬ್ಜೆಕ್ಟ್. ಎಕ್ಕಂಜಿ ಈ ಡಿಸಿಷನ್‌ಕ್ ಬಂದದೊ? (ತೆಳಿ)

ಪೂವಿ : ಅದೇ ಮಾಚು, "ವಿನಾಶಕಾಲ, ವಿಪರೀತ ಬುದ್ಧಿ ಅವ್ವನ ಪೊಯ್ಯು, ಅಪ್ಪನ ಬಯ್ಯು, ಅರೆ ಓಲೆ ಕುತ್ತು- ಅರೆ ಇಾಯ ಪರೆಯೊಂದ್" ವಿಷಯ ಪೂರ್ತಿ ಮಾಡತೆ ನಾಡ ವಡಿಯ ಬಟ್ಟೆ ತಪ್ಪಿತ್ ಕಾಡ್ ಪತ್ತಾಚಲ್ಲ?... ಅಂದೆಂಜ!

ಮಾಚು : ಈ ಪೊಣ್ಣಾಳಡ ಸಾವಾಸ ಕಷ್ಟಪ್ಪ. ಪರ್‌ಂದಂಡ್ ಪರ್‌ಂದಂಡ್ ಬೇರ್‌ಕೇ ಬತ್ತಿ ಬೆಚ್ಚಿರುವ ಓರಮ. ಡೈರೆಕ್ಟಾಯಿತ್ ಎಣ್ಣೆರೊಲುವಲ್ಲ? ಸುತ್ತಿ ಬಳಸಿತ್ ಒರ್ ಕುತ್ತ್ ಎನ್ನಂಗೊ?

ಪೂವಿ : ನೀನೇ ಓರಮ ಎಣ್ಣುವಿಯಲ್ಲ ಮಾಚು? ಚಪ್ಪಲ್‌ನ ಶಾಲ್‌ರ ಒಳಿಯ ಬೆಚ್ಚೆಂಡಾಚೆಂಗೂ ಓರಬಕ್ ಓರಂದ್ ಬಾಟಿರೊಂಡೂಂದ್?!

ಮಾಚು : ಓಹೋ, ಇಕ್ಕ ನಾಕೇ ಪ್ರಯೋಗ ಮಾಡಿಟ್ಟಾ ಅಂದಕೆ?

ಪೂವಿ : ಥೂ! ಬುಟ್ಟಿತ್‌ಂದೆಣ್ಣ್ ಮಾಚು. ಲೋಕಾರೂಡಿ ಪರ್‌ಂದ್‌ಟಕ ಅದೆನ್ನನೆ ನೀಕೇ ಆಯಿಪೋಪೊ? ಅದಿಕ್ಕಡ್, ಎನ್ನನೆ ಉಂಡೊಲೊ ಶಂಭು ಮಾಂವೊ? ಬುದ್ಧಿತ್ ಮೂಡೆಲ್ಲ ಗಾಯ ಆಯಿತ್‌ಂದ್ ಎಣ್ಣುವಿಂಜತ್?

ಮಾಚು : (ತೆಳಿ) ನೀಡ ಶಂಭು ಮಾವಂಡ ಕತೆ ಕೇಟಕ?... ಬುದ್ಧಿಯದೂ ಅಲ್ಲ ಒಂದೂ ಅಲ್ಲ. ಮಕ್ಕ ಕಳಿ ಕಳ್‌ಚಕ ಅನ್ನನೇ ಆಪೊ?...ಬೋಂಡುವಾ ಈ ವಯಸ್‌ಲ್ ಡ್,.... ಕಳಿ? (ತೆಳಿ)

ಪೂವಿ : (ತೆಳಿ) ಅದೆಂತ ಮಾಚು 'ಡ್'ಕಳಿ?

- ಮಾಚು : ಓ. ನೀಕ್ ವಿಷ್ಯ ಗೊತ್ತಿಲ್ಲಿಯಾ ಅಂದಕ? ಎಣ್ಣೆ ತಪ್ಪಿ ಕೇಳ್... ಸ್ಕೂಲ್ ಮಕ್ಕ ಈ ಬರಿಂಜ ಕಲ್ಲ್ ಬಾಣೆರಲ್ಲಿ ಪೋಯಂಡಿಪ್ಪಕ ಆ ಬರಿಂಜ ಶಂಭು ಮಾಂವೊ ಬಂದಂಡುಂಡ್. ಮಕ್ಕಳ ನೋಟಿತ್ ಎಂತ ಕೋಣ ಬಾತೋ. ಅಚ್ಚಕ್ ದೂರತ್ಂಜೇ ಡ್ರೆಂಡ್ ಈ ಮಕ್ಕೆಲ್ಲ ಗಾಡಿ ಬುಡುವಲ್ಲ- ಅನ್ನನೆ ಸದ್ನ್ ಮಾಡಿಯಂಡ್ ಓಡಿಯಂಡ್ ಬಾತ್.....
- ಪೂವಿ : ನಂಗಡ ಸಂಜು ಕಣ್ಣು ಮಾಡುವಿಂಜತಲ್ಲ ಅನ್ನನೆ ಕಾಂಬ? ಚೆರ್ಪತ್ ಎಲ್ಲಾ ಮಕ್ಕಕೂ ಬಸ್ ಬುಡುವೊ ಎಣ್ಣಕ ಕುಶಿಯಲ್ಲ ಮಾಚು?
- ಮಾಚು : ಇಕ್ಕ ವಿಷ್ಯ ಬುಟ್ತ್ ಪೋಯಂಡುಳ್ಳ ದಾರ್? ನಾನಾ -ನೀನಾ?
- ಪೂವಿ : ಅಯ್ಯೋ, ಅದ್ಂಗೂ ಒರ್ ಕೋರೀಸ್ ನೀಡ. ಎಣ್ಣಪ್ಪ ಒಮ್ಮ ರಾಗ ಬಪ್ಪಕ ತಂತಿ ತುಂಡ್ಚೀಂದ್ ಮಾಡತೆ ನೀನ್!
- ಮಾಚು : ಇನ್ನನೆ ಕೋಡಿ ಬರಿಂಜ ಡ್ರೆಂಡ್ ಶಂಭು ಮಾಂವೊ ಗಾಡಿ ಬುಟ್ಟಿಂಡ್ ಸ್ಪೀಡ್ಲ್ ಬಪ್ಪಕಾಪಕ ಬಟ್ಟೆಲ್ ದಾರೋ ಓರ್ ಪಯ್ಯುನ ಮೇವಕ್ ಕೆಟ್ಟಿಂಜತೊಲೊ. ಆ ಪಯ್ಯುಕ್ ಗಾಬರಿ ಪತ್ತಿಪೋಯಿತ್... (ತೆಳೆ)
- ಪೂವಿ : (ತೆಳೆ) ಇದೆಂತದೋ ಒರ್ ಬಲ್ಯ ವೆಹಿಕಲ್ ಬಂದಂಡುಂಡ್ಂದ್ ಗೇನ ಮಾಡ್ಚೆನ್ನೊ....
- ಮಾಚು : ಅನ್ನನೇ ಆಯೆ ಕತೆ. ಮಾಂವೊ ಅಲ್ಲಿಕ್ ಎತ್ತುವದೂ ಈ ಪಯ್ಯುರ ಕೇರ್ ತುಂಡುವದೂ ಸರಿ ಆಚಿ.
- ಪೂವಿ : ಅಯ್ಯೋಯ್ಯೋ! ಅಲ್ಲಿಂಜ?
- ಮಾಚು : ಅಲ್ಲಿಂಜ ಇಂಞೆಂತ? ಪಯ್ಯುರ ಕೇರ್ ಮಾಂವಂಡ ಕಾಲ್ಕ್ ಸುತ್ತಿಯಂಡಿತ್. ಎಡ್ಡಾ... ಅಲ್ಲಿಂಜ ಪಯ್ಯು ಮಾವನ ಕೆಟ್ಟಿಯಂಡ್ ತಾರ್ ರೋಡ್ಲ್ ಡ್ರೆ.... ಅಚ್ಚಿಕೆ ಆಯೆ! (ತೆಳೆ) ಇಕ್ಕ ಸ್ಕೂಲ್ ಮಕ್ಕ ಮಾವನ ಕಾಂಬಕ ಡ್ರೆ ಮಾಂವೊ ಬಾತ್ಂದ್ ಒರ್ ಬರಿಕ್ ನಿಪ್ಪೊಲೊ! (ತೆಳೆ)
- ಪೂವಿ : ಕರ್ಮಕರ್ಮ! ಎಂತೆಲ್ಲ ಕಳೆಂದ್!... ಅಯ್ಯೋಯ್ಯೋ!
- ಮಾಚು : ಎಲ್ಲಾ ಆನ ಪಿಂಞ ನೀಡದೆಂತ ಅಯ್ಯೋಯ್ಯೋ?
- ಪೂವಿ : ಒಂದೂ ಇಲ್ಲೆ. ಬಯ್ಯತೆ ನಾಕ್. ಈ ಮರ್ಪುರ ಬಾಯಿಕ್ ಮಣ್ಣ್ ಇಡುವಕ್.
- ಮಾಚು : ಎಂತಾಚಿ ಪೂವಿ ಅಂತದ್?
- ಪೂವಿ : ಒಂದೂ ಇಲ್ಲೆ. ಕುಕ್ಕರ್ಲ್ ಅಕ್ಕಿ ಇಟ್ಟಿತ್ ನೀರ್ ಬೂಕಿತ್ ಮುಚ್ಚಿತ್ ಬೆಚ್ಚಿಯೆ.
- ಮಾಚು : ಒಲೆ ಮಾತ್ರ ಕತ್ತ ಚಿಟ್ಟಿತ್ಲೆ ಅಚ್ಚಿಕೆ!... "ಡ್ರೆ" ಏಳ್ ತಿತ್ತ್ ಕತ್ತಚಿಡ್!

ಕತೆರೊಳ್ಳಾಲ್ ಕತೆ !

- ಮಾಚು : ಎಂತ ಪೂವಿ? ಒಬ್ಬಳೇ ತೆಳ್ಳಚಂಡುಳ್ಳಿಯ?
- ಪೂವಿ : ತೆಳಿ ಬಪ್ಪಕ ಪಿಂಚಾಂತ ಮಾಡುವೊ ಮಾಚು? ಮೊರಡುವಕಾಪ?
- ಮಾಚು : ಸೆರಿಯಪ್ಪ, ವಿಷಯ ಎಂತೇಂದ್ ನಾಕೂ ಎಣ್ಣೆಲುಲ್ಲ?
- ಪೂವಿ : ಎಲ್ಲಾ ವಿಷಯಕೂ ಎಲ್ಲಾಕೂ ತೆಳಿ ಬಕ್ಕೊಂಡೂಂದಿಲ್ಲೆ. ಕೇಟಿತಾನ ಪಿಂಚಾ ಓಹೋ ಇದೆಂತೋರ್ ಬಲ್ಯ ವಿಷಯಾಂದ್ ನೀನ್ ಎಣ್ಣೆಟಕ?
- ಮಾಚು : ಅಂದಕ ಓರ್ ಕೆಲ್ಯ ಮಾಡ್. ಒಬ್ಬಳೇ ಅಳ್ತಂಡ್ ತೆಳಿ. ಆಚೆಂಗಿ ದಾಕೂ ಕಾಂಗತನ್ನಕೆ ಒರ್ ಮುಸ್‌ಕ್ ಇಟ್ಟ! (ತೆಳಿ)
- ಪೂವಿ : (ತೆಳಿ) ನೀಡ ಕತೆ ಕೇಟಕ! ನಾಕ್ ತೆಳಿ ಬಂದದೂ ಇಂತದೇ ಒರ್ ವಿಷ್ಕಕ್...
- ಮಾಚು : ಅನ್ನನೆ ಎಣ್ಣಕ?
- ಪೂವಿ : ವಿಷ್ಕ ಪೂರ್ತಿ ಎಣ್ಣವಿ ಕೇಳ್. ಮೊನಿಯಾಂದ್ ಜೂಬಿ ಆಂಟಿರ ಮೋವಡ ಮಂಗಲತ್ ಪೋಯಿತಿಂಜನಲ್ಲ, ಅಲ್ಲಿ ನಡಂದದ್ ಮಾಚೂ....
- ಮಾಚು : ಎಣ್ಣ ಅಂದಕ ಕೇಕನ....
- ಪೂವಿ : ಒರ್ ಬರಿಲ್ ಇಸ್ಪೀಟ್ ಕಳಿ ಆಯಂಡುಂಡ್. ಇಂಚೋರ್ ಬರಿಲ್ ಸಿಗರೇಟ್ ಪೊಗೆ ಒರೇ ಸಮ ಎದ್ದುಂಡುಂಡ್. ರಾಜು ಅಣ್ಣಯ್ಯಂಗ್ ಅವಂಡ ಮೋಂವನೂ ಸಿಗರೇಟ್ ಬಲ್ಚಂಡುಂಡುಂಡ್ ಒರ್ ಗುಮಾನಿ.....
- ಮಾಚು : ದಾರ್ ಸರು ಕ್ಕಣ್ಣ?
- ಪೂವಿ : ಅಕ್ಕು ಮಾಚು. ಅಚ್ಚಕೂರ್ ಡೀಸೆಂಟ್ ಆಯಿತಿಂಜ ಕ್ಕಣ್ಣ ಇಕ್ಕಿಕ್ಕ ಬೋಂಡತ ಚಾಲ್ ಸುರು ಮಾಡ್ಕಂಡಿತ್.
- ಮಾಚು : ಅದೆನ್ನನೆ ಗೊತ್ತಾಯೆ?
- ಪೂವಿ : ಅಪ್ಪಂಡ ಸಿಗರೇಟ್ ಪ್ಯಾಕ್‌ಂಜ ಒಂದ್ ದಂಡ್ ಸಿಗರೇಟ್ ಕಾಂಗತೆ ಆಪಿಂಜತ್. ರಾಜು ಅಣ್ಣಯ್ಯಂಗ್ ಡಾಟ್ ಬುದ್ದಿತ್....
- ಮಾಚು : ಅಲ್ಲಿಂಜ?
- ಪೂವಿ : ಒನ್ನಾಂದ್ ಇವಂಗ್ ಪಡ್‌ಪ್‌ಚಿಡುವಿ ಪಣೇಂದ್ ಎಣ್ಣುಂಡ್ ಒರ್ ಪ್ಯಾಕ್‌ಲಿಂಜ ಎಲ್ಲಾ ಸಿಗರೇಟ್‌ರ ಪೇತೊಪ್ಪುನೂ ಚೆನ್ನ ಚೆನ್ನ ಎಡ್‌ತಿತ್, ಆಂಡೊಳ್‌ಕ್ ಚೆನ್ನ ಚೆನ್ನ ಮಳು ಪೊಡಿ ದುಂಬ್‌ಚಿಡುವಂಜಿ ಬೆಚ್ಚತೊಲೊ... ಆಚೆಂಗಿ ಅಂವೊ ಬಲ್ಯ ಕುರ್ಕ. ತಾಂಡ ಗುಟ್ಟ್ ಅಪ್ಪಂಗ್ ಗೊತ್ತಾಯಿ ಪೋಯಿತ್‌ಂದ್ ಅಂವೊ ಅದ್‌ನ ತೊಟ್ಟದೇ ಇಲ್ಲೆ... ಗ್ರಾಚಾರಕ್ ಅಂದ್

ದಾರೋ ಬೆಂದ್‌ಕ ಬಂದಿತ್ ಮನೆಕ್. ರಾಜು ಅಣ್ಣಯ್ಯಂಗ್ ತಾನೇ ಕಯ್ಯಾರೆ ಪೇತೊಪ್ಪು ಎಡ್‌ತಿತ್ ಮಳು ಪೊಡಿ ದುಂಬ್‌ಚಿಟ್ಟದ್ ಮರ್‌ಂದೇ ಪೋಯಿತ್. ಬೆಂದುಕೂ ಸಿಗರೇಟ್ ಕೊಡ್‌ಪಂಜಿ ತಾನೂ ಒಂದಾನ ಕತ್‌ಚಿಟ್ಟಂಡಿತ್... ?

ಮಾಚು : ಸುರು ಮಾಡಿತಿಕ್ಕು ದುಡಿ ಕೊಟ್ಟುವಕ್!

ಪೂವಿ : ಆಕತೆ ಇಪ್ಪಾ? ದಂಡಾಳೂ ಒಮ್ಮೆ ಕೆಮ್ಮುವಕ್ ಸುರು ಮಾಡಿತ್. ರಾಜು ಅಣ್ಣಯ್ಯಂಗ್ ಅಕ್ಕ ಮಂಡೆಕ್ ಪೋಯಿತ್. ತಾನೇ ಮಾಡ್ಯಂಡ ಕೇತರೆ (ತೆಳಿ)

ಮಾಚು : (ತೆಳಿ) ಎಂತ ಎಣ್ಣೆಚೊಲೊ ಬಂದಂವೊ?

ಪೂವಿ : ಅವಂಗ್ ತಕ್ಕ ಪರಿವಕ್ ಕೈಂಜಕಲ್ಲ, ಅವೊ ಎಣ್ಣುವೊ? ಅವಂಡ ದಮ್ ದಡಾಸ್ ಆಯಿಪೋಯಿತ್. ತಾಂಡ ಬಲ್ಯ ಪೊಟ್ಟಿನ ತೇಟಿಯಂಡ್, ತೇಟಿಯಂಡ್ ಕಣ್ಣಲ್ ನೀರ್ ಉಳ್‌ಪಿಯಂಡ್ ಕೆಮ್ಮುವಿಂಜತೊಲೊ! (ತೆಳಿ)

ಮಾಚು : ಪಾಪ! ಬಂದ ಬೆಂದು ಬಂದ ಬಟ್ಟೆಕ್ ಸುಂಕ ಇಲ್ಲೆಂದ್ ಬೈಪಿರಿಂಜಿತಿಕ್ಕು.

ಪೂವಿ : ಅನ್ನನೇ ಆಚೊಲೊ. ಆಸಾಮಿ ಚೆಡ್‌ಂಜಂಡ್ ನಾಕ್ ಇವು ಬೋಂಡೂಂದೇ ಮಾಡಿಯೇಂದ್ ದುಂಡ್‌ನ ಕುಂಬಳ ಮಾಡ್ಯಂಡ್ ಕೂಡೆನ್ನೆ ಜಾಗ ಖಾಲಿ ಮಾಡ್‌ಚಿಲೊ! (ತೆಳಿ)

ಮಾಚು : ಅದ್‌ಂಗೇ ಎಣ್ಣುವೊ! ತಾನ್‌ಟ್ಟಿ ಗಾಳಕ್ ತಾನೇ ಕೆಣ್‌ವೋಂದ್!.... ಅಲ್ಲ ಅಂದೆಂತದೋ ಎಣ್ಣಲ್ಲ? ಅಂತದೇ ಕತೇಂದ್.... ಅದೆಂತ?

ಪೂವಿ : ನಾನ್ ಎಣ್ಣುವಕ್ ಪೊರಟ್ಟದೇ ಅದ್‌ನ ಎಣ್ಣುವಕ್.... ಮಂಗಲತ್‌ರ ಮನೆರೆ ಕತೇಂದೆಣ್ಣಲ್ಲ? ಸಮಾಜತ್ ಒರ್ ಬರಿಲ್ ಇಸ್ಪೀಟ್ ಕಳಿ- ಇಂಇಶೋರ್ ಬರಿಲ್ ಪೊಗೆಕಳೇಂದೆಣ್ಣ ನೋಟ್... ರಾಜು ಅಣ್ಣಯ್ಯ ಇಸ್ಪೀಟ್ ಕಳ್‌ಚೆಂಡ್ ಇಂಜಿತ್. ಸಿಗರೇಟ್‌ರ ಪೊಗೆ ಬಪ್ಪದೂ ಡೌಟ್ ಬಂದಿತ್. ತಾಂಡ ಮೋಂವೊ ಎಲ್ಲಿಯಾಂದ್ ತೇಡುವಕ್ ಕೂಡಿತ್.... ನೋಟುವೊಲೊ, ದೂರತ್ ಅಂಜಾರ್ ಬಾಲೆಕಾರ ಮಕ್ಕ ಗುಡ್ಡೆ ಕೂಡಿಯಂಡ್ ಗೌಜಿಲ್ ಪೊಗೆ ಸೇವೆ ಮಾಡ್ಯಂಡುಂಡ್.

ಮಾಚು : ಸರು ಕ್ಕಣ್ಣನೂ ಇಂಜತೋ ಇನ್ನೋ?

ಪೂವಿ : ಅದೇ ಉಳ್ಳೋ ತಮಾಷಿ! ಎಲ್ಲರೂ ಓರಂದ್ ಬೆಡ್‌ಶೀಟ್‌ನ ಮಂಡೆಕ್ ಮುಸ್‌ಕ್ ಇಟ್ಟಂಡನ್ನೆ ಇಟ್ಟಂಡಿತ್! (ತೆಳಿ) ತಂಗ ತಂಗಡ ಗುರ್‌ತ್ ಕ್ಕಟ್ಟೆ ಇಕ್ಕಡ್‌ಂದ್!... ರಾಜು ಅಣ್ಣಯ್ಯ ಅಯಿಂಗಡ ಪಕ್ಕ ಪೋಕಣೆ, ಬೆಡ್‌ಶೀಟ್

ಪಳಮೆ ಫೊನ್ನಾಲ್

ಅಡ್ಕ ಅಸಾಮಿಯ ಅಪ್ಪರತ ಬರಿಕಾಲೆ ನಾಪತ್ತೆ! (ತೆಳಿ)

ಮಾಚು : (ತೆಳಿ) ತಮಾಷಿ ಉಂಡ್ ಕತೆ!.... ಅಲ್ಲ ಪೂವಿ, ಒರ್ ವಿಷ್ಯ ಮಾತ್ರ ಎಲ್ಲರೂ ಗೇನ ಮಾಡೊಂಡು.

ಪೂವಿ : ಎಂತ?

ಮಾಚು : ಏದೇ ಒರ್ ಅಬ್ಯಾಸತ್‌ನ ಸುರು ಮಾಡುವಕ್ ಸುಲ್‌ಭ. ಬುಡುವದ್ ಮಾತ್ರ ಅವಂಡ ಕೈಲಿಲ್ಲೆ.

ಪೂವಿ : ಅದ್ ಬುಟ್ಟಕಲ್ಲ ಇಯಂಗಳ್? ಕಳ್ಳ ಕುಡಿಯೂ ಅಚ್ಚಿಕೆ ಅಲ್ಲ ಮಾಚು?...ದಾಕೋ ಕಂಪೆನಿ ಕೊಡ್‌ಪಕ್‌ಂದ್ ಚೆನ್ನ ಚೆನ್ನಾಂದ್ ಅಭ್ಯಾಸ ಆಪ. ಅದಾನದೂ ಅದೇ ಬಲ್ಯ ಕಂಪೆನಿ ಆಯಿಪೋಪ.

ಮಾಚು : ಅನ್ನನೇ ಆಪೊ. ಚಂಗು ಮಾಂವನೇ ಎಡ್‌ತ. ಪೊಲಾಕ ಎದ್ದಿತ್ ಕೆಮ್ಮುವದ್ ಮೂಂದ್ ಮೈಲ್ ದೂರಕ್ ಕೇಪ. ಬೀಡಿನ ಮಾತ್ರ ಬುಡುವದೇ ಇಲ್ಲೆ.....

ಪೂವಿ : ತಾಯಿಯೇ ಎಡ್‌ತ ಬಂತ್ ಕೊಡ್‌ಪಲ್ಲ ಮಾಚು.... ಆಂಗಂತ ಎಣ್ಣುವಿಯ?

ಮಾಚು : ಎಡ್‌ತ ಬಂದಿತ್ ಕೊಡ್‌ಕತಿಂಜಕ ಮಾಂವೊ ಬುಡುವಾಂದ್ ಗೇನ ಮಾಡಿಯಾ?

ಪೂವಿ : ಎಂತ ಮಾಡುವೊಲೊ?

ಮಾಚು : ಮಾಂವಂಗ್ ಕೆಮ್ಮಟ ಜೋರಾಪ. ಆ ನೇರಕ್ ಒರ್ ಬೀಡಿ ಬಲ್‌ಚಕ ಚೆನ್ನ ಸಮಾಧಾನ ಆಪಲೊ. ಬೀಡಿ ಕೊಂಡಬಂದಿತ್ ಕೊಡ್‌ಕತಿಂಜಕ ತಾಯಿಕ್ ತಾರಾಮಾರ ಬೈಯುವಕ್ ಸುರು ಮಾಡುವ. ಬೈವಕ್ ಕೂಡಣೆ ಕೆಮ್ಮಟೋ ಜೋರಾಪ. ಒರ್ ಬರಿಲ್ ಕೆಮ್ಮಟ ಇಂಞೋರ್ ಬರಿಲ್ ಬೈಗಳ್. ಕಣ್ಣಲ್ ಮೂಕ್‌ಲ್ ನೀರ್ ಉಳ್‌ಪಿಯಂಡ್ ಬೋಂಡ ಪಜೀತಿ....

ಪೂವಿ : ಈ ಪಾಡ್‌ನ ನೋಟುವಕ್ ಕಯ್ಯತೆ ಬೀಡಿ ಕೊಂಡಬಂತ್ ಕೊಡ್‌ಪೆನ್ನೋ?

ಮಾಚು : ಇಂಞೆಂತ ಮಾಡುವ? ಎಲ್ಲಾ ಬೋಂಡತ ಚಾಲೂ ಇನ್ನನೇ. ಕುಡಿಕಾರಂಗಡ ಪಾಡ್‌ನೇ ಎಡ್‌ತ. ಬೈಟ್ ಕುಡ್‌ಚದೇ ಬುಟ್ಟಿತಿಪ್ಪುಲೆ. ಬೊಳಿಯಾಪಕ್ ಮಿಂಞ ಪುನಾದ್ಯ ಕಳ್ಳಾಂಡು. ಇಲ್ಲೆಂಗಿ ಕೈಕಾಲ್ ಬೊರ್‌ಚಲ್, ಮಂಡ ನೊಂಬಲ!

ಪೂವಿ : ಮಾಚೂ, ನಾನೋರ್ ಕತೆ ಎಣ್ಣಡಾ? (ಗಂಭೀರ ಸ್ವರ)

ಮಾಚು : ಅರೆ, ಇದೆಂತ ಪೂವಿ? ಎಕ್ಕೊಲೂ ಒರ್ ಕತೆ ಎಣ್ಣೆ ಮಾಚೊಂದ್ ನಾಡ ಮಂಡೆ ತಿಂಬಿಂಜವ ಇಂದೆನ್ನ ಪುದಿಯ ಥರ?

ಪೂವಿ : ಇದ್ ನಂಗಡ ಊರ್‌ಲೇ ನಡ್‌ಂದದ್ ಮಾಚು. ಜನ ಮಾತ್ರ ದಾರ್‌ಂದ್

ಕೇಕತೆ.

- ಮಾಚು : ಸೆರಿಯಪ್ಪ, ಈ ಕತೆಲ್ ಹೀರೊ ದಾರ್? ಹೀರೋಯಿನ್ ದಾರ್ ಅಂದಕ?
- ಪೂವಿ : ಓರಂದ್ ಕತೆಲ್ ಹೀರೋ ಹೀರೋಯಿನ್ಂದೇ ಇಪ್ಪುಲೆ ಮಾಚು. ಬೋರೀ ಕತೆ ಮಾತ್ರ ಇಪ್ಪು.
- ಮಾಚು : ನೀಡ ಫಿಲಂ ನೇರಾಯಿತೂ ತಲೆ ಪತ್ತುಲೆ ಅಂದಕ ! (ತೆಳಿ)
- ಪೂವಿ : ಅಯ್ಯೋ! ಇದೆನ್ನಾ ಥಿಯೇಟರ್‌ಲ್ ರಿಲೀಸ್ ಮಾಡುವಕಲ್ಲಲ್ಲ ಮಾಚೂ..
- ಮಾಚು : ಆಚಪ್ಪ ಅಂದಿತೂ ಕತೆಲ್ ಹೀರೋ ಹೀರೋಯಿನ್ ಇಲ್ಲೆಂದ್ ಎಣ್ಣುವಕ ಆಶ್ಚರ್ಯ ಆಪಪ್ಪು.
- ಪೂವಿ : ನೀನೇ ಎಣ್ಣುವಿಂಜಿಯಲ್ಲ? "ಹೀರೋ, ಹೀರೋಯಿನ್ ಕಾನ್ಸೆಪ್ಟ್ ಬೆಚ್ಚಂಡ ಕತೆಲ್ ಆಂಡದೇ ಆನನ್ನತ ಒರ್ ಮಿತಿ ಇಪ್ಪು. ನಂಗಡ ಬದ್‌ಕ್‌ಲ್ ನಡ್‌ಪನ್ನತದೇ ಬೋರೇಂದ್" ಗೇನ ಉಂಡಾ?
- ಮಾಚು : ಓಹೋ, ಇದ್‌ನೊ ಎಣ್ಣೆತಿಂಜನಾ ನಾನ್?
- ಪೂವಿ : ಇಕ್ಕ ಎಣ್ಣೆದ್ ಇಂಞೋರ್ ಗಳಿಗೇಕ್ ಗೇನ ಇಪ್ಪುಲೆ ನೀಕ್! ಪರ್ಟ್ ಮೇಲ್‌ಕ್‌ಟ್ಚಂಡ್ ನಾಡ ಪರ್ಟ್ ಎಲ್ಲಿಯ ಪೂವೀಂದ್ ಕೇಪಂವೊ ನೀನ್!
- ಮಾಚು : ಸುರು ಮಾಡಿಟ್ಯಾ? ನಾಡ ಕತೆನ ಪಾಡುವಕ್?
- ಪೂವಿ : ನೀಡ ಕತೆನ ನಾನೊಂದೂ ಪಾಡಿತ್‌ಲೆ ಮಾಚು. ಉಳ್ಳಾನ ಎಣ್ಣ ಅಚ್ಚಿಕೇ!
- ಮಾಚು : ಎಣ್ಣುವಕ್ ಮನಸ್ ಮಾಡ್‌ನಕ ನೀಡ ಕತೆಯೂ ಸುಮಾರ್ ಉಂಡ್. ಎಣ್ಣುವಕ್ ಪುರುಸೊತ್ತ್ ಬೋಂಡು ಅಚ್ಚಿಕೇ!
- ಪೂವಿ : ಪಾಪ! ಇಕ್ಕ ಪೆರ್ತ್ ಬ್ಯುಸಿಲ್ ಉಳ್ಳಿಯ ನೋಟ್ ನೀನ್! (ತೆಳಿ)
- ಮಾಚು : ನಾಯಿ ಕಡ್‌ಚೆತ್‌ಂದ್ ಅರ್‌ಂಜವು ನಾಯಿರ ಕಾಲ್‌ಕ್ ಕಡಿಪ್ಪಾ! ಪೂವಿ?
- ಪೂವಿ : ಎಂತ? ಚೆನ್ನ ಗೇನ ಮಾಡಿತ್ ಪರಿ ಮಾಚು....
- ಮಾಚು : ಓಹೋ, ನಿನ್ನ ಇಂಡೈರೆಕ್ಟ್ ಆಯಿತ್ ನಾಯೀಂದ್ ಎಣ್ಣನ್ನಕೆ ಆಯಿರ್‌ತ್ ಕಾಂಬಲ್ಲ? ವೆರಿ ಸಾರಿ, ವೆರಿ ಸಾರಿ!.... ಅದಿಕ್ಕಡ್ ಅದೆಂತದೋ ಕತೆ ಎಣ್ಣುವೀಂದೆಣ್ಣಲ್ಲ?
- ಪೂವಿ : ಆ ಕತೆನ ಗೇನ ಮಾಡ್‌ನಕ ಎಂತವಂಗೂ ಬೇಜಾರ ಆಂಡು. ಅನ್ನತಾ ಕತೆ ಅದ್....
- ಮಾಚು : ತೆಳಿಪ ಕತೆಯಾ? ಮೊರಡುವ ಕತೆಯಾ?
- ಪೂವಿ : ತೆಳಿಪ್ಪಕ್ ಇದ್ ಕುರ್ಕಂಡ ಕತೆ ಅಲ್ಲ ಗೊತ್ತಾಚಾ?
- ಮಾಚು : ಅಂದಕ ಮೊರಡುವ ಕತೆ! ಸೆರಿ ಎಣ್ಣ್. ಅಲ್ಲ ನಾಡ ಕರ್ಚೀಪು ಎಲ್ಲಿಯ ಪೂವಿ?

ಷಕಮೆ ಪ್ರೊಮ್ಯಾಲೆ

ಪೂವಿ : ಕರ್ಚೀಪು ಎಂತಾಂಗ್ ಮಾಚು? ಮನೆಲಿಪ್ಪಕ.....

ಮಾಚು : ತೆಳಿಪ್ಪ ಕತೆ ಅಲ್ಲೆಂಗಿ ಅದ್ ಮೊರಡುವ ಕತೆಯೇ ಆಯಿತಿಕ್ಕೊಂಡುವಲ್ಲ?...
ಕರ್ಚೀಪು ಇಂಜಕ ಕತೆ ಕೇಪಕೊರ್ ಚಾಯಿ. ರಾಣಿ ಮಮ್ಮಂಡನ್ನಕೆ! (ತೆಳಿ)

ಪೂವಿ : ರಾಣಿ ಮಮ್ಮನ ಎಂತಾಂಗ್ ಗೇನಾಯೆ ನೀಕಿಕ್ಕ?

ಮಾಚು : ಒರ್ ದಿವಸ ಎಂತಾಚಿ ಗೊತ್ತುಂಡಾ? ರಾಣಿ ಮಮ್ಮಂಡ ಮನೆಕ್ ಪೋನ.
ಕಾಕ್ನಕ ದಾರೂ ಒರಡುಲೆ. ನಾಯಿ ಕೂಡಿ ಕೊರ್ತಾಲೆ. ನನ್ನ ಒಮ್ಮ
ದುರ್ಗುಟ್ಟಿತ್ ನೋಟ್ಚಿ, ಆಂಡ ಪಾಡ್ಕ್ ಅದ್ ಆ ಬರಿಕ್ ತಿರಿತ್
ಬುದ್ದಂಡತ್.

ಪೂವಿ : ನೀನೆಲ್ಲ ನಾಕ್ ಏದ್ ಲೆಕ್ಕಾಂದ್ ಆಯಿತಿಕ್ಕು! (ತೆಳಿ)

ಮಾಚು : ಅನ್ನನೆ ಅಲ್ಲ ಅಷ್ಟಕೆ ಅಷ್ಟೇ ಬರೋದೊಂದ್ ಆಯಿತಿಕ್ಕು! (ತೆಳಿ)

ಪೂವಿ : ಎಣ್ಣಕ?

ಮಾಚು : ನಾಕ್ ಇಡುವದೇ ಒರ್ ಪುಡಿ ಕೂಳ್. ಅನ್ನತಲ್ಲಿ ನಿನ್ನಂತಂವಂಗೆಲ್ಲ ಕೊರ್ತಕ
ಅಸ್ಲ ಆಪುಲೇಂದ್ ಆಯಿತಿಕ್ಕು!.... ಮೆಲ್ಲೆ ಒಳ್ಳಕ್ ಕಾಲ್ಟ್ಚಿ, ಟೀವಿರ
ರಭಸತ್ ನಾನ್ ಒಳ್ಳಕ್ ಪೋನದ್ ಅಯಿಂಕ್ ಕಂಡಕಲ್ಲ?

ಪೂವಿ : ಟಿ.ವಿನ ಅಚ್ಚಕ್ ಜೋರ್ಲ್ ಬೆಚ್ಚಂಡಿತಿಕ್ಕು!

ಮಾಚು : ನೀನೊಮ್ಮ ನೋಟೊಂಡಿಂಜತ್ ಆ ಸೀನ್! ಒರ್ ಬರಿಲ್ ಟೀಪಾಯಿಲ್
ಕಾಫಿ ಚಿಪ್ಸ್ ಎಲ್ಲ ಬೆಚ್ಚಂಡಿತ್. ಕಾಫಿ ಬಟ್ಟತೇ ತಣ್ಂಜೋಯಿತಿಂಜತೆನ್ನೊ...
ವಲ್ಂಜಿ ಮುತ್ತಂಡಿತ್!

ಪೂವಿ : ಬಟ್ಟತ್ ಕಾಫಿ ಬೆಚ್ಚಂಡ್ ಎಂತಾಂಗ್ ಮಾಚು ಕುಡಿಕ್ಕತದ್?

ಮಾಚು : ಅದ್ನೇ ಎಣ್ಣಂಡುಳ್ಳ ಕೇಳ್, ಕಾಫಿರ ಗೇನೇ ಇಲ್ಲೆ ಇಯಂಗಕ್! T.V.
ರೆಡೆಲ್!

ಪೂವಿ : ಇಯಂಗಕ್ಂದೆಣ್ಣಕ? ಬೋರೆ ದಾರಿಂಜತ್ ರಾಣಿರಲ್ಲಿ? ಅಯಿಂಗ ಎಲ್ಲರೂ
ಇಂಜತಾ?

ಮಾಚು : ರಾಣಿ ಮಮ್ಮಂಡ ಕೂಟ್ಕಾರ್ತಿ! ನಾಯಿ ಪೋನಲ್ಲಿ ಬಾಲ್ಂದ್
ಕೇಟಿತುಳ್ಳಿಯಲ್ಲ....

ಪೂವಿ : ಓ ಗೊತ್ತಾಚಿ ಗೌರು ಅಕ್ಕಯ್ಯ!

ಮಾಚು : ಅವಳೇ! ಒಬ್ಬ ಪೊಡಿಯ ನೆರಿಲ್ ಕಣ್ಣ್ ತ್ತೆಟಿಯವ. ಇಂಚೊಬ್ಬ ಬಲ್ಯೊರ್
ಟೆವಲ್ನ ಕೂಡೇ ಬೆಚ್ಚಂಡಿತ್. ಒಮ್ಮ ಕಣ್ಣ್ ತ್ತೆಟುವೊ- ಇಂಚೊಮ್ಮ
ಮೂಕ್ ತ್ತೆಟಿಯವೊ! (ತೆಳಿ)

- ಪೂವಿ : ಕರ್ಮ ಕರ್ಮ! (ತೆಳಿ) ಟಿ.ವಿಲ್ ಎಂತ ಪೋಗ್ರಾಂ ಇಂಜಿಯೆ?
- ಮಾಚು : ಅದೆಂತೆಂದ್ ನಾಕೆನ್ನ ಗೊತ್ತೆ?... ಇಯಂಗಕ್ ನಾನ್ ಪೋಯಿತ್ ಅಯಿಂದ ಬಯ್ಯಲ್ ಅಳೆತದ್ ಕೂಡಿ ಗೊತ್ತೆಲೆ. ಮೊರೆಯೇ ಮೊರೆ! (ತೆಳಿ)
- ಪೂವಿ : ಏದ್ ಫಿಲಂ ಮಾಚು ಅದ್? ಅಚ್ಚೆಕೊರ್ ಮೊರಡುವಂತದ್?
- ಮಾಚು : ನಾಕ್ ಗೊತ್ತಿಲ್ಲೆಂದ್ ಎಣ್ಣೆಲ್ಲ. ಏದೋ ಒರ್ ತಮಿಳ್ ಫಿಲಂ ಒರ್ ಆಣಾಳ್ ಒರ್ ಪೋಣ್ಣಾಳ್ಕ್ ಒರೇ ಸಮ ಪೋಯ್ಯುವ. ಪೋಯ್ತೆ ಪೋಯ್ತೆ!.... ಅವ ಒರೇ ಸಮ ದಮ್ಮಯ್ಯ ಇಡುವ. ನನ್ನ ಪೋಯ್ಯತೆ, ನಾನ್ ಅಂತವ ಅಲ್ಲಾಂದ್! ಅಂವೊ ಇವಳ ತಾರಮಾರ ಈತಂಡ್ ಈತಂಡ್ ಬಡಿಪ್ಪ.... ಈ ದಂಡ್ ಪೋಣ್ಣಾಳ ಕಣ್ಣ್ ಮೂಕ್ ತೇಟಿಯಂಡ್ ಆ ಆಣಾಳ್ಕ್ ಬಾಯಿಕ್ ಬಂದನ್ನಕೆ ಬಯ್ಯುವ. ಅದ್ ಅವಂಗ್ ಕೇಟಕಲ್ಲ? ಅಂವೊ ಒರೇ ಸಮ ಪೊಜ್ಜಂಡೇ ಉಂಡ್. (ತೆಳಿ)
- ಪೂವಿ : ಬಾರಿ ಚಾಯಿ ಇಂಜಿತಿಕ್ಕುವಲ್ಲ ಮಾಚು ಆ ಸೀನ್? ಛೆ! ನಾನ್ ಇಲ್ಲತೆ ಆಯಿಟ್ಟಲ್ಲ? (ತೆಳಿ)
- ಮಾಚು : ತಮಾಷಿ ಎಂತ ಗೊತ್ತುಂಡಾ? ಈಂಡೆಡೆಲೂ ರಾಣಿ ಮಮ್ಮ ಗೌರು ಮಮ್ಮಂಗ್ ಓರಂದೇ ಚಿಪ್ಸ್ ಎಡ್ಡಿತ್ ಕೊಡ್ಪಿಂಜದ್!.... ದಂಡಾಳೂ ಚಿಪ್ಸ್ನೊ ತಿಂದಂಡ್, ಆ ಆಣಾಳ್ಕ್ ಬಯ್ಯುವ..... ರಾಣಿ ಮಮ್ಮ ಅಂತೂ ಆ ಆಣಾಳ್ನ ಪೋಯ್ಯುವಕ್ ಪೋಪನ್ನಕೆ ಕಳಿಪ್ಪಿಂಜತ್. ಈಂಡೆಡೆಲ್ ಇಂಞೂ ಒರ್ ಕತೆ...
- ಪೂವಿ : ಪೆರ್ತ್ ಇಂಟೆರೆಸ್ಟಿಂಗ್ ಉಂಡಲ್ಲ? ಎಂತ ಇಂಞೋರ್ ಕತೆ?
- ಮಾಚು : ಟಿ.ವಿ. ಸೀರಿಯಲ್‌ನ ನೋಟಿಯಂಡ್, ಆ ಆಣಾಳ್ ಮಾಡ್ಯಂಡುಳ್ಳ ಕೇತರೆಕ್ ಇಡೀ ಆಣ್ ಜಾತಿನೇ ಬಜ್ಜಂಡುಂಡ್ ದಂಡಾಳೂ. ಈ ಆಣಾಳ ಆಶೆ ಭಾಷೆ ಇಲ್ಲತವು, ಪರ್ದೇಸಿಯ, ಪೋಲಿಯ, ಪೂರ್ಕಿಯಾಂದ್!
- ಪೂವಿ : ನೀಕ್ ಒರ್ ತರಾ ಆಯಿತಿಕ್ಕು!(ತೆಳಿ)
- ಮಾಚು : ಆಕತಿಪ್ಪಾ ಪೂವಿ? ಗ್ರಾಚಾರಕ್ ಎಣ್ಣೆತೆ ಕೇಕತೆ ಮನೆರೊಳ್ಕ್ ಪೋನದಲ್ಲತೆ ಇಯಂಗಡ ಬಯ್ಯಲೇ ಅಳ್ಳಿತುಳ್ಳ. (ತೆಳಿ) ಆ ಸಂದರ್ಭತ್ ಅವು ನನ್ನ ಎನ್ನೇಂಗಿ ನೋಟಿತುಂಡ್.... ನಾಡ ಪಣ ಕೂಟಿರುವ. ಅಚ್ಚೆಕೊರ್ ಚೊಡಿಲ್ ಆಣಾಳ್ಕ್ ಬಯ್ಯುವಿಂಜತ್..... (ತೆಳಿ)
- ಪೂವಿ : ಅಲ್ಲಿಂಜೆಂತಾಚಿ? ನಿನ್ನ ಕಾಂಬದೂ ಎಂತ ಎಣ್ಣೆಚಿ?
- ಮಾಚು : ನಾನ್ ಅಯಿಂಕ್ ಕಂಡಕಲ್ಲ? ಕಾಂಬ್‌ಚಿಟ್ಟವಕ್ ಇದ್ ಸರಿಯಾನ ನೇರ

ಸಕಮೆ ಪ್ರೊಮ್ನಾಲೆ

ಅಲ್ಲಾಂದ್ ಗೊತ್ತಾಚಿ. ಎನ್ನನೆ ಒಳ್ಳೆಕ್ ಪೋನನೋ ಅನ್ನನೇ ಬಯ್ಯಕ್ ತಿರಿತ್ ಕೂಡಿ ನೋಟತೆ ಜಾಗ ಖಾಲಿ ಮಾಡ್‌ನ.

ಪೂವಿ : ಅಯ್ಯೋ, ಅಂದಕ ನೀನ್ ಪೋನದ್ ಬಂದದ್ ಒಂದೂ ಅಯಿಂಕ್ ಗೊತ್ತೇ ಇಲ್ಯಾ?

ಮಾಚು : ಎಲ್ಲಿ ಗೊತ್ತಿಪ್ಪ? ಮನೆಂಜ ಎಂತಾನೇಂಗಿ ಕಟ್ಟಬಂತಿಂಜಕಲೂ ಗೊತ್ತಿಲ್ಲೆ!

ಪೂವಿ : ದಮ್ಮಯ್ಯ!... ಇನ್ನನೇ ಕಳ್ಳತನ ಕೂಡಿ ಆಪದಲ್ಲ ಮಾಚೂ. ನಂಗ ಅಂದ್ ಅದೇದೋರ್ ಪೇಪರ್‌ಲ್ ಓದ್‌ಚಿ ನೋಟ್, ಮನೆಲ್ ಎಲ್ಲಾಂಗೂಡಿ ಅದೇದೋ ಓರ್ ಸೀರಿಯಲ್‌ನ ಇಂಟರೆಸ್ಟ್‌ಲ್ ನೋಟ್ಯಂಡುಂಡೊಲೊ.... ಕಳ್ಳಂಗ ಬೆಂಬರತ ಕಂಡಿಕಾಲೆ ಮನೆನುಗ್ಗಿತ್ ಎಂತಾನೊ ಎಲ್ಲ ಬಾತಿಯಂಡ್ ಪೋಯಿತ್. ಟಿ.ವಿರ ಬಯ್ಯೆ ಕೂಡಿಟ್ಟಕ ಭೂಲೋಕತ್ ಆಪ ಪೋಪದೂ ಗೊತ್ತಿಕ್ಕೊಂಡು!

ಮಾಚು : ಪೊಣ್ಣಾಳಡ ಕತೆ ಅನ್ನನೇ ಅಲ್ಲ ಪೂವಿ? ಏದೇಂಗಿ ಒರ್ ವಿಷಯತ್ ಇಂಟರೆಸ್ಟ್ ಬಂದ್‌ಟಕ ಮದಿ. ಆಂಡೊಳ್‌ಲೇ ಕೂಡಿರುವ.

ಪೂವಿ : ಓಹೋ, ಎನ್ನ ಮಾಚು? ತಕ್ಕ್‌ನ ಏಲೇಲೋ ಕೊಂಡಪೋಪಂಜಿ ನಾಕೂ ಒರ್ ಕುತ್ತ್!.... ಅತ್ತಟಿ, ಪೊಜ್ಜನ್ನಕೆ ಕಾಂಬಕಾಗ- ಬೆನ್ನಲ್ ಮಾತ್ರ ಬರೆ ಬಂದಿತ್ತಿರೊಂಡು!

ಮಾಚು : ಅರೆ, ನೀಕೆಂತಾಚಿ ಪೂವಿ? ನಾನೆಂತ ಎಣ್ಣೆ ನೀಕಿಕ್ಕ?

ಪೂವಿ : ಒಂದೂ ಇಲ್ಲೆ. ಇಂಡ್ಯೆರೆಕ್ಪಾಯಿತ್ ಒರ್ ಪೂಯ್ ಅಚ್ಚಿಕೆ. ಇರಡ್ ಬುಡ್. ಮಾಯಿಕ್ಕೊರ್ ಕಾಲ ಬಪ್ಪಕ -ಮೈಮಕೂ ಒರ್ ಕಾಲ ಬಪ್ಪಕಿಲ್ಲಿಯಾ?

ಮಾಚು : ಪೂವಿ, ನೀಕೆನ್ನೋ ಜಗಲಾಡನಾಂದ್ ಆಯಿತಿಕ್ಕೊಂಡು. ಇದೆಲ್ಲ ಅದ್‌ಂಗಲ್ಕ ನೇರ ಅಲ್ಲ ಗೊತ್ತಾಚಾ?

ಪೂವಿ : ಜಗಲಾಡುವಕ್ ಮೊಳಿ ಇಡುವೊ ಸುರೂಲ್ ದಾರ್? ನಾನಾ - ನೀನಾ?

ಮಾಚು : (ತಳಿ) ಮೊಳಿ ಇಡುವೊ ದಾರೇ ಆಯಿತಿಕ್ಕಡ್- ಜಗಲಾಡುವೊ ಮಾತ್ರ ನಂಗಲೇ!

ಪೂವಿ : ಹ್ಲೊಂ.... ಎಚ್ಚಕ್ ಉಶಾರ್ ನೋಟಂವೊ ತಕ್ಕ್ ತಿರುಕುವಕ್!...ಪಾಪ! ಬಾಯಿಕ್ ಬೆರ ಇಟ್ಟಕಲೂ ಕಡಿಪ್ಪಕ್ ಗೊತ್ತೇ ಇಲ್ಲೆ ಅಸಾಮಿಕ್!

ಮಾಚು : ಅಲ್ಲ, ನೀಡ ಕತೆ ಏಲೆ ಕುಂದ್ ಪತ್ತ್‌ಚಿ ಪೂವಿ?

ಪೂವಿ : ಎಂತ ನಾಡ ಕತೆ?

ಮಾಚು : ನೀಡ ಕತೆ ಅಲ್ಲ ಮಾರಾಯತಿ. ನೀನ್ ಎಣ್ಣುವಕ್ ಪೊರಟ್ಟಿತಿಂಜಿಯಲ್ಲ ಆ ಕತೆ!

- ಪೂವಿ : (ಊಜಳೆ) ಅದಾನ ಗೇನ ಮಾಡುವಕಲೇ ಬೇಜಾರಾಪ ಮಾಚು. ಆಣಾಳ ಮನೆಲ್ ಸೆರಿ ಇಂಜಿಲೆಂಗಿ ಎಲ್ಲಾ ಪಾಳೇ!
- ಮಾಚು : ಓಹೋ, ಇದ್ ಗ್ಯಾರಂಟಿ ನಾಕ್ ಬತ್ತಿ ಬೆಪ್ಪಕುಳ್ಳ ಕತೆ ಅಂದಕ....
- ಪೂವಿ : ನೀಕೆಂತಾಂಗ್ ಬತ್ತಿ ಬೆಪ್ಪೊ?
- ಮಾಚು : ಈ ಮನೆಲ್ ಇಕ್ಕ ಆಣಾಳ್ ನಾನೇ ಅಲ್ಲ? ಆಂಗ್! (ತೆಳಿ)
- ಪೂವಿ : ನೀಡ ತಮಾಷಿ ಒಂದೂ ಬೋಂಡ. ನಾನ್ ಸೀರಿಯಸ್ ಆಯಿತ್ ಎಣ್ಣೆಂಡುಳ್ಳ ಮಾಚು. ಅನ್ನತ ವಡಿಯನೂ ಇಪ್ಪಕಾಗ- ಅಪ್ಪನೂ ಇಪ್ಪಕಾಗ....
- ಮಾಚು : ವಿಷ್ಯ ಎಂತ ಪೂವಿ?
- ಪೂವಿ : ನಾನ್ ಆಳನ ಕುರ್ಚಿತ್ ಎಣ್ಣೆಲೆ ಮಾಚು. ವಿಷ್ಯ ಮಾತ್ರ ಎಣ್ಣೆವಿ ಕೇಳ್..... ಒರ್ ಮನೆಲ್ ವಡಿಯನೂ-ಪೋಣ್ಣೂ-ಒರ್ ಮೋವಳೂ ಇಪ್ಪ....
- ಮಾಚು : ಸದ್ಯ ನಂಗಡ ಮನೆರ ಕತೆ ಅಲ್ಲ ಅಂದಕ...
- ಪೂವಿ : ಎಣ್ಣೆವಾನ ಚೆನ್ನ ಕೇಳ್ ಮಾಚು....
- ಮಾಚು : ಕೇಟಂಡೇ ಉಳ್ಳಲ್ಲ? ಇದಾ ದಂಡ್ ಕೆಮಿನೊ ನೀಕ್ ದಾನ ಮಾಡಿತ್ ನೀಡ ಮಿಂಞಲ್ ಶರಣಾಗತ ಕೈದಿರನ್ನಕೆ ಅಳತಿತುಳ್ಳ. ಎಣ್ಣೆ.....
- ಪೂವಿ : ವಡಿಯ ಪೋಣ್ಣರ ನಡುಲ್ ಎಚ್ಚಕೊ ಜಗಳ ಬಕ್ಕಣ ಆಕು. ಅದಾನೇ ಬಲಂಬನೆ ಎಡ್ತಂಡ್ ಪೋನಕ ಮಕ್ಕಡ ಪಾಡ್ ಇನ್ನನೇ ಆಪೊ....
- ಮಾಚು : ಎಂತಾಚಿ ಪೂವಿ ಅಂತದ್?
- ಪೂವಿ : ಎಂತೇಂದ್ ಎಣ್ಣೆಡೆಣ್ಣೆ? ಆ ಮೂಡಿ ಕುಂಞಿರ ಪಾಡ್ನ ಗೇನ ಮಾಡುವಕ ಕೆಲ ಕತ್ತುವ ನಾಕ್. ಆ ಕುಂಞಿರ ಪಾಡ್ನೇಂಗಿ ಗೇನ ಮಾಡಂಡ ಪೆತ್ತವು?
- ಮಾಚು : ಇದ್ ನಲ್ಲ ಕಷ್ಟಾಚೆಲ್ಲ ಪೂವಿ? ವಿಷ್ಯ ಎಂತೇಂದ್ ಪೂರ್ತಿ ಎಣ್ಣೆತೆ ಬೋರೀ ಸೈಡ್ ರೀಲ್ನ ಮಾತ್ರ ಕಾಟ್ಟಿಂಡುಳ್ಳಿಯ?
- ಪೂವಿ : ಇರ್ ಮಾಚು ನೀನ್. ವಿಷ್ಯ ಅರ್ಂಬಕ ನೀನೂ ನಾಡನ್ನಕೆ ಆಯಿರುವಿಯ.
- ಮಾಚು : ಆಚೆಪ್ಪ ಎಣ್ಣೆಕ ಒಮ್ಮ ಪೂರ್ತಿ!
- ಪೂವಿ : ವಡಿಯ ಮನೆಲಿಲ್ಲತ ನೇರತ್ ದಾರೋ ಒರ್ ತಾಮನೆಕಾರ ಮನೆಕ್ ಬಂದಿತ್. ಪೋಣ್ಣ ಒಬ್ಬಳೇ ಮನೆಲಿಂಜಿಯೆ. ಅವ ಬಂದವಂಗ್ ಕೂಳ್ ನೀರ್ ಕೊಡ್ತಿತ್. ಒಳಿವಕೂ ಎಣ್ಣೆತ್. ವಡಿಯ ಪುರ್ಕ ಕುಡ್ಚಂಡ್ ಬಂದಿತ್ ಮನೆಕ್ ಬಕ್ಕಣ ಈ ಬೆಂದುನ ಕಂಡಿತ್.... ಪೋಣ್ಣಕ್ ತಾರಾಮಾರ ಪೊಜ್ಜಿತ್....
- ಮಾಚು : ಓರ್ ಮಿನಿಟ್ - ಓರ್ ಮಿನಿಟ್.... ಮನೆಕ್ ಬಂದ ಬೆಂದು ದಾಡ ಕಡೆಕಾರ ಎಣ್ಣೆವ ಪ್ರಶ್ನೆ ಬೋಂಡ. ದಾರೇ ಆಯಿತಿಕ್ಕಡ್ ಬೆಂದು ತಕ್ಕಾರ

ಸಕಮೆ ಪೂಮ್ಯಾಲೆ

ಮಾಡಂಡಿಯದ್ ಮನೆಕಾರಡ ಕರ್ತವ್ಯ. ಅಂತಲ್ಲಿ ವಡಿಯ, ಬೆಂದುರ ಎದಿಕ್ಕೆ ಪೂಣ್ಣ್ ಕ್ ಎಂತಾಂಗ್ ಪೂಜ್ಜತ್?

ಪೂವಿ : ಅದ್‌ನೇ ಎಣ್ಣುವಕ್ ಪೂರಟ್ಟಿಯೆ ನಾನ್. ಅಕ್ಕಣೆ ಎಡೆಲ್ ಬಾಯಿ ಇಟ್ಟಿಯ. ವಡಿಯಂಗ್ ತಾಂಡ ಕೂಟ್‌ಕಾರಂಗಡ ಕೂಡೆ ಕೂಡೆ ಕೂಡ್ಯಂಡ್ ಪೀಂದಿತ್ ಬಪ್ಪದ್ ಮಾಮೂಲಿ ಅಭ್ಯಾಸ. ಅಂದೂ ಅನ್ನನೇ ಆಯಿತ್. ಕೂಟ್‌ಕ್ ಪೂಣ್ಣರ ಮೀದ ಸಂಶಯ. ತಾನ್ ಇಲ್ಲತ ನೇರತ್ ಬಂದ ಬೆಂದುನ ದಾರ್‌ಂದ್ ಕೂಡಿ ಕೇಟ್‌ಲೆ. ಏಕಿದಂ ನೀನ್ ಚೂಳೆ-ಅಂತವ- ಇಂತವಾಂದ್ ಬಜ್ಜಂಡ್ ಪೂಯ್ಯುವಕ್ ಸುರು ಮಾಡಿತ್....

ಮಾಚು : ಅಂವೊ ತಡ್‌ತ್‌ಲಿಯಾ ಇವನ?

ಪೂವಿ : ಅಂವೊ ಎಣ್ಣುವಚ್ಚಕ್ ಎಣ್ಣಿತ್. ಇಂವೊ ಕೇಟಕಲ್ಲ? ಬಂದ ಬಟ್ಟೆಕ್ ಸುಂಕ ಇಲ್ಲೆಂದ್ ಬೆಂದು ಜಾಗ ಖಾಲಿ ಮಾಡಿತ್. ಪೂಣ್ಣ್ ಕ್ ಅಡ್ಡಿ ಕ್‌ಟ್ಟುಮಿಂಜದ್ ಅದೇ ಸುರು ಅಲ್ಲ. ಅಂದಿತೂ ಅವಕ್ ಪೆರ್ತ್ ಅವಮಾನ ಆಯಿತ್. ತಾಂಡ ತಾಮನೆಕಾರಡೆದಿಕ್ಕೆ ನನ್ನ ಅವಮಾನ ಮಾಡ್‌ಚಿಲ್ಲ್ಯಾಂದ್!... ದಾಕೇಂಗಿ ಬೇಜಾರ ಆಪುಲಿಯ ಮಾಚು?

ಮಾಚು : ಆಕತಿಪ್ಪಾ? ಅಲ್ಲಿಂತೆಂತಾಚಿ?

ಪೂವಿ : ಅವ ಇದೇ ನೆವನತ್ ತಾಮನೆ ಕೂಡ್ಯಂಡತ್. ಪತ್ತನೇ ಕ್ಲಾಸ್ ಓದಿಯಂಡುಳ್ಳ ಮೋವಳೂ ಅಪ್ಪನೂ ದಂಡಾಳೇ ಮನೆಲ್. ವಡಿಯ ಕೂಟಿಯ ಪೋಪಕ್ ಬಕ್ಕತೆ ತಾನ್ ಪೋಪುಲೇಂದ್ ಇವ. ಚೊಡಿಲ್ ಮನೆಬುಟ್ಟ್ ಪೋನವ ಅವಳಾಯಿತೇ ಬಕ್ಕಡ್‌ಂದ್ ಇಂವೊ. ದಂಡಾಳೂ ಆ ಮೂಡಿಕುಂಞಿರ ಸ್ಥಾನತ್ ನಿಂದಿತ್ ಗೇನ ಮಾಡ್‌ಲೆ.....

ಮಾಚು : ಸುಮಾರೆಲ್ಲ ಸಂಸಾರತ್ ಇನ್ನನೇ ಆಪೊ ಪೂವಿ. ನಾನೆಂತಾಂಗ್ ತಾರಡ್‌ಂದ್ ವಡಿಯ, ನಾನೆಂತಾಂಗ್ ತಾರಡ್‌ಂದ್ ಪೂಣ್ಣ್. ಅಪ್ಪ ಅಮ್ಮ ಜಗಳದಲ್ಲಿ ಕೂಸು ಬಡವಾಯ್ತುಂದ್ ಮಕ್ಕಡ ಪಾಡ್. ಆಡಿ ಕೂಡಿ ಇಡೀ ಸಂಸಾರೇ ಸರ್ವನಾಶ ಆಪದ್ ಇನ್ನನೇ... ಅಲ್ಲಿಂಜ ಎಂತಾಚೋ?

ಪೂವಿ : ಆಪದೆಂತ ಮಾಚು, ಮನೆಲ್ ವಯಸ್‌ಕ್ ಬಂದ ಮೂಡಿಕುಂಞಿ. ಅದ್‌ನೇ ಮೂಂದ್ ನೇರ ಪಾರಕಾತಂಡಿಪ್ಪಕಾಪ? ಕೂಟ್‌ಕ್ ಪೋಲಿ ಪೂರ್ಕಿಯಕೂ ಇಂತದೇ ಚಾನ್ಸ್ ಬೋಂಡಿಯೆ. ಅಪ್ಪಂಗ್ ಕುಡಿಪ್ಪಚ್ಚಕ್ ಕುಡ್‌ಪ್‌ಚಿಡು ವೆಂಜಿ, ಒನ್ನಾಂದ್ ಇರ್ಲ್ ಮೂಡಿನ ಪಾಳಾಕುವಕ್ ಪೇಚಾಡಿತ್....

ಮಾಚು : ಅಯ್ಯೋದೇವಳೇ! ಅಲ್ಲಿಂಜ?

- ಪೂವಿ : ಮೂಡಿ ಕೂತ್‌ಟ್ಟಂಡ್ ನೆರೆಮನೆಕಾರಡಲ್ಲಿ ಪೋಯಿತ್ ಒಳ್‌ಂಜಿತ್. ಇಚ್ಚೆಕೆಲ್ಲ ಕೇತರೆ ನಡೆಂದ ಪಿಂಞ ವಿಷಯ ಅರ್‌ಂಜಿತ್ ಅವೊ ಮನೆಕ್ ಬಂದಿತ್. ಅಪ್ಪನೂ ಇದಾನ ಪಿಂಞ ಕಳ್ಳ, ಬುಟ್ಟಿತ್‌ಂದ್ ವರ್ತಮಾನ.
- ಮಾಚು : ಕಡೇಕೂ ಬುದ್ಧಿ ಬಾತಲ್ಲ? ವಡಿಯನೇ ಆಡ್ ಪೊಣ್ಣೇ ಆಡ್, ತಾಂದಂಡ್ ಇಪ್ಪದ್ ಇಣಾಣಕೇಡ್ ಒಂದೂ ಅಲ್ಲ. ಮಕ್ಕಡ ಭವಿಷ್ಯ ನಂದಾಕುವದ್ ಮುಖ್ಯ ಪೂವಿ.
- ಪೂವಿ : ಅಲ್ಲ ಮಾಚು, ನಾಕ್ ಆಶ್ಚರ್ಯ ಆಯೆ ಎಂತ ಗೊತ್ತುಂಡಾ? ಈ ವಿಷ್ಯ ಕೇಟಿತೂ ನೀನ್ ದಾಡ ಪರೊ ನಿಂದೆಲ್ಲೆಲ್ಲೆಂದ್!
- ಮಾಚು : ಇದ್ ಎಲ್ಲಾಕೂ ಪಾಠ ಪೂವಿ. ಅರ್‌ಂಜಂಡಕ ದಾರೂ ಕೊರವು ಪರಿಯುಲೆ. ಅದಿಕ್ಕಡ್ ಉಂಬಕ್‌ಡ್. ಕೆಲ ಪಯಿಪ.

ಮನೆದುಂಬ ಮದ್ ಪುಟ್ಕೊರಾ ಗಮನ...

- ಮಾಚು : ಗಮ| ಗಮ|ಗಮ| ಗಮನ... ಮನೆಲೆಲ್ಲ ದುಂಬೆನ ಗಮನ|....
- ಪೂವಿ : ಆರೆ, ನೀನ್ ಎಚ್ಚಕ್ ನೇರಕ್ ಬಂದಿಯೆ ಮಾಚು?.... ಪಾಟೆಲ್ಲ ಸುರು ಆಯಿತ್? ಎನ್ನ ಸಮಾಚಾರ?
- ಮಾಚು : ಸಮಾಚಾರ ಸುಮಾರೆಲ್ಲ ಉಂಡ್... ಗೌಜಿಯು ಎಂತೆಲ್ಲ ಉಂಡ್? (ಪಾಟ್)
- ಪೂವಿ : (ತೆಳಿ) ನೀಕೆಂತಾಚಿ ಮಾಚು? ಎಲ್ಲ ಪಾಟ್‌ಲೇ ಆಯೆಂಡುಂಡ್!
- ಮಾಚು : ಪಾಟ್‌ನ ಕೇಪಕ್ ಚಾಯಿ! ಕೇಪಕ ಓಡುವ ನಾಯಿ!
- ಪೂವಿ : (ತೆಳಿ) ಎಲ್ಲಿಯೇಂಗಿ ಕಳ್ಳ, ಗಿಳ್ಳ, ಕುಡ್‌ಚಿತ್ ಬಂದಿತುಳ್ಳಿಯಾ ಎನ್ನೆಲ್ಲ?
- ಮಾಚು : ಕಳ್ಳ, ನಾ ಕುಡಿಪುಲೆ ಪೂವಿ! ಕುಡ್‌ಚಕ ಬರೆ ಕುತ್ತ ಬೂವಿ!
- ಪೂವಿ : (ಪಾಟ್‌ಲೇ ಉತ್ತರ) ಇಂದೆಡೀ ಪಾಟ್‌ರ ಸೂರೆ! ತೆಳಿಕ್ಕುಲ ಕೇಟಕ ಊರೇ!
- ಮಾಚು : ಅಂದಕ ಕೇಳ್ ನೀ ಪೂವಿ| ಪಾಟ್‌ನ ಬುಟ್ಟಿತ್ ಏವಿ!.. ನೀನೂ ಪರೋಲೆ ಪೂವಿ. ನಾನ್ ಎಂತದೋ ಗೇನ ಮಾಡಿತಿಂಜ ನಿನ್ನ ! (ತೆಳಿ)

ಪಳೆಮೆ ಪೊಮ್ಮಾಲೆ

- ಪೂವಿ : (ತೆಳಿ) ಎಲ್ಲಾ ನೀಡದೇ ಟ್ರೈನಿಂಗ್ ಮಾಡು. ಕೇರೆ ತಿಂಬ ಊರ್ಕ್ ಪೋಚಿಂಗಿ ಕೇರೆರ ನಡುಕಂಡ ತಿಂಗೊಂಡುವೊಲೊ. ಪೊಯ್ತಕ್ ಪೊಯ್ತಲೇ ಜವಾಬ್ ಕೊಡ್ಕೊಂಡುವೊಲೊ. ಪಾಟ್ಕ್ ಪಾಟ್ಲೇ ಉತ್ತರ ಕೊಡ್ಕೊಂಡುವೊಲೊ!
- ಮಾಚು : ಓಹೊಹೋ, ಪೆರ್ತ್ ಆಳತ್ ಉಂಡ್ ಕಾಂಬಲ್ಲ ನೀಡ ಬೇರ್? (ತೆಳಿ)
- ಪೂವಿ : ಎಣ್ಣೆಲ್ಲ ಮಾಡು, ಎಲ್ಲ ನೀಡದೇ ಕೆಟ್ಟ ಬುದ್ಧಿ ಬಂದ್ರತ್ ನಾಕೂ!
- ಮಾಚು : ಕೆಟ್ಟ ಬುದ್ಧಿ? ನಾನೆಂತ ಕೆಟ್ಟ ಬುದ್ಧಿ ಕಾಟ್ನ ನೀಕ್?
- ಪೂವಿ : ಮಕ್ಕಕಳಿಕೂ ಒರ್ ವಯಸ್‌ಂದ್ ಉಂಡ್ ಮಾಡು. ಚೆರಿಯ ಮಕ್ಕಡನ್ನೆಕೆ ಪಾಟ್ ಪಾಡುವಕ್ ಕೂಡಿಟ್ಟಿಯೆ? ನಲ್ಲ ಬುದ್ಧಿಯ ಇದ್?
- ಮಾಚು : ಅಚ್ಚಕೆಯ ವಿಷ್ಯ? ನಾನೆಂತದೋ ಬಲ್ಯ ಕೇಸ್‌ಂದ್ ಗೇನ ಮಾಡಿಟ್ಟಿ!... ಓರ್ ವಿಷ್ಯ ಗೊತ್ತುಂಡ ನೀಕ್? ಮನುಷ್ಯಂಡ ತಡಿಕ್ ಮಾತ್ರ ದಿನತಾಂಜ ದಿನಕ್ ವಯಸಾಯಂಡ್ ಪೋಪ. ಮನಸ್‌ಕಲ್ಲ ಗೊತ್ತಾಚಾ?
- ಪೂವಿ : ಅನ್ನನೆಣ್ಣೆಕೆ?
- ಮಾಚು : ಇಕ್ಕ ನೋಟ್ ಚೆರಿಯ ಮಕ್ಕಡ ಕಳಿನೇ ನೋಟ್. ಎಂತೆಂತೆಲ್ಲ ಕಳಿನ ಕಳಿಪ್ಪ ನೋಟ್ ಮಕ್ಕ. ಅದಾನೆಲ್ಲ ನೋಟುವಕ ನಂಗಳೂ ಅಯಿಂಗಡನ್ನಕೇ ಕಳಿಕ್ಕನಾಂದ್ ಆಪುಲಿಯಾ ನಂಕ್?
- ಪೂವಿ : ಆಪ. ಆಚಿಂಗಿ ನಂಗೆ ನಂಗೆಡ ವಯಸ್‌ನ ಗೇನ ಮಾಡಂಡ ಮಾಡು? ಮಕ್ಕಡನ್ನೆಕೆ ಕಳಚಕ ನೋಟ್‌ನವು ಎಂತ ಎಣ್ಣೆಲೆ?
- ಮಾಚು : ಅಕ್ಕು. ನೋಟ್‌ನವು ತೆಳಿಪ್ಪ. ಆಚಿಂಗಿ ನಂಗೆಡ ಮನಸ್‌ರೊಳ್‌ಲೂ ಅಂತದೋರ್ ಆಸೆ ಉಳ್ಳದ್ ಮಾತ್ರ ಪೊಟ್ಟಿಲ್ಲಾಂದ್ ನೀನ್ ಒತ್ತಂಡಿಯಾಂದಾಚಿ. ಅಕ್ಕುವಾ?
- ಪೂವಿ : ಅಕ್ಕೊಂದ್ ಕಾಂಬ ಮಾಡು. ಆಚಿಂಗಿ ಜನಕ್ ಬೊತ್ತತೆ ಆಪಾ? ಮಕ್ಕಡನ್ನೆಕೆ ಪೆರಿಯವೊ ಕಳಚಕ ನೋಟ್‌ನವು ಕೈ ಕೊಟ್ಟಿತ್ ತೆಳಿಪ್ಪುಲಿಯಾ?
- ಮಾಚು : ಅನ್ನನೆ ತೆಳಚಿಯಿಂಗಡ ಮನಸ್‌ಲೂ ಇಂತದೇ ಗೇನ ಇಪ್ಪ. ಮಕ್ಕಡ ಕೂಡ ಮಕ್ಕ ಆಯಿತ್ ಕಳಿಪ್ಪಾಂಡ ಚೋದೇ ಬೋರೆ!
- ಪೂವಿ : ಮಕ್ಕ ಕಳಿ ಒಕ್ಕ ಕೇಡಾಚಿಂಂದ್ ತಕ್ಕ ಉಂಡಲ್ಲ ಮಾಡು? ಓರಮ ಇನ್ನತ ಕಳಿಂಜಾಯಿತೇ ಎಂತೆಂತೋ ಆಯಿಪೋಪೊ..... ಒರ್ ವಿಷ್ಯ ಕೇಳ್, ಸಂಜು ಕ್ಕಣ್ಣ ಅಂದ್, ತಮ್ಮಿ ಅಣ್ಣಯ್ಯ ಮನೆಕ್ ಬಂತಿಪ್ಪಕ, ಕಳ್ಳ ಕುಡ್‌ಚಂಡ್ ಅಂವೊ ಕಳಿಪ್ಪನ್ನೆಕೆ ಆಕ್ ಮಾಡ್‌ಚಾ?... ತಮ್ಮಿ ಅಣ್ಣಯ್ಯಂಗ್ ಚೊಡಿ ಬಂದ್ರುವದಾ.... ಮಕ್ಕಡ ಮಕ್ಕ ಕಳೀಂದೂ ಗೇನ ಮಾಡ್‌ಲೆ ಅಂವೊ,

ಗೊತ್ತುಂಡಾ?

ಮಾಚು : (ತೆಳಿ) ಕಳ್ಳ, ಕುಡಿಕಾರಳ ಅನ್ನನೆ ಹಂಗ್ ಚಿಟ್ಟಕಲೇ ಅವು ಅನ್ನತ ಪಾಳ್ ಚಟತನ ಬುಡುವೊ!

ಪೂವಿ : ಓರಬ್ಬ ಮಕ್ಕಾಂದೂ ಗೇನ ಮಾಡುಲೆಲ್ಲ ಮಾಚು? ಅಯಿಂಗಳ ಚೆನ್ನ ಹಂಗ್ ಚಿಟ್ಟಕಲೂ ಉರಿ ಕಾರುವಕ್ ಸುರು ಮಾಡಿರುವ.

ಮಾಚು : ಪೂವಿ, ಇಂಇಶೋರ್ ವಿಷ್ಯ ಗೊತ್ತುಂಡಾ?

ಪೂವಿ : ನೀನ್ ಎಣ್ಣಕ ಗೊತ್ತಾಕು. ಇಲ್ಲೆಂಗಿ ಎನ್ನನೆ ಗೊತ್ತಾಂಡು ನಾಕ್?

ಮಾಚು : ಪಾಪ! ನಂಗಡ ಪೂವಿಕ್ ಬಾಯಿಕ್ ಬೆರ ಇಟ್ಟಕಲೂ ಕಡಿಪ್ಪಕ್ ಗೊತ್ತೇ ಇಲ್ಲೆ.

ಪೂವಿ : ಮಾಚೂ, ನೀನ್ ತಕ್ಕ್ ಪರಂದಿತ್ ಪರಂದಿತಾಪಕ ಓರಮ ಜಗಳಕೇ ಮೊಳಿ ಇಡುವೊ!

ಮಾಚು : ನಾನೆಕ್ ಜಗಳ ಮಾಡ್ನ ಪೂವಿ? ಸುರೂಲ್ ಜಗಳಕ್ ಮೊಳಿ ಇಡುವೊ ನೀನ್!

ಪೂವಿ : ಮಾಚು, ವಾದ ಮಾಡುವೆಂಗಡ ಕೂಡೆ ವಾದ ಮಾಡಿತ್ ಗೆಲ್ಲೊಲು. ಆಚೆಂಗಿ ತರ್ಕ ಮಾಡುವೆಂಗಡ ಕೂಡೆ ವಾದ ಮಾಡುವಕ್ ಕಯ್ಯಲೆ. ಈ ತಕ್ಕ್ನೋ ನೀನೇ ಎಣ್ಣವಂವೊ ಗೊತ್ತಿರಡ್!

ಮಾಚು : ಪೂವಿ, (ತೆಳಿ) ನಂಗ ಸೀರಿಯಸ್ ಆಯಿತ್ ಜಗಳಾಡತೆ ಎಚ್ಚಕ್ ದಿನಾಚಿ?

ಪೂವಿ : (ತೆಳಿ) ಕೇಲೆಂಡರ್ ನೋಟೊಂಡು. ಸೆರಿಕ್ ಗೇನ ಇಲ್ಲೆ!.... ಎಕ್ಕಪ್ಪ?

ಮಾಚು : (ತೆಳಿ) ಎಂತ? ಕ್ಯಾಲೆಂಡರ್‌ಲ್ ಎಳ್ಳಿತ್ ಬೆಚ್ಚಿತುಳ್ಳಿಯಾ?

ಪೂವಿ : ಎಳ್ಳಿತ್ ಬೆಚ್ಚಿದಲ್ಲ ಮಾಚು. ಅಂದ್ ಎಕ್ಕಲೋ ಗ್ರಾಣ ಕೈಂಜತ್ ನೋಟಾ! ಅಂದೇ ಜಗಳಾಡಿಯೆ ನಂಗ!

ಮಾಚು : (ತೆಳಿ) ರಾಶಿ ಫಲತ್ ಎಳ್ಳಿತಿಂಜತಲ್ಲ ಪೂವಿ. ಅನ್ನನೇ ಆಚಿ ಅಚ್ಚಿಕೇ!

ಪೂವಿ : ಎಂತೇಂದ್ ಎಳ್ಳಿತಿಂಜತ್? ರಾಶಿ ಫಲತ್?

ಮಾಚು : ನಾಡ ರಾಶಿಲ್ ಸ್ತ್ರೀ ಮೂಲಕ ಕಲಹಾಂದ್ ಇಂಜತ್. ನೀಡ ರಾಶಿಲ್ ಗಂಡನಿಂದ ಗಂಡಾಂತರಾಂದ್ ಇಂಜತ್! (ತೆಳಿ)

ಪೂವಿ : ಮುಂಡತೇಂಗಿ ಎಣ್ಣತೆ ಮಾಚು ನೀನ್! ಎಂತೋ ಎಣ್ಣವಕ್‌ಂದ್ ಪೊರಟ್ಟಿತಿಂಜಿಯಲ್ಲ ಅದ್ ಎಂತೇಂದ್ ಎಣ್ಣ.

ಮಾಚು : ಅದೋರ್ ಬಲ್ಲಾದೆ ಸಂಗತಿ. ಇದನೇ ಐಂಬತ್ತದಂಡ್ ಎಪಿಸೋಡ್‌ರ ಓರ್ ಧಾರಾವಾಹಿ ಮಾಡಿರೊಲು. ಅಚ್ಚಕ್ ರಸ ಉಂಡ್ ಕತೆ! (ತೆಳಿ)

ಪಳನು ಪ್ರೊಮ್ಯಾಲೆ

- ಪೂವಿ : ಎಣ್ಣೆರ್ ಅಂದಕ ಫಿಲಂ ನೋಟ್‌ನನ್ನೆ ಆಯಿರಡ್....
- ಮಾಚು : ಸ್ತ್ರೀನ್ ಪ್ಲೇ, ಡಯಲಾಗ್ ಕೂಟಿತ್ ಎಣ್ಣೆದಾ? ಅಲ್ಲ ಕತೆರ ರೂಪತ್ ಎಣ್ಣೆಕ ಮದಿಯ?
- ಪೂವಿ : ಅದೆನ್ನೆ ಇಪ್ಪ ಸ್ತ್ರೀನ್ ಪ್ಲೇ, ಡಯಲಾಗ್‌ಲ್ ಎಣ್ಣುವದ್?
- ಮಾಚು : ಫಸ್ಟ್‌ಕ್ ಒರ್ ಪಾಟ್, ಡ್ಯಾನ್ಸ್ ಇಪ್ಪ. ಅಲ್ಲಿಂಜ ಧಾರಾವಾಹಿರ ಪೆದ. ಅದಾನದೂ ಅದತ್ ದಾರ್ ದಾರ್ ಆಕ್ಟ್ ಮಾಡಿತ್? ಕತೆ ದಾರ್ ಎಳ್‌ದಿಯೆ? ಮ್ಯೂಸಿಕ್ ದಾರ್? ಎಡಿಟಿಂಗ್ , ಮಿಕ್ಸಿಂಗ್, ಕ್ಯಾಮರಾ ವರ್ಕ್ ಇನ್ನತಾಂಡ ವಿವರ ಇಪ್ಪ....
- ಪೂವಿ : ಅಯ್ಯೋಯ್ಯೋ! ಅದ್‌ನೆಲ್ಲ ಎನ್ನೆ ಕಾಟುವಕಾಪ ನೀಕ್? ಕತೆನ ಮಾತ್ರ ನಾಕ್ ಅರ್ಥ ಆಪನ್ನೆ ಎಣ್ಣೆ ಮಾಚು ನೀನೊಮ್ಮೆ!
- ಮಾಚು : ಕತೆರ ತಲೆ ಎಳ್ತ್ ಕಕ್ಕುಡಿಕಾರಂಡ ಕಿತಾಪತಿ
- ಪೂವಿ : ತಲೆ ಎಳ್ತ್ ಎಣ್ಣೆಕ? ಹಣೆಬರಾಂದಾ ಮಾಚು?
- ಮಾಚು : ನಾಡ ಮಂಡೆರ ಓಡ್‌ಂದ್! ಪೋಯಿ ಪೋಯಿತ್ ನೀಕ್ ಎಣ್ಣುವಕ್ ಬಂದಲ್ಲ ನಾನ್? 'ತಲೆ ಎಳ್ತ್‌ಂದ್' ಎಣ್ಣೆಕ ಕೂಡವ ತಕ್ಕ್‌ಲ್ ಕತೆರ ಹೆಡ್ಡಿಂಗ್‌ಂದ್ ಎಣ್ಣುವಲ್ಲ ಅದ್. ಏದ್ ಗ್ರಾಜಾರ ಬಂದ್ರತ್ ನೋಟ್! ಕೂಡವ ತಕ್ಕ್‌ನ ಕೂಡಿ ಇಂಗ್ಲೀಷ್‌ಲ್ ಟೀಚ್ ಮಾಡುವ ಕಾಲ ಬಂದೋಚಿ!
- ಪೂವಿ : ಆಂಗಂತಾಂಗ್ ಮಾಚು, ಚೊಡ್‌ಂಜವಿಯ? ಕೂಲಾಯಿತ್ ಎಣ್ಣೆ. ಸಮಾಧಾನ ಉಂಡೆಂಗಿ ಏದ್ ಕಾಯಿಲೆಯೂ ಬಪ್ಪಲೆಲೊ.... ಬೈದಿ ಬೈ ಎಕ್ಕಲೋ ನೀನೇ ಎಣ್ಣೆನ ತಕ್ಕ್. ನನ್ನ ದೂರತೆ!
- ಮಾಚು : ಇಕ್ಕಿಕ್ಕ ನೀನ್ ಪೆರ್ತ್ ಶಾರ್ಪ್ ಆಯಿತುಳ್ಳಿಯ ಪೂವಿ. ಪ್ರತಿಯೊಂದಾನೋ ನಾಡ ಮಂಡೆಕೇ ಕೆಟ್ಟಿರುವಿಯ. ನೀನ್ ಮಾತ್ರ ಸುಬಗತಿರನ್ನೆ ಇಂಜಿರುವಿಯ!
- ಪೂವಿ : ಅದ್‌ನೋ ನೀನೇ ಎಣ್ಣೆತಂದಿತುಳ್ಳಿಯ ಮಾಚು. ಏದೊಂದಾನೋ ಒಂದಾಂಗ್ ದಂಡ್‌ರಟ್ಟಿ ಕೂಟಿತ್ ಬಯ್ಯಕ್ ಕೂಡ್ತೊಂಡು. ಇಲ್ಲೆಂಗಿ ಸಾಲ ಬಾಕಿ ಆಯಿಪೋಪ! (ತೆಳಿ)
- ಮಾಚು : ಅಹಾ! ತೆಳಿ ನೋಟವಡ! ಪಲ್ ಕಂಡೋಚಿ ನುಪ್ಪತ್ತದಂಡ್!
- ಪೂವಿ : ಎಣ್ಣೆ ಮಾಚು ನೀನ್ ಕತೆ! ಕಾಲ ಕೈಕತೆ.
- ಮಾಚು : ಕೇಳ್ ಪೂವಿ ಕತೆನ ನೀನ್! ಕುಡಿತಾರಂಡ ಕಿತಾಪತಿ| ಕುಡ್‌ಚಿತಂದ್ ಪೋಚಿ ತಾನ್ ಓರ್ ಬೆಂದು ಮನೆಕ್.....
- ಪೂವಿ : ಎಂತ ಮಾಚು, ಇದ್? ಕತೆಂದೆಣ್ಣೆಕ ಪಾಟ್ ಪಾಡಿಯಂಡುಳ್ಳಿಯ?

- ಮಾಚು : ಇದ್ ಎಂತ ಗೊತ್ತುಂಡಾ? ಧಾರಾವಾಹಿ ಸುರು ಆಪಕ ಪಾಟ್ ಬಪ್ಪಲ್ಲ? ಅನ್ನನೇಂದ್ ಗೇನ ಮಾಡ್.
- ಪೂವಿ : ಪಾಟ್ ರೂಪತ್ ಬೋಂಡ ಮಾಚು. ನೀನ್ ಮಾಮೂಲ್ ಎಣ್ಣುವನ್ನಕೆ ಎಣ್ಣ್. ಅದೇ ಮದಿ.
- ಮಾಚು : (ತೆಳಿ) ಪಂಡ್ ಒರ್ ರಾಜ ಇಂಜತೊಲೊ....
- ಪೂವಿ : ಕಕ್ಕುಡಿಕಾರಂಡ ಕತೇಂದ್ ಇಕ್ಕ ರಾಜಂಡ ಕತೆ ಸುರು ಮಾಡಿಟ್ಟಿಯ? ಎಂತ ಇದ್ ನೀಡ ಕತೆ/
- ಮಾಚು : ಕತೇಂದೆಣ್ಣಕ ಎಂತೇಂದ್ ಗೇನ ಮಾಡಿತುಳ್ಳಿಯ ಪೂವಮ್ಮ. ಕತೆರೊಳ್ಲಾ ಒರ್ ಉಪಕತೆ ಇಪ್ಪ. ಉಪಕತೆರೊಳ್ಲಾ ಒರ್ ಚೆರ್ ಕತೆ ಇಪ್ಪ. ಕತೆ ಮುಟ್ಟೆ ಇಟ್ಟಿಂಡ್ ಪೋಪ ಗೊತ್ತಾಚಾ?
- ಪೂವಿ : ಕತೆ ಮುಟ್ಟೆ ಇಡುವೊ? (ತೆಳಿ) ಇಕ್ಕಲೇ ಕೇಟಿಯೆ ನಾನ್! ಅದೆನ್ನನೆ ಕತೆ ಮುಟ್ಟೆ ಇಡುವೊ?
- ಮಾಚು : ಇಕ್ಕ ನೋಟ್. ರಾಧಂಗ್ ದಾರೋ S.M.S. ಮಾಡ್ಚೊಲೊ. SMSಮಾಡ್ನವು ದಾರಂದ್ ಗೊತ್ತಿಲ್ಲತಾಂಗ್ ಅವ ಆ ನಂಬರ್ಕ್ ಮಿಸ್ ಕಾಲ್ ಮಾಡ್ಚೊಲೊ. ಅಕ್ಕಣೆ SMS ಮಾಡ್ನ ಅಸಾಮಿ ನಾಕ್ ನೀಡ ಫ್ರೆಂಡ್‌ಶಿಫ್ ಬೋಂಡೊಂದ್ ವರಾತ ಮಾಡುವಕ್ ಕೂಡ್ಚಿ....
- ಪೂವಿ : ಇರ್ ಇರ್.. ಏದ್ ರಾಧ? ಎಂತ ಕತೇಂದ್ ಮೂಲ ಎಣ್ಣತೆ ಏಕಿದಂ ಎಣ್ಣುವಕ್ ಕೂಡಿಟಕ?
- ಮಾಚು : ನೀಡ ಫ್ರೆಂಡ್ ಜಾಜಿ ಉಂಡಲ್ಲ? ಅವಡ ತಂಗಿ ರಾಧ.
- ಪೂವಿ : ಆ ವಿಷ್ಯ ನೀಕೆನ್ನನೆ ಗೊತ್ತ್ ಮಾಚು? ನೀನ್ ರಾಧನ ನೋಟತೇ ಇಲ್ಲೆಲ್ಲ?
- ಮಾಚು : ನೋಟತೆ ಇಂಜಕ ಎನ್ನಾಚಿ? ಕೇಟಿತ್ ಗೊತ್ತಿಪ್ಪುಲಿಯ ಪೂವಿ? ಈ ಭೂಲೋಕ ಚಿಂಡ್‌ರನ್ನಕೆ ಉರ್‌ಟ್ ಉಂಡ್ ಗೊತ್ತಾಚಾ? ಎಲ್ಲಾರ್‌ನೊ ಎಲ್ಲಾಕೂ ಎಕ್ಕಲೊ ಒಮ್ಮ ಕಾಂಬನ್ನತ ಯೋಗ ಇಲ್ಲತಿಪ್ಪುಲೆ!
- ಪೂವಿ : ಸೆರಿಯಪ್ಪ. ಆಚೆಂಗಿ ನೀಕ್ ಗೊತ್ತಾನ ಸಂದರ್ಭ ಏದಂದ್ ಎಣ್ಣೊಲುವಲ್ಲ?
- ಮಾಚು : ಕತೆ ಕೇಪವು ಕ್ರಾಸ್ ಕೊಶ್ಚನ್ ಕೇಪಕಾಗ. ಕತೆನ ಮಾತ್ರ ಕೇಕೊಂಡು. ರಾಮಾಯಣ ಕೇಪಿಯ. ರಾಮನ ನೀನ್ ನೋಟಿತುಳ್ಳಿಯ? ಮಾಬಾರತ ಕೇಪಿಯ. ಅರ್ಜುನನ ನೋಟಿತುಳ್ಳಿಯ? ಅನ್ನನೇ ಇದೊಂದ್ ಬೆಚ್ಚಂಡಕ ಆಚಿ!
- ಪೂವಿ : "ಸೆರಿ. ನೀಕೂ ಒರ್ ಕಾಲ ಇಪ್ಪ. ಅಕ್ಕ ನಾನೂ ನೋಟಿವಿ" ಕತೆ ಎಣ್ಣ್ ಇಕ್ಕ.

ಸಕಮೆ ಪ್ರೊಮ್ಯಾಲೆ

ಮಾಚು : ಎಂತ ಎಣ್ಯ?

ಪೂವಿ : ಒಂದೂ ಇಲ್ಲೆ ಮಾಚು. ರಾಧಂಡ ವಿಷ್ಯ ಎಣ್ಯಂಡಿಂಜಿಯ. ಅದ್‌ನೊಮ್ಮೆ ತೆ ಎಣ್ಣೆ.

ಮಾಚು : ಒಮ್ಮೆ ನಲ್ಲ ತಕ್ಕಲ್ ಎಣ್ಣೆಚಿ. ದಂಡ್ ಕುರಿ ನಲ್ಲ ತಕ್ಕಲ್ ಎಣ್ಣೆಚಿಲೊ. ಅಂದಿತೂ ಅಸಾಮಿ ಅಕ್ಕಾಕ ಮಿಸ್‌ಕಾಲ್ ಮಾಡುವೊ. SMS ಅಯಿಪೊ ಮಾಡ್ಯಂಡೇ ಇಂಜಿತ್. ಇವಂಡ ಹಾವಳಿ ತಡ್‌ಪಕಯ್ಯತೆ ರಾಧ ನೋಟಿಪ್ಪಾ ನಾಕ್ ಮಂಗಲ ಆಯಿತ್ ನೀನ್ ಇನ್ನನೆ ನಾಡ ಬಯ್ಯ ಬೂವದ್ ಚಾಯಿಲ್ಲೆ. ನೀಡ ಪಾಡ್‌ಕ್ ನೀನ್ ಇಂಜಿರ್‌ಂದ್ ಎಚ್ಚರಿಕೆನೊ ಕೊಡ್ತತ್....

ಪೂವಿ : ಓರಂದ್ ಅಣಾಳಡ ಬುದ್ಧಿಯೇ ಇನ್ನನೇ ಮಾಚು. ನಾಯಿಯಡನ್ನೆಕೆ ಪೊಂಗಡ ಬಯ್ಯ ಬೂವೊ. ಆಖೀರಿಕ್ ನಲ್ಲೋಣೆ ಕೆಟ್ಟಿಯವದೂ ಉಂಡ್.

ಮಾಚು : ನಾನ್ ಎಣ್ಣುವೊ ಎಂತ ಗೊತ್ತುಂಡಾ? ಆಣೇ ಆಡ್, ಪೊಣ್ಣೇ ಆಡ್. ಪರಸ್ಪರ ಸಿನೇತಂಗಡನ್ನೆಕೆ ಇಪ್ಪದ್ ತಪ್ಪು ಅಲ್ಲ. ಆಚೆಂಗಿ ಆ ಸಿನೇತಿಕೆನ ಏದೇ ಕಾರಣಕ್ಕೂ ದುರಪಯೋಗ ಪಡ್‌ತಿಯವಕಾಗ.

ಪೂವಿ : ಅಲ್ಲಿಂಜ ಎಂತಾಚೊಲೊ ಮಾಚು?

ಮಾಚು : ಅಲ್ಲಿಂಜ ಎಂತಾಪೊ? ನಾಯಿರ ಬಾಲ್‌ಕ್ ಕೊಳ್‌ಪೆ ಇಟ್ಟಕ ಚೆನ್ನ ನೇರ ಬಾಲ್ ನೇರೇ ಇಕ್ಕು. ಕೊಳ್‌ಪೆ ಎಡ್‌ತದೂ ಯಥಾ ಪ್ರಕಾರ ಡೊಂಕ್! ಅನ್ನನೇ ಆಚೊಲೊ.

ಪೂವಿ : ದಾರಪ್ಪ ಅನ್ನತ ದರಿದ್ರತಂವೊ? ನಾಡ ಮೇಲೆಲ್ಲ ಉರಿ ಉರಿ ಆಪ. ಇನ್ನತ್ಯೆಂಗಡ ವಿಷ್ಯ ಕೇಪಕ ಬೆಪ್ಪಕಾಗ ಅಂತ್ಯೆಂಗಳ.

ಮಾಚು : ರಾಧಂಗೂ ಅನ್ನನೇ ಆಯಿತೇ ಅವ ತಾಂಡ ವಡಿಯಂಗ್ ಎಣ್ಣೆಯೆ. ಅಂವೊ ಮಿಂಗಳಲೇ ಮಿಲ್ವಿಕಾರ. ಒನ್ನಂದ್ ಇವಡ ಕೂಡೆ ಒರ್ SMS ಬುಟ್ಟಿತ್. ಅಸಾಮಿಕ್ ತಾಂಡ ಗಾಳಕ್ ಮೀನ್ ಕೆಣ್‌ಂಜಂಡಿತ್‌ಂದ್ ಕುಶಿ ಆಯಿರ್‌ತ್. ನೀನ್ ಇಚ್ಚಕ್ ನೇರಕ್ ಮಡಿಕೇರಿರ ರಾಜಾ ಸೀಟ್‌ರಲ್ಲಿಕ್ ಬಾಂದ್ SMS ಓದಿತ್ ಕುಶಿ ಎಣ್ಣುವದೇ ಬೋಂಡ. ಅರೆ ಲೀಟರ್ ಸೆಂಟ್ ಬಳ್‌ಂದಂಡ್ ನೇರೇ ರಾಜಾ ಸೀಟ್‌ರಲ್ಲಿಕ್ ಪೋಯಿತ್.

ಪೂವಿ : ಅಯಿಂಕ್ ಒಬ್ಬನೊಬ್ಬನ ಮಿಂಗಳಲೇ ನೋಟಿತ್ ಗೊತ್ತಿಂಜತಾ ಮಾಚು?

ಮಾಚು : ಈ ಅಸಾಮಿಕ್ ರಾಧನ ನೋಟಿತ್ ಗೊತ್ತುಂಡ್. ಆಚೆಂಗಿ ರಾಧಂಗ್ ಗೊತ್ತಿಲ್ಲೆ. ಸರಿ ಇಕ್ಕ ಕಂಡ್ ಪುಡಿಪೊ ಎನ್ನನೆ? ಪುನಾದ್ಯ ಅಪ್ಪರಿಪ್ಪರ ಮೊಬೈಲ್‌ಲೇ ಪರ್‌ಂದಂಡಿತ್. ಚೋಂದ ಶರ್ತ್ ಇಟ್ಟಿತ್ ಮಕ್ಕಡ ರೈಲ್

ಕಂಬಿರ ಪಕ್ಕಲ್ ನಿಂದಿತುಳ್ಳಾಂದ್ ಅಸಾಮಿ ಎಣ್ಣೆಚಾ? ರಾಧಂಡ ವಡಿಯ ನೇರೇ ಬಂದದೂ ತಾಂಡ ಚಪ್ಪಲ್ಲ್ ಈ ಅಸಾಮಿರ ಮೂಡ್ ಮರ್ಯ ಬೆಚ್ಚಿಕೊಡ್ತದೂ.....

ಪೂವಿ : (ಚಪ್ಪಾಳೆ ಸದ್ದು) ಅನ್ನನೆ ಮಾಡೊಂಡು ಅಂತ್ಯಂಗಕ್ ! ಪರ್ದೇಸಿಯ! ಎಣ್ಣುವವು ಕೇಪವು ದಾರೂ ಇಲ್ಲೆಂದಾಯಿತಿಂಜಕ ಎಂತದೂ ಮಾಡಿರು! ನಾಯಿಯ!

ಮಾಚು : (ತಳಿ) ಇಕ್ಕ ನೀನ್ ಮಾತ್ರ? ಚೆರಿಯ ಮಕ್ಕಡನ್ನಕೆ ಕೈಕೊಟ್ಟಿಯಂಡ್ ಆಡಿಟ್ಟಿಯ? ನೀಡ ಮಾತ್ರ ಮಕ್ಕ ಕಳಿ ಅಲ್ಲ ಕಾಂಬ?

ಪೂವಿ : ಪಾಪಿಯಕ್ ಶಿಕ್ಷೆ ಆಚೀಂದಾಪಕ ದಾಕೂ ಕುಶಿ ಅಪುಲಿಯ ಮಾಚು? ಅಲ್ಲಿಂಜ?

ಮಾಚು : ಅಕ್ಕಣೆ ರಾಜಾಸೀಟ್ಲ್ ಕೂಡಿತಿಂಜವು ಸುಮಾರಾಳ್ ಓಡಿಯಂಡ್ ಬಂದಿತ್. ವಿಷ್ಯ ಅರ್ಂಜಂಡ್ ಅಯಿಂಗಳೂ ಅಸಾಮಿರ ಬೆನ್ನಕ್ ಕೈಕೂಟಿತ್!... ಅಕ್ಕಣೆ ಅಲ್ಲಿಯೇ ಇಂಜ ಪೊಲೀಸುವ ಬಂತ್. ಆಡಿ ಕೂಡಿ ಅಸಾಮಿಕ್ ಜೈಲ್ನೋ ನೋಟಿತ್ ಬಪ್ಪ ಭಾಗ್ಯ!

ಪೂವಿ : ಅನ್ನನೇ ಮಾಡೊಂಡು ಅಂತ್ಯಂಗಕ್!

ಮಾಚು : ಕತೆ ಮುಟ್ಟೆ ಇಡುವಾಂದ್ ಎಣ್ಣಲ್ಲ? ಈ ವಿಷ್ಯ ಅರ್ಂಜಿತಾಪಕ ರಾಧಂಗ್ ಆಗತ ಒರ್ ಪೊಣ್ಣಾಳ್ ಇದ್ಂಂಗ್ ಕಾಲ್ ಬಾಲ್ ಕೂಟಿತ್ ಕತೆ ನೆಜ್ಜಿತ್. ರಾಧಂಗ್ ಈ ಅಸಾಮಿನ ಮಿಂಞಲೇ ಗೊತ್ತಿಂಜತೊಲೊ. ರಾಧಂಗೂ ಇವಂಗೂ ಮಂಗಲಕ್ ಮುಪ್ಪಡೇ ಅಫೇರಾಲೊ. ಈ ವಿಷಯತ್ನ ಒಳ್ಂಜೊಳ್ ಅರ್ಂಜಂಡ ರಾಧಂಡ ವಡಿಯ ನೇರ ಪಾರಕಾತಿತ್ ಇಯಂಗಡ ಗುಟ್ಟೊನ ರಟ್ಟೊ ಮಾಡ್ಚೊಲೊಂದ್ " ಮತ್ಯವ ಕತೆ ನೆಜ್ಜಿತ್ ಪ್ರಚಾರ ಮಾಡಿತ್. ಇದ್ಂಂಗ್ ಕತೆ ಮುಟ್ಟೆ ಇಡುವೊಂದ್ ಎಣ್ಣುವೊ. ಗೊತ್ತಾಚಾ?

ಪೂವಿ : ಉಫ್! ಗೇನ ಮಾಡುವಕ ಪೊಡಿ ಆಪ ಮಾಚು. ದಾಡ ದಾಡ ಸಂಸಾರ ಎನ್ನನೆಲ್ಲ ಪಾಳಾಪಕ್ ಸಾಧ್ಯ ಉಂಡಲ್ಲಾ? ಎಂತದೂ ಮಾಡತೇ ಅಪಪ್ರಚಾರಕ್ ಕೆಣ್ಂಜೊಪ.

ಮಾಚು : ಆಚೆಂಗಿ ಇಲ್ಲಿಯೂ ರಾಧಂಡ ವಡಿಯ ಪೊಣ್ಣಾರ ಸಾಯಕ್ ನಿಂದಿತ್. ರಾಧಂಗೂ ಮತ್ಯವಂಗೂ ಅಫೇರ್ ಇಂಜಿತ್ಂದ್ ಪೂವ್ ಮಾಡ್. ಇಲ್ಲೆಂಗಿ ನಿನ್ನ ಕೋರ್ಟ್ ಬಲಿಪ್ಪಂಜಿ ಮಾನನಪ್ಪ ಕೇಸ್ಲ್ ಕೆಣ್ಂಪಂಚಿಡುವೀಂದ್ ರಭಸ ಇಡುವದೂ ಅಪಪ್ರಚಾರ ಮಾಡ್ನವಡ ಬಾಯಿ ಮುಚ್ಚಿಚಿಟ್ಟಿತ್.

ಷಕಮೆ ಪ್ರೊಮ್ಯಾಲ್

ಅವಕ್ ಅವಡ ವಡಿಯಂದ ಕೈಂಜ ತಲ್ಲೂ ಕ್ಕೆಟ್ಟಿತ್. ಇಕ್ಕ ಎಣ್ಣೆ ಪೂವಿ. ಏದೇ ವಿಷಯತ್ ಆಣಾಳಳನೇ ದೂರುವಕೂ ಕಯ್ಯಲೆ. ಪೊಣ್ಣಾಳಳನೇ ದೂರುವಕೂ ಕಯ್ಯಲೆ. ಅಕ್ಕುವಾ?

ಪೂವಿ : ನಾನೆಲ್ಲಿ ಅನ್ನನೆ ಎಣ್ಣೆ ಮಾಚು? ಆಣೇ ಪೊಣ್ಣೇ ಆಡ್. ತಾಂಡ ತಾಂಡ ಮರ್ಯಾದಿನ ಕಾತಂಡಕ ದಾರೂ ದೂರುಲೆ. ಅದಿರಡ್ ಇಕ್ಕ ಎಣ್ಣೆ ರಾಧಂಡ ವಿಷ್ಯ ನೀಕ್ ದಾರ್ ಎಣ್ಣೆಯೇಂದ್.

ಮಾಚು : ಕತೆರ ಬಗೆಲ್ ನಿಗೇ ಇಲ್ಲೆ ಇವಕ್. ದಾರ್ ಎಣ್ಣೆದಾಯಿತಿಕ್ಕು ಇವಂಗ್ಂದ್ ಒರೇ ಆತುರ. ನೀಕ್ ಅಗೆ ಎಡ್ಪಕ ಎನ್ನನೆಲ್ಲ ಪೊಣ್ಣಾಳಡ ಬಾಯಿಂಜ ಮಾಹಿತಿ ಕ್ಕೆಟ್ಟುವೋ, ಅನ್ನನೇ ನಾಕೂ ಬೋರೆ ಬೋರೆ ಮೂಲತ್ಂಜ ವರದಿ ಕ್ಕೆಟ್ಟುವ. ಮೊನಿಯಾಂದ್ ಪ್ರಕಾಶ ಕಾಂಬಕ್ ಕ್ಕೆಟ್ಟೆಚಿ. ಪ್ರಕಾಶನೂ ರಾಧಂಡ ವಡಿಯನೂ ಮಿಲ್ವಿಲ್ ಒಕ್ಕಚೇ ಇಂಜವೊಲೊ.

ಪೂವಿ : ಓಹೋ, ಅನ್ನನೆಯಾ ಕತೆ? ಇಕ್ಕ ಡೌಟ್ ಕ್ಲಿಯರ್ ಆಚಿ ನಾಡ. ಇಕ್ಕ ಇಂಞೋರ್ ಕತೆ ಸುರ್ ಮಾಡ್ ಅಂದಕ...

ಮಾಚು : ಇಂಞೋರ್ ಕತೇಂದೆಣ್ಣೆಕ? ಏಳ್ ಸಮುದ್ರತ್ ರಾಬರಿಲ್ ರಾಕ್ಷಸ ಇಂಜತ್. ಅವಂಡ ಜೀವ ಇಂಜಿಯೆ ಒರ್ ಗಣಿ ಪಕ್ಷಿರ ಎದರೊಳ್ಲ್. ಆ ಗಣಿ ಪಕ್ಷಿನ ಕೊಂದಕ ರಾಕ್ಷಸಂಡ ಜೀವ ಪೋಪಲ್ಲ ಆ ಕತೆಯಾ?

ಪೂವಿ : ಥತ್ ಅದಲ್ಲ ಮಾಚು! ಪಂಡ್ ಒರ್ ರಾಜ ಇಂಜತೊಲ್ಲೊಂದ್ ಎಣ್ಣೆವಕ್ ಸುರು ಮಾಡಿಂಜಿಯ ಅಕ್ಕಲೆ. ಅದ್ನ ಎಣ್ಣೆಂಡಿಕ್ಕಣೆ ಕತೆರೊಳ್ಲ್ ಉಪಕತ್ಂದ್ ಏಲೆ ಏಲೆಯೋ ಪೋಪಂಜಿ ಬಾವಲಿ ಬಟ್ಟೆ ಬಲಂಬೇರಿಕಾರೇಂದ್ ಎತ್ತಟಿಯೋ ಪೋಯಿಟ್ಟಿಯ. ಕತೆರೊಳ್ಲ್ ಉಪಕತೆ, ಚೆರ್ಕತೇಂದ್ ಪೋನಂವೋ ಇಂಞೂ ಮಾಮೂಲ್ ಟ್ರ್ಯಾಕ್ಕ್ ಬಂದಿತೇ ಇಲ್ಲೆ! (ತೆಳಿ)

ಮಾಚು : (ಪಾಟ್ ರೂಪತ್) ಕತೆಕತೆ ಕತೆಕತೆ ಏದದ್ ಕತೆಯೋ| ಕತೆ ಕತೆ ಕತೆ ಕತೆ ಕತ್ತೆರ ಕತೆಯೋ!.... ಇರಡ್, ಪಾಟ್ಲ್ ಎಣ್ಣೆಟಕ ಪಾತಾಳ ಕೂಡುವೀಂದ್ ಬೊತ್ತಚಿಟ್ಟಿತುಳ್ಳಿಯ. ನೀನ್ ಪಾತಾಳ ಕೂಡುವದೂ ಬೋಂಡ. ನಾನ್ ಕತ್ತೆರಾಗತ್ ಪಾಟ್ ಪಾಡುವದೂ ಬೋಂಡ. ಪಂಡ್ ಒರ್ ಊರ್ಲ್ ಓರ್ ರಾಜ ಇಂಜತ್. ಕೊಶ್ಚನಂ ನಂಬರ್ ವನ್, ಆ ಊರ್ಲ್ ರಾಜ ಮಾತ್ರ ಇಂಜಿಯದಾ? ಕೊಶ್ಚನ್ ನಂಬರ್ ಟೂ. ಅಂವೊ ದೇಶತ್ನ ಆಳುವದ್ ಬುಟ್ಟಿತ್ ಆ ಊರ್ಕ್ ಎಂತಾಂಗ್ ಕೂಡಿಯಂಡತ್?

- ಪೂವಿ : ಧೂ. ಪೋ ಮಾಚು ನೀನ್. ಉಪ್ಪದ್ ಬುಟ್ಟಿತ್ ಇಂಡ್ ಪುಡ್‌ಚತ್‌ಂದ್ ಎಣ್ಣಾಟ, ನೀನ್ ಬಟ್ಟೆ ತಪ್ಪಿತ್ ಪೋಯಂಡುಳ್ಳಿಯ.
- ಮಾಚು : ಸೆರಿ, ಬಟ್ಟೆ ತಪ್ಪನ ಮಾಚು- ಬಟ್ಟೆ ಕೂಟ್‌ನ ಪೂವೀಂದ್ ಒರ್ ಟಿ.ವಿ. ಸೀರಿಯಲ್ ಮಾಡನ. ಇಕ್ಕ ಕತೆ ಕೇಳ್. ಆ ರಾಜ ಚೆನ್ನ ಪಿರಾಂದ. ಅಂವೊ ಎಣ್ಣದೇ ಅವಂಗ್. ಇಂಞಿ ಮಿಂಞಕ್ ನಂಗಡ ಊರ್‌ಲುಳ್ಳವು ದಾರ್ ತಕ್ಕ ಪರಿವಕಾಗ. ಪ್ರತಿಯೊಂದಾನೋ ಪಾಟ್‌ಲೇ ಕೇಕೊಂಡು-ಎಣ್ಣೊಂಡೂಂದ್ ಆಚ್ಚೆ ಮಾಡುವ. ಅಲ್ಲಿಂಜ ಸುರುವಾಚಿ ಊರ್‌ಕಾರಕ್ ಗ್ರಹಚಾರ.
- ಪೂವಿ : ಉಯೀ ರಾಮಾ! ಪ್ರತಿಯೊಂದಾನೋ ಪಾಟ್‌ಲೇ ಎಣ್ಣುವದಾ? (ತೆಳಿ) ದಾರೋ ಪುಚ್ಚ ರಾಜನೇ ಆಯಿತಿಕ್ಕೊಂಡು. ಮನೆಕ್ ಬೆಂದ್‌ಕ ಬಾತೆಂಗಿ ಚಾಯಿಲ್ ಉಳ್ಳೀರಾಂದ್ ರಾಗತ್ ಕೇಕೊಂಡು ಅಂದಕ! (ತೆಳಿ)
- ಮಾಚು : ಚಾಯಿಲುಂಡ್. ನಿಂಗಡಲ್ಲಿ ಚಾಯಿಲುಂಡಾಂದ್ ರಾಗತ್ ಇವು ಕೇಕೊಂಡು. ಇನ್ನನೆ ಆಯಿತಾಪಕ ಊರ್‌ಕಾರಕೆಲ್ಲ ಪುಚ್ಚಿ ಪುಡ್‌ಚನ್ನಕೆ ಆಯಿರ್‌ತೊಲೊ. ಇಚ್ಚತಾಪಕ ಒರ್ ದಿನ ಒರ್ ಬುದ್ದಿವಂತ ಊರ್‌ಕ್ ಬಂದಿತ್. ಕುಡಿಪ್ಪಕಾಯಿತ್ ಕಯ್ಯೊಲೊ ಅವಂಗ್. ನೀರ್ ಕೇಟಕ ರಾಗತ್ ಕೇಟಕ ಮಾತ್ರ ನೀರ್ ತಪ್ಪೊಂದ್ ಊರ್‌ಕಾರ ರಾಗ ಸುರು ಮಾಡ್‌ಚಿಲೊ. ಇಯಂಗಕ್ ಎನ್ನೆನೇಂಗಿ ಬುದ್ದಿ ಪಡ್‌ಪಾಚಿಡಂಡೂಂದ್ ಇವನೂ ರಾಗತೇ ನೀರ್ ಕೇಟಿತ್ ಕುಡ್‌ಚಿತ್....
- ಪೂವಿ : ಕರ್ಮ ಕರ್ಮ! ಕತೆ ಚಾಯುಂಡ್. ಅಲ್ಲಿಂಜ?
- ಮಾಚು : ಇಂವೊ ಮರ್‌ಚಿ ತಾಂಡ ಊರ್‌ಕ್ ಪೋನಂವೊ ಈ ಊರ್‌ಕಾರಕ್ ಬುದ್ದಿ ಪಡ್‌ಪಾಚಿಡೊಂಡೂಂದ್ ಗೇನ ಮಾಡ್ಯಂಡ್ ಒರ್ ಕೆಣಿ ಕೊಯತಿತ್. ಒರ್ ಪೊಟ್ಟಿರೊಳ್‌ಕ್ ನರಿ ಕಡ್‌ಂದಿಯಳ ಕೂಟ್ಟಂಡ್ ಈ ಊರ್‌ಕ್ ಬಂದಿತ್...
- ಪೂವಿ : ಅದೆಂತಾಂಗ್ ಮಾಚು?
- ಮಾಚು : ಅರ್ಚೆಂಟ್ ನೋಟವಡ. ಎಣ್ಣುವಾನ ಕೇಳ್. ಇದ್ ಪಾಟ್ ಪಾಡುವ ಪೊಟ್ಟಿ ಊರ್‌ಕಾರೆಲ್ಲ ಓರ್ ಬಲ್ಯ ಕಟ್ಟಡತ್‌ರೊಳಿಯ ಕೂಡೊಳಿ. ಕಿಟಕಿ ಪಡಿನೆಲ್ಲ ಬಂದ್ ಮಾಡಿತ್, ಈ ಪಾಟ್ ಪೊಟ್ಟಿನ ತೊರ್‌ಂದಕ ಆನಂದ ಆಪನ್ನತ ಪಾಟ್‌ನ ಕೇಕೊಲೂಂದ್ ಎಲ್ಲಾರ್‌ನೊ ಪುಸಲಾವಣೆ ಮಾಡಿರುವಂಜಿ, ಎಲ್ಲಾರ್‌ನೊ ಒಳ್‌ಲಾಕಿತ್ ಇಂವೊ ಪೊರ್ಮೆಂಜ ಚಿಲ್‌ಕ ಇಟ್ಟಂಡತ್! (ತೆಳಿ)
- ಪೂವಿ : ಒಳ್‌ಲುಳ್ಳವು ಕಡ್‌ಂದಿ ಪೊಟ್ಟಿ ತೊರ್‌ಂದಿತಿಕ್ಕು! (ತೆಳಿ)

ಸಕಮೆ ಪೊಮ್ಮಾಲೆ

ಮಾಚು : ಎಲ್ಲಕೂ ಆತುರ ನೀಡನ್ನಕೆ! ಬೆರಿಯ ಒಮ್ಮ ಪೊಟ್ಟಿ ತೊರ್ಂದಿತ್ ಪಾಟ್ ಕೇಕನಾಂದ್!

ಪೂವಿ : ಕತೆರೆಡೆಲ್ ನನ್ನ ಎಂತಾಂಗ್ ಮಾಚು ನೀನ್ ಕೂಟೊವೊ?

ಮಾಚು : ನೀಕೂ ಅಂತದೇ ಆತೂರ ಪೂವಿ. ಒರ್ ವಿಷ್ಯತ್‌ನ ನಾನ್ ಎಣ್ಣಣೇಕೂ ನೀಕ್ ಪುರುಸೊತ್ತೇ ಇಪ್ಪುಲೆ. ಅದ್‌ಂಗ್ ಎಣ್ಣಪ್ಪ.

ಪೂವಿ : ಅಕ್ಕು ಅಕ್ಕು, ನೀನ್ ಮಾತ್ರ ಪೆರ್ತ್ ನಿಸೂರ. ಎಣ್ಣ ಅಲ್ಲಿಂಜೆಂತಾಚೀಂದ್.

ಮಾಚು : ಪಾಟ್ ಪೊಟ್ಟಿನ ನಾನ್ ಮಿಂಞ ತಾನ್ ಮಿಂಞಾಂದ್ ತೊರ್ಂದತಾ.... ಕೊಡ್ತತ್.... ನರಿ ಕಡ್‌ಂದಿಯ! ಟಯ್ ಟುಯ್‌ಂದ್ ಮೂಡ್ ಮುಸುಣಿ- ಕಾಲ್ ಮೇಲ್ ಬೋಂಡ ಅಯಿಂಡ ಪಾಡ್! (ತೆಳಿ)

ಪೂವಿ : (ತೆಳಿ) ಪಾಪ! ಓರ್ ನರಿ ಕಡ್‌ಂದಿ ಕಡ್‌ಚಕಲೇ ಉರಿಕ್ ಪನಿ ಬಂದುವ. ಅಂತಲ್ಲಿ ಆ ಪಾಪ ಕಡಿಪಕ ಎನ್ನನೆ ಆಯಿತಿಕ್ಕು ಪರಿಸ್ಥಿತಿ? (ತೆಳಿ)

ಮಾಚು : ಅವು ಅಚ್ಚಕ್ ಕಷ್ಟತಿಪ್ಪಕಲೂ ನೀನ್ ತೆಳೆಚೆಂಡುಳಿಯ?

ಪೂವಿ : ಇದ್ ಕತೆ ಅಲ್ಲ ಮಾಚು? ನೇರಾಯಿತೂ ಆಯಿತುಂಡೆಂಗಿ ದಾರೇಂಗಿ ತೆಳಿಕ್ಕುವಾ?

ಮಾಚು : ಇರಡ್, ಒಳ್‌ಲ್ ಒರೇ ಸಮ ನರಿ ಕಡ್‌ಂದಿ ಕಡ್‌ಚೆಂಡುಂಡ್. ಜನಡ ಕೂತೋಡ್ ಕೂತ್. ದಮ್ಮಯ್ಯ ಒಮ್ಮ "ಪಡಿ ಎಡೀಂದ್ ಜನ ದಮ್ಮಯ್ಯ ಇಟ್ಟುಂಡುಂಡ್. ಪೊರ್ಮೆ ಅಳೆತ ಬುದ್ಧಿವಂತ ಪಡಿ ಎಡೀಂದ್ ರಾಗತ್ ಎಣ್ಣೆ. ಅಂದಕ ಮಾತ್ರ ಪಡಿ ತೊರ್‌ಪೀಂದ್" ಎಣ್ಣೆಚಿ. ರಾಜಂಗ್ ತಂಗಡ ತಪ್ಪು ಎಂತೇಂದ್ ಗೊತ್ತಾಚಿ. ಈ ಕತೆನ ನಾನ್ ಎಂತಾಂಗ್ ಎಣ್ಣ ಎಣ್ಣೆ ನೋಟನ.

ಪೂವಿ : ನಾಕ್ ಗೊತ್ತಾಚಿ ಮಾಚು. ಮುಂಡತೇಂಗಿ ಕಾನೂನ್ ಮಾಡಿಟ್ಟಕ ಪೋರ. ಆ ಕಾನೂನ್‌ಂಜ ಎದೇಂಗಿ ಪ್ರಯೋಜನ ಉಂಡಾಂದ್ ಸರ್ಕಾರ ಬೇರ್ ಚಿಡೊಂಡು. ಗ್ಯಾಸರ್ ವಿಷಯತ್ ಮಾಡ್‌ನ ಕಾನೂನ್‌ಂಜ ಇಕ್ಕ ಎಂತೆಲ್ಲ ಪಾಡ್ ಆಯುಂಡುಂಡ್ ನೋಟ್!... ಅಲ್ಲ ಮಾಚೂ, ಕಕ್ಕುಡಿಕಾರಂಡ ಕಿತಾಪತಿ ಕತೆ ಎಂತಾಚಿ?

ಮಾಚು : ಅದ್‌ನೇ ಇಕ್ಕ ಎಣ್ಣುವಕ್ ಪೊರಟ್ಟೆ ನಾನ್. ಈ ಕತೆರ ಮುಕ್ರಿಕ್ ರಾಮೂಂದ್ ಪೆದ ಬೆಕ್ಕ. ಇಂವೊ ಕುಡ್‌ಚೆಂಡ್ ಒರ್ ಮನೆಕ್ ಪೋಚಿ. ಬೈಟಾಕಣೆ ಅಲ್ಲಿಯೂ ಪೀಂದಿತ್ ಇರ್ಲ್ ತಾಂಡ ಮನೆಕ್ ಪೋಪಕ್‌ಂದ್ ಪೊರಟ್ಟತ್. ಪೊರ್ಮೆ ಜೋರ್ ಮಳೆ.

ಪೂವಿ : ದಾರ್ ಮಾಚು ಈ ಮನುಷ್ಯ? ಚಾಮುಣಿ ಬಾವನಾ?

- ಮಾಚು : ಆಯಿತಿಕ್ಕು ದಾಕ್ ಗೊತ್ತ? ನೀನ್ ಮಿಂಞಾ ಕತೆ ಕೇಳ್! ಟಾರ್ಚ್ ಇಟ್ಟಂಡ್ ಪೋಯಂಡಿಪ್ಪಕ ಜಾರಿತ್ ಬೂವಂಜಿ ಕೊಡೆ, ಟಾರ್ಚ್ ದಂಡೂ ತೋಡ್‌ಕ್ ಬುದ್ದತ್. ಈ ಅಸಾಮಿ ಚೆನ್ನಂಗಾಲ್ ಬಚಾವಾಚಿ. ಅಲ್ಲಿಂಜ ಅಂದಾಜಿಲ್ ತಾಂಡ ಮನೆನ ತೇಡಿಯಂಡ್ ನಡಂದತ್. ಮನೆ ಕೊಟ್ಟಲೆ. ಆಖೀರಿಕ್ ದಾಡದೋ ಒರ್ ಕೊಟ್ಟೆಲ್ ಪೋಯಿತ್ ಕೂಡ್ಯಂಡತ್. ಕೊಟ್ಟರ ಅಟ್ಟತ್ ಪಿಲ್ ಪೊದತ್ತಂಡ್ ಬುದ್ದಂಡತ್. (ತೆಳಿ)
- ಪೂವಿ : ದಾಡ ಅತ್ತ ಕೊಟ್ಟ ಮಾಚು ? (ತೆಳಿ)
- ಮಾಚು : ದಾಡದೋ ದಾಕ್ ಗೊತ್ತ? ಪೊಲಾಕ ನೇರ್ತೆ ಆ ಮನೆರ ಅವ್ವಯ್ಯ ಪಯ್ಯುನ ಕರ್‌ಪಕ್ ಕೊಟ್ಟಕ್ ಬಪ್ಪದೂ- ಕೊಟ್ಟರ ಅಟ್ಟತ್ ಬುದ್ದಂಡಿಂಜ ಈ ಅಸಾಮಿ ದಫಾರಂದ್ ಅಡಿಕ್ ಬೂವದೂ ಸೆರಿ ಆಚಿ! (ತೆಳಿ)
- ಪೂವಿ : ಆಯ್ಯೋಯ್ಯೋ ಬೊತ್ತಿ ಪೋಯಿತಿಕ್ಕು ಅವ್ವಯ್ಯ ! (ತೆಳಿ)
- ಮಾಚು : ಅತ್ತ ಎಲ್ಲ ಒಮ್ಮಕೇ ಅರಂದತ್. ಅವ್ವಯ್ಯ ಕೂಳಿ ಕೂಳಿ ಕೂಳೀಂದ್ ಪೋಯಿತ್ ಕಡಿಕ್ಕೆ ಪತ್ತನದ್ ಆರ್ ತಿಂಗ ಬುದ್ದಂಡಲ್ಲಿಯೇ ! (ತೆಳಿ)
- ಪೂವಿ : ಪಾಪ! ಇದ್ ಕುಕ್ಕಡಿ ಕೂಳಿ!.... ನೇರಾಯಿತೂ ಗೇನ ಮಾಡ್‌ನಕ ಕುಡಿಕಾರಂಗ ಎಂತೆಂತೆಲ್ಲ ಕಿತಾಪತಿ ಮಾಡಿರುವಲ್ಲ? ಅಯಿಂಗ ಪಾಳಾಪದ್ ಮಾತ್ರ ಅಲ್ಲ. ಅಯಿಂಗಳ ನಂಬಿಯಂಡ್ ಉಳ್ಳಯಿಂಗಳನೋ ಪಾಳ್ ಮಾಡಿರುವ.
- ಮಾಚು : ಆಂಗಾಯಿತೇ ಪೂವಿ, ನಾನ್ ಇಂಞಾ ಮಿಂಞಾಕ್ ಕುಡಿಪ್ಪಕಾಗಾಂದ್ ತೀರ್ಮನ ಮಾಡಿಯೆ. ಆಚೆಂಗಿ ಕುಡಿಕ್ಕತೆಯೂ ಅನ್ನನೆಲ್ಲ ಕಳಿಪ್ಪಕ್ ಸಾಧ್ಯ ಉಂಡಾಂದ್ ನೋಟ್ಟುಂಡುಳ್ಳ! (ತೆಳಿ)
- ಪೂವಿ : ಅಲ್ಲೆಂಗೂ ನೀಡ ಕಳಿ ಚೆನ್ನ ಅನ್ನತದೇ! ನೀನ್ ಮನೆಲ್ ನಾಡ ಕೂಡೆ ಕಳಿಪ್ಪಾನ ದಾರೇಂಗಿ ನೋಟನಕ ನೇರಾಯಿತೂ ಇಂವೊ ಕುಡ್‌ಚಿತ್‌ಂದೇ ಎಣ್ಣು!.... ಅನ್ನತ ಕಳಿ ನೀಡ! (ತೆಳಿ).... ಗಮಗಮ | ಗಮಗಮ| ಗಮನಾಂದ್| ಆಡಿ ಕಳಿಪ್ಪಿಂಜಿಯಲ್ಲ ಅಕ್ಕಲೆ ! (ತೆಳಿ)
- ಮಾಚು : ಇಕ್ಕೆನ್ನ ನಾನೇ ಮದ್ದ್‌ಪುಟ್ ಎಡ್ತಂಡ್ ತಿಂಗಡಾ ?ನೀನೇ ಇಡುವಿಯಾ?
- ಪೂವಿ : ಬಾ ಮಾಚು ನೀನೋಮ್ಮ. ಜಂಬ ಕಳಿಕ್ಕತೆ. ಪಾಪ! ಇವನೇ ಎಕ್ಕೊಲು ಇಟ್ಟಂಡ್ ಉಂಡಂವೊ! ದಾರೇಂಗಿ ಕೇಟಕ "ಪೊಣ್ಣ್ ಇವಂಗ್ ಊಟ ಇಡುವದೇ ಇಲ್ಲೆಂದ್ "ಆಂಡು!... ಏಳ್ ಕೈ ಕತ್ತಿಯಂಡ್ ಬಾ ಮಿಂಞಾ.
- ಮಾಚು : ಕೈ ಕತ್ತಿಯಂಡ್ ಬಪ್ಪಿ ಪೂವಿ! ಮದ್ದ್ ಪುಟ್ ತಿಂಗನಾ..... (ರಾಗತ್)

ಕರ್ತ ಕೂಳಿ....

- ಮಾಚು : ಅವ್ವಯ್ಯ... ಅವ್ವಯ್ಯ.... ಸುಮಿ... ರಂಜು.... ಅರೆ ದಾರೂ ಇಲ್ಲೆ
ಕಾಂಬಲ್ಲ.... ಪೂವೀ.... ಪೂವಿ.....
- ಪೂವಿ : ಓ.... ನೀನಾ? ನಾನ್ ದಾರೋ ಕಂಬಳಿ ವ್ಯಾಪಾರಕಾರ ಕಾಕುವೊ ಕಾಂಬಾಂದ್
ಗೆನ ಮಾಡಿಯೆ....
- ಮಾಚು : ನೀಕ್ ಅನ್ನನೆ ಆಕು... ಅಲ್ಲ ಪೂವಿ ಅಚ್ಚಕ್ ಕಾಕ್‌ನಕಲೂ ಕೇಪಾಲಿಯಾ
ನೀಕ್? ಅವ್ವಯ್ಯ, ಮಕ್ಕ ಎಲ್ಲ ಏಲೆಪೋಚಿ?
- ಪೂವಿ : ನಾಕ್ ನಿನ್ನಾಂತೆಂಜ ಸುರುವಾನ ಕೆಮಿನೊಂಬಲ ಕಮ್ಮಿಯಾಯಿತೇ ಇಲ್ಲೆ
ಗೊತ್ತುಂಡಾ... ಓರ್ ಕೆಮಿ ಅಡ್‌ತೋನನ್ನಕೆ ಆಯಿತ್..... ಸರಿ ಕೇಪದೇ
ಇಲ್ಲೆ... ನೀಡ ಸ್ವರೇ ಗೊತ್ತಾಯಿಲೆ.
- ಮಾಚು : ಬಾ ಅಂದಕ ಡಾಕ್ಟರ ಪಕ್ಕ ಪೋಯಿತ್ ಬಕ್ಕನ.
- ಪೂವಿ : ಡಾಕ್ಟರ ಪಕ್ಕ ಪೋಪದೊಂದೂ ಬೋಂಡ. ಆ ಡಾಕ್ಟ್ ಓರ್ ಪುಚ್ಚ.
- ಮಾಚು : ನೀಕೆಂತ ಮಾಡ್‌ಚಿ ಪೂವಿ ಅಂವೊ?
- ಪೂವಿ : ಅಪ್ಪರತ ಮನೆ ರಾಜು ಎಡ್‌ತ ಕೆಮಿ ನೊಂಬಲಾಂದ್ ಪೋನಾಂಗ್
ಬಲೆತೆಕೆಮಿನ ಆಪರೇಷನ್ ಮಾಡಿತ್. ದಂಡ್ ಕೆಮಿಯಾ ಕೇಕತನ್ನಕೆ
ಮಾಡಿಟ್ಟಿಲ್ಲಿಯೂ ಅಂವೊ?
- ಮಾಚು : ಅಂದಕೆಂತ ಮಾಡುವೊ ಇಕ್ಕ? ವಡಿಯಕಾಕ್‌ನಕ ಕಂಬಳಿ ವ್ಯಾಪಾರ ಕಾರಾಂದ್
ಪಡಿ ತೊರ್‌ಂದ್‌ಲೆಂಗಿ ನಾನೆನ್ನ ಮಾಡ್‌ಡ್? ಅವ್ವಯ್ಯ ಮಕ್ಕ ಎಲ್ಲ ಎಲ್ಲಿಯಾ
ಪೂವಿ?
- ಪೂವಿ : ನೀಕೆಕ್ಕೊಲೂ ತಮಾಸಿಯೆ! ಇದಾ ಟಾರ್ಚ್ ಕೆಮಿರೊಳ್ ಕೊಮ್ಮೆ ಇಟ್ಟಿತ್
ನೋಟ್.... ಮಾಯಿಯೂ ಮಕ್ಕಳೂ ಕರ್‌ಮಂಜಿ ಪಣ್ಣ್ ಬೋಟೆಕ್
ಪೋಯಿತಪ್ಪ.... ಇಂಞೂ ಬಂತಲೆ.
- ಮಾಚು : ತಾ ಇಲ್ಲಿ ಟಾರ್ಚ್.... ಎಲ್ಲಿ ಈ ಬರಿಕ್ ಬಗ್ಗೆ ನೋಟನ ?
- ಪೂವಿ : ಎಂತೆಂಗಿ ಕಾಂಬಾ? ಕೆಮಿರೊಳ್‌ಲಾ?
- ಮಾಚು : (ತಳಿ) ಎಂತೆಂಗಿ ಕಾಂಬಾಂದ್?! ಇಂಞೆಲ್ಲಿ ಕೆಮಿ ಕೇಪೋ ಇವಕ್?
- ಪೂವಿ : ಅಲ್ಲಾ ನೀಕೆಂತಾಯಿರಂತೆಂದ್ ? ತಳಿಪ್ಪಿಯಲ್ಲ ಪುಚ್ಚೆಂಡನ್ನಕೆ!
- ಮಾಚು : ಎಂತ ಪೂವಿ ಇದ್? ಇಂಞೆಲ್ಲಿ ಕೆಮಿ ಕೇಪ ?
- ಪೂವಿ : ಎಂತ? ಎಂತ ಉಂಡ್ ನಾಡ ಕೆಮಿಲ್?

- ಮಾಚು : ನೋಟಿಲ್ಲಿ ಕಾಂಬಾ?
- ಪೂವಿ : ಉಯೀ ಪರ್ತಿರ ಉಂಡೆ! (ತೆಳಿ)
- ಮಾಚು : ನಿನ್ನಾಂದ್ ವಿರಾಜಪೇಟೆಕ್ ಬಸ್‌ಲ್ ಪೋಪಕ, ಕೆಮಿಕ್ ಗಾಳಿ ಕೂಡತ್ತಿರಡ್‌ಂದ್ ಬೆಚ್ಚಂಡ ಪರ್ತಿ! ಎಂತೆಲ್ಲ ಜನ ಉಂಡ್ ಲೋಕತ್‌ಂದ್! (ತೆಳಿ)
- ಪೂವಿ : ನಾಕ್ ಗೇನ ಉಂಡೆಗನ್ನೆ? ಈ ನೂಯಿಟೆಟ್ ಪಣೆರೆಡೆಲ್ ಮರ್‌ಂದ್ ಪೋಯಿತ್ತಿಂಜತ್ತದಾ! (ತೆಳಿ)
- ಮಾಚು : ಓರಬ್ಬಡ ಓರಂದ್ ಕತೆ! ನಿನ್ನಾಂದ್ ಚಾವುಮನೆಕ್ ಒಳಿಯುವಕ್ ಪೋಯಿಂಜಲ್ಲ? ಅಲ್ಲಿಯೋರ್ ಕತೆ?
- ಪೂವಿ : ಎಂತಾಚಿ ಸಾಬು ಅಣ್ಣಯ್ಯಂಡಲ್ಲಿ?
- ಮಾಚು : ನಿನ್ನಾಂದ್ ಬೋರೆ ದಾರೂ ಬಂತೆಲೆ ಆಚಾ? ನಾನೊಬ್ಬನೇ. ಮಾಯಿಯೂ ಚಿಟ್ಟೆಮೂಡಿಯೂ ಒಳ್ತ ಕೋಂಬರೆಲ್ ಬುದ್ದಂಡತ್.
- ಪೂವಿ : ನೀನ್ ಎಲ್ಲಿ ಬುದ್ದಂಡಿಯ?
- ಮಾಚು : ನಾನೂ, ಸಾಬುಕ್‌ಣ್ಣನೂ ಮುದ್‌ಕನೂ ಆಫೀಸ್ ಕೋಂಬರೆಲ್ ಬುದ್ದಂಡತ್.
- ಪೂವಿ : ಅಂದಿತೂ?....
- ಮಾಚು : ಮಾಯಿ ಬುದ್ದವಕಲೇ ಎಣ್ಣೆಚಿ. ಎಂತೋ ಸದ್ಡ್ ಮಾಡುವರಾ ಮಾಚು ಎಕ್ಕೊಲೂಂದ್!
- ಪೂವಿ : ಅದೇ ದಾರೋ ಎಣ್ಣುವಿಂಜತ್, ಕುಂಞಪ್ಪ ಚತ್ತಲ್ಲಿಂಜ ಎಕ್ಕೊಲೂ ಮನೆಲ್ ಸದ್ದಾಪೊಲ್ಲೊಂದ್! ನೀಕ್ ಎಣ್ಣುವಕ್ ಮರ್‌ಂದೋಯೆ ನಾಕ್!... ನೀಕ್ ಪೋಡಿಯಾಯಿಲಿಯಾ?
- ಮಾಚು : ಎಣ್ಣುವಾನ ಚೆನ್ನ ಕೇಳ್ ಪೂವಿ! ಇವಡದೋರ್ ಅರ್ಚೆಂಟ್!
- ಪೂವಿ : ಎಣ್ಣಪ್ಪ ಕೇಕನ... ಅಲಿಂಜಂತಾಚಿ?
- ಮಾಚು : ಅಯಿಂಗಡಲ್ಲಿ ಕರೆಂಟ್ ಇಲ್ಲೆ ಗೊತ್ತುಂಡಲ್ಲ?....
- ಪೂವಿ : ಇಲ್ಲೆ ನೇರೇ! ಎಲ್ಲಾ ಸೀಮೆಣ್ಣೆ ಬೊಳ್‌ಚತೆಲೇ ಆಂಡು...
- ಮಾಚು : ನಂಗಡ ಕೋಂಬರೆಲ್ ಓರ್ ಸೀಮೆಣ್ಣೆ ಬೊಳ್‌ಚ ಇಂಜತ್. ಮುದ್‌ಕಂಡ ಪಕ್ಕ ಬೀಡಿಬಲಿಪ್ಪಾನಂಗುಂಡ್ ತಿತ್ತಪ್ಪೊಟ್ಟಿ ಕಾಯಂ ಇಪ್ಪಲ್ಲ.... ಅನ್ನನೇ ಇರ್ಲ್ ಒಯಿಂಬದರೆಕ್ ಬೊಳ್‌ಚ ಕೆಡ್‌ತಿತ್ ಬುದ್ದಂಡತ್....
- ಪೂವಿ : ಬೆರಿಯ ವರ್ಕ್ ಬಾತಾ? ಅಲ್ಲ ಎನ್ನೆಂಗಿ.....

ಪಳಮೆ ಪೊಮ್ಮಾಲೆ

ಮಾಚು : ನಾಕಂತೂ ಬುದ್ಧಂಡದೊಂದೇ ಗೊತ್ತ್.... ಇರ್ನಡ್ಪಾದ್ರೆಕ್ ಎಂತೂ ಸದ್ವಾಕ್ ಒಮ್ಮಕೇ ಎಚ್ಚರಾಚದ....

ಪೂವಿ : ಎಂತ ಸದ್ವಾಕ್? ನೀಕ್ ಪೋಡಿಯಾಯಿಲಿಯಾ?

ಮಾಚು : ಚೆನ್ನ ಎಣ್ಣಾನ ಕೇಳ್ ಪೂವಿ... ಆರ್ತಿಂಗಕ್ ಪುಟ್ವಾನವಡನ್ನಕೆ ಕಳಿಕತೆ....

ಪೂವಿ : ನಾನೊಂದು ಆರ್ತಿಂಗಕ್ ಪುಟ್ಟಿತ್ಲೆ.... ಪುಟ್ಟಿತುಂಡೆಂಗಿ ನೀನೇ!

ಮಾಚು : ಅಮ್ಮಾ... ದಾಕ್ಗೊತ್ತ್? ಅವ್ವಯ್ಯನ ಕೇಕೊಂಡು ವಚ್ಚಿಕೆ!.... ಎಂತೋ ಸದ್ವಾಚೀಂದೆಣ್ಣಲ್ಲ?.. ತಣಮಣ ತಣಮಣ ತಣಮಣಾಂದ್ ಒರೇ ಸಮ ಸದ್ವಾಪಿಂಜತ್ ಒಳ್ಳಲ್!

ಪೂವಿ : ಅಯ್ಯೋ ದೇವಳೇ, ನೀನ್ ಎಣ್ಣುವದ್ ಕೇಪಕಲೇ ನಾಕ್ ಮೇಲೆಲ್ಲ ಬೊರ್ತಂಡುಂಡ್! ಪೋಡಿಯಾಯಿಲಿಯಾ ನೀಕ್? (ಪೋಡಿಸ್ವರ)

ಮಾಚು : ಆ ಸದ್ವಾಕೇ ವರ್ಕ್ ಬುಟ್ಟೋಯೆ ನಾಕ್! ಒಳ್ಳಂಜೊಳ್ಳಕ್ ನಾಕೂ ಪೋಡಿಯಾಯಂಡಿಂಜತ್.! ಅಯಿಂಗಡೆದಿಕ್ಕೆ ಕಾಟುವಕಾಪಾ? ಇಂವೊ ಏದೋರ್ ಪುಕ್ಳಲಾಂದ್ ಆಯಿಪೋಪುಲಿಯಾ?

ಪೂವಿ : ಅದೇ! ಇಯಿಂಕ್ ಧೈರ್ಯಕ್ಂದ್ ಪೋಯಿತ್ ನೀನೂ ಬೊತ್ತಿಟಕ ಉಂಡಾ?ಅಲ್ಲಿಂಜೆಂತಾಚಿ? ಕೂಳಿ ಕಾಂಬಕ್ ಕ್ಕಟ್ಚಿಚಾ?

ಮಾಚು : ಕೂಳಿಯೊಲ್ಲೊ ಕೂಳಿ? ಕೂಳಿನ ಕಣ್ಣತ್ತಾರೆ ಕಂಡಿತ್ತುಂಡೆಂಗಿ ನಾನ್ ಬಯ್ಯಕ್ ಬಂದ ಕಾಲ ಇಂಜತಾ?... ನೀಡದೋರ್ ಪ್ರಶ್ನೆ!

ಪೂವಿ : ಇಂಇಂತ ಸದ್ವಾ ಅಂದಕ ಅದ್?..... ಬೆರಿಯ ಎಣ್ಣೊಮ್ಮೆ!

ಮಾಚು : ಎಣ್ಣುವಕೇ ಬುಡುಲೆಲ್ಲ ನೀನ್? ಒಳ್ಳತ ಕೋಂಬರೆಂಜ ಮಾಯಿಯೂ ಚಿಟ್ಟೆಮೂಡಿಯೂ ಒರೇ ಸಮ ಕೂತ್ಕೊಡ್ಪಿಂಜತ್!... "ಅಯ್ಯೋ ಮಾಚು... ಒಮ್ಮ ಬಾಂದ್" ಮಾಯಿಯೂ, "ಅಣ್ಣಯ್ಯ, ತಾತಾಂದ್" ಚಿಟ್ಟೆ ಮೂಡಿಯೂ ಜೋರ್ತೆ ಕಾಕುವಿಂಜತ್...

ಪೂವಿ : ಒಳ್ಳಕ್ ಪೋಯಾ ನೀನ್?

ಮಾಚು : ಇಲ್ಲಿ ಬೊಳ್ಳಚೆ ಕತ್ತ್ಚಿಡನಾಂದೆಣ್ಣಕ ನಾಡಪಕ್ಕ ತಿತ್ತ್ಪೊಟ್ಟಿ ಉಂಡೆಂಗೆನ್ನೆ? ಟಾರ್ಚು ಎಲ್ಲಿ ಬೆಚ್ಚಿಟಾಂದ್ ಕೈಕ್ ಕ್ಕಟ್ವಾನದೇ ಇಲ್ಲೆ....ಅಕ್ಕಣೇಕ್ ತಣಮಣ, ತಣಮಣ ಸದ್ವಾ ಜೋರಾಪಕ್ ಸುರುವಾಚಿ....

ಪೂವಿ : ಅಲ್ಲಿಂದಿ?...

ಮಾಚು : ಅಂತೂ ಇಂತೂ ತವಡ್ಚಿಟ್ಟಿತ್ ನೋಟಿತಾಕಣೆ ಟಾರ್ಚುಕ್ ಕ್ಕಟ್ಚಿ. ಬೊಳ್ಳಚೆ ಕತ್ತ್ಚಿಡಿ ತಾತಾ"ಂದ್ ಮುದ್ದಾಕನ ಕಾಕ್ಚೆಂಗಿ, ಅದ್ ಮನಾರ

- ಪ್ಯಾಂಟ್ ಪುಂಡೆ ಮಾಡಿಯಂಡ್ ಕಟ್ವರಡಿಲ್ ತುರ್ಂಡಿತ್ ಬೊರ್ತಂಡುಂಡ್!....ಸಾಬುಕ್ಣನೋ.... ಆಂಗ್ಂಜ ಪುಕ್ಯಲ!
- ಪೂವಿ : ಅಲ್ಲಿಂಜೆಂತಾಚಿ? ನೀನ್ ಪೊರ್ಮೆ ಪೋಯಾ?
- ಮಾಚು : ನಾನೊಬ್ಬನೇ ಪೋಪದಾ? ಕೂಳಿ ಮಾರಿ ಇಲ್ಲೆಂಡ್ ಗೊತ್ತುಂಡಾಚಾ ಇಲ್ಲೆಂದೆಣ್ಣಕ ಅಕಸ್ಮಾತ್ ಬಂದಾರ್ತೇಂಗಿಯೊ?
- ಪೂವಿ : ಇಲ್ಲತದ್ ಎಲ್ಲಿಂಜ ಬಪ್ಪ?.... ನೀಡದೋರ್ ಕತೆ!
- ಮಾಚು : ಇಲ್ಲೆಂದೆಣ್ಣವಕೂ - ಉಂಡ್ಂದೆಣ್ಣವಕೂ ಆಧಾರ ಎಂತೆಂಗಿ ಉಂಡಾ?
- ಪೂವಿ : ಅದ್ ನೇರೆ!ಓರಬ್ಬಡ ಅನುಭವ ಕೇಪಕ ಉಳ್ಳದ್ ನೇರೇಂದಾಪ. ಓರಬ್ಬ ಎಣ್ಣುವಾನ ಕೇಪಕ ಮುಂಡತೇಂಗಿ ಪೊಳ್ಳಾಸ್ಂದಾಪ..... ಓರಬ್ಬಕ್ ಮೇಲ್ಕಾಕ್ ಪೊದ್ದಿತ್ ಬಪ್ಪಲ್ಲ. ಅದೆನ್ನನೆ ಅಂದಕ?
- ಮಾಚು : ಕಯಿಂಜಕಾಲ ನೋಟ್ ಆ ವಿಮಲ ಮೂಡಿಕ್? ಆ ಕಣತ್ತರೆಕ್ ಪಾರಿತ್ ಚತ್ತವಂಡ ಕೂಳಿ ಪುಡ್ಚಂಡಿಂಜದ್?...ತಮಿಳ್ ತಕ್ಕ್ ಪರಿಯುವಯಿಂಜದ್?
- ಪೂವಿ : ಅದೆಂತೆಂಗಿ ಚಾವಡಲ್ಲಿ..... ನಿನ್ನಾದೆತಾರ ಕತೆ ಎಣ್ಣೊಮ್ಮ..... ಅಲ್ಲಿಂಜೆಂತಾಚಿ?
- ಮಾಚು : ಸಾಬುಕ್ಣಂಡ ರಟ್ಟೆನ ಪುಡ್ಚಂಡ್, ಮೆಲ್ಲೆ ಒಳ್ತ ಪಡಿನ ಎಡ್ತತ್ ದಂಡಾಳೊ.... ಪಡಿ ಎಡ್ತಿತಾಪದೂ ಮಾಯಿಯೂ ಚಿಟ್ಟೆ ಮೂಡಿಯೂ ಓಡಿಯಂಡ್ ಬಂತ ನಂಗಳ ಕೂಡಿಯಂಡತ್.....
- ಪೂವಿ : ಬೊತ್ತಿ ಪೋಯಿತಿಕ್ಕುವಲ್ಲ ಅಯಿಂಗ?
- ಮಾಚು : ಯಾವನೇಂಗಿ ಬೊತ್ತಿತಿಪ್ಪಾ? ಅನ್ನತ ಸಂದರ್ಭ ಅದ್! ಮಾಂವೊ ದುರ್ಮರಣತ್ ಚತ್ತದ್ - ಕೂಟ್ಕ್ ದುಂಬಾ ಕಷ್ಟ ಉಂಡ್ಂದ್ ನೋಟ್ಚಿಟ್ಟಲ್ಲಿ ಕಂಡ್ ಬಂದದೂ-ಎಂತಯಿಂಕೂ ಪೋಡಿಯಾಕತಿಕ್ಕುವಾ?...
- ಪೂವಿ : ನೀಡದ್ ಇದೇ ಆಚಲ್ಲ ಕತೆ? ಅದಾನದೂ ಎಂತಾಚಿಂದೆಣ್ಣಲೆಲ್ಲ ನೀನ್?
- ಮಾಚು : ಅದಾನದೂ ನಾನ್ ಕಣ್ಣಾರೆ ಕಂಡಾನ ಎಣ್ಣಕ ನೀನ್ ಎಂತ ಎಣ್ಣುವಿಯೊ? ಬಲ್ಲಾದೆ ದೃಶ್ಯ ಅದ್! (ಗಂಭೀರ ಸ್ವರ)
- ಪೂವಿ : ಆಯ್ಯೋ.... (ಪೋಡಿಸ್ವರ) ಎಂತ ಅದ್ ಅಂತದ್?
- ಮಾಚು : ಥೂ.... ಪಾಳಾನವಳೆ!..... ಬೊತ್ತಿತ್ ಎಲ್ಲಿಯೇಂಗಿ ಹಾರ್ಟ್ ಎಟ್ಯಾಕ್ ಆಯೋಕು. ಚೆನ್ನ ಸಮಾಧಾನ ಎಡ್ತ!
- ಪೂವಿ : ಪಿಂಚಾಂತಾಂಗ್ ನೀನ್ ನನ್ನ ಅನ್ನನೆಲ್ಲ ಎಣ್ಣಿತ್ ಬೊತ್ತಚಿಡುವಕ್ ನೋಟುವೊ? ನಾಕ್ ಪೋಡಿಯಾಯಂಡುಂಡಿಲ್ಲಿ!

- ಪೂವಿ : ಎಣ್ಣು ವೇಂಗಿ ಎಣ್ಣೆ. ಮುಂಡತೇಂಗಿ ಬಟ್ಟೆ ತಪ್ಪಾಚಿಡತೆ ನೀನ್?
- ಮಾಚು : ನಿನ್ನ ಎನ್ನಂಗ್ ಬಟ್ಟೆ ತಪ್ಪಾಚಿಡಡ್ ನಾನ್? ನಂಗಳೇ ಬಟ್ಟೆ ತಪ್ಪಿಪೋಚಿ ನಿನ್ನಾಂದ್ ಅಲ್ಲಿ!
- ಪೂವಿ : ಕೂಳಿ ಬಟ್ಟೆ ತಪ್ಪಾಚಿಟ್ಟತಾ ನಿಂಗಳ! (ಗಾಬರಿ ಸ್ವರ)
- ಮಾಚು : ಅಯ್ಯೋ ಬಾ.... ಅದ್ ಕೂಳಿ ಆಯಿತುಂಡೆಗೆನ್ನೆ?.... ಅದೋರ್ ಕರ್ತಪೂಂಚಿ!
- ಪೂವಿ : ಉಯಿ ಪೂಂಚಿಯಾ? ಎಂತ ಎಣ್ಣುಂಡುಳ್ಳಿಯ ನೀನ್?...
- ಮಾಚು : ಅಕ್ಕು ಪೂವಿ! ಕತೆ ಎಂತ ಗೊತ್ತುಂಡಾ? ಬೈಟೇತ್ ಪಾಲನ್ ಮಾಯಿ ಓರ್ ಚೊಂಬಲ್ ಒರೆಕೂಟಿತ್ ಅಂಗ್ ಬಟ್ಟೆ ಬಾಯಿಕೆಟ್ಟತ್ ಬೆಪ್ಪಿಂಜತೊಲ್ಲೊ.... ಆ ಬಟ್ಟೆನ ಕಣ್ಣ್ ಮಾಡಿತ್ ಚೊಂಬುರೊಳ್ಂಜ ಮಂಡೆ ಎಡ್ ಪಕಯ್ಯತೆ ಉಳ್ಳ ಉಳ್ಳಾಲೆಲ್ಲ ತಣಮಣ-ತಣಮಣಾಂದ್ ಓಡಿ ಕಳಿಪ್ಪಿಂಜತದ್!
- ಪೂವಿ : ಈಯಾ! ಇಚ್ಚಕೆಯಾ ನೀಡ ಕೂಳಿರ ಕತೆ (ತೆಳಿ) ನಾನೆಂತದೋ ಭಯಂಕರ ಸಂಗತಿ ಕಾಂಬಾಂದ್ ಇಚ್ಚಕ್ ನೇರ ಇಂಟರೆಸ್ಟ್ ಪಾರಕಾತಂಡಿಂಜ.
- ಮಾಚು : ಪೂವಿ... ಸುಮಾರೆಲ್ಲ ಸಂಗತಿ ಇಂತದೇ ಆಚಾ!..... ಕೂಳಿಮಾರಿ ಇಲ್ಲೆಂದಲ್ಲ ಇಪ್ಪಕೂ ಮದಿ - ಇಲ್ಲತಿಪ್ಪಕೂ ಮದಿ. ಆಚೆಂಗಿ ಓರಬ್ಬ ಮುಂಡತೇಂಗಿ ಇನ್ನನೆಲ್ಲ ರಸರಸಾಯಿತ್ ಕತೆಕೆಟ್ಟಿತ್ ದಾರ್ ದಾರ್ನೇಂಗಿ ಬೊತ್ ಚಿಟ್ಟುವ ಅಚ್ಚಿಕೆ!
- ಪೂವಿ : ನೀಡ ಕತೆ ಕೇಟಕ! ನೀಡ ಪೂಂಚಿರ ಕತೆಲೇ ನಾಡ ಪಾದಿ ಜೀಂವ ಪೋಪಕಾಯಿಂಜತ್ ಅಕ್ಕಲೆ! (ತೆಳಿ) ಇನ್ನನೇಂದಾಯಿತಿಂಜಕ ಕೇಪಿಂಜಿಲೆ ನಾನ್!
- ಮಾಚು : ಎಲಿಪೋಚೆಂಗಿ ನರಿ ಪೋಚೀಂದ್ ಓರಬ್ಬಡ ಕತೆ!
- ಪೂವಿ : ಅದೇ! ಕಟ್ಟಿಮೂಡಿ ಪಾಶಾಣ ಮೂರ್ತಿ ತಡಿಕ್ ಪೊದ್ದಿತ್ ತುಳ್ಳನನ್ನೆ!
- ಮಾಚು : ಏದ್ ಕಟ್ಟಿ ಮೂಡಿ?
- ಪೂವಿ : ಅದೇ ಪೋಳೆಕೆರೆ ಚುಬ್ರಂಡ ಮೋವ!
- ಮಾಚು : ಅದೆಂತ ಕತೆ ಅವಡ?
- ಪೂವಿ : ವಡಿಯ ಎಕ್ಕೊಲು ಕುಡ್ಚೆಂಡ್ ಬಂತ ಇವಳ ಪೊಯ್ಯುವಿಂಜತ್ಲೊ. ಅವಂಗ್ ಬುದ್ದಿ ಪಡ್ಚಿಡುವಕಾಯಿತ್ ಇವ ಕೂಳಿ ಪೊದ್ದಾನನ್ನೆ ಕಳಿಪ್ಪಕ್ ಸುರು ಮಾಡ್ಚಿಲೊ.
- ಮಾಚು : ವಡಿಯಂಗ್ ಗೊತ್ತಾಯಿಲಿಯ?

- ಪೂವಿ : ಸುರು ಸುರುಲ್ ಗೊತ್ತಾಯಿತಿಲ್ಲೆ. "ನಾನ್ ಪಾಶಾಣ ಮೂರ್ತಿ ಈ ಸಿಸುರ ಮೇಲ್ಕಾ ಇಂಞಾ ಮಿಂಞಾಕ್ ನೀನ್ ಕೈ ಬೆಚ್ಚಕ ನಿನ್ನ ಇಲ್ಲತೆ ಮಾಡಿರುವೀಂದ್" ಅಪ್ಪಣೆ ಕೊಡ್ತಲ್ತೊ. ಅಲ್ಲಿಂಜ ಅವನೂ ಕುಡಿಬುಟ್ಟಿತ್ಲೊ. ಪೊಯ್ಯುವಾನೋ ಬುಟ್ಟಿತ್ಲೊ.
- ಮಾಚು : ಅಲ್ಲಿಂಜ ಅವಂಗ್ ಗೊತ್ತಾಚಾ ಗೊತ್ತಾಯಿಲಿಯಾ ?
- ಪೂವಿ : ಇವಡ ಪೊಂಬಾಯಿ ಮುಂಡತೆ ಇಂಜಿತುಂಡೆಂಗಿ ಆಪಿಂಜತ್. ಇವ ಈ ಐಡಿಯತ್‌ನ ಪಿಂಞೊಬ್ಬಕ್ ಎಣ್ಣೆಕೊಡ್ತತ್.
- ಮಾಚು : ದಾಕೋ?
- ಪೂವಿ : ಜೂಬಿ ಆಂಟಿರ ಮೋವ ಕಯಿಂಜಕಾಲ ಮಂಗಲಾಯಿಲಿಯ ಆ ಮೂಡಿಕ್!
- ಮಾಚು : ಓ ಸೀತೆ ಮೂಡಿಕ್!
- ಪೂವಿ : ಆಂ, ಅವಕೇ! ಅವ ಮಾಡ್‌ಚಿಲ್ಲಾಂದ್ ಇವಳೂ ತುಳ್ಳಾವಕೊಂಜತ್ಲೊ.
- ಮಾಚು : ಅದ್ ಗೊತ್ತಾಯೋಚೆನ್ನೊ?
- ಪೂವಿ : ಅವಡ ಮಾಯಿ ನಲ್ಲ ಕಾಂಜಕ್ಕ! ಇವಡ ಮಂಡೆಕುತ್ತ ಚಾಣತ್ತ ನೀರೊನ ಕಲ್‌ಕಿತ್ ಬೂಕಿತ್- ಚೀಪೆ ಪುಡಿಲ್ ನಲ್ಲೋಣೆ ಕೊಡ್ತಿತ್ "ನೀನ್ ಏದ್ ಕೂಳಿ ಇಕ್ಕ ಬಾಯಿಬುಡ್‌ಂದ್" ಎಣ್ಣುವಕ ಇವಡ ಮೊರೆ ಜೋರಾಚಿಲೊ.
- ಮಾಚು : ಕೂಳಿ ಬುಟ್ಟಿತಿಕ್ಕು!
- ಪೂವಿ : ಕೂಳಿರ ಎಡ್ರೆಸ್ಸೇ ಇಲ್ಲೆ. ದಮ್ಮಯ್ಯ ಮಾಯಿ ನಾನ್ ಕೂಳಿಯಲ್ಲ. ನಾಕ್ ಕಟ್ಟಿಮೂಡಿ ಎಣ್ಣೆತಂದ್ಯೆಂದಾಚಿ! ಅನ್ನನೆ ಕಟ್ಟಿಮೂಡಿರ ಪಾಶಾಣ ಮೂರ್ತಿ ಊರ್‌ಡೀ ಟಾಂಟಾಂ ಆಯಿರ್‌ತ್!
- ಮಾಚು : ಇನ್ನನೆ ಓರಬ್ಬ ಮಾಡಲಾಯಿತೇ ಪೊಟ್ಟೇದ್ ನೇರೇದ್‌ಂದ್ ಗೊತ್ತಾಪುಲೆ.
- ಪೂವಿ : ಅಲ್ಲ ಇಂತಾನೆಲ್ಲ ನಂಬುವಯಿಂಗ ಇಂದ್ ಕಾಲತೂ ಉಂಡಲ್ಲಾಂದ್ ನಾಕ್ ಆಶ್ಚರ್ಯ ಆಪ.
- ಮಾಚು : ಇಲ್ಲತೆ? ಸತ್ಯಕ್ ಎಕ್ಕೊಲೂ ಬೆಲೆಯಿಲ್ಲೆ. ಕಳ್ಳಕಳಿಕೇ ಬೆಲೆ.
- ಪೂವಿ : ನೇರೇ! ಪೊರಡುವ ನೇರಕ್ ಪೊಂಞೆನ ಕಾಂಬಕಾಗ. ಒಂಟಿಪಟ್ಟಿನಕಾಂಬಕಾಗ. ಖಾಲಿ ಬಿಂದಿಗೆ ಕಾಂಬಕಾಗ. ಇನ್ನತದೆಲ್ಲ ಬೊರೀ ಮೂಢ ನಂಬಿಕೇಂದಾಪ.
- ಮಾಚು : ನಂಬಿಕೆ ಪಿಂಞ ಮೂಢ ನಂಬಿಕೆ - ಇದ್‌ಂಗ್ ಪೆರ್ತ್ ಪಕ್ಕತ ಬೆಂದೂರ್ತ ಪೂವಿ. ಒಂದಾನ ಬುಟ್ಟಿತ್ ಒಂದಿಲ್ಲೆ. ಆಚೆಂಗಿ ಇಂತ ನಡಪುನೆಲ್ಲ ನಂಗಳೂ ಚೆನ್ನ ಚಾಯಿಲ್ ಬೇರ್‌ಚಿಟ್ಟಿತ್ ವಿಮರ್ಶೆ ಮಾಡೊಂಡು.
- ಪೂವಿ : ಅದೇ ನಾನೂ ಎಣ್ಣುವೊ. ಅದ್ ಎಂತಾಂಗ್? ಎನ್ನನೇಂದ್ ಅರಿಯಂಡು.

- ಅಪ್ಪೊ ಮಾಡ್‌ಚಿ - ನಾನೂ ಅದ್‌ನೇ ಮಾಡುವೀಂದೆಣ್ಣಕ ಆಂಗಂತ ಅರ್ಥ?
- ಮಾಚು : ಅದೇ! ಪಂಡ್ ಏದೋ ಓರ್ ಕಾಲತ್ ಎಂತದೋ ಓರ್ ನಲ್ಲ ದೃಷ್ಟಿಲೇ ನಡ್‌ಂದಿತ್ ಬಂದಿತಿಕ್ಕು. ಅದ್‌ನ ನಂಗ ಇಂದೆತ ಕಾಲಕ್ ಅನ್ವಯಿಚಿಟ್ಟಂಡ್ ವಿಮರ್ಶೆ ಮಾಡೊಂಡು.
- ಪೂವಿ : ನೇರೇ ವಿಮರ್ಶೆ ಮಾಡತೆ ಅದ್‌ನ ಆಚರಣೆ ಮಾಡಿತೆನ್ನಾ ಫಲ? ದಾರೋ ಪಂಡ್ ಭೂಮಿಕೂಳಿಕ್ ಎಡೆ ಇಡುವಕ ಪೂಂಞ್‌ನ ಕೆಟ್ಟಿತ್ ಇಡುವಿಂಜತ್‌ಲೊ. ಅದ್ ಕ್ರಮೇಣ ಪದ್ಧತಿಯೇ ಆಯೋಚಿ.
- ಮಾಚು : ಪೂಂಞ್ ಮನೆಲಿಲ್ಲೆಂಗ್ ದಾಡ ಮನೆಂಜಾಂಚೆಂಗೂ ಕೊಂಡಬಂತ್ ಕೆಟ್ಟಿತ್‌ಡುವ ಪದ್ಧತಿ ಚಲಾವಣೆಕ್ ಬಾತೊಲೊ!
- ಪೂವಿ : ಪೂಂಞ್‌ನ ಕೆಟ್ಟಿತ್‌ಡುವೊ ಎಂತಾಂಗ್‌ಂದೆಣ್ಣಕ ಅದ್ ಇಟ್ಟಿ ಎಡೆನ ತಿಂಗತಿರಡ್‌ಂದಾಯಿತಿಕ್ಕು. ಅದ್ ಪದ್ಧತಿಯೇ ಆಯಿಪೋಚಿ.
- ಮಾಚು : ಇಂದಿಕ್ಕ ಸುಮಾರೆಲ್ಲ ನಡ್‌ಪು ಅಂತ ಅರ್ಥ ಇಲ್ಲತ್ತದೇ! ಏದ್ ಬೋಂಡು ಅದ್‌ನ ಎಡ್ತೊವೊಂಡು. ಬೋಂಡತಾನ ಬುಟ್ಟೊಂಡು.
- ಪೂವಿ : ಏಳ್ ಮಾಚು. ಮಾಯಿಯೂ ಮಕ್ಕಳೂ ಬಾತ್‌ಕಾಂಬ. ನಾನೊಮ್ಮೆ ಚೆರಿಯ ಅಡಿಗೇ ಪಣಿ ತೇತೆರುವಿ.
- ಮಾಚು : ಓಹೋ! ಮಾತಾಡಿ ಮಾತಾಡಿ ಪೂವಮ್ಮಕ್ಕ ಅಡಿಗೇಯೇ ಮಾಡಿತಿಲ್ಲೆಯಾ ಈ ನೇರ? ದೇವಳೇ ಗತೀ... "ಶಿವಪ್ಪ ಕಾಯಿತಿಂದೆ, ಮೂರುಲೋಟ ನೀರೂ ಕುಡಿದೆ ಹಸಿವೆಯನ್ನು ತಾಳಲಾರೆ ಕಾಪಾಡಯ್ಯ" ಹರನೇ!
- ಪೂವಿ : ಮುಂಡತ್ತಿರಪ್ಪಾ ನೀನೊಮ್ಮೆ! ಚೆರಿಯ ಮಕ್ಕಡನ್ನಕೆ!

ಮುದಾರೆ ಪಜ್ಜಿಯೂ - ನೀರ್ ಕಣ್ಣಿಯೂ...

- ಮಾಚು : ಕುಂಡೋಣಿ ನಡುಕಾಲೆ - ಊಕಾಡ್ ಬನಕಾಲೆ-ಮೊಟ್ವಾಟ್ವಾ ನಡೊಂದ್ ಬಾ ಮೋಳೆ - ತಾಮನೆಕ್ ಬಂತ್ ಪೋಮೋಳೆ" ಚಾಕ್ ನ ಅಪ್ಪನ ಪೆತ್ತೋರವ್ವನಾ ಮರಕತೆ ನೀ ಮೋಳೆ| ಅಣ್ಣ ತಮ್ಮಣ | ಅಕ್ಕ ತಂಗೆಯಳ| ಕಾಂಗೊಂಡು ನೀ ಮೋಳೆ| ತಾಮನೆರ ಬೊಳಿ ನೀನ್ | ಪೂಬಾಳೆ ಸುಳಿ ನೀನ್ | ಪೂಪೋಲೆ ಬಾಳ್ ನೀ ಮೋಳೆ||
- ಪೂವಿ : ಒಹೋಹೋ..... ಮಾಚುರ ಗೌಜಿಯೇ ಗೌಜಿ ಕಾಂಬಲ್ಲ.....
- ಮಾಚು : ಓ! ಪೂವಮ್ಮಕ್ಕ! ಬಾರಿ ಬಾರಿ! ಮನೆಲೆಲ್ಲ ಚಾಯಿಲುಂಡಾ?
- ಪೂವಿ : ಮದಿ ಮಾಚು ನೀಡ ನಾಟಕ ಕಳಿ. ಅಲ್ಲಾ ಅಚ್ಚಕೋರ್ ಸಮಾಧಾನತ್ ಪಾಡಿಯಂಡಿಂಜಿಯಲ್ಲ? ಪಾಡೊಂದೆಣ್ಣೆಚೆಂಗಿ ಮಾತ್ರ ನೀಕ್ ಪಾಡುವಕ್ ಆಪುಲೆ!
- ಮಾಚು : ಪಾಟ್ ರ ಬಾಯಿಕ್ ಮಣ್ಣ ಬೂವಡಲ್ಲಿ! ಅಲ್ಲ ಪೂವಿ ನಿನ್ನಾಂದ್ ಬೈಟಾಪಾಂಡೊಳ್ ಲ್ ಬಪ್ಪೀಂದೆಣ್ಣೆ ತಿಂಜವ ಇಂದ್ ಮಜ್ಜಾಣ ನೇರಕ್ ಮೆಲ್ಲೆ ಬಂದಂಡುಳ್ಳಿಯಲ್ಲ? ಓರ್ ಪೋನೇಂಗಿ ಮಾಡಿತುಂಡೆಂಗಿ ಆಪಿಂಜಿಲಿಯಾ ನೀಕ್?
- ಪೂವಿ : ಅಲ್ಲಿ ಪೋನ್ ಡೆಡ್ಡಾಯಿತಿಂಜತ್ ಪಿಂಚಿನ್ನೆ ಪೋನ್ ಮಾಡುವೊ?
- ಮಾಚು : ಅಲ್ಲಿ ಡೆಡ್ಡಾಯಿತಿಂಜಕ ಕೊಡಿಮನೆ ಮಾವಂಡಲ್ಲಿಂಜ ಮಾಡೋಲಿಂಜತಲ್ಲ?
- ಪೂವಿ : ಪಪ್ಪಂಡಯಿಂಗಳೂ ಅಯಿಂಕೂ ತಕ್ಕ ಬಾಕಿಲ್ಲೆ ಅದ್ ಗೊತ್ತುಂಡಾ ನೀಕ್?
- ಮಾಚು : ಅಲ್ಲ ಪೂವಿ? ಮಕ್ಕ ಎಲ್ಯ? ಅಲ್ಲಿಯೇ ಬುಟ್ಟಿತ್ ಬಂದೊಟ್ಟಾ?
- ಪೂವಿ : ಶಂಭು ಬಂದಿತ್ ಮನೆಕ್. ಅಂವೊ ನಾಳೆ ಮಕ್ಕಳ ಕೂಟ್ಟಂಡ್ ಬಪ್ಪೊಲ್ಯೊ ಇಲ್ಲಿಕ್.
- ಮಾಚು : ಅಂತೂ ಇಂತೂ ನೀಡ ತಮ್ಮಣ, ತಂಗೆಯ, ಅವು ಇವೊಂದ್ ಈ ಬಡಪಾಯಿ ವಡಿಯಂಡ ಗೇನೇ ಆಯಿಲೆ ಕಾಂಬ ಒಮ್ಮೂ ನೀಕ್!
- ಪೂವಿ : ಮುಂಡತ್ತಿರ್ ಮಾಚು ನೀನೊಮ್ಮೆ! ನಿಂಕೇ ಆಣಾಳಕ್ ಪೊಣ್ಣಾನ ಗೇನ ಇಲ್ಲತ್ತದ್. ನಂಕಲ್ಲ ಗೊತ್ತಿರಡ್!
- ಮಾಚು : ಬಲ್ಯ! ಗೇನ ಇಂಜಿತೇ ಬಂದೊಟ್ಟೆ ಇವ. ಒನ್ನಾಂದ್ ತಡ ಆಯಿತ್!
- ಪೂವಿ : ಚೆಡಿಮಾಡತೆ ಮಾಚು ಪ್ಲೀಸ್! ನಲ್ಲ ಕ್ಕಣ್ಣನಲ್ಲ? ತೆಳಿ ನೋಟಂಗ! ಇದಾ ನೀಕ್ ಪೆಪ್ಪಿ ಎಡ್ಡ ಬಂದೆ!

ಮಾಚು : ಬೆಪ್ಪಿನೋಟ್ ಪಡಮಂಡೆಕ್!

ಪೂವಿ : ಓರ್ ವಿಷ್ಯ ಗೊತ್ತುಂಡಾ ನೀಕ್? ತಡ್ಡಿಯೂ ಇಂಜತ್ ಈ ಕುರಿ!

ಮಾಚು : ಏದ್ ಚಡ್ಡಿ!

ಪೂವಿ : ಅಯ್ಯೋ ಕರ್ಮಕರ್ಮ! ಚಡ್ಡಿಯಲ್ಲ ತಡ್ಡಿ. ತಡ್ಡಿಯಪ್ಪಂಡಯಿಂಗಳೂ ಇಂಜತ್ ಕಾರಣಂಗೆಡುವಕ್.

ಮಾಚು : ಓ ಮನೆಕಾರ- ತಾಮನೆ ಮೂಡಿಯಾಂದ್ ಓರ್ ಚೆರಿಯ ಊರ್ ಕೂಡ್‌ನ ಲೆಕ್ಕೇ ಅಂದಕ!

ಪೂವಿ : ಅನ್ನನೇಂದೇ ಎಣ್ಣೆಲು. ಅಲ್ಲ ಮಾಚು? ನೀನ್ ಮರಪತ್ತನ ಕತೆನ ನಾಕೆಂತಾಂಗೆ ಎಣ್ಣೆತದ್?

ಮಾಚು : ಏದ್ ಕತೆ ಪೂವಿ?

ಪೂವಿ : ನೀನೊಂದೂ ಒಳ್‌ಪಂಚಿಡುವದ್ ಬೋಂಡಾಚಾ? ಊರ್‌ಕೆಲ್ಲ ಗೊತ್ತಿಪ್ಪ ನಾಕ್ ಮಾತ್ರ ಗೊತ್ತಿಪ್ಪಲೆ.

ಮಾಚು : ನೀಕ್ ದಾರ್ ಎಣ್ಣೆಯೆ?

ಪೂವಿ : ನಿನ್ನ ಮರತ್‌ಂಜ ಉಳ್‌ಪುವಕ್ ಏಣೆಕೊಂಡ ಬಂದಂವೊ!

ಮಾಚು : ಉಯಿ ರಾಮಾ! ದಾಕೂ ಎಣ್ಣೆತೆ ನಾಡ ಮಾನಮಯಾದಿ ಪೋಯಿರುವಾಂದ್ ಅವಂಗೆ ಕಳ್ಳಕ್ ಬೋರೆ ದುಡ್ಡ್ ಕೊಡ್ತಿಂಜನಲ್ಲ?

ಪೂವಿ : ನಾಕೂ ಬಣ್ಣೆ ಗೊತ್ತಾಚೆಂದ್ ಗೇನ ಮಾಡಿಯಾ? "ಅಕ್ಕಯ್ಯಾ, ಓರ್ ಕ್ವಾರ್ಟರ್ ತಪ್ಪದಾಚೆಂಗಿ ಬಾವಂಡದೋರ್ ಕತೆನ ಎಣ್ಣೆ ತಪ್ಪಿಂ" ದೆಣ್ಣೆ ಚಂವೊ!

ಮಾಚು : ಹ್ಲಂ... ಕೆಣೆನೋಟ್ ಕಾಳುರ! ಕ್ವಾರ್ಟರ್‌ನೊ ಕೈಕ್!

ಪೂವಿ : ಅಲ್ಲ ಮಾಚು? ನೀಕ್ ಎಚ್ಚಕ್ ಕುರಿ ಎಣ್ಣೆಯೆ ನಾನ್ ಮರಪತ್ತತೆ. ಮರ ಪತ್ತತೇಂದ್? ಅದೂ ನಾನಿಲ್ಲತಿಪ್ಪಕೇ ಮಾಡುವೊ ನೀನ್ ಕೇತರೆ.

ಮಾಚು : ಅಲ್ಲ ಪೂವಿ ಒಮ್ಮೆ ದಂಡ್‌ಕುರಿ ಬುದ್‌ಟಾಂದ್ ಎಕ್ಕೊಲೂ ಅನ್ನನೇ ಆಪಾ?

ಪೂವಿ : ಆಗತೆಯಾ ಇಕ್ಕ ಊರೆಲ್ಲ ದಂಗೂರ ಆಯೆ?

ಮಾಚು : ದಾಕ್ ಗೊತ್ತ್ ಇನ್ನನೆ ಆಪಾಂದ್? ಪತ್ತ್ ಕುರಿ ಎಣ್ಣೆತಿಕ್ಕು ಕಾಳು ಕ್ವಾರ್ಟರ್ ಒಮ್ಮೆ ಬಂತ್ ಆ ಬೈರಿಮರತ್‌ರ ಕೊಂಬೆನ ಉಳ್‌ಪಿ ತಾರಾಂದ್!

ಪೂವಿ : ಅಲ್ಲ ಇಳಿಯುವಕ್ ಕಯ್ಯತಂವೊ ಎನ್ನನೆ ಪತ್ತಿಟಿಯ ಪಿಂಞ ಮರಕ್?

ಮಾಚು : ಎನ್ನನೆ ಪತ್ತನನೊ ದೇವಕೇ ಗೊತ್ತ್! ಬೋಂಡೂಂದ್ ಪತ್ತನನಾ ನಾನ್?

ಪೂವಿ : ಉಯಿ ಸೊಯ ಇಲ್ಲತವಂಡನ್ನಕೆ ತಕ್ ಪರಿಯುವೊ ನೋಟಂವೊ?

ಪಳಮೆ ಪೊಮ್ಮಾಲೆ

- ಮಾಚು : ನೀನಾಂಡು ಇಂಜತ್ ಗೊತ್ತಾಪಿಂಜತ್! ವಿಷ್ಯಕೇಳ್ ಎಣ್ಣೆತಪ್ಪಿ....
- ಪೂವಿ : ಎಣ್ಣೆ ಕೇಕನ.... ಎಂತಾಚೇಂದ್.....
- ಮಾಚು : ನೀನ್ ತಾಮನೆಕ್ ಪೋನಾಂಡ ಪಿತ್ಯಂದ್ ರಘುರ ಬೇಲ್ಲ್ ಆನೆ ಬಂತಿಂಜತ್.....
- ಪೂವಿ : ಬೇಲ್ಲ್ ಆನೆ ಬಂದಾಂಗೂ ನೀನ್ ಬೈರಿಮರ ಪತ್ತಾನಾಂಗೂ ಸಮ್ಮಂದ ಎಂತೇಂದ್?
- ಮಾಚು : ನಲ್ಲ ಕತೆ ಆಚಲ್ಲ ನೀಡ.... ಚೆನ್ನ ಅವಸರ ಮಾಡತೆ ಕೇಳ್!
- ಪೂವಿ : ಎಣ್ಣೆ ಎಣ್ಣೆ ಅಂದಕ!
- ಮಾಚು : ನಾನೂ ಕಾಳು ಕ್ಕಣ್ಣನೂ ರಘುರ ಬೇಲ್ಲ್ ನೋಟುವಕ್ಂದ್ ಪೋಚಿ..... ಇರ್ಲ್ ಆನೆ ಬಂತ ನಷ್ಟ ಮಾಡಿತ್ ಪೋಯಿಂಜತ್.... ಕೊಡಿ ರೋಡ್ಂಜ ಕುತ್ತ ಬಪ್ಪಲ್ಲಿ ಬಿಸಿಬಿಸಿ ಲದ್ದಿ ಕಂಡತ್.....
- ಪೂವಿ : ಆನೆ ಇಂಜತಾ ಅಂದಕ ಅಲ್ಲಿ?
- ಮಾಚು : ರೋಡ್ ರ ಕೊಡಿ ಬರಿಲ್ ಎಲ್ಲಿಯೊ ಓಂ...ಯ್ಂದ್ ಕೂತ್ ಕೇಟತ್....
- ಪೂವಿ : ಉಯೀ ದೇವಳೇ! ಅಲ್ಲಿಂಜೇ?....
- ಮಾಚು : ಕಾಳು ಕ್ಕಣ್ಣ ಚೆಟ್ ಪ್ಲೆನ್ ರನ್ನಕೆ ಕಾಡ್ ಬುದ್ದ್ ಓಡಿರ್ತ್!
- ಪೂವಿ : ನೀನ್ ಅಲ್ಲಿಯೇ ಇಂಜಿಯಾ?
- ಮಾಚು : ನಾನೂ ಎದ್ದನೋ ಬುದ್ದನೋಂದ್ ರೋಡ್ ಕುತ್ತ ಓಡಿಯಂದ್ ಬಂದ....
- ಪೂವಿ : ಆನೆ ದವ್ತಿಯಾ ಬಾತಾ?
- ಮಾಚು : ಯಾಂವೊ ತಿರಿತ್ ನೋಟಿತೆಣ್ಣೆ? ನಂಕ್ ಓಡುವದೇ ಆಚಿ...
- ಪೂವಿ : ಅಲ್ಲಿಂಜಂತಾಚಿ?
- ಮಾಚು : ಕಾಳುಕ್ ಕ್ಕಣ್ಣನ ಕಾಕ್ ಚೆಂಗಿ ಪತ್ತೆಯೇ ಇಲ್ಲೆ... ತೋಟತರ ತಿರ್ಮಾಸ್ಲ್ ಆ ಚಪ್ಪೆ ಮರ ಉಂಡ್ ನೋಟ್ ಅಲ್ಲಿಕ್ ಬಂತ ನೋಟುವಿ.... ಬಗ್ಗಿತ್ ಮೇಂಜಂಡುಂಡ್!....
- ಪೂವಿ : ಅಯ್ಯೋ ರಾಮಾ? ಆನೆಯಾ?....
- ಮಾಚು : ಎಣ್ಣೆ ವಕ್ ಪುರುಸೊತ್ತಿಲ್ಲೆ ಇವಕ್!....
- ಪೂವಿ : ಎಣ್ಣೆ ಎಣ್ಣೆ.....
- ಮಾಚು : ನಾಕ್ ಚಾವಕಾಲ ಕಾಂಬಾಂದ್ ಒರೇ ಉಸ್ ರಕ್ ಕೊಡಿಯತ ಬರೆಕ್ ಪಾರಿಟ್ಟ! ಬರೆ ಪಾರ್ ನದೂ- ಬೈರಿಮರ ಪತ್ತನದೂ!
- ಪೂವಿ : ಅಕ್ಕಣ್ಣೇಕ್ ಆನೆ ಅಲ್ಲಿಯೇ ಇಂಜತಾ?

- ಮಾಚು : ಅಯ್ಯೋ ಪುಚ್ಚಿ! ಆನೆ ಅಲ್ಲ ಅದ್ ರಮೇಶಂಡ ಎಮ್ಮೆ!
- ಪೂವಿ : ಈs.... ಎಮ್ಮೆಕ್ ಬೊತ್ತಿತ್ ನೀನ್ ಮರ ಪತ್ತಿಟ್ಟಿಯದಾ?
- ಮಾಚು : ಪುಚ್ಚಿ... ಮರ ಪತ್ತಿತಾನ ಪಿಂಞ ಗೊತ್ತಾಯೆ ಅದ್ ಆನೆ ಅಲ್ಲ ಎಮ್ಮೆಂದ್! ಮೇವಕ್ ಕೆಟ್ಟಿತಿಂಜ ಎಮ್ಮೆ ಕೇರ್ ತುಂಡ್ ಚಿಟ್ಟುಂಡ್ ಅಲ್ಲಿ ಬಂತಿಂಜದೊಲ್ಲೊ!
- ಪೂವಿ : (ತೆಳಿ)..... ಎಮ್ಮೆ ಏದ್ ಆನೆ ಏದ್ಂದ್ ಗೊತ್ತಾಯಿಲಿಯಾ?
- ಮಾಚು : ಅಲ್ಲಿಂಜ ಇಳಿಯುವಕ್ ನೋಟುವೀ.... ಇಳಿಯುವಕಾಪಾ? ಕಮ್ಮಿಕ್ ನುಪ್ಪದ್ ಅಡಿ ಪತ್ತಿತಾಯಿತ್....
- ಪೂವಿ : ಪತ್ತುವಕ್ ಗೊತ್ತುಂಡ್ ಇಳಿಯುವಕ್ ಗೊತ್ತಿಲ್ಲೆ.... (ತೆಳಿ)
- ಮಾಚು : ಗುಲ್ಬರ್ಗಾಕಾರ ಎಣ್ಣಾಟ ಮರ ಇಳಿಯಾಕ ಹತ್ತೀನೀಂದ್ ಮಜ್ಜಾಣ ಕೆತ್ತನೆ ಮರತ್ಲೇ!
- ಪೂವಿ : ಮುಂಡತೆ ಅಳ್ಪಾಂಗ್ಂಜ ದಾರ್ನೇಂಗಿ ಕಾಕೊಂಡಿಂಜತ್!
- ಮಾಚು : ನೀಕೆನ್ನೊ ಪುಚ್ಚಿಗಿಚ್ಚ್ ಉಂಡಾ! ಮರ ಪತ್ತುವಕ್ ಗೊತ್ತುಂಡ್ ಇಳಿಯುವಕ್ ಗೊತ್ತಿಲ್ಲೆಂದೆಣ್ಣಾಚೆಂಗಿ ಯಾವನೇಂಗಿ ತೆಳಿಕ್ಕತ್ತಿಕ್ಕುವಾ?
- ಪೂವಿ : ರಾಮ!.... ಅಲ್ಲಿಂಜೆಂತಾಚಿ?
- ಮಾಚು : ಅಲ್ಲಿಂಜೆಂತಾಪೊ? ಕಾಳುರ ಮಾದಕಯಿಪೊ! ಪರ್ದೇಸಿ, ಮೆಲ್ಲೆ ಆಲೆ ಈಲೆ ನೋಟುಂಡ್ ಬಾತ್.... "ಏಯ್! ಅಪ್ಪ ಚೆತ್ತವನೇ, ಏಣೆ ಎಡ್ತ ಬಾರಾಂದ್" ಕೊತ್ಟ್ಟು....
- ಪೂವಿ : ಎಡ್ತ ಬಾತಾ?...
- ಮಾಚು : ಈ ಪುಣ್ಯಾತ್ಮಂಡ ತೆಳಿ ನಿಪ್ಪದೇ ಇಲ್ಲೆ. "ಬಾವಾ ನೀನ್ ಆಕಾಸತ್ಂಜ ಮರಕ್ ಇಳ್ಂಜದಾ- ಅಲ್ಲಾ ಭೂಮಿಂಜೇ ಪತ್ಯದಾ"ಂದ್ ಇವಂಡ ಕೊಣೆ ಬೋರೆ!
- ಪೂವಿ : ಅಲ್ಲ ದಾಕಾಚೆಂಗಿಯೂ ತೆಳಿ ಬಪ್ಪುಲಿಯಾ? ನೀಡ ಅವಸ್ಥೆಕ್?
- ಮಾಚು : 'ಬಾವಾ ಕಳ್ಳಕ್ ದುಡ್ಡ್ ತಪ್ಪದಾಚೆಂಗಿ ಏಣೆ ಎಡ್ತ ಬಪ್ಪಿ. ಇಲ್ಲೆಂಗಿ ಟಾಟಾ"ಂದ್ ಎಣ್ಣುವಲ್ಲ ಎಂತೆಣ್ಣೊಂಡು?
- ಪೂವಿ : ಕಡೇಕ್ ಎಡ್ತ ಬಾತಾ?
- ಮಾಚು : ಎಡ್ತ ಬಾತ್ ಪಾಳಾನಂವೊ? ಈ ಸೀಕ್ರೇಟ್‌ನ ಎಚ್ಚಕ್ ಜನಕ್ ಕಳ್ಳಕ್ ಮಾರಿತೊ? ಅವಂಡ ಕತೆನ ನಾನ್ ಟಾಂ.. ಟಾಂ... ಮಾಡತೆ ಪೋಚೆಂಗಿ ಕೇಳ್....
- ಪೂವಿ : ಎಂತ ಅವಂಡ ಗುಟ್? ಅಂತದ್?

ಸಕಲಮೆ ಫ್ರೂಮ್ನಾಲೆ

- ಮಾಚು : ದಸರಕ್ ಲಂಗ ಇಟ್ಟಂಡ್ ಪೋನದ್!...
- ಪೂವಿ : ಲಂಗ ಇಟ್ಟಂಡ್ ದಸರಕ್ ಪೋನದ್?... ಅಂವೊ ಎಂತಾಂಗ್ ಲಂಗ ಇಡುವ?
- ಮಾಚು : ಮೊನಿಯಾಂದ್ ದಸರತ್‌ರಂದ್ ಅಂವೊ ರಾಜಂಡಲ್ಲಿ ಒಳ್‌ಂಜಿಯೇ!
- ಪೂವಿ : ಮಡಿಕೇರಿಲಾ?
- ಮಾಚು : ಮಡಿಕೇರಿಲೇ! ಇಂವೊ ಪುರ್ಕ ಪೀಂದಿತ್ ರಾಜಂಡ ಮನೇರ ಪೊರ್ಮೆ ಕೊಂಬರೆಲ್ ಬುದ್ಧಂಡತೊಲ್ಲೊ. ರಾಜ ಇವಂಗೋರ್ ಲುಂಗಿ ಕೊಡ್ತೊಂಜತೊಲ್ಲೊ. ಇಂವೊ ನಡ್‌ಪಾದ್ರೆ ಕಯಿಂಜಿತ್ ತೇರ್ ನೋಟುವಕ್‌ಂದ್ ಗಾಂಧಿಮಂಟಪಕ್ ಪೋಚೊಲ್ಲೊ.
- ಪೂವಿ : ಒಬ್ಬನೆಯಾ? ಕೂಡ ದಾರೇಂಗಿಂಜತಾ?
- ಮಾಚು : ರಾಜಂಡ ಕ್ಕಣ್ಣ ಇಂಜತೊಲ್ಲೊ. ತೇರ್‌ರ ಎದಿಕ್ಕೆ ಇವಂಡ ಆಟೇ ಆಟೊಲ್ಲೊ. ಬಾಯಿಲ್ ಮ್ಯೂಸಿಕ್ ಬೊರೆ! "ಡರಪುಕುಡರಪುಕು ಡೆಡ್ಡೆಡ್ಡೆ-ಡರಪುಕುಡರಪುಕು ಡೆಡ್ಡೆಡ್ಡೆ" ಕಳ್ಳ ಕಮ್ಮಿಯಾನದೂ ನೋಟುವೊಲ್ಲೊ ಇದ್ ಲುಂಗಿ ಅಲ್ಲ-ಲಂಗ!... ರಾಜಂಡ ಪೊಣ್ಣಾರದ್!
- ಪೂವಿ : (ತೆಳ) ಓಹೋ ನೀನ್ ಮರ ಪತ್ತಾನ ಕತೆನ ಅಂವೊ ಎಣ್ಣಾಂಗ್ ನೀನ್ ಈ ಕತೆನ ಎಣ್ಣೆತ್ ಸೇಡ್ ತೇತೋವದಾ ಅಂದಕ?
- ಮಾಚು : ಕರೆಕ್ಕ್! ನೋಟ್ ಪೂವಿ..... ನಿನ್ನ ದಾರ್ ದೂರುವಕ್‌ಳಂಜತೋ ಅಯಿಂಡ ಎದೇಂಗೋರ್ ವೀಕ್‌ನೆಸ್‌ನ ನೀನ್ ಕಂಡ್‌ಪುಡ್‌ಚಂಡಕ ನಿನ್ನ ಅವು ದೂರಲೆ! ಎನ್ನನೆ ನಾಡ ಐಡಿಯಾ?
- ಪೂವಿ : ಓ ಪುಡಾರಿಯಡನ್ನಕೆ! ಅಯಿಂಗ ಅನ್ನನೇ ಅಲ್ಲ, ಅವನ ಇಂವೊ ಸೈಕಲ್ ಕಳ್ಳಾಂದ್ ಎಣ್ಣಕ ಇಂವನ ಅಂವೊ ಕೋಳಿ ಕಳ್ಳಾಂದ್ ಎಣ್ಣುವ. ಅಡಿಕೂಡಿ ದಂಡಾಳೂ ಕಳ್ಳಂಗಳೇ!
- ಮಾಚು : ಇಕ್ಕ ದಾರ್ ಸಾಚಾ ಉಂಡ್ ಎಣ್ಣೆನೋಟನ? ಕೊಂಬಮೀಸೆ ಕಾಡ್‌ಕಳ್ಳಂಡ ಕೂಡ ದುಡ್ಡ್ ಮಾಡುವಕ್ ನಾಡ್‌ಕಳ್ಳನೂ ಕೂಡ್ತೊವ. ನಾಡನ್ನನೆ!
- ಪೂವಿ : ಅದೆಂತ ನೀಡನ್ನನೆ? ನೀಕೆಂತಾಯಿತ್ ಅಂತದ್ ಇಕ್ಕ?
- ಮಾಚು : ಇಂಇಂತೆ ಆಪಕುಳ್ಳೊ? ಪೊಣ್ಣ್ ಇಂಜಿತೂ ನಾನೇ ಕೈಬಾಯಿ ಚುಟ್ಟಂಡ್ ಅಡಿಗೇ ಮಾಡ್ತೊವೆಂಡು. ಅವಕ್ ತಾಮನೆಕ್ ಪೋಯಿಟ್ಟಕ ವಡಿಯಂಡ ಗೇನೇ ಬಪ್ಪಲೆ!
- ಪೂವಿ : ಅಲ್ಲ ಮಾಚು, ವಾರಾಂಡೆಕೋರಮ ತಾಮನೆಕ್ ಪೋಪೋ ನಾನ್. ಅದ್‌ಕೂ ಕೊಕ್ಕೆ ಇಡುವಿಯಲ್ಲ ನೀನ್? ನಾನೆನ್ನ ಅಲ್ಲಿಯೇ ಪೋಯಿತ್ ಇಂಜಿತಿಲ್ಲೆಲ್ಲ.

- ಮಾಚು : ನಾಲ್ ದಿವಸಕ್ಕೆ ಪಾಡ್ ಎದ್ದೋಯಿತ್ ನಾಡ. ಎಚ್ಚಕ್ಂದ್ ಉಂಗೋಲು ಅದ್ನ!
- ಪೂವಿ : ಎಂತಾನೆ? ಕರಿ ಒಂದೂ ಮಾಡಿತ್ತಿಲ್ಲಿಯಾ? ಕೆಲ ಪಯಿಚ್ಚಂಡುಂಡ್ ನಾಕ್!
- ಮಾಚು : ಉಂಡಿತ್ ನೋಟ್ ಗೊತ್ತಾಪ! ಮೂಂದ್ ದಿವಸತ್ಂಜ ಮುದಾರೆಪಜ್ಜಿಯೂ ನೀರ್ ಕಣ್ಣೆಯೂ ಗೋವಿಂದಾ- ಗೋವಿಂದಾ!
- ಪೂವಿ : ಪೊಲಾಕ ಎಂತ ಮಾಡಿತ್ತಿಂಜಿಯ? ಒಟ್ಟಿಯ? ಉಪ್ಪಿಟ್ಟಾ?
- ಮಾಚು : ಅವಲಕ್ಕಿನ ನೀರ್ಕಟ್ಟಿತ್ ಮೋರ್ ಬೂಕಿಯಂಡ್ ಓರ್ ತುರ್ಕಲ್!
- ಪೂವಿ : ಉಯಿ ರಾಮಾ! ಒಟ್ಟಿ ಮಾಡ್ಯಂಡಿತುಂಡೆಂಗಿ ಆಪಿಂಜಿಲಿಯಾ?... ನಂಗಡ ಮೇಕೆಮನೆ ತಾತನೂ ಅನ್ನನೇ ಮಾಡುವದೊಲ್ಲೊ. ಎಣ್ಣಾಟ ಮೊನಿಯಾಂದ್ ತಾತ ಕಾವೇರಿಕ್ ಪೋಯಿತ್ತಿಂಜಲ್ಲಿ ನಲ್ಲ ಮಜ ಇಂಜತೊಲ್ಲೊ.
- ಮಾಚು : ಎಂತೊಲ್ಲೊ?
- ಪೂವಿ : ತಾತಂಡ ಗೊತ್ತುಂಡಲ್ಲ? ಬಾರೀ ನೇಮಕಾರ. ಪೊಲಾಕಲೇ ಭಾಗಮಂಡ್ಲಕ್ ಪೋಯಿತ್ ಪಿಂಡ ಬೆಚ್ಚಿತ್ ತೀರ್ಥಬಕ್ಕಣೇಕ್ ಉಪವಾಸ ಇಂಜತೊಲ್ಲೊ!
- ಮಾಚು : ಕೂಡ ತಡ್ಡಿಯಪ್ಪಡಯಿಂಗಳೂ ಇಂಜಿತ್... ಕೋಟಕ್ ಸ್ಪೆಟ್ಟರ್ ತೊಪ್ಪಿ ಯಾಯಿತ್ ಬಂದೋಬಸ್ತಲ್ ಕರೆರ ಪಕ್ಕ ನಿಂದಂಡಿಂಜತೊಲ್ಲೊ! ಪಾಪ! ದಾರೋ ತಾತನ ಕೆರೆಕ್ ಉಂದಿತ್ ಟ್ಪಟ್ಟಿ!
- ಮಾಚು : ಅಲ್ಲಿಂಜ? (ತೆಳಿ)
- ಪೂವಿ : ಕೊಡಿಕ್ ಪತ್ತನಾಂದೆಣ್ಣಕಲೂ ಆಯಿಲೆಲ್ಲೊ. ದಂಡ್ ಬಣ್ಣ ತಡಿಕಾರಂಗ ಡೆಡೆಲ್ ಕೆಣ್ಂಜಂಡ್ "ಗೋವಿಂದಾ"ಂದ್ ಎಣ್ಣಾಚೊಲ್ಲೊ ತಾತನೂ!
- ಮಾಚು : ನಲ್ಲ ಐಡಿಯಾ! ಕುಳಿಪಕ್ಳಿವಕ ಕೋಟ ಆಪೇಂಗಿ ಸ್ಪೆಟ್ಟರ್ ಇಡೊಂಡೂಂದ್ ಆಚಿ ಅಂದಕ!
- ಪೂವಿ : ಅನ್ನನೇ ಕೇಟತೊಲ್ಲೊ ಓರ್ ದಡಿಯ ತಾತನ! "ಅಲ್ಲ ತಾತ ಬಟ್ಟೆ ಇಡತೆ ಇಳಿಯವದ್ ಬುಟ್ಟಿತ್ ಇಟ್ಟಿಂಡ್ ಇಳ್ಂಜಿತುಳ್ಳಿರಲ್ಲಾ"ಂದ್!
- ಮಾಚು : ಎಂತ ಎಣ್ಣಾ ಚೊಲ್ಲೊ ತಾತ?
- ಪೂವಿ : "ಏಯ್ ಮುಚ್ಚಾರಾಬಾಯಿ. ನೀನ್ ಪುಟ್ಟುವಕ್ ಮಿಂಞಂಜೇ ನಾನ್ ಇನ್ನನೇ ಬಂದಂಡುಳ್ಳ ಕಾವೇರಿಕ್ಂದ್ ದಬಾಯಿಚಿಟ್ಟತೊಲ್ಲೊ!
- ಮಾಚು : ಅಲ್ಲ ಪೂವೀ, ನಂಗಳೂ ಒಮ್ಮೆ ಕಿರುಸಂಕ್ರಮಣತ್ ರ ಒಳಿಯ ಪೋಯಿತ್ ಬರೊಂಡಿಂಜತಲ್ಲ?
- ಪೂವಿ : ಪೋಯಿತೇ ಪೋಂಡು. ರಂಜು ಸುಮಿಯೂ ಹರ ಪುಡ್ಚೆಂಡುಂಡ್ ಪೋಕನ.

ಸಳಮೆ ಪ್ರೊನ್ಯಾಲೆ

ಮಾಚು : ಓರ್ ಲೆಕ್ಕ ಗೇನ ಮಾಡ್‌ಚೆಂಗಿ ಪೂವೀ. ನಂಗಕ್ ಎಣ್ಣೆಕ ಕೊಡಗ್‌ಕಾರಕ್ ಕಾವೇರಮ್ಮೆರ ಮೇಲೆ ಭಕ್ತಿಯೇ ಪೋರಾಂದಾಪ. ಕೊಡಗ್‌ಲ್ ಎಂತ ಇಲ್ಲತದ್ ಎಣ್ಣೆ ನೋಟನ?

ಪೂವಿ : ಯಾಲ, ಕಾಫಿ, ನೆಲ್ಲ್, ಪುಳಿ, ಬಾಳೆ ಇಲ್ಲತಂತದೇದೂ ಇಲ್ಲೆಲ್ಲ?

ಮಾಚು : ಇಚ್ಚೆಲ್ಲ ಇಂಜಿತೂ ನಂಗಕ್ ಇಂಞೂ ಬೋಂಡು ಇಂಞೂ ಬೋಂಡೂಂದ್ ದುರಾಸೆ ಬಂದಾಂಡ ಫಲ ಇಂದಂತಾಚಿ ಎಣ್ಣೆ?

ಪೂವಿ : ಬರಗಾಲ ಬಪ್ಪಕಾಚಿ. ಮರಕಾಡ್‌ನ ಮನಾರ ಕೆತ್ತಿತ್ ಬೋಳ್ ಮಾಡುವ ಕಾಚಿ. ಇಂಞೆಲ್ಲಿ ಮಳೆ ಬಪ್ಪ?

ಮಾಚು : ಕಾರ್ಯಕಾಪಕ ಮಾತ್ರ ಜನಕ್ ಕಾವೇರಿನ ಗೇನಾಪೊ. ಮಳೆ ಬೊಳೆ ಚಾಯಿಲುಂಡೆಂಗಿ ದಾಕೂ ಗೇನೇ ಇಪ್ಪುಲೆ. ತಡಿಕ್ ಪನಿ ಬಾತೆಂಗಿ ಆಂಗ್ ಬೋಂಡಿಯಾನ ಮದ್ದ್ ಮಾಡೊಂಡು. ನಲ್ಲದ್ ಮಾಡಪ್ಪಾಂದ್ ದೇವಳನೋ ಬೋಡೊಂಡು.

ಪೂವಿ : ಅದೇ ನಾನೂ ಎಣ್ಣೆಪೊ. ಮಾಡುವ ಅನಾಚಾರತ್‌ನೆಲ್ಲ ಮಾಡಿತ್ ಮಳೆ ಬಪ್ಪೆಚಿಡವ್ವಾಂದ್ ಬೋಡಿತೆನ್ನೆ ಫಲ?

ಮಾಚು : ಒಂದ್ ನೋಟ್‌ಚೆಂಗಿ ಪೂವಿ, ಇಂದಿಕ್ಕ ಉಳಿಕೆ ಆಯಿತುಳ್ಳ ಕಾಡ್‌ನೆಂಗಿ ಕೆತ್ತತೆ ಮಾಡತೆ ಚಾಯಿಲ್ ಬೆಪ್ಪದೇ ನಂಗ ಕಾವೇರಿಕ್ ಮಾಡಂಡಿಯ ಪೂಜೆ ಎನ್ನಣ್ಣುವಿಯಾ?

ಪೂವಿ : ನೇರೇ ಮಾಚು. ನಂಗಡ ಜಾಗತ್‌ಲುಳ್ಳ ಒರೇ ಓರ್ ಮರ ಇಂಞೆ ಕೆತ್ತುವಕಾಗ

ಮಾಚು : ಏಳ್ ಪೂವಿ ಉಂಗನ ಬಾ! ಮುದಾರೆ ಪಜ್ಜಿ ನೀರ್‌ಕಣ್ಣೆ ಗೋವಿಂದಾ-ಗೋವಿಂದ!

ದೇವಂಡೋ ದೇವಿರೊ ಪಾಟ್‌ರ ಸೂರೆ... ತಾಲಿಲೆಲ್ಲೆಲಾ...

- ಪೂವಿ : ಕಡು ಓರ್ ಚಮಚ, ಜೀರಿಗೆ ಪಾದಿ ಚಮಚ, ಉದ್ದಾ ಬೇಳೆ ದಂಡ್ ಚಮಚ, ಕಡ್ಲೆಕಾಳ್ ದಂಡ್ ಚಮಚ, ಒಣ್‌ಂಗ್‌ನ ಮಳು 3-4, ಚೋರಂಗಿ ರಸ, ಚೆನ್ನ ಮಂಜ ಪೊಡಿ, ಚೋದ್‌ಕ್ ಬೋಂಡಿಯಚ್ಚಕ್ ಉಪ್ಪು, ತೊರಂಡಿತ್ ಬೆಚ್ಚಂಡ ತಂಗಿ ಚೆನ್ನ....
- ಮಾಚು : ಓಹೊಹೋ ಎನ್ನ ಪೂವಿ ಇದ್ ಕತೆ? ಎಂತದೋ ಭಯಂಕರ ರೆಸಿಪಿ ತಯಾರಾಪನ್ನಕೆ ಕಾಂಬ?... ಇಕ್ಕಲೆ ಬಾಯಿಲ್ ನೀರ್ ಬಂದಂಡುಂಡಪ್ಪ!
- ಪೂವಿ : ನೀನ್ ಚೆನ್ನ ಮುಂಡತ್ತಿರ್ ಮಾಚು.... ಇದ್‌ನೆಲ್ಲ ನಾನ್ ಬಾಯಿಪಾಠ ಮಾಡ್ಕೋವೊಂಡು ನಾಳೆಕ್!... ಚಿತ್ರಾನ್ನ ಮಾಡುವ ವಿಧಾನ :- ಸುರೂಲ್ ಪೊಡಿಮಾಡಿತ್ ಬೆಚ್ಚಂಡಿತುಳ್ಳ ನೆಲ್ಲಿಗೆರ ಪೊಡಿನ ಕೂಳ್‌ಕ್ ಮೇಕಿತ್, ಕೂಳ್ ಬಿಸಿಬಿಸಿ ಇಪ್ಪಕ್ಕಲೇ ಮುಚ್ಚಿತ್ ಬೆಯಿರಿ....
- ಮಾಚು : ಅಚಪ್ಪ ಬೆಚ್ಚ.... ನೆಕ್ಕ್!
- ಪೂವಿ : ಮಾಚೂ, ಪ್ಲೀಸ್..... ನೀಡ ಪಾಡ್‌ಕ್ ನೀನ್ ಚೆನ್ನ ಪೇಪರ್ ಓದ್ಯಂಡ್ ಅಳೆ ಚೆನ್ನ ನೇರ... ನಾಕ್ ಡಿಸ್ಪರ್ಬ್ ಮಾಡತೆ... ಅಲ್ಲಿಂಜ ಕಾಂಬ ಎಣ್ಣೆಕ್ ಕಡು, ಉದ್ದಾ ಬೇಳೆ, ಒಣ್‌ಕ್ ಮಳು ಇಟ್ಟಿತ್ ಅಗ್ರಾಣೆ ತಯಾರ್ ಮಾಡ್ಕೋಳಿ....
- ಮಾಚು : ಪೂವಿ, ಒರೇ ಓರ್ ಕೊಶ್ಚನ್! ಇದೆಲ್ಲ ಎಂತಾಂಗ್‌ಂದ್ ಓರ್ ತಕ್ಕ್ ಎಣ್ಣೆಟಕ ಮದಿ. ಅಲ್ಲಿಂಜ ನೀಡ ಪಾಡ್ ನೀಕ್-ನಾಡ ಪಾಡ್ ನಾಕ್!
- ಪೂವಿ : ನಾನ್ ಮೊನಿಯಾಂದೇ ಎಣ್ಣೆನಲ್ಲ ಮಾಚೂ, ನಾಳೆ ಅಡಿಗಿ ಕಾಂಬಿಟೇಷನ್. ಓರಬ್ಬಕ್ ಓರಂದ್ ಐಟಂ ಪ್ರಿಪೇರ್ ಮಾಡುವ ಒಪ್ಪಾಚಾರ ಆಯಿತ್. ನಾಕ್ ಚಿತ್ರಾನ್ನ!
- ಮಾಚು : ಉಯ್ಯವ್ವಯ್ಯಾ! ನಾಡ ಮಂಡೆಯೆ ಚಿಂದಿ ಚಿತ್ರಾನ್ನ ಆಯೋಚಿ!.... ನೀನ್ ನಾಳೆ ಚಿತ್ರಾನ್ನ ಮಾಡುವಿಯ?
- ಪೂವಿ : ಎಂತಾಂಗ್ ಮಾಡೂ ನನ್ನ ನೀನ್ ಅಚ್ಚಕ್ಕೋರ್ ಕಂಡೆಮ್ ಮಾಡಿತ್ ಕೇಪೊ ಅನ್ನನೆ?
- ಮಾಚು : ಒಂದೂ ಇಲ್ಲೆವ್ವಯ್ಯ. ಮುಂಡತೆ ಕೇಟ ಅಚ್ಚಿಕೆ! ಅದಿರಡ್, ಈ ಅಡಿಗಿ ಕಾಂಬಿಟೇಷನ್‌ರ ಐಡಿಯ ದಾಡ ಮಂಡೆಲ್ ಉದ್‌ಚದೋ?
- ಪೂವಿ : ನಂಗಡ ಸ್ವಸಹಾಯ ಸಂಘತ್‌ರ ಪ್ರೆಸಿಡೆಂಟ್‌ರ ಮಂಡೆಲ್ ಈ ಐಡಿಯ

ಪೆಳೆನೆ ಪೊನ್ನಾಳೆ

ಬಂದ್ಲೆ!... ಎಂತ ನಲ್ಲ ಕಾಂಪಿಟೇಷನಲ್ಲ?

ಮಾಚು : ಅವಡ ಮಡೆರ ಓಡ್! ಏದೂ ಐಡಿಯ ಬಂದ್ಲಿಯ ನಿಂಗಕ್? ಅಡಿಗೆಯೆ ಆಂಡೂಯಿಂಜತಾ?

ಪೂವಿ : ಎಂತಾಂಗ್ ನೀನನ್ನನೆ ಎಣ್ಣುವೊ? ಅಡಿಗಿನ ಎಂತಾಂಗನ್ನನೆ ಕಮ್ಮಿತರತ್ ಕಾಂಬೊ?... ಮಂಗಲವೇ ಆಯಿತಿರಡ್ ನೇಮಿಂಗ್ ಸರ್‌ಮನಿಯೇ ಆಯಿತಿರಡ್, ನಮ್ಮ ನಾಳೇ ಆಯಿತಿರಡ್, ಪ್ರತಿಯೊಂದೂ ಅಡಿಗರ ಮೇಲೇ ಡಿಪೆಂಡ್ ಆಯಿತುಳ್ಳೊ. ಅಡಿಗೆ ಚಾಯಿಂಜಕ ಮಾತ್ರ ಫಂಕ್ಷನ್ ಚಾಯಿ. ಇಲ್ಲೆಂಗಿ ಬಂದವು ತುಪ್ಪಿಯಂಡ್ ಪೋಪ. ಗೊತ್ತಾ?

ಮಾಚು : ಗೊತ್ತಾಚವ್ವಯ್ಯ! ಎನ್ನೋ ಕೇಟ್‌ಟ್ಟ ಅಚ್ಚಿ ಕೇ. ಕೆಮಿ ಪಾವನ ಆಚಿ!

ಪೂವಿ : ನಿಂಕ್ ಬೋಂಡೂಂದಾನಕ ಮಾತ್ರ ಬೊಳ್ಳುಳ್ಳಿ ಅಲ್ಲೆಂಗಿ ಇಂಗ್‌ನ ಇದ್‌ಂಗ್ ಕೂಟ್ಯೊಳಿ....

ಮಾಚು : ಅಯ್ಯೊಯ್ಯೋ! ಬೊಳ್ಳುಳ್ಳಿ! ಆಂಡ ಅಜ್ಜಿನ ತಿಂಗಡ್!.... ಇಂಗ್ ಅದ್‌ಂಡ ಅಪ್ಪೊ!

ಪೂವಿ : ನೀಕೆಂತ ಗೊತ್ತಾ ಬೊಳ್ಳುಳ್ಳಿರ ಚೋದ್? ಬೊಳ್ಳುಳ್ಳಿ ಎಂತಾ ನಲ್ಲ ಮದ್ದೆಂದ್ ಗೊತ್ತುಂಡೆಗೆನ್ನೆ?...ಅದಾನದೂ ಸಂಬಾರ ತೊಪ್ಪುರ ಚೂರ್, ತೊರಂಡ್‌ನ ತೆಂಗಿ, ಚೋರಂಗಿ ರಸ, ಇದ್‌ನೆಲ್ಲ ಕೂಳ್‌ಕ್ ಮೇಕಿರಿ.... ಕಡ್ಲೆ ಕಾಳ್‌ನ ಎಣ್ಣೆಲ್ ಚಾಯಿಲ್ ಬರ್‌ತಿತ್ ಕೂಳ್‌ಕ್ ಮೇಕೋಳಿ. ಬೋಂಡೂಂದಾಚೆಂಗಿ ಗೇರ್ ಬೀಜ, ತೊರಂಡ್‌ನ ಕ್ಯಾರೇಟ್ ಇದ್‌ನೊ ಕೂಟ್ಯೊವೊಲು....

ಮಾಚು : ಅಲ್ಲ ಪೂವಿ, ನಿಂಗ ರೆಸಿಪಿ ಪ್ರಿಪೇರ್ ಮಾಡುವದಲ್ಲತೆ ಭಾಷಣವು ಮಾಡೊಂಡುವಾ?

ಪೂವಿ : ಭಾಷಣ ಅಲ್ಲ ಮಾಚೂ, ನಂಗ ತಯಾರ್ ಮಾಡ್‌ನ ಅಡಿಗರ ವಿಷ್ಕತ್‌ನ ಕೂಡ್‌ನಯಿಂಕ್ ಚಾಯೋಡೆ ಎಣ್ಣೆ ಕೊಡ್ಕೊಂಡು. ಚೋದಾನ ಅಡಿಗಕ್ ಫೈಜ್ ಉಳ್ಳನ್ನಕೆ ಅದ್‌ನ ವಿವರೋಡೆ ಎಣ್ಣುವ ರೀತಿಕೂ ಫೈಜ್ ಉಂಡ್‌ಲೋ!

ಮಾಚು : ದೇವಳೇ ಗೆತಿ!ನೀಕ್ ನಾಳೆ ಫೈಜ್‌ರ ಸೂರೆ ಅದಂಕ?!... ಎಣ್ಣಾಟ ಈ ಅಡಿಗನೆಲ್ಲ ತಿಂಬೊ ದಾರ್?

ಪೂವಿ : ಸುರೂಲ್ ಟೇಸ್ಟ್ ನೋಟುವಕ್ ಒರ್ ಕಮಿಟಿ ಉಂಡ್. ಅಯಿಂಗ ನಂಗ ನಂಗಡ ಅಡಿಗಿನ ಟೇಸ್ಟ್ ನೋಟಿತ್ ಫೈಜ್‌ಕ್ ಸೆಲೆಕ್ಟ್ ಮಾಡುವ....

ಮಾಚು : ಅದಾನದೂ ಎಲ್ಲಾರೂ ಗೌಜಿ ಗದ್ದಳತ್ ಬಾಟಿ ಕೊಡ್ತಿರಾಂದೆಣ್ಣೆ!....

- ಪೂವಿ : ಪಿಂಞ ಬಾಕಿ ಬುಡುವಕಾವ? (ತೆಳಿ)
- ಮಾಚು : ಕೊಂದ ಪಾಪ ತಿಂದು ಪರಿಹಾರ.... ಮಾಡಿದುಣ್ಣೋ ಮಹರಾಯ! (ತೆಳಿ)
- ಪೂವಿ : ಪಿಂಞಸೋರ್ ವಿಷ್ಯ ಗೊತ್ತುಂಡ ಮಾಚು?
- ಮಾಚು : ಅದೆಂತದಪ್ಪ? ಎಣ್ಣ್ ಕೇಕನ!
- ಪೂವಿ : ಇನ್ನನೆ ಪುದಿಯ ಕಾಂಪಿಟೆಷನ್ ರ ಐಡಿಯ ಕೊಡ್ತಯಿಂಗಕೂ ಸ್ಪೇಷಲ್ ಇನಾಂ ಉಂಡ್ಲೊ!
- ಮಾಚು : ಭಯಂಕರ ಮಂಡೆ ಮಾತ್ರ ನಿಂಗಡ! ನಿಂಗಡ ಮಂಡೆಕ್ ಕೊಡ್ಕೊಂಡು!
- ಪೂವಿ : ಮೊನಿಯಾಂದ್ ಅದೂ ಆಚಿ ಮಾಚು! (ತೆಳಿ)
- ಮಾಚು : ಅದೂಂದ್ಲಣ್ಣಕ?
- ಪೂವಿ : (ತೆಳಿ) ಕಣ್ಣ್ ಕ್ ಬಟ್ಟೆ ಕೆಟ್ಟಿತ್ ಕುಡಿಕೆ ಒಡ್ಪ ಪೈಪೋಟಿ ಇಂಜತ್!
- ಮಾಚು : ಎಂತಾಚಿ ಅದಲ್? ದಾರ್ ಗೆದ್ದತೋ?
- ಪೂವಿ : ಗೆಲ್ಲುವ ಕತೆ ಅಲ್ಲಿರಡ್, ಕಾಮುಣಿ ಆಂಟಿ ಕಣ್ಣ್ ಕ್ ಬಟ್ಟೆ ಕೆಟ್ಟನದೇ ತಡ ಓಡ್ಯಂಡ್ ಪೋಯಿತ್ ದೊಣ್ಣೆಲ್ ಜೋರಾಯಿತ್ ಪೊಜ್ಜಿಟಕ ನಂಗಡ ಪ್ರೆಸಿಡೆಂಟ್ ರ ಮಂಡೆಕ್! (ತೆಳಿ)
- ಮಾಚು : (ತೆಳಿ) ಕಣ್ಣ್ ಕೆಟ್ಟಿತ್ ಮಂಡೆ ಒಡ್ಪ ಪೈಪೋಟೀಂದ್ ಗೇನ ಮಾಡಿತಿಕ್ಕು ಅವ!....ಅಲ್ಲಿಂಜೆಂತಾಚಿ? (ತೆಳಿ)
- ಪೂವಿ : ಎಂತಾಪೊ? ಅವಕ್ ಪ್ರೆಸಿಡೆಂಟ್ ರ ಮೇಲೆ ಎಂತದೋ ಸೇಡ್ ಇಂಜತಿಕ್ಕೊಂದ್ ಒರಬ್ಬ ಎಣ್ಣಿಂಡಿಂಜತಪ್ಪ ದೇವಕೇ ಗೊತ್ತ್! (ತೆಳಿ)
- ಮಾಚು : ಪ್ರೆಸಿಡೆಂಟ್ ಎಂತ ಎಣ್ಣಿಚಿ?
- ಪೂವಿ : ಅವ ಎಂತ ಎಣ್ಣುವ? ಪೊಯಿತ್ತರ ನೊಂಬಲ, ಆಂಡ ಕೂಟ್ ಕ್ ಚೆನ್ನ ಇಣಾಣಕೇಡೂ ಆಯಿತ್ ಮೂಡ್ ಕರ್ಪ್ ಚಿಟ್ಟಿಂಡಿಂಜತ್. (ತೆಳಿ)
- ಮಾಚು : ಆ ಪೈಪೋಟಿಕಂಜ ಈ ಅಡಿಗೇರ ಪೈಪೋಟಿಯೆ ನಲ್ಲದ್ಂದ್ ಆಯಿತಿಕ್ಕು ಅವಕ್! ಇದ್ಂದ ರಿಸಲ್ತ್ ಎಂತಾಪಕುಂಡೋ? (ತೆಳಿ)
- ಪೂವಿ : ಅದಿರಡ್ ಮಾಚೂ, ನೀಕೂ ಎಂತೆಂಗಿ ಐಡಿಯ ಬಾತೆಂಗಿ ಎಣ್ಣ್ ನೋಟನ!
- ಮಾಚು : ಎಂತ ಐಡಿಯ?
- ಪೂವಿ : ಅದೇ ಮಾಚೂ, ಎಂತೆಂಗಿ ಪುದಿಯ ಪುದಿಯ ಕಾಂಪಿಟೆಷನ್ ಬೆಪ್ಪನ್ನಕೆ?
- ಮಾಚು : ಐಡಿಯಕೆನ್ನ್ ಬರ ಪೂವಿ? ನೀನ್ ರೆಡಿ ಇರೊಂಡು ಅಚ್ಚಿಕೆ!
- ಪೂವಿ : ನಾನ್ ರೆಡಿ ಉಳ್ಳ ಮಾಚೂ, ನೀನ್ ಎಂತ ಎಣ್ಣಿ ಕಲೂ ನಾನ್ ರೆಡಿ... ಆಚೆಂಗಿ ಆ ಐಡಿಯ ಇಕ್ಕಣೇಕ್ ದಾರೂ ಮಾಡತೆ ಉಳ್ಳದಾಯಿತಿಕ್ಕೊಂಡು.

ಸಕಮೆ ಪ್ರೊಮ್ಯಾಲೆ

- ಮಾಚು : O.K, O.K.! ಪುದಿಯ ಐಡಿಯ ತಪ್ಪಿ ಅದ್‌ಂಗೆನ್ನಾಂಡು?
- ಪೂವಿ : ಎಣ್ಣೆ ಬೆರಿಯ!
- ಮಾಚು : ನೋಟ್, ನೀನ್ ಇಕ್ಕಾಕಲೆ ಒತ್ತಿತುಳ್ಳಿಯ- ನಾನ್ ಏದ್‌ಂಗೂ ರೆಡೀಂಡ್. ಇಂಞಿಕ್ಕೆ ಬೆಲೆಕ ಪರ್‌ಂದಕ ಮಾತ್ರ ನಾನ್ ಐಡಿಯ ತಪ್ಪುಲೆ ಗೊತ್ತಿರಡ್.
- ಪೂವಿ : ಎಣ್ಣೆ ಮಾಚೂ, ಜಂಬ ಕಳಿಕೆ ನೀನ್!
- ಮಾಚು : ಇದ್‌ಲ್ ನೀಕ್ ಇನಾಂ ಕ್‌ಟ್‌ನಕ ನಾಕೂ ಪಾದಿ ತರೊಂಡು O.K.ನಾ?
- ಪೂವಿ : O.K.ಗ್ಯಾರಂಟಿ ತಪ್ಪಿ!
- ಮಾಚು : ಬೀರ್‌ಬಲಂಡ ಕತೆ ಆಯಿಪೋಕು. ಕ್‌ಟ್‌ನಾಲ್ ಪಾದೀಂಡ್! (ತಳಿ)
- ಪೂವಿ : ಕೂಡೆ ಪೋನಯಿಕ್ ಬೆನ್ನೆದುಂಬ ಅಡಿ ಕ್‌ಟ್‌ಚಿಲ್ಲ ಅನ್ನನೆಯಾ?... ನೀನ್ ಮುಂಡತೆ ಕಾಲ ಕಯಿಕತೆ ಮಾಚೂ, ಎಣ್ಣೆಮ್ಮ!
- ಮಾಚು : ಅಂದಕ ಕೇಳ್ ಎಣ್ಣೆ ತಪ್ಪಿ. ನಾಕ್ ಗೊತ್ತುಳ್ಳನ್ನಕೆ ಈ ಪೈಪೋಟಿನ ಯಾಂವನೂ ಎಲ್ಲಿಯೂ ಮಾಡಿತಿಪ್ಪಕ್ಕಿಲ್ಲೆ. ಅಂತೋರ್ ಪೈಪೋಟಿ ಇದ್....
- ಪೂವಿ : ದುಂಬ ಕಷ್ಟ ಉಳ್ಳದ್ ಕಾಂಬ! ಅಂದಕ?
- ಮಾಚು : ಒಂದೂ ಕಷ್ಟ ಇಲ್ಲೆ. ತಾಲಿಪಾಟ್‌ರ ರಾಗತ್ ಪರಸ್ಪರ ತಕ್ಕ ಪರ್‌ಂದೊವೊ ಅಚ್ಚಿಕೇ!
- ಪೂವಿ : ಅದೆನ್ನೆ ಮಾಚೂ?
- ಮಾಚು : ಅದೆನ್ನೆಂದ್ ಎಣ್ಣೆತಪ್ಪಿ. ನಾನ್ ಓರ್ ಮೊಳಿ ಪಾಡುವಕ ನೀನೂ ಓರ್ ಮೊಳಿ ಪಾಟ್‌ಲೇ ಉತ್ತರ ತರೊಂಡು. ಚೋತಕ ಅಂತವು ಗೆದ್ದಯಿಂಗಕ್ ನೂರ್ ಊರ್‌ಪಿಯ ಕೊಡೊಂಡು ಒಪ್ಪಿಗೆ ಉಂಡಾ?
- ಪೂವಿ : ನಾಡಕ್ಕಿಲುಳ್ಳ ದುಡ್ಡ್‌ನ ಕಂಡಂಡಿತುಳ್ಳಿಯ. ಅದ್‌ನ ಎನ್ನನೇಂಗಿ ನೀಕ್ ಚೊಟ್ಟಿರೊಂಡು. ಅದ್‌ಂಗುಳ್ಳ ಪ್ಲಾನ್ ಇದೆಲ್ಲ!
- ಮಾಚು : ಬೋಂಡೆಂಗಿ ಬೋಂಡ ನಾಕೆನ್ನಾಂಡು ಇಕ್ಕ?... ಉಂಬಕಾಯಿತುಂಡೆಂಗಿ ಕೂಳ್ ಇಡ್ ಉಂಗನ.
- ಪೂವಿ : ದುಂಬ ಬಲ್ಯರಿಕೆ ಕಳಿಪ್ಪಕಾಗ ಮಾಚು, ನಾನೂ ಎಚ್ಚಕೊ ಐಡಿಯ ಎಣ್ಣೆ ತಂದಿತಿಲ್ಲಿಯ ನೀಕ್?
- ಮಾಚು : ಅಂದಕ ಪಿಂಞಂತಾಂಗ್ ಮಡ್‌ಚಿಕಳಿಪ್ಪೊ ನೀನ್? ನೀನ್ ಚೋತಕೆನ್ನೆ? ನಾನ್ ಚೋತಕೆನ್ನೆ? ದುಡ್ಡ್ ನಂಗಡ ಮನೆರೊಳ್‌ಲೇ ಇಪ್ಪುಲಿಯ?
- ಪೂವಿ : ಇಕ್ಕ ಅನ್ನನೆ ಎಣ್ಣುವಿಯ ನೀನ್. ನೀನ್ ಚೋತ್‌ಟಕ ದುಡ್ಡೇ ತಪ್ಪುಲೆ ನಾಕ್. ಅಂದೊಮ್ಮೆ ಇನ್ನನೇ ಎಂತದೋ ಓರ್ ಐಡಿಯ ಮಾಡಿತ್ ದುಡ್ಡ್

ತರತೆ ಎಪ್ಪೆ ಇಟ್ಟಿತುಳ್ಳಿಯ!

- ಮಾಚು : ನೀನ್ ಚೆರ್‌ಪತ್ ಮಾಡ್ಯಂಡಿಂಜದ್ ಗೇನ ಉಂಡಾ? ನಾನ್ ಚೋತಕ ಅಂಜಿ ಕಿತ್ತುಳಿ ಪಣ್ಣ್ ಕೊಂಡಬಪ್ಪಿಂದೆಣ್ಣವ ನಾಕ್ ಎಪ್ಪೆ ಇಟ್ಟಿದ್?
- ಪೂವಿ : ಅಯ್ಯೋ ದೇವಳೆ, ಅದ್‌ನ ಇಂಞೂ ಮರ್‌ಂದಿತ್ತಿಲ್ಲಿಯ ನೀನ್?
- ಮಾಚು : ಎನ್ನೆ ಮರ್‌ಪಕಾಪ ಪೂವಿ? ಚುಟ್ಟಿಂವೊ ಮರ್‌ಕು ಚುಡ್‌ಚಿಟ್ಟಿಂಡಂವೊ ಮರ್‌ಪಕಯ್ಯುವಾ?
- ಪೂವಿ : ಓಹೋ, ನೀನ್ ಮಾತ್ರ ಒಂದೂ ಕಮ್ಮಿ ಇಂಜಿತ್ತಿಲ್ಲೆ. ಚೆಕ್ಕೆಮರಕ್ ಪತ್ತಿತ್ ನಾಡ ಕಣ್ಣೆದಿಕ್ಕೇ ಈರಂಡಿರಂಡ್ ಪಣ್ಣ್ ಚೆಕ್ಕೆನ, ಒರೇ ಓರ್ ಚೊಳೆ ತರತೆ ತಿಂದಂಡಿಂಜದ್?... ಅದ್‌ನ ನಾನೂ ಮರ್‌ಂದಿತ್ತಿಲ್ಲೆ.
- ಮಾಚು : ಅಲ್ಲಿಂಜ ಮೊರಾಟಂಡ್ ಓಡಿಪೋಯಿತ್ ನೀಡ ಅಪ್ಪಂಗ್ ಚಾಡಿ ಎಣ್ಣೆತ್ ನಾಡ ಚಣ್ಣೆಕ್ ಅಡಿ ತಪ್ಪ್‌ಚಿಟ್ಟಿದ್? ನಾನೂ ಮರ್‌ಂದಿತ್ತಿಲ್ಲೆ ಗೊತ್ತಿರಡ್!
- ಪೂವಿ : ನೀನಿಕ್ಕ ಪಳಿಯಾನೆಲ್ಲ ಕೆದ್‌ಕಿಯಂಡ್ ಅಳೊಕತೆ ಮಾಚೂ. ಇಕ್ಕ ಆಪಕುಳ್ಳಾನ ನೋಟ್ ಮಿಂಞ.
- ಮಾಚು : ಆಪದ್ ಪೋಪದ್ ನಾಪದಾಂಡೊಳ್‌ಲ ತಾಲಿಲೆಲ್ಲೆಲಾ... ನಾಪದ್ ಕೈಂಜದೂ ಪೋಪದೇ ನೋಟ್ ತಾಲಿಲೆಲ್ಲೆಲಾ.... (ರಾಗತ್)
- ಪೂವಿ : ಥೂ... ಬುಟ್ಟಿತ್‌ಂದೆಣ್ಣ್ ಮಾಚೂ. ಏದೇದ್ ಗಳಿಗೇಲ್ ಎಂತೆಂತೋ ಎಣ್ಣೆತ್ ಅನಿಷ್ಟ ಪರಿಯತೆ ನೀನ್. ನಂಗ ಇನ್ನನೇ ನೂರ್ ಕಾಲ ಬದ್‌ಕೊಂಡು.
- ಮಾಚು : ಉಯ್ಯವ್ವಯ್ಯ! ಇಕ್ಕಾಕಲೆ ನೀಡ ಕೂಡೆ ಏಂಗಿ ಕಳಚಿತ್ ಮದಿ ಮದಿ ಆಯಿತ್ ನಾಕ್. ಅಂತಲ್ಲಿ ನೂರ್ ಕಾಲಲೊ! ದೇವಳೇ ಗತಿ!
- ಪೂವಿ : ಎಂತ ಮಾಚೂ ನಾಡ ಕೂಡೆ ಏಂಗಿ ಕಳಿಪ್ಪೊ ನೀನ್? ನೀಡ ಕೂಡೆ ಏಂಗಿ ಕಳಚಿತ್ ನಾಕ್ ಮದಿಯಾಯೆ ಗೊತ್ತುಂಡಾ?
- ಮಾಚು : ಆಚಿ ಅಂದಕ ಡೈವೊರ್ಸ್ ಅಪ್ಪಿ ಕೇಶನ್ ಕೊಂಡಬಪ್ಪದಾ?
- ಪೂವಿ : ಮಾಚೂ! ನಾಕ್ ಚೆಡಿಗಿಡಿ ಬಪ್ಪ್‌ಚಿಡತೆ ನೀನ್...! ತಮಾಷಿಕೂ ಒರ್ ಮಿತಿ ಉಂಡ್..... ಮುಂಡತೇಂಗಿ! phone ಮಾಡೊಂಡುವಾ ಪಪ್ಪಂಗ್?
- ಮಾಚು : ಓಹೋಹೋ ಎನ್ನ ಪೂವಿ ಚೆರಿಯ ಮಕ್ಕಳ ಬೊತ್ತ್‌ಚಿಟ್ಟಿನ್ನೆಕೆ ನನ್ನ ಬೊತ್ತ್ ಚಿಟ್ಟಿಂಡುಳ್ಳಿಯ? ನಾಕೆನ್ನ ಗೋಲಿಕಳಿ ಕಳಿಪ ವಯಸ್ಸಲ್ಲ ಗೊತ್ತಾಚಾ?
- ಪೂವಿ : ನೀಡ ತಡಿಕ್ ಮಾತ್ರ ವಯಸ್ಸಾಯೆ. ಅದೇ ಗೋಲಿಕಳಿಪ್ಪಕ ಇಂಜ ಬುದ್ಧಿಯೇ ಇಕ್ಕಲೂ ಉಳ್ಳ ನೀಕ್! ಚೆರಿಯ ಮಕ್ಕಡನ್ನೆಕೆ! ಇಕ್ಕೆನ್ನ ಇನ್ನನೇ ವಾದ ಮಾಡ್ಯಂಡಿಪ್ಪಿಯಾ ಅಲ್ಲ ಐಡಿಯ ಎಣ್ಣೆತಪ್ಪಿಯ?

ಸಕಲಮಃ ಪೂನೂಲೆ

- ಮಾಚು : ಇದ್ ನಲ್ಲ ಕಷ್ಟಾಚಲಪ್ಪ? ಇಕ್ಕ ನೀನೇ ಅಲ್ಲ ಉಲ್ಪಾ ಪರ್ಂದಿಯೆ? ನೂರ್ ಉರ್ಪಿಯತ್‌ರ ಮೂಡ್ ನೋಟ್ಯಂಡ್?
- ಪೂವಿ : ಎಣ್ಣ್ ಅಂದಕ ಪಿಂಞಂತ ಮಾಡುವೊ? ನಾನ್ ಚೋತಕ ನೂರ್ ಉರ್ಪಿಯ ತಪ್ಪಿ ನೀನ್ ಚೋತಕ ನಾಕೋರ್ ಪುದಿಯ ಪೊಡಿಯ ಎಡ್ತಿತರೊಂಡು. ಆಂ. ಪುದಿಯ ಪೊಡಿಯಾಂದೆಣ್ಣಕ ಅಂದಾಜಿ ಅಂಜಾಯಿರ ಉರ್ಪಿಯತ್‌ರ ದಾಯಿತಿಕ್ಕೊಂಡು. ಅಲ್ಲತೆ ಅಂದೆತನ್ನಕೆ ಹ್ಲೊಂದ್ ಒತ್ತಂಡ್ "ಪುದಿಯ ಪೊಡಿಯನ್ನೇ ಇದಾ ಎಡ್ತಾಂದ್ "ಬೀರಾರೊಳ್‌ಂಜ ಎಡ್ತಿತ್ ತಪ್ಪದಲ್ಲ.
- ಮಾಚು : ಅದೆನ್ನ್ ಪೂವಿ. ನೀನಾಚೆಂಗಿ ನೂರ್ ಉರ್ಪಿಯ ತಪ್ಪೊ? ನಾನಾಚೆಂಗಿ ಅಂಜಾಯಿರ ಉರ್ಪಿಯ ತೆರಂದಿಯೆ?
- ಪೂವಿ : ನೀನಾಚೆಂಗಿ ಆಣ್. ಸಂಪಾದನೆ ಉಳ್ಳಂವೊ! ನಾಕೆಂತ ಉಂಡ್ ಸಂಪಾದನೆ? ಅನ್ನನೆ ನಾಕ್ ನೂಕ್ ಉರ್ಪಿಯ ಅಂಜಾಯಿರ ಉರ್ಪಿಯತ್‌ರ ಲೆಕ್ಕೇ!
- ಮಾಚು : ಭಯಂಕರ ಮಂಡೆ ಅವ್ವಯ್ಯ ನೀಡ!.... ಇರಡ್ ನಾನಂತೂ ಚೋಪ ತಕ್ಕೇ ಇಲ್ಲೆ. ನೀನೇ ಚೋತ್ ಪೋಪೊ!
- ಪೂವಿ : ಅದೆನ್ನನೆ ಚೋಪದ್, ನಾನೂ ಓರ್ ಕೈ ನೋಟಿರುವಿ ಅಂದಕ. ಛಾಲೆಂಜ್ ಛಾಲೆಂಜೇ!
- ಮಾಚು : ಸರಿ ಅಂದಕ... "ಪಾಟ್‌ರ ನೇಮವು ಎಣ್ಣುವಿ ಕೇಳ್ ತಾಲಿಲ್ಲೇಲಾ" ಪಾಟ್‌ಕ್ ಒತ್ತೋರ್ ರಾಗವು ಬೋಂಡು.... ತಾಲಿಲ್ಲೇಲಾ...
- ಪೂವಿ : "ಆಂಗ್ ನಾನೊತ್ತಿಯೆ ಪಿಂಞಂತ ಎಣ್ಣ್" ತಾಲಿಲ್ಲೇಲಾ....
- ಮಾಚು : ಕೇಟೋರ್ ಪ್ರಶ್ನೆಕ್ ಉತ್ತರ ತರೊಂಡು ತಾಲಿಲ್ಲೇಲಾ..
- ಪೂವಿ : "ಕೇಪನಾ ಕೇಕೊಲು ಡೆನ್ನ್ ಪುದುಮೆ" ತಾಲಿಲ್ಲೇಲಾ...
- ಮಾಚು : ಚೋತಕ ತರೊಂಡು ಉರ್ಪಿಯವು ನೂರ್... ತಾಲಿಲ್ಲೇಲಾ...
- ಪೂವಿ : ಚೋತಕ ಬೇಂಗೊಂಡು ಕಂಬಿ ಪೊಡಿಯ. ತಾಲಿಲ್ಲೇಲಾ...
- ಮಾಚು : ಚೋಪಿಯ ನೀನ್ ಬೋಂಡಲಾ ಪೂವಿ ತಾಲಿಲ್ಲೇಲಾ...
- ಪೂವಿ : ಅಚ್ಚಕ್ ಸುಲ್‌ಬತ್ ಚೋಪವಳಲ್ಲ... ತಾಲಿಲ್ಲೇಲಾ...
- ಮಾಚು : ಆಣ್‌ರ ಎದಿಕ್ಕೆ ಪೊಣ್ಣ್‌ಕ್ ಕಯ್ಯ. ತಾಲಿಲ್ಲೇಲಾ....
- ಪೂವಿ : ಆಣ್‌ನ ಪೆತ್ತದೂ ಪೊಣ್ಣ್‌ದ್ ಕೇಳ್.... ತಾಲಿಲ್ಲೇಲಾ...
- ಮಾಚು : ಆಣ್‌ಂದಿಲ್ಲತೆ ಪೊಣ್ಣೆಲ್ಲಿ ಬಪ್ಪ? ತಾಲಿಲ್ಲೇಲಾ....
- ಪೂವಿ : ಆಣ್ ಪೊಣ್ಣ್ ಸಂಸಾರ ಮಾಡುವ ತಾಲಿಲ್ಲೇಲಾ....
- ಮಾಚು : ಸಂಸಾರತಾಣ್ ಇಲ್ಲತೆ ಪೋಚೆಂಗಿ ತಾಲಿಲ್ಲೇಲಾ.....

ಪೂಣ್ಣಾರ ಕೈಲ್ ಚೆಡಿಯುಲೆ ಒಂದೂ ತಾಲಿಲೆಲ್ಲೇಲಾ.....

ಪೂವಿ : ಪೂಣ್ಣೆಲ್ಲತಾಮನೆ ಒಲೆಯದ್ ಕತ್ತುಲೆ ತಾಲಿಲೆಲ್ಲೇಲಾ.....

ಒಟ್ಟಿ ಚುಡುವಕೂ ಆಣ್ಣ್ ಕಯ್ಯುಲೆ. ತಾಲಿಲೆಲ್ಲೇಲಾ.....

ಮಾಚು : ಸೃಷ್ಟಿನ ಮಾಡ್‌ನ ಬ್ರಹ್ಮನು ಆಣ್... ತಾಲಿಲೆಲ್ಲೇಲಾ....

ಪೂವಿ : ಜೀವನ ತಪೋರ್ ಭೂಮಿಯು ಪೂಣ್ಣ್. ತಾಲಿಲೆಲ್ಲೇಲಾ....

ಮಾಚು : ಎಲ್ಲಾನೊ ಚಾಕುವ ವಿಷ್ಣುವು ಆಣ್. ತಾಲಿಲೆಲ್ಲೇಲಾ.....

ಪೂವಿ : ವಿಷ್ಣುವು ಉಳ್ಳಲ್ಲಿ ಲಕ್ಷ್ಮಿಯು ಉಂಡ್. ತಾಲಿಲೆಲ್ಲೇಲಾ....

ಮಾಚು : ಪುಕ್ಕ ನೆಲ್ಲ್‌ಕ್ ಚಿಂದವು ಏರ ತಾಲಿಲೆಲ್ಲೇಲಾ.....

ಪೂಂಗಡ ಬಾಯಿಲ್ ತಕ್ಕದ್ ಏರ ತಾಲಿಲೆಲ್ಲೇಲಾ....

ಪೂವಿ : ತಕ್ಕಿಲ್ಲತಿಂಜಕ ಕಾಕೆ ಕೊಂಡೋಕು. ತಾಲಿಲೆಲ್ಲೇಲಾ... ಕೈಬಾಯಿ ಇಲ್ಲೆಂಗಿ
ಚಾವೊಂಡು ಪೂಂಗ. ತಾಲಿಲೆಲ್ಲೇಲಾ

ಮಾಚು : ನೀಡೋರ್ ಪೂಂಬಾಯಿ ಕೈ ಇಟ್ಟೆ ದಾರೋ ತಾಲಿಲೆಲ್ಲೇಲಾ

ಪೂವಿ : ನೀಡೋರ್ ಮಾತಾಯಿ ನಾಡೋರ್ ಮಾಯಿ ತಾಲಿಲೆಲ್ಲೇಲಾ

ಮಾಚು : ದಮ್ಮಯ್ಯ ದೇವಳೆ ಮದಿಯಾಚಿ ನಾಕ್ ತಾಲಿಲೆಲ್ಲೇಲಾ

ಪೂವಿ : ಕಂಬಿ ಪೂಡಿಯಕ್ ಬಾತದಾ ಕಾಲ ತಾಲಿಲೆಲ್ಲೇಲಾ.....(ಟ್ರಿನ್ ಟ್ರಿನ್.....
ಟ್ರಿನ್..... ಟ್ರಿನ್.....)

ಮಾಚು : ಹಲೋ..... ಅಲ್ಲ.. ರಾಂಗ್..... ನಂಬರ್..... ಇವಂಗೋರ್ ಅರ್ಜೆಂಟ್!

ಪೂವಿ : ಮಾಚೂ, ನೀನೇ ಚೋತಿಯೆ! ತಕ್ಕ್ ತಪ್ಪತೆ ಪೂಡಿಯ ತಂದಾರ್!

ಮಾಚು : ಓಹೋ ನಾನೊಂದೂ ಚೋತಿತ್‌ಲೆ. phone ಬಾತ್ ಎಟೆಂಟ್ ಮಾಡ್‌ನ
ಅದೆನ್ನನೆ ಚೋಪೊ?

ಪೂವಿ : ಅದೆಂತದೇ ಇರಡ್, ಪೋನ್‌ಲೂ ರಾಗತೇ ಪಾಡಿಯಂಡೇ ತಕ್ಕ್,
ಪರಿಯೊಂಡಿಂಜತ್..... ಅದೆಲ್ಲ ನೆವನ ಬೋಂಡ. ನೀನಂತೂ ಚೋತ ಲೆಕ್ಕೇ.

ಮಾಚು : ಅದೊಂದೂ ಇಲ್ಲೆ. ಅಂಬಾಲ್ ಇಟ್ಟಿಂಡ ಲೆಕ್ಕ ಅಚ್ಚಿಕೇ!

ಪೂವಿ : (ತೆಳಿ) ಅಯ್ಯೊಯ್ಯೋ..... ಥೇಟ್ ಮಕ್ಕಕಳಿ! ದಾರೇಂಗಿ ಕೇಟಕ ತೆಳಿಕ್ಕು!

ಮಾಚು : ತೆಳಚಕ ತೆಳಿಕ್ಕಡ್ ನಾಕೆನ್ನಾಂಡು? ವಡಿಯ ಪೂಣ್ಣಾರ ತಕ್ಕ್ ಮಂಡೆ
ಇಡುವಯಿಂಗಕ್ ಅನ್ನನೇ ಅಂಡು!

ಪೂವಿ : ಅಲ್ಲ ಮಾಚೂ, ಇದ್ ಮಾತ್ರ ಅನ್ಯಾಯ. ಆಕಸ್ಮಾತ್ ನಾನ್ ಪಾಟ್‌ನ
ನಿಪ್ಪಾಚಿಟ್ಟಿತಿಂಜಕ ನೀನ್ ನಾಡ ಕೈಂಜ ನೂರ್ ಉರ್‌ಪಿಯ ವಸೂಲ್ ಮಾಡತೆ
ಬುಡುವಿಂಜಿಲೆ... ನೀಕೋರ್ ನ್ಯಾಯ ನಾಕೋರ್ ನ್ಯಾಯ ಉಂಡಾ ಅಂದಕ?

ಪಳೆಮೆ ಪೊನ್ನಾಳೆ

- ಮಾಚು : ಆಚಪ್ಪ, ನಾನೇ ಚೋತಂದ್ ಇರಡ್. ನೀಕಿಕ್ಕ ಆಪ್ಪರಾಲ್ ಓರ್ ಪೊಡಿಯನ್ನೆ ಬೋಂಡಿಯೆ?
- ಪೂವಿ : ಉಯಿ, ನೇರಾಯಿತೂ ಎಡ್ ತಪ್ಪಿಯ ಮಾಚೂ?
- ಮಾಚು : ಕಳಿಪ್ಪೊ ನೋಟವ ಮಕ್ಕಡನ್ನೆಕೆ! ನಾಕ್ ಮಾತ್ರ ಎಣ್ಣೆರ್ತ್ ಮಕ್ಕಕಳಿಂದ್ ಅಯಿಂಗಯಿಂಗ ಕಳಿಪ್ಪದ್ ಅಯಿಂಕಯಿಂಕ್ ಗೊತ್ತಾಪುಲೆ ಅಚ್ಚಿಕೆ! ಅದೆಂತದೇ ಇರಡ್ ಎನ್ನನೆಉಂಡ್ ನಾಡ ಐಡಿಯೆ?
- ಪೂವಿ : ಪೆರ್ತ್ ಚಾಯಿ ಉಂಡ್ ಮಾಚು! ನಂಗಡ ಸಂಘತ್ ಈ ಕಾಂಪಿಟೆಷನ್ ಗ್ಯಾರಂಟಿ ಬೆಪ್ಪೆಚಿಡೊಂಡು..... ನಾಕಂತೂ ಓರ್ ಪೈಜ್ ಗ್ಯಾರಂಟಿ!
- ಮಾಚು : ನೋಟ್ ಪೂವಿ, ಈ ಕಾಂಪಿಟೆಷನ್ ಉಂಡಲ್ಲ - ತಮಾಷಿಕ್ ತಮಾಷಿಯೂ ಅಕ್ಕು ಕಾರ್ಯಕ್ ಕಾರ್ಯವೂ ಆಪ.
- ಪೂವಿ : ಎಣ್ಣೆಕೆ?
- ಮಾಚು : ಇಕ್ಕ ನೋಟ್, ನಂಗಡ ಎಚ್ಚಕೆಲ್ಲ ಜಾನಪದ ಆಟ್-ಪಾಟ್ ಉಂಡ್. ಎಲ್ಲ ಮೂಲೆಕ್ ಆಯಂಡುಂಡ್? ಚೆನ್ನ ಇಂತಾನೆಲ್ಲ ಆಂಜಂಡ್ ಅದ್ನ ಪುದಿಯ ರೀತಿಲ್ ಪ್ರಯೋಗ ಮಾಡ್ನಕ ನಂಗಡ ಜಾನಪದ ಸಂಸ್ಕೃತಿಯೂ ಉಳಿಕೆ ಆಪ. ಮಕ್ಕಡ ಪ್ರಯೋಗಶೀಲತೆಯೂ ಮೋಳ್ಕೇರುವ. ಎನ್ನೆಣ್ಣುವಿಯೆ?
- ಪೂವಿ : ನೇರೇ ಅಲ್ಲ? ಇದೋರ್ ವಿಷ್ಠ ನಾನ್ ಗೇನ ಮಾಡಿತೇ ಇಂಜಿಲೆ ಮಾಚು. ನಲ್ಲ ಐಡಿಯ ಮಾತ್ರ ಇದ್! ಆಚೆಂಗಿ ಓರಬ್ಬ ಇದ್ಲ್ ಕೂಡಿಯಾಡುವಕ್ ಇಾಣ ಕಳಿಪ್ಪೊ ಇನ್ನೊ?
- ಮಾಚು : ಎಂತಾಂಗ್ ಇಾಣ ಕಳಿಕ್ಕಂಡಿಯೆ?... ಈ ಕಳಿಕೂಟ, ಪೈಪೋಟೀಂದೆಲ್ಲ ಬೆಪ್ಪಲ್ಲ. ಇದ್ಂಡ ಉದ್ದೇಶ ಎಂತ ಎಣ್ಣೆ ನೋಟಿನ?
- ಪೂವಿ : ಅಯಿಂಡಯಿಂಡ ಟ್ಯಾಲೆಂಟ್ನ ಪತ್ತಾಳ್ಕೆ ಕಾಟುವೊ!
- ಮಾಚು : ಅಚ್ಚಕೇ ಅಲ್ಲ ಪೂವಿ. ಪತ್ತಾಳ್ಕೆ ಕೂಟ್ಕೆ ಕೂಡಿತ್ ನಂಗ ನಂಗಡ ಬುದ್ಧಿರ ಮಟ್ಟಿತ್ನ ಬೊಳ್ಳೊವದೂ ಈಂಡ ಉದ್ದೇಶ. ಆಂಡ ಕೂಟ್ಕೆ ಓರ್ ಒತ್ತೋರ್ಮೆಯೂ ಬೊಳ್ಳೆಂದೆಂದ್ ಬಪ್ಪ ಇಂತ ಕೂಟತ್....
- ಪೂವಿ : ಅದೆಲ್ಲ ನೇರೇ ಮಾಚು. ಆಚೆಂಗಿ ಕಂಬಿ ಪೊಡಿಯ ಕೈಕ್ ಕಟ್ಟುವೊ ಎಕ್ಕಾಂದ್?
- ಮಾಚು : ನೀನ್ ಇಂದ್ ಇರ್ಲ್ ವರುಲೆಂದ್ ಕಾಂಬ ! (ತೆಳಿ)
ಇಂದಿರ್ಲ್ ನೀಕ್ ಸ್ವಪ್ನತೂ ಪೊಡಿಯ ತಾಲಿಲೆಲ್ಲೆಲಾ.... ! (ತೆಳಿ)
- ಪೂವಿ : ತಕ್ಕತೆ ಪೋಚೆಂಗಿ ತಕ್ಕಾನ ಬುಡುವಿ ತಾಲಿಲೆಲ್ಲೆಲಾ... ! (ತೆಳಿ)

ಮಾಚು ಪೂವಿರ ಕಷ್ಟ - ಸುಖ!

- ಪೂವಿ : ಚೆನ್ನ ಇಪ್ಪರ ಅಳೆ ಮಾಚೂ, ನೀನೊಬ್ಬನೇ ತಿತ್ತ ಕಾಂಜಕ ಮದಿಯಾ? ನಾಡ ಕಾಲ್ ಕೋಡಿ ಪೋಯಿತ್ ಗೊತ್ತುಂಡಾ?
- ಮಾಚು : ಅಂದಕ ಅರೆಗಂಟೆ ಒಲೆರೊಳ್ ಕ್ ಇಡ್ ಸೆರಿಯಾಪ! (ತೆಳಿ)
- ಪೂವಿ : ಎಣ್ಣು ಪೊ ನೋಟಂವೊ! ನೀಕ್ ಓರಿಚ್ಚಕೂ ಕರುಣೆ ಇಲ್ಲೆ ಮಾಚು!
- ಮಾಚು : ಎಂತಾಂಗ್ ಕರುಣೆ ಕಾಟಂಡಿಯೆ? ಅದ್ನೆಣ್ಣ್ ಮಿಂಞ
- ಪೂವಿ : ಎಂತಾಂಗ್ಣೆಣ್ಣೆ? ನಾನ್ ಸಂಸಾರಕಾಯಿತ್ ಇಚ್ಚೆಕ್ಕೆಲ್ಲ ಪೇಚಾಡುವಿ... ಅಂದಿತೂ ಓರಿಚ್ಚಕ್ ಅಯ್ಯೋ ಪಾಪಾಂದ್ ತೋಂದುಲೆಲ್ಲ ನೀಕ್?
- ಮಾಚು : (ವ್ಯಂಗ್ಯ) ಅಯ್ಯೋ ಪಾಪ! ಇಂದ್ ಎಂತೆಲ್ಲ ಮಾಡಿಯವ್ವಯ್ಯ?
- ಪೂವಿ : ಮದಿ ಮಾಚು, ನೀಡ ಕೋಣೆ!... ಅಗೆ ಪಣೆಕ್ ಅಳಳ ಕೊಂಡ ಬಾ ಎಣ್ಣುಕ ಅದೂ ಇಲ್ಲೆ. ಪದ್ನಂಜಿ ದಿನ ಆಚಿ.... ಇಂದ್ ನಾಳೆಂದ್. ಎಕ್ಕ ನೋಟಡ್ ಪಣೆ ಪಣೆ ಪಣೆ! ಓರಮ್ಮ, ರೋಸಿ ಪೋಪ ಮಾಚು!
- ಮಾಚು : ಅಳ ಕ್ಕಾಟತಾಂಗ್ ನಾನೆನ್ನ ಮಾಡಡ್ ಪೂವಿ? ನಾನೇ ಪೊಡಿಯ ಉಡ್ತಂಡ್ ವೇಷ ಇಟ್ಟಂಡ್ ಬಕ್ಕಡಾ?
- ಪೂವಿ : ಬಾಕಿ ಉಳ್ಳಯಿಂಕೆಲ್ಲ ಕ್ಕಾಟ್ಟುವ. ನೀಕ್ ಮಾತ್ರ ಕ್ಕಾಟ್ಟತದ್. ನಾಕೆಲ್ಲ ಗೊತ್ತುಂಡ್. ಮನೆಲ್ ಎಂತೂ ಬಿಟ್ಟಿ ಪೊಣ್ಣುಂಡ್. ಅನ್ನನಿಪ್ಪಕ ಬೋರೆ ಅಳ ಎಂತಾಂಗ್ಂದ್ ನೀಡ ಕೇಣೆ?
- ಮಾಚು : (ತೆಳಿ) ಬಿಟ್ಟಿ ಪೊಣ್ಣ್! ಅಲ್ಲೆಂಗಿ ಮಾತ್ರ ನೀಕೆನ್ನ ದುಡ್ಡ್ ಕೊಡ್ತಿತ್ ಕ್ರಯಕ್ ಕೊಂಡ ಬಂತುಳ್ಳನಾ ಪೂವಿ? ಅನ್ನನೆ ಎಣ್ಣುವದಾಚೆಂಗಿ ನಾನೂ ಬಿಟ್ಟಿವಡಿಯನೇ!
- ಪೂವಿ : ನೀನ್ ಎಕ್ಕೊಲೂ ಇನ್ನನೇ. ಏದ್ ವಿಷಯತ್ನೊ ಸೀರಿಯಸ್ ಆಯಿತ್ ಎಡ್ತವದೇ ಇಲ್ಲೆ.
- ಮಾಚು : ಎನ್ನ ಪ್ರಯೋಜನ ಪೂವಿ? ಬಂದಾನ ತಡ್ಪಕ್ ಯಾಂವಂಗೂ ಕಯ್ಯಲೆ. ಬಂದದ್ ಬರಡ್ ದೇವಡ ದಯ ಇರಡ್ಂದ್ ಆರಾಮ್ ಇಂಜಿರೊಂಡು! ಅದಿರಡ್, ಅಗೆ ಎಡ್ಪಲ್ಲಿ ಒಂದೂ ಪಳಮೆ-ಗಳಮೆ ಇಲ್ಲಿಯಾ?
- ಪೂವಿ : ಅಯ್ಯೋ ಬಾ. ಪಳಮೆಕ್ ಎನ್ನೆಂಗಿ ಬರೆ ಉಂಡಾ? ನಾನಾಯಿತ್ ನೀಕ್ ಎಣ್ಣುವಕ್ ಬಾತೆಂಗಿ, ಕಂಡವಂಡ ಸುದ್ದಿ ನೀಕೆನ್ನಂಗೆಂದ್ ನೀಡ ಬಾಯಿಂಜ ಬೈಗಳ ಕೇಟವಕಾಚಿ. ಎಣ್ಣುತಿಂಜಕ, ಇನ್ನನೆ! ಬಾರಿ ಕಷ್ಟ ಉಂಡ್ ಮಾಚು

ನೀಡ ಸಾವಾಸ!

- ಮಾಚು : ನಾನ್ ಎಣ್ಣೆದೊಂದ್, ನೀನ್ ಅರ್ಥ್ ಮಾಡ್ಯವದ್ ಇಂಞೊಂದ್. ನಾನೆನ್ನೆ ಮಾಡಡ್?
- ಪೂವಿ : ಅನ್ನನೆ ಎಣ್ಣೆಕ? ಆಂಡ ಅರ್ಥ್ ಎಂತೆಂದ್ ಬೋಂಡುವಲ್ಲ?
- ಮಾಚು : ಅನ್ನನೆ ಎಣ್ಣೆಕ ನೀಡ ಮಂಡೆರೊಳ್ಲ್ ಮೂಳೆ ಇಂಞೊ ಚಾಯಿಲ್ ಆತಿತ್ಲೆಂದ್!.... ಕೇಪ ನೋಟವ! ಅಲ್ಲ ಪೂವಿ, ಅಲ್ಲಿ ಪರಂದಾನ ಬೋರೆಲ್ಲಿಯೋ ಒರ್ ಜಾಗತ್ ಬಾಯಿ ಬುಡತೆಂದ್ ಮಾತ್ರ ನಾನ್ ಎಣ್ಣೆದಲ್ಲತೆ, ನಾಡ ಕೂಡೇ ಎಣ್ಣೆಂಡಾಂದ್ ಎಣ್ಣೆನಾ?
- ಪೂವಿ : ಓಹೋ, ಇದಾ ವಿಷ್ಯ? ನೀನ್ ಮಾತ್ರ ದಾಕೂ ಎಣ್ಣೆಲೆಂದ್ ಏದ್ ಗ್ಯಾರಂಟಿ ಮಾಡೂ? (ತೆಳಿ)
- ಮಾಚು : ನಾನ್ ಎಕ್ಕೇಂಗಿ ದಾಡ ಕೂಡೇಂಗಿ ಬಾಯಿ ಬುಟ್ಟಿದ್ ಗೊತ್ತುಂಡ ನೀಕ್?
- ಪೂವಿ : ಸರಿ ಅಂದಕ, ಏದ್ ವಿಷ್ಯ ಎಣ್ಣೆಡ್ ಮಾಡೂ ಸುರೂಲ್?
- ಮಾಚು : ಏದ್ ವಿಷ್ಯಂದ್ ಎಣ್ಣೆಕ? ಅಚ್ಚೆಕೊರ್ ವಿಷ್ಯ ಉಂಡಾ ಅಂದಕ!
- ಪೂವಿ : ವಿಷ್ಯ ಸುಮಾರುಂಡ್ ಮಾಡೂ. ನಂಜು ಕ್ಕೊಣ್ಣ ಮೂಡಿ ತೇಡುವಕ್ ಪೋನ ಕತೆ ನಲ್ಲ ರಸ ಉಂಡ್.
- ಮಾಚು : ಏದ್ ನಂಜು? ದೇವಿ ಬಾವಂಡಲ್ಲಿ ಉಂಡಲ್ಲ, ಅವನಾ?
- ಪೂವಿ : ಅಕ್ಕು ಮಾಡು. ವಯಸ್ ನುಪ್ಪದ್ ನುಪ್ಪತ್ತಂಜಿ ಆಚಲ್ಲ? ಏದ್ ಮೂಡಿಯಳೂ ಇವನ ಒತ್ತೊವುಲೆಲೊ!
- ಮಾಚು : ಎಲ್ಲಿಕ್ ಪೋಯೆ ಮೂಡಿ ನೋಟುವಕ್?
- ಪೂವಿ : ರಘು ಕ್ಕೊಣ್ಣ ಕೂಟಿಯ ಪೋಯೆ ಇವನ. ಈ ಪುಣ್ಯಾತ್ಮಂಗೆ ಕಳ್ಳುಕುಪ್ಪಿ ಕೂಡೇ ಬೋಂಡು! (ತೆಳಿ) ಆಂಗೇ ಅನ್ನನೆ ಆಯೆ!
- ಮಾಚು : ಅನ್ನನೇಂದೆಣ್ಣೆಕ?
- ಪೂವಿ : ಒರ್ ಮೂಡಿನ ನೋಟುಕ್ಂದೇ ರಘು ಕ್ಕೊಣ್ಣ ಇವನ ಜುಲ್ಮೆ ಮಾಡಿತ್ ಕೂಟಿಯ ಪೋಚಿ. ಮಂಗಲತ್ ಕ್ಕೊಣ್ಣನೂ ಮೂಡಿಯೂ ಒಬ್ಬೊ ಒಬ್ಬನ ನೋಟವಡ್ಂದೂ ತೀರ್ಮಾನ ಆಚಿ...
- ಮಾಚು : ಅಲ್ಲಿಂಜ?
- ಪೂವಿ : ಮೂರ್ತ ನೇರಕೆತ್ತನೆ ದಂಡಾಳೂ ಕೂಡೇ ಓಡಿಕ್ಳಚಿತ್. ಮೂರ್ತಕ್ ಅಳ್ಪಕಾಪಕ ನಂಜು ಕ್ಕೊಣ್ಣ ಇಕ್ಕ ಬಂದ್ತೇಂದ್ ಟಾಯಿಲೆಟ್ಕ್ ನುಗ್ಗಿತ್!
- ಮಾಚು : ಅರೆ, ಟಾಯಿಲೆಟ್ಕ್ ಪೋಚೆಂಗಿ ಅದಾಲೆಂತ ನೀಕ್ ತೆಳಿಪ್ಪುಕುಲ್ಲೆ?

ಸಕನು ಪೂಮ್ಯಾಲೆ

- ಪೂವಿ : ವಿಷ್ಯ ಪೂರ್ತಿ ಕೇಳ್ ಮಾಚು. ನೀನ್ ಪಾದಿಲ್ ಅರ್ಜಂಟ್ ಕಳಿಕ್ಕತೆ....
- ಮಾಚು : ನೀನೂ ಅದೇ ಥರ ಮಾಡುವೊ ಪೂವಿ. ವಿಷ್ಯ ಎಂತೆಂದ್ ಪೂರ್ತಿ ಎಣ್ಣುವಕೇ ಪುರುಸೊತ್ತಿಲ್ಲೆ. ಅಲ್ಲಿಂಜೆಂತಾಚಿ... ಅಲ್ಲಿಂಜೆತಾಚೆಂದ್ ಅಲ್ಂಬಲ್ ಕಳಿಪ್ಪಿಯ!
- ಪೂವಿ : ಆಚಪ್ಪ. ನಾನ್ ಬುದ್ಧಿ ಇಲ್ಲತವ. ನೀನ್ ಬುದ್ಧಿಕಾರ ಅಲ್ಲ ಮಾಚೂ? ನೀನ್ ಅನ್ನನೆ ಕಳಿಪ್ಪಕಾಗಲ್ಲ?
- ಮಾಚು : ಸಾವಾಸ ದೋಷ ಪೂವಿ. ಕತ್ತರ ಕೂಡ ಕೂಡಿಟಕ ಕುದುರೆಯೂ ಓರಮ ಕತ್ತರನ್ನಕೇ ಕಳಿಪ್ಪೊಲೊ!
- ಪೂವಿ : (ಚೆಡಿಸ್ಸರ) ಮಾಚೂ, ನೀನ್ ನನ್ನ ಕತ್ತೇಂದ್ ಎಣ್ಣುಂಡುಳ್ಳಿಯಲ್ಲ?... ನಿಂದ ನಾನ್ ಪಪ್ಪಂಗ್ ಎಣ್ಣೆ ಕೊಡ್ತಿ!
- ಮಾಚು : (ತೆಳಿ) ಚೆರಪತಾರ ಕಳಿ ಬುಟ್ಟಿತೇ ಇಲ್ಲೆಲ್ಲ ನೀನ್? ಪ್ರತಿಯೊಂದಾಂಗೂ ಪಪ್ಪಂಗಣ್ಣೆ ಕೊಡ್ತಿ -ಪಪ್ಪಂಗಣ್ಣೆ ಕೊಡ್ತೀಂದ್!
- ಪೂವಿ : ಪಿಂಚಾಂತ ಮಾಚು ನೀನ್! ತಮಾಷಿ ಕಳಿಪ್ಪಾಂಗೂ ಒರ್ ಮಿತಿ ಉಂಡ್. ಕತ್ತಕೊಂಜ ಕಡೆ ಆಯಿತ್ ನೈಚಂಡ್ ಇಂಜಕಲೂ ಒರ್ ನಲ್ಲ ತಕ್ಕ ಇಲ್ಲೆ ನೀಡ ಬಾಯಿಲ್.... ಇಂಡೈರೆಕ್ಕಾಯಿತ್ ಕುತ್ತುವೊ ಬೋರೆ!
- ಮಾಚು : ಪೂವಿ, ನಾಡ ಸರ್ವ ತಪ್ಪಾಚಿ. ಇಂಚಾ ಮಿಂಚಾಕ್ ನೀನ್ ಕತ್ತೆಯೂ ಅಲ್ಲ. ನಾನ್ ಕುದುರೆಯೂ ಅಲ್ಲ. ಗೊತ್ತಾಚಾ?
- ಪೂವಿ : ಓಹೋ, "ಇಲ್ಲಿಕೆತ್ತನೆ ನಾನ್ ಅದೇಂದ್" ಆಯಿಲಿಯಾ ಅಂದಕ?
- ಮಾಚು : ಅಯ್ಯೋ ರಾಮಾ! ನಲ್ಲ ಕಷ್ಟಾಚಲ್ಲ ಇವಡ? ಇಲ್ಲಿಕೆತ್ತನೆಯೂ ನೀನ್ ಕತ್ತೆ ಅಲ್ಲ ದೇವಡಾಣೆಕೂ!
- ಪೂವಿ : (ತೆಳಿ) ಅನ್ನನೆ ಬಾ ಮಾಚು ಬಟ್ಟೆಕ್! ಆಣಾಳ ಪರಂದಾನೆಲ್ಲ ಕೇಟಂಡ್ ಮಂಡೆ ಕುಂಬ್ಚೆಂಡ್ ಅಳ್ಪ ಕಾಲ ಇದಲ್ಲ ಮಾಚು. ನಂಕೂ ಸ್ವಂತ ಆಲೋಚನೆ, ಗೇನ ಶಕ್ತಿ ಎಲ್ಲ ಉಂಡ್!
- ಮಾಚು : ಅರೆ, ಒಬ್ಬಳೇ ಉಳ್ಳಿಯ? ನಂಕೂಂದ್ ಎಣ್ಣುಂಡುಳ್ಳಿಯ! ನೀಡ ತಡಿಕ್ ಎನ್ನೇಂಗಿ ಕೂಡ್ಯಂಡಿತಾ? ಕೂಳಿ ಮಾರಿ ಎಕ್ಸೆಟ್ರಾ, ಎಕ್ಸೆಟ್ರಾ!
- ಪೂವಿ : ಅಲ್ಲ ಮಾಚೂ, ಪೇಟೆಕ್ ಪೋನಂವೊ ಬೆರಿಯ ಬಪ್ಪೀಂದ್ ಅಚ್ಚಕ್ ನೇರ ಏಲೆ ಪೋಯಿಟ್ಟೆ ನೀನ್?
- ಮಾಚು : ಅಯ್ಯೋ ಬಾ. ನಿಂಗ ಪೊಣ್ಣಾಳ ದುಂಬ ಬೇಜಾರಾಚೆಂಗಿ ಒಂದೋ ಕಣ್ಣೊನೊ ಮೂಕ್ನೋ ಉದ್ದಿಯಂಡೂ, ತೇಟಿಯಂಡೂ ಮೊರಟ್ಟಿತೇಂಗಿ ನಿಂಗಡ

ಬೇಜಾರ ಕಳಂದವಿರ. ಇಂಗೂ ಬೇಜಾರ ಜಾಸ್ತಿ ಆಚಿಂಗಿ ಬೆಚ್ಚಿ ತಾಮನೆಕ್ ಅಳುವಿರ. ನಂಗಡದೋ ನಾಯಿ ಪಾಡ್!

ಪೂವಿ : ನಂಗಾಂದ್ ಎಣ್ಣಕ? ನೀಡ ತಡಿಕೂ ಬೀರಂಡ ಸೋಕಾಯಿತಾ ಮಾಚು?

ಮಾಚು : ನಂಗಾಂದ್ ಎಣ್ಣಕ ಅಣಾಳಾಂದ್ ಎಣ್ಣವ ಅರ್ಥತ್ ಎಣ್ಣಂಡುಳ್ಳ ನಾನ್. ಎಲ್ಲಿಯೋ ಒರ್ ಜಾಗಕ್ ಪ್ರೋಯಿತಿಪ್ಪ. ಕಾಂಬವನ ಕಾಂಗೊಂಡು ಕೇಪವನ ಕೇಕೊಂಡು. ಕಾಂಬಂವೊ ಕೇಪಂವೊ ದಂಡಾಳೂ ಕ್ವಾಟ್ಲೇಂದ್ ಬೆಚ್ಚ. ಅಕ್ಕ ಪೊಂಗಡನ್ನಕೆ ಮೊರ್ಟ್ಟಂಡ್ ಅಳತವಕಾಪ ಎಣ್ಣ ಅಣಾಳಕ್?

ಪೂವಿ : ಅಯ್ಯಯ್ಯೋ! ದಾರ್ ಮಾಚು ನಿನ್ನ ತಡ್ತಿಯೆ? ನೀನೂ ಮೊರಡೊಲು!.... ನಾನೆನ್ನ ತಡ್ತನಾ? (ತೆಳಿ)

ಮಾಚು : ತೆಳಿಪ್ಪೊ ನೋಟವ! ವಡಿಯಂಡ ಕಷ್ಟ ಅರ್ಥ ಮಾಡ್ಯವಂಡು ಪೂವಿ, ಮಿಂಞ.

ಪೂವಿ : ವಡಿಯನೂ ಅಚ್ಚಿಕೇ ಮಾಚೂ. "ಮನೆಲ್ ಪೊಣ್ಣಾನವ ಇಚ್ಚಕೆಲ್ಲ ಪೇಚಾಡುವ. ಅವಡ ಕಷ್ಟ ಸುಖ ಎಂತೇಂದ್ ಕೇಕನಾಂದ್" ವಡಿಯಂಗೂ ಗೇನ ಬೋಂಡು!

ಮಾಚು : ಆಂಡ ಅರ್ಥ, ನಾನ್ ನೀಡ ಕಷ್ಟ ಸುಖ ಕೇಟಂಡಿಲ್ಲೇಂದ್. ಅಕ್ಕುವಾ?

ಪೂವಿ : ಅಕ್ಕೊಂದ್ ಎಣ್ಣ ಚಿಂಗಿ ನೀನ್ ಏಕಿದಂ ಜಗಳಕ್ ಇಳಿಯುವಿಯ. ಅಲ್ಲಾಂದ್ ಎಣ್ಣಕ ಅದ್ ಸತ್ಯಕ್ ದೂರ ಆಪ.

ಮಾಚು : ಅಕ್ಕ ಎಂತ ಮಾಡೊಂಡೂ? (ತೆಳಿ) ಕೊಡಿ ಮನೆ ತಾತನೂ ತಾಯಿಯೂ ಮಾಡುವಲ್ಲ? ಅನ್ನನೆ ಮಾಡೊಂಡು!... "ಉಂಬಕ್ ಬಟ್ಟ ಬೆಚ್ಚಿಯೆ ಕೆಂಜು ನಾಯಿ. ನೀಡ ಯಜಮಾನ ಬೋಂಡೆಂಗಿ ಬಂತ್ ಉಂಗೊಲೂಂದ್" ತಾಯಿ ಕಾಕಿತ್ ಎಣ್ಣವೊ. ಅಕ್ಕಣೆ ತಾತ "ಕೋಟ ಆಯಂಡುಂಡ್ ಚೆನ್ನ ಬಿಸಿ ಬಿಸಿ ಇರಡ್ಂದೆಣ್ಣ ಕೆಂಜು ನಾಯೀಂದ್" ವಾಪಾಸ್ ಎಣ್ಣವಕಾಚಿ! (ತೆಳಿ)

ಪೂವಿ : (ತೆಳಿ) ಬಂದ ಬೆಂದ್ಕಡದಿಕ್ಕೆ ಕೂಡಿ ಇವು ಅನ್ನನೇ ತಕ್ಕ ಪರಂದಂಡಿಂ ತೊಲ್ಲೊ ಮಾಚು!

ಮಾಚು : ಎಲ್ಲಿಯೋ ಒರ್ ಜಾಗತ್ ಅನ್ನನೇ ಆಯಿತೊಲೊ ಪಂಡ್. ವಡಿಯ ಪೊಣ್ಣಾನ ಏದೋ ಒರ್ ಕೆಟ್ಟ ತಕ್ಕಲ್ ಕಾಕುವಿಂಜತೊಲೊ...

ಪೂವಿ : ಕೆಟ್ಟ ತಕ್ಕಂದೆಣ್ಣಕ?

ಮಾಚು : ಕೆಟ್ಟ ತಕ್ಕಂದೆಣ್ಣಕ ಕೆಟ್ಟ ತಕ್ಕ ಅಚ್ಚಿಕೆ. ವಡಿಯ ಚತ್ತಯಿಂಗಕ್ ಎಣ್ಣವಲ್ಲ ಆ ತಕ್ಕ. ಬಂದ ಬೆಂದುಕ್ ಎಂತಾಯಿತ್? ಒಹೋ, ಇದೇ ಇವಡ ಪೆದ ಆಯಿತಿಕ್ಕು ಕಾಂಬಾಂದ್ ಅವನೂ ಅದೇ ತಕ್ಕಲ್ "ನಾನ್ ಇಂಞಿ ಪ್ರೋಯಿತ್"

ಸಕನು ಪೂನ್ಯಾಲೆ

ಬಪ್ಪಿ ಡ್ಯಾಶ್ ಡ್ಯಾಶ್‌ಂದ್" ಎಣ್ಣೆತ್! (ತೆಳಿ)

ಪೂವಿ : ಥೂ!.... ಪಾಳಾನಂವೊ! ಅಚ್ಚಕೂ ಗೊತ್ತಾಯಿಲಿಯ ಆವಂಗ್?

ಮಾಚು : ಎನ್ನನೆ ಗೊತ್ತಿಪ್ಪ ಪೂವಿ? ಅದೂ ಒರ್ ಪೆದ ಆಯಿತಿಕ್ಕೂಂದ್ ಗೇನ ಮಾಡಿತಿಪ್ಪ.

ಪೂವಿ : ಅದೆಲ್ಲ ಇರಡಲ್ಲಿ. ಪೇಟೆಕ್ ಪೋನಂವೊ ಅಚ್ಚಕ್ ನೇರ ಎಂತ ಮಾಡಿಯಾಂದ್ ಎಣ್ಣೆ ಮಾಚು ನೀನೊಮ್ಮೆ. ಆನಾನ ಪೋನಾನ ಮನೆಲ್ ಬಂತ ಪೋಣ್ಣಾರ ಕೂಡೆ ಎಣ್ಣೊಂಡೂಂದೂ ನಾನೇ ಎಣ್ಣೆ ತಕ್ಕೊಂಡುವಾ ನೀಕ್?

ಮಾಚು : ಅದ್‌ನೆಲ್ಲ ಎಣ್ಣೆಚೆಂಗಿ ನೀಡ ಪಕ್ಕ ಆಂಗೆಲ್ಲ ಪರಿಹಾರ ಉಂಡಾ ಅಂದಕ?

ಪೂವಿ : ಪರಿಹಾರ ಇಪ್ಪ ಮಾಚು. ದುಡ್ಡ್ ಕಾಸ್‌ಕ್ ಕಷ್ಟ ಆಪಕ ಎಚ್ಚಕ್ ಕುರಿ ನಾಡ ಮಾಲ್‌ಮಟ ತಂತಲೆ ನಾನ್ ನೀಕ್? ಓರಚ್ಚಕ್ ಮಾಲ್ ಮಟ ಮಾಡಿತ್ ಬೆಚ್ಚೆಂಡಿಯೆ ಪಿಂಞ ಎಂತಾಂಗ್? ಬೋರೆ ಬಟ್ಟೆ ಇಲ್ಲೆಂದಾಪಕ ಅದ್ ನಂಗಳ ಕಾಪಾಡುವ.

ಮಾಚು : ನಿಂಕೆಲ್ಲ ಎಣ್ಣೆಚೆಂಗಿ ಅರ್ಥ ಆಪುಲೆ ಪೂವಿ. ಲೋನ್‌ಕ್ ಅಪ್ಪೆ ಮಾಡೊಂಡೂಂದಾಚೆಂಗಿ ಬ್ಯಾಂಕ್‌ಕಾರ ನಂಗಳ ಕರುಬಟ್ಟಿನ ಸತಾ ಬಲ್‌ಚಿರುವ. "ಪೋ, ಎಲ್ಲಾ ಬ್ಯಾಂಕ್‌ಂಜೂ 'ಸಾಲ ಇಲ್ಲೆಂದ್' ದೃಢೀಕರಣ ಪತ್ರ ಕೊಂಡ ಬಾಂದ್ ಎಣ್ಣುವ ಅದಾಚಾ.... ನೆಮ್ಮದಿ ಕೇಂದ್ರಕ್ ಪೋಪಂಜಿ ಭೂ ಹಿಡುವಳಿ ಪತ್ರ ಕೊಂಡ ಬಾಂದ್ ಎಣ್ಣುವ. ಅದಾಚಾ..... ಸಬ್‌ರಿಜಿಸ್ಟ್ರಾರ್ ಆಫೀಸ್‌ಕ್ ಪೋಪಂಜಿ E.C. ಕೊಂಡಬಾಂದ್ ಎಣ್ಣುವ. ಎಲ್ಲಾ ರೆಡಿ ಮಾಡ್ಯಂಡ್ ಪೋಕಣೆ ಸರ್ವೆ ಸೈಚ್ ಎಲ್ಲಿಯಾಂದ್ ಕೇಪ. ಕಂದಾಯ ರಸೀತಿ, ಮೂಂದ್ photo ಕೊಂಡ ಬಂತುಳ್ಳಿಯಲ್ಲಾಂದ್ ಅಗ್ರಾಣೆ ಇಡುವ!

ಪೂವಿ : ಉಯೀ ದೇವಳೇ! ಎಲ್ಲಿಕೆಲ್ಲ ಸುತ್ತಿಯ ಮಾಚು ಇಂದ್?

ಮಾಚು : ಕಾಲ್‌ರ ಏಳ್ ತೋಲ್ ತೇಂಚೊಚಿ. ಬ್ಯಾಂಕ್‌ಕ್ ಪೋಪಕ ಒರ್ ಪುಣ್ಯಾತ್ಮ ಸಾರ್ ಒರ್ ಗಳಿಗೆ ಪೆನ್ನ ತಾರೀಂದ್ ಕೇಟಂಡತ್. ಅಕ್ಕಣೆ ಅವಂಗ್ ದಾಡದೋ phone ಕಾಲ್ ಬಾತ್. ಅಸಾಮಿ ತಕ್ಕ ಪರ್‌ಂದಂಡ್, ಪರ್‌ಂದಂಡ್ ಒರ್ ಕೈಲ್ ಪೆನ್ನನೊ ಪುಡ್‌ಚಂಡ್ ಪೋನದ್ ಪೋನದೇ. ನಾನ್ ಇಲ್ಲಿ ಚೆಕ್ ಡ್ರಾ ಮಾಡಿಯವದಾ? ಇವಂಡ ಬಯ್ಯ ಕೂಡೆ ನಾಡ ಪೆನ್ನ ನಾಡ ಪೆನ್ನೆಂದ್ ಬಿಕ್ಕಿ ಬೋಡಿಯಂಡ್ ಪೋಪದಾ?

ಪೂವಿ : ಅಲ್ಲ ಮಾಚೂ, ಎಚ್ಚಕ್ ಪೆನ್ನ ಇನ್ನನೆ ಕಳಂದಂಡಿಯ ನೀನ್? ಒಮ್ಮೆ ಕುಂಡ್‌ಕ್ ಬೂವಕಲೇ ಎಚ್ಚರಾಂಡು. ಎಚ್ಚಕ್ ಪೆನ್ನಾಚಿ ಕಳಂದವದ್!

ಮಾಚು : ಅಯ್ಯೋ ಬೋಂಡೂಂದ್ ದಾರೂ ಅನ್ನನೆ ಮಾಡುಲೆ ಪೂವಿ. ಅಕಸ್ಮಾತ್ ಅನ್ನನೆ ಅಯಿರುವ ಅಚ್ಚಿಕೆ. ಒರ್ ಪೆನ್ನಲ್ ಅಯಿಂಗಿನ್ನ ಮಾಡಿ ಮನೆ ಕೆಟ್ಟಿರುವಾ ಎಣ್ಣೆ?

ಪೂವಿ : ಅಯಿಂಗ ಮಾಡಿ ಮನೆ ಕೆಟ್ಟತಿಂಜಕಲೂ ಪೆನ್ನ ಕಳಂದಂಡ ಪುಣ್ಯಾತ್ಮ ಅಕ್ಕಾಕ ಪತ್ತಿರುವದ್ ಕೊಡ್ತಿತ್ ಪೆನ್ನ ಎಡ್ಕೊಂಡುವಾ? ಅದೇ ಪತ್ತಿರುವದ್ ಉರ್‌ಪಿಯತ್‌ನೇ ಕೂಟಿ ಬೆಚ್ಚಕ ಎಕ್ಕೇಂಗಿ ಇವನೂ ಮಾಡಿ ಮನೆ ಕೆಟ್ಟೊಲು.

ಮಾಚು : ಓಹೋ ಬೇರ್ ಬಾರಿ ಆಳತೇ ಉಂಡ್. (ಸ್ವಗತ) ಇನ್ನನೆ ಲೆಕ್ಕ ಇಟ್ಟಿತಿಂಜಕ ಇಕ್ಕಾಕಣೆ ನಾಲ್ ಮಾಡಿ ಮನೆ ಕೆಟ್ಟೊಲಿಂಜತ್.

ಪೂವಿ : ಎಂತ ಎಣ್ಣೆಯ?

ಮಾಚು : ಒಂದೂ ಇಲ್ಲೆ.... ಅಂದ್ ಮೀಟಿಂಗ್‌ಕ್ ಪೋನವ ಮಹಿಳಾ ಸಮಾಜತೇ ಕೂಡ ಬುಟ್ಟಿತ್ ಬಂದಿಯಲ್ಲ? ಅದ್ ಕಾಟ್ವಾವನ್ನಕ ಉಂಡಾಂದ್?

ಪೂವಿ : ಮಳೆಗಾಲತ್ ಕಳಂದಂಡ ಕೂಡೆಯೂ, ಮಂಗಲತ್‌ರ ಮನೆಲ್ ಕಳಂದಂಡ ಚಪ್ಪಲೂ ಬಯ್ಯಕ್ ಕ್ಕಟ್ಟುವಾ ಮಾಚು?

ಮಾಚು : ಒರ್ ಪೆನ್ನಕ್ ಎಚ್ಚಕ್ ರೇಟ್ ಪೂವಿ? ಅಪ್ಪರಾಲ್ ಪತ್ತಿರುವದ್ ಉರ್‌ಪಿಯ. ಆಚೆಂಗಿ ಕೊಡೆಕ್?...ಮಂಗಲಾನ ಪಿಂಞ ಎಚ್ಚಕ್ ಕೂಡೆನ ಕುರು ಇಟ್ಟಿತ್ ಬಂತಲೆ ನೀನ್?... ಎಣ್ಣೆ ನಾಕೊಮ್ಮೆ!

ಪೂವಿ : ಓ ಹೊಹೋ, ಮಂಗಲತ್‌ರ ಮನೆಲ್ ಆಯಿರ ಉರ್‌ಪಿಯತ್‌ರ ಪುದಿಯ ಶೂನ ದಾನ ಮಾಡಿತ್ ಬಂದದ್? ಆಯಿರತ ಅಂಞೂರ್ ಉರ್‌ಪಿಯತ್‌ರ ಕಾಶ್ಮೀರ ಚೇಲೆನ ದಾನ ಕೊಡ್ತಿತ್ ಬಂದದ್?

ಮಾಚು : (ತಳಿ) ಪೂವಿ, ಅಗೆ ಎಡ್‌ಪಲ್ಲಿ ಎಂತೆಂತೋ ಪಳಮೆ ಉಂಡ್‌ಂದೆಣ್ಣೆಯ ಎಣ್ಣೆದೇ ಇಲ್ಲೆಲ್ಲ?

ಪೂವಿ : ನೋಟ್, ನೋಟಂವೊ ಎಚ್ಚಕ್ ಬೆರಿಯ Topic ಚೇಂಜ್ ಮಾಡುವಕ್ ನೋಟುವೊ! ತಾಂಡ ಬಟ್ಟತ್ ಎಲಿ ಚತ್ತಿತ್ ಬುದ್ದದ್ ಗೊತ್ತೇ ಇಲ್ಲೆ.... ಕಂಡಂವಂಡ ಬಟ್ಟತ್‌ರ ವಲ್‌ಂಜಿ ಚತ್ತದೇ ಬಲ್ಯದಾಯಿರುವ.

ಮಾಚು : ಎಂತಾಚಿ ಪೂವಿ ಇಕ್ಕ ಅಂತದ್? ಅಯ್ಯೋ ಪಾಪ! ನಂಗಡ ಮಾಚುಕ್ ಇಕ್ಕಿಕ್ಕ ಪೆರ್ತ್ ಮರ್‌ಪು! ಎಣ್ಣೆದೇ ಗೇನ ಇಪ್ಪುಲೆ.

ಮಾಚು : ನೀಕಿಕ್ಕ ಎಂತೆಂಗಿ ಒಂದಾನ ಎಣ್ಣೆತ್ ಮಾಚುಕ್‌ಂಜ ನಾನೇ ನಿಸೂರತಿಂದ್ ಪ್ರೂವ್ ಮಾಡೊಂಡು ಅಚ್ಚಿಕೆ!

ಪೂವಿ : ಪ್ರೂವ್ ಮಾಡುವೊ ಅಲ್ಲ ಮಾಚು. ಸತ್ಯ ಸಂಗತಿನ ಎಣ್ಣೆಂಡುಳ್ಳ ಎಚ್ಚಕೋ

ಮನೆಲ್ ನಡಂದಂಡುಳ್ಳ ಸಂಗತಿನ ಎಣ್ಯಂಡುಳ್ಳ ನಾನ್. ವಡಿಯಂಗ ಎಂತದೇ ಮಾಡನಕಲೂ ಅದ್ ಚಿಲ್ಲರೆ ವಿಷ್ಯ. ಪೂಣ್ಣಾನವ ಎಂತದೇ ಮಾಡನಕಲೂ ಅದ್ ಬಲ್ಲಾದೇ ವಿಷ್ಯ. ಅಕ್ಕುವಾ -ಅಲ್ಲಾ ಎಣ್ಣೆ!

ಮಾಚು : (ಸ್ವಗತ) ಇಕ್ಕ ಅಕ್ಕೂಂದ್ ಒತ್ತವತೆ ವಿಧಿ ಇಲ್ಲೆ. ಕೇಸ್ ಸೀರಿಯಸ್ ಆಯಿಟಕ ಇವ ನಾಳೆ ಬಸ್ ಪತ್ತಿಟಕಲೊ? ಅಗೆ ಎಡ್‌ಪಕೂ ಬಾಕಿ ಉಂಡ್. ಜಗಳಕ್ ಇದ್ ಸಮಯ ಅಲ್ಲ! ಪಣೆ ಎಲ್ಲ ತೇರಡ್. ಅಕ್ಕ ನೋಟ್ಯವಿ!

ಪೂವಿ : ಎಂತ ಮಾಚೂ, ಒಬ್ಬನೇ ಗೊಣಗಿಯಂಡುಳ್ಳಿಯ? ನಾಡ ತಕ್ಕ ಕೇಟ್‌ಲಿಯ ನೀಕ್?

ಮಾಚು : ಕೇಟ್ ಪೂವಿ. ನಾನೂ ಅದನೇ ಎಣ್ಯಂಡುಳ್ಳ. ಈ ಆಣಾಳಕ್ ಬುದ್ದಿ ಇಲ್ಲೆ!

ಪೂವಿ : ಅರೆ, ನೀಕೆಕ್ಕ ಇಂತ ಬುದ್ದಿ ಬಂದ್‌ಟಿಯೆ ಮಾಚೂ? ನೀನೂ ಆಣಾಳೇ ಅಕ್ಕುವಲ್ಲ? ಅಂದಿತೂ ಸತ್ಯ ಒತ್ತಂಡುಳ್ಳಿಯ? (ತೆಳಿ)

ಮಾಚು : ಆಣಾಳೋ-ಪೂಣ್ಣಾಳೋ ಅಯಿಂಡ ಬಾಯಿಕಿಚ್ಚಕ್ ಮಣ್ಣ್ ಬೂವಡ್ ಪೂವಿ. ಪಲ್ಲ್ ಕುತ್ತಿತ್ ನಾತ ನೋಟ್ಯಂಡತ್‌ಂದ್ ನಂಗ ನಂಗ ಎನ್ನಂಗ್ ಕಡ್‌ಚಿ ಬೂವೊಂಡು?... "ಓ ಮಾಚುರಲ್ಲಿ ವಡಿಯಂಗೂ ಪೂಣ್ಣ್ ಕೂ ಚೆನ್ನ ಅನ್ನನಲೊ! ದಂಡಾಳಕೂ ಇಟ್ಟ ಅಕ್ಕಿ ಬೇವುಲೆಲ್ಲೊಂದ್ ಇಂಇೊಬ್ಬಂಡ ಬಾಯಿಕ್ ನಂಗನ್ನಂಗ್ ಬೂವೊಂಡು?

ಪೂವಿ : ಅನ್ನನೆ ಬಾ ಮಾಚು ಬಟ್ಟೆಕ್! ನೀನ್ ಪೆನ್ನ ಕಳಂದಿತುಳ್ಳಿಯ- ನಾನ್ ಕೊಡೆ ಕಳಂದಂಡಿಯೆ. ನಾನ್ ಬೊರೀ ಚಪ್ಪಲ್ ಕಳಂದಂಡಕ ನೀನ್ ಅಚ್ಚಕ್ ರೇಟ್‌ರ ಚೇಲೆನೇ ಕಳಂದಂಡಿತುಳ್ಳಿಯ. ಇಂಇೊಬ್ಬನ ದೂರುವವು ತಂಗ ಸುಭಗಂಗ ಆಯಿತಿಕ್ಕೊಂಡು. ಎನ್ನೆಣ್ಣುವಿಯ?

ಮಾಚು : ಅಯ್ಯೋ ಮದಿ..... ಮದಿ..... ಪರಂದಾನೇ ಪರಂದಂಡ್ ಬಬ್ಲಗಮ್ ಮಾಡತೆ ಪೂವಿ. ಕೇಟ್ ಕೇಟ್ ಕೆಮಿ ಕೀತಿ ಪೋಪ. ಆಪ ಪೋಪಾನ ಪರಿಯನ. ನಂಜುರ ಕತೆನ ಪಾದಿಕೇ ಮಾಡಿಟಿಯ- ನಾಕ್ ಮಾತ್ರ ಎಣ್ಣೆರುವಿಯ- ವಿಷ್ಯ ಬುಟ್ಟಿತ್ ಕುಂದ್ ಪತ್ತುವಿಯಾಂದ್!

ಪೂವಿ : (ತೆಳಿ) ನಂಜುರ ಕತೆ ಕೇಟಕ! ಇವಂಡ ಪ್ಯಾಂಟ್ ಜೋಬ್‌ರೊಳ್‌ಲ್ ಒರ್ ಕಳ್ಳ ಕುಪ್ಪಿ ಉಳ್ಳದ್ ರಘು ಕ್ಕಣ್ಣಂಗ್ ಗೊತ್ತುಂಡೆಂಗಲ್ಲ? ಈ ಪುಣ್ಯಾತ್ಮ ಅದನ ಪುರ್ಕ ಪೀಂದಿತ್. ಅದೂ ಎಲ್ಲಿಂದ್ ಗೇನ ಮಾಡಿಯಾ?....

ಮಾಚು : ಎಲ್ಲಿ? ಟಾಯಿಲೇಟ್‌ರೊಳ್‌ಲಾ? (ತೆಳಿ)

ಪೂವಿ : (ತೆಳಿ) ಅಕ್ಕು ಮಾಚೂ! ಪನ್ನಂದ್ ಗಂಟೆಕ್ ಮೂರ್ತ ನೇರಕ್ ಸರಿ ಆಯಿತ್ ಕಾಂಗತೆ ಆನ ಅಸಾಮಿ ಪತ್ತೇ ಇಲ್ಲೆ... ಮಂಗಲತ ಮನೆ ಇಡೀ ತೇಡಿತ್.... ಉಹ್ನೂಂ.... ಜನ ಪತ್ತೇ ಇಲ್ಲೆ.....

ಮಾಚು : ಪಿಂಞ ಏಲೆ ಪೋಚೋ?

ಪೂವಿ : (ತೆಳಿ) ಎಲ್ಲಿ ಪೋಪ ಮಾಚು? ಚಾಯಿಲೆಟ್‌ರೊಳ್‌ಲ್ ಚೆಲ್‌ಕ ಮುರಿಪೋಯಿತ್. ಎಡ್‌ಪಕ್ ಕೈವಚ್ಚಕ್ ಪೇಚಾಡಿತ್. ಕೈಂಚಿತಿಲ್ಲೆ. ಮಂಗಲಕ್ ಬಂದವು ಉಂಡಿತ್ ಪೋಪನೇರ. ಯಾಂವನೋ ಬಂತ್ ಚಾಯಿಲೆಟ್‌ರ ಪಡಿನ ಉಂಡಿತ್....

ಮಾಚು : ಪಡಿ ತೊರಂದತಾ? (ತೆಳಿ)

ಪೂವಿ : ಒಳ್‌ತಂವೊ ಚಿಲ್‌ಕ ಬಲಿಪ್ಪಾಂಗೂ-ಪೊರ್ಮೆತಂವೊ ಪಡಿಕ್ ಚೊಟುವಾಂಗೂ ಸರಿ ಆಯಿತ್! (ತೆಳಿ) ಪೊರ್ಮೆತವಂಡ ಪೀಡೆ ಬುಟ್ತ್ ಪೋಯಿತ್! (ತೆಳಿ)

ಮಾಚು : (ತೆಳಿ) ಈಂಡೊಳ್‌ಲ್ ಇದೇದ್ ಕೂಳಿಯಪ್ಪಾಂದ್ ಅವಂಗಾಯಿತಿಕ್ಕು!

ಪೂವಿ : ಅಕ್ಕುವೊಲೊ ಮಾಚು!.... (ತೆಳಿ) ಅಸಾಮಿ ಬೊತ್ತಿತ್ ಬಲ್ಯಾ ಕೂತ್‌ಟ್ಟಿ ತೊಲೊ. ಪಡಿ ಟೈಟಾಯೆ ಕಾಂಬಾಂದ್ ಇಂವೊ ಚೈಟ್‌ಚಿ. ಟೈಟಾನ ಅಸಾಮಿ ಒಳ್‌ಲ್ ಉಂಡ್‌ಂದ್ ಅವಂಗೆನ್ನ್ ಗೊತ್ತ್?

ಮಾಚು : ಕರ್ಮ!ಅಲ್ಲಿಂಜ?

ಪೂವಿ : ಅಲ್ಲಿಂಜೆಂತ? ಮೂಡಿ ಬಂದ ಬಟ್ಟೆಕಾಲೆ ರೈಟ್ ಎಣ್ಣೆಚಾ.... ರಘುಕ್ ಬಂದ ಚೆಡಿಲ್ ಇವನ ತಿಂಗೊಂಡೂಂದ್ ಆಯಿತಿಂಜತೊಲೊ!.... ಓರಬ್ಬಡ ಕತೆ ಕೇಟಕ ತೆಳೆಚಿ ತೆಳೆಚಿ ಚಾವೊಂಡು!.... ಅದಲ್ಲಿರಡ್ ಪಣಿ ಎಲ್ಲ ತೇರಡ್ ಅಲ್ಲಿಂಜ ಜಗಳ ಸುರು ಮಾಡುವೀಂದ್ ಎಣ್ಣೆಂಡಿಂಜಿಯ

ಮಾಚು : ಎಂತ ಎಣ್ಣೆಯ? ನಾನೆಕ್ಕ ಅನ್ನನೆಣ್ಣೆ ಪೂವಿ?

ಪೂವಿ : ನಾಡ ಕೆಮಿ ಇಂಞೂ ಚಾಯಿಲೇ ಉಂಡ್ ಮಾಚು. ನಾಕೆನ್ನ್ ಕೇಪುಲೇಂದ್ ಗೇನ ಮಾಡಿಯಾ? ನಾಕೆಲ್ಲ ಗೊತ್ತುಂಡ್ ನೀಡ ಕೆಣಿ.

ಮಾಚು : ಅಲ್ಲೆಂಗಿ ಮಾತ್ರ ಇಕ್ಕ ಜಗಳಾಡುವಕ್ ಪುರುಸೊತ್ತ್ ಎಲ್ಲಿ ಉಂಡ್ ಎಣ್ಣೆ?

ಪೂವಿ : ಎಲ್ಲಾ ಅನ್ನನೇ ಮಾಚು. 'ಕಾರ್ಯವಾಸಿ ಕತ್ತೆ ಕಾಲು ' ಎಣ್ಣಾಟ!

ಮಾಚು : ನೀಕೋರ್ ವಿಷ್ಯ ಎಣ್ಣುವಿ ಕೇಳ್. ರವಿ ಬಾವಂಡಲ್ಲಿ ಒರ್ ಆಳ್ ಇಂಜತ್. ಪಾಪತಂವೊ ನಾಟಿ ಮಾತ್ರ ಅಲ್ಲ ಅಗೆ ಕೂಡಿ ಎಡ್‌ಪಿಂಜತ್. ಇಕ್ಕ ನೋಟ್ ಅಯಿಂಡ ಪಾಡ್!

ಪೂವಿ : ಎಂತಾಯಿತ್ ಅಯಿಂಡಲ್ಲಿ? ನಾಕ್ ವಿಷ್ಯೆ ಗೊತ್ತಿಲ್ಲೆ!

ಪಳೆಮೆ ಪೊಮ್ಮಾಲೆ

ಮಾಚು : ಅಲ್ಲ ಪೂವಿ, ಎಕ್ಕೊಲ್ಲೂ ನೀರ್ ಕಣ್ಣೆ, ಪಾರ ಮಾಡಿತ್ ಇಟ್ಟಕ ಏದ್ ಮನೆಲ್ ಆಳ್ ನಿಕ್ಕು ಎಣ್ಣೆ?

ಪೂವಿ : ಶೈಲ ಅನ್ನನೆ ಮಾಡಿರ್ತಾ ಅಂದಕ? ಅವ ಅಂತವಾಂದ್ ದಾರ್ ಗೇನ ಮಾಡಿತ್?

ಮಾಚು : ಅಕ್ಕುವೊಲೊ. ಇಯಂಗ ವಡಿಯ ಪೊಣ್ಣ್ ಮಕ್ಕ ಚಾಯಿಲ್ ರಸರಸ ಮಾಡ್ಯಂಡ್ ಉಂಬೊಲೊ. ಆಳ್ಕ್ ಮಾತ್ರ ನೀರ್ಕಣ್ಣೆ, ಪಾರ!

ಪೂವಿ : ಉಯಿ, ಶೈಲ ಅಂತವಾಂದ್ ಗೊತ್ತೇ ಆಪುಲೆ ನೋಟುವಕ. ಅವಡ ತಕ್ಕ ಎಂತಾ ಚಾಯಿಪ್ಪ ಗೊತ್ತುಂಡಾ?

ಮಾಚು : ತಕ್ಕ ಕೇಟಿತ್ ಮನುಷ್ಯನ ಅಳತೆ ಮಾಡುವಕಾಪ ಪೂವಿ? ' ಅತಿ ವಿನಯಂ ಧೂರ್ತ ಲಕ್ಷಣಂ' ಗಾದೆ ಉಂಡ್. ದಾರ್ ದುಂಬಾ ನೈಸಾಯಿತ್ ತಕ್ಕ ಪರಿಯುವೊ ಅಂತಯಿಂಗಡ ಬಗೆಲ್ ಎಚ್ಚರ ಬೋಂಡು.

ಪೂವಿ : ನೇರೇಪ್ಪ ರಮ್ಮ ಮೂಡಿನೇ ನೋಟ್, ಅಚ್ಚಕ್ ಸಮಾಧಾನ ತಕ್ಕ. ಮಾವಿನ ಪೆರ್ತ್ ಚಾಯಿಲ್ ನೋಟುವ ಕಾಂಬಾಂದ್ ಎಲ್ಲಾಡೋ ಗೇನ. ಒರ್ ದಿನ ಪೋಯಿತ್ ನೋಟುವಂಜಿ ಥೂ. ಇಂತಾ ಮನುಷ್ಯಂಗಳೂ ಉಂಡಾಂದ್ ಆಯಿರ್ತ್ ನಾಕ್.

ಮಾಚು : ಎಂತ ಮಾಡ್ಯಂಡಿಂಜತ್ ಅವ?

ಪೂವಿ : ಪೂವಿ ಮಾಯಿ ಬುದ್ದಂಡ ಕಡಿಕ್ಕಿಲ್. ಇವ ಪ್ಲೇಟ್ಲ್ ಎಡ್ ಪೋಯಿತ್ ತಿನ್ನೋಂದ್ ಪ್ಲೇಟ್ನ ಕುಕ್ಕವೊ! "ರೋಗತ ಮುದಾಕಿ ಇಂಞೂ ಎಚ್ಚಕ್ ದಿನ ನನ್ನ ಗೋಳ್ ಬೂಕುವಕುಂಡೋಂದ್" ಗೊಣಗುವೊ!

ಮಾಚು : ಇಂದ್ ಅಯಿಂಕ್ ಬಂದದ್ ನಾಳೆ ನಂಕೂ ಬಕ್ಕೊಂದ್ ಮನುಷ್ಯ ಗೇನ ಮಾಡುವದೇ ಇಲ್ಲೆ ಪೂವಿ. ವಯಸ್ ದಾರ್ನ ಬುಡುವ ಎಣ್ಣೆ?

ಪೂವಿ : ಅದೇ ಅಲ್ಲ? ಉಂಬ ತಿಂಬಾತ್ ವಂಚನೆ ಮಾಡ್ನೆಂಗಕ್ ಅಯಿಂಡ ಅಖೀರಿ ಕಾಲತ್ ಕೂಳ್ ಉಂಗತ ಕಾಯಿಲ ಬಪ್ಪಾಂದ್ ಅಮ್ಮ ಎಣ್ಣುವಿಂಜತ್!

ಮಾಚು : ಅದೆಲ್ಲ ಸರಿ ಪೂವಿ. ನಾಕಿಕ್ಕ ಕೂಳ್ ಉಂಬನ್ನತ ಕಾಯಿಲ ಸುರುವಾಯಿತ್ ಕೆಲ ಅಕ್ಕಲೆಂಜ ತಾಳ ಇಟ್ಟುಂಡುಂಡ್. ಏರ್ಪಾಡೊಂದೂ ಕಂಡಿಲ್ಲೆ!

ಪೂವಿ : ಉಂಬಕ್ ಮಾಡಿತ್ ಇಡುವಕ್ ಮಾತ್ರ ನೀಕ್ ಪೊಣ್ಣ್ ಬೋಂಡಿಯೆ. ಅವಡ ಕೂಡೆ ಜಗಳಾಡುವಕಾಗಾಂದ್ ಮಾತ್ರ ಗೊತ್ತಿಪ್ಪಲೆ!....ಎಳ್ ಉಂಗನ!

ಮಾಚು : (ತೆಳಿ) ಆಂಗೂ ಒರ್ ಗಾದೆ ಉಂಡ್.... "ಗಂಡ ಹೆಂಡಿರ ಜಗಳ"

ಪೂವಿ : (ತೆಳಿ) ಉಂಡು ಮಲಗುವ ತನಕ!".... ನೀಡ ಮಂಡೆ!

ನಂಗಡ ಸಂಸಾರ

- ಸುಮಿ : ನಿಂದ, ನೀಕ್ ಎಣ್ಣೆಕೊಡ್ಡಿ ಅಮ್ಮಂಗ್, ನೀನೊಬ್ಬನೆ ನಾಕ್ ತರತೆ ಕಾಯಿ ತಿಂದಂಡುಳ್ಳಿಯ. (ಮೊರೆಸ್ವರ)
- ಸಂಜು : ಇದಾ ಅಂದಕ.
- ಸುಮಿ : ನಾಕ್ ಅದೊಂದೊ ಬೋಂಡ. ಅದ್ ಕರ್‌ಟ್ವೆಕಾಯಿ. ನಾಕ್ ಪಣ್ಣಾನದ್ ತಾ.
- ಸಂಜು : ಬೋಂಡೆಂಗಿ ಇದ್ ಎಡೆತ. ಇಲ್ಲೆಂಗಿ ಪೋ. ನಾನ್, ಅಚ್ಚಕ್ ಕಷ್ಟತ್ ಮರ ಪತ್ತಿತ್ ಕೊಜ್ಜಿಯೆ ಗೊತ್ತುಂಡಾ?
- ಸುಮಿ : ಓಹೋ, ಮರತ್ ಕಾಯಿ ಉಂಡೇಂದ್ ಕಾಟಿ ತಂದವ ನಾನ್ ಗೊತ್ತುಂಡ?
- ಪೂವಿ : ಧತ್! ಎಂತ ಮಕ್ಕಳೆ ನಿಂಗಡ? ಹರಟೆ ತೀರುವದೇ ಇಲ್ಲೆ.
- ಸುಮಿ : ನೋಟಮ್ಮ ಇಂವೊ! ಪಣ್ಣೆಕಾಯಿನ ಬೆಚ್ಚಂಡ್ ಕರ್‌ಟ್ವೆಕಾಯಿನ ನಾಕ್ ತಪ್ಪಕ್ ಬಪ್ಪೊ!
- ಸಂಜು : ಓ, ನಾನ್ ಅಂದಕ ಕರ್‌ಟ್ವೆನ ತಿಂಗಡಾ? ಬಾರಿ ಉಶಾರ್ ಇವ!
- ಸುಮಿ : ನೋಟಮ್ಮ, ಇಂವನ! ಕಾಯಿನ ಕಾಟಿ ಕೋಡ್ತದೇ ನಾನ್! ಇಕ್ಕ ನಾಕೇ ಇಲ್ಲತೆ ಮಾಡುವೊ ಇಂವೊ!
- ಸಂಜು : ಕಾಟಿ ತಂದಕ ಮದಿಯ? ಕೊಜ್ಜಿತ್ ತಿಂಗೊಂಡಿಂಜತ್! ದಾರ್ ಬೋಂಡಾಂದ್ ಎಣ್ಣೆಚಿ?
- ಪೂವಿ : ಸಂಜು, ಎಂತಾಂಗ್‌ರ ಅನ್ನನೆಲ್ಲ ಕಳಿಪ್ಪೋ ನೀನ್? ಅವಕ್ ಕೊಡ್ ಪಣ್ಣೆಕಾಯಿನ.
- ಸಂಜು : ಅಂದಕ ನಾನೆಂತ ಮಾಡಡಮ್ಮ? ಕರ್‌ಟ್ವೆಕಾಯಿ ನಾಕ್ ಬೋಂಡೇ ಬೋಂಡ.
- ಪೂವಿ : ಎಲ್ಲಿ ತಾ ಇಪ್ಪರ ಆ ದಂಡ್ ಕಾಯಿನೊ!
- ಸಂಜು : ಅಮ್ಮ, ಇದ್ ಮಾತ್ರ ಅನ್ಯಾಯ
- ಪೂವಿ : ನ್ಯಾಯೋ ಇಲ್ಲೆ ಅನ್ಯಾಯೋ ಇಲ್ಲೆ ತಾ ನೀನ್ ಇಪ್ಪರ, ಪೋ, ಸುಮಿ ಆ ಚಾಕ್ ಕೊಂಡ ಬಾ. ಎಕ್ಕ ನೋಟಡ್ ಇದೇ ರಾಮಾಯಣ ನಿಂಗಡ. ನಾಕ್ ಅದಾಂಡು, ನಾಕ್ ಇದಾಂಡೊಂದ್!.... ಪೊ, ಮೂಡಿ ಬೆರಿಯ ಕೊಂಡ ಬಾ ಚಾಕ್.
- ಸಂಜು : ಅಂದಕ ನಾಕ್ ಬಲ್ಯ ವಡೆ ಬೋಂಡು.

ಪಳಮೆ ಪ್ರೋಮ್ಯಾಲೆ

- ಪೂವಿ : ಎಂತಾಂಗ್‌ರ ನೀಕ್ ಬಲ್ಯ ವಡೆ? ಅವ ಕಾಟಿತರತೆ ಪೋಯಿತಿಂಜಕ ನೀಕ್ ಗೊತ್ತಿಪ್ಪಕಿಂಜತಾ ಕಾಯಿ ಉಂಡಂದ್?
- ಸಂಜು : ನಾನ್ ಪತ್ತಿತ್ ಕೊಯ್ತೆಂಜಕ ಅವಕ್ ಕಾಯಿ ಕ್‌ಟ್ಟುವಿಂಜತಾ?... ಅಮ್ಮ.... ನೀನ್ ಎಕ್ಕೊಲೂ ಸುಮಿರ ಪರೇ ತಕ್ ಪರಿವೊ!
- ಸುಮಿ : ಇದಮ್ಮ ಬಾಕ್..... ಚೋಂದ ಕಾಯಿ ಪಪ್ಪಂಗ್ ಕುಶಿಯಲ್ಲಮ್ಮ? ಓರ್ ಪೀಸ್ ಪಪ್ಪಂಗ್ ಬೆಚ್ಚಿರಮ್ಮ.
- ಪೂವಿ : ನೋಟಿ ಮಕ್ಕಳೆ, ಒರ್ ವಸ್ತು ಕೈಕ್ ಕ್‌ಟ್ಚೆಚ್ಚೆಂದ್ ಓರಬ್ಬಳೇ ತಿಂಬದಲ್ಲ ಗೊತ್ತಾಚಾ? ಎಲ್ಲಾಕ್ ಪಾಲ್‌ಟ್ಟಿತ್ ಕೊಡ್ತಿತ್ ತಿಂಗೊಂಡು. ಗೊತ್ತಾಚರಾ ಕುಂಟೆ ಕೋಣ?
- ಸುಮಿ : ಈ.... ಕುಂಟೆ ಕೋಣ!ಕುಂಟೆ ಕೋಣ!(ತಳಿ)
- ಸಂಜು : ನೋಟಿಮ್ಮ ಇವ?... ನಾನ್ ಮಾತ್ರ ಮುಂಡತ್ತಿಪ್ಪಲೆ! ನಾನ್ ಕುಂಟೆ ಕೋಣ ಆಚೇಂಗಿ ನೀನ್ ದುಮ್ಮಿ!.... ದುಮ್ಮಿ ದುಮ್ಮಿ ಡಿಂಗಾಲೆ!
- ಸುಮಿ : ನೋಟಿಮ್ಮ ಇಂವೊ! ನನ್ನ ದುಮ್ಮಿಂಂದ್ ಎಣ್ಣುವೊ!
- ಪೂವಿ : ಚೆನ್ನ ಮುಂಡತೆ ಇರಿ ಮಕ್ಕಳೇ! ನಾನೊಬ್ಬಳೆ ತಿಂದ್ರುವಿ ಇಕ್ಕ ಕಾಯಿನ! ನಂಕ್ ದಂಡಾಳಕೊ ಇಲ್ಲೆ. ಇದಾ ಮೂಡಿ ಪಪ್ಪಾ ಬಪ್ಪಕಾಚಿ. ಎಲ್ಲಾರು ಒಕ್ಕಾಚಿ ತಿಂಗನ, ಅಲ್ಲಿ ಬೆಯ್ಕಿ ಮೇಜಿರ ಮೇಲೆ....
- ಸುಮಿ : ಅಮ್ಮ, ಅಮ್ಮ, ಪಪ್ಪ ಬಾತ್-ಪಪ್ಪ ಬಾತ್!
- ಮಾಚು : ಎಂತ ಮೂಡಿ ನೀಡ ಕಳಿ? ಕೊಕ್ಕರೇಕೊ-ಕೊಕ್ಕರೇಕೋಂದ್ ಕೋಳಿ ಕೂಂದನ್ನಕೆ?... ಎಂತ ಪೊವಿ ಸಮಾಚಾರ? ಬಾರಿ ಪಳಮೆ ಕೇಪಯಿಂಜತ್?
- ಸಂಜು : ಪಪ್ಪ, ಇಕ್ಕ ಓರ್ ವಿಷ್ಯ. ಒರ್ ಮರತ್ ದಂಡ್ ಕಾಯಿ ಇಪ್ಪ. ಒಂದ್ ಪಣ್ಣ್-ಇಂಜೋಂದ್ ಕರ್‌ಟ್ಚೆ....
- ಸುಮಿ : ಪಪ್ಪ, ಬಾಕಿ ಉಳ್ಳಾನ ನಾನೆಣ್ಣುವಿ. ಈ ದಂಡ್ ಕಾಯಿನ ಒಬ್ಬ ನೋಟಿತಿಪ್ಪ. ಇಂಜೊಬ್ಬೊ ಪತ್ತಿತ್ ಕೊಡ್ತಿಪ್ಪ...
- ಪೂವಿ : ಇಕ್ಕ ನಾನೆಣ್ಣುವಿ, ದಂಡ್ ಕಾಯಿನ ಒಬ್ಬೊ ನೋಟಿತಿಪ್ಪ. ಒಬ್ಬೊ ಕೊಡ್ತಿಪ್ಪ. ಆನಾಂಗುಂಡ್ ಈ ವಿಷ್ಯತ್ ಆಯಿಂಕ್ ಜಗಕಾಯಂಡಿಪ್ಪ.
- ಮಾಚು : ಅಕ್ಕಣೆ ಅಲ್ಲಿಕೋರ್ ಮೂಂದನೆ ಮನುಷ್ಯ ಬಂದಿತಿಪ್ಪ.ಅಕ್ಕುವಾ?
- ಪೂವಿ : ಕರೆಕ್ಚೆ ಮಾಚು. ಈ ಮೂಂದನೇ ಮನುಷ್ಯ ಕಾಯಿನ ಇಯಂಡ ಕೈಂಜ ಕೇಟವ. ಅದ್‌ನ ನಾಲ್ ಪಾಲ್‌ಡುವ. ಕರ್‌ಟ್ಚೆ ಕಾಯಿ ನಾಲ್ ಪಾಲ್ ಪಣ್ಣ್ ಕಾಯಿ ನಾಲ್ ಪಾಲ್. ಇದಾ ನೀಕ್!

ಮಾಚು : ಅಂದಿತೂ ನಾಲಾಳ್ ಕೊಡಿತ್ ದಂಡ್ ಕಾಯಿನ ಏದ್ ತಕಾರಾರು ಇಲ್ಲತೆ ತಿಂದುವ. ಅಲ್ಲಿಕ್ ಕೇಸ್ ಡಿಸ್ಮಿಸ್!(ತಳಿ)

ಪೂವಿ : ಒಮ್ಮೆ ಕ್ಲಾಸ್ ಸುರು ಆಯಿರ್ತೆಂಗಿ ಮದಿ ಮಾಚು. ನಾಕಂತೂ ಇಯಂಗಳ ತಡ್ತವಕ್ ಕೈಜಂಡಿಲ್ಲೆ. ತೇರುವದೇ ಇಲ್ಲೆ ಇಯಂಗಳ ವ್ಯಾಜ್ಯ!

ಸಂಜು : ಪಪ್ಪ, ನೀನ್ ಬಂದ ಪಿಂಜಾ ನಾಕ್ ಚೆನ್ನ ಧೈರ್ಯ ಬಾತ್. ಅಮ್ಮ ಎಕ್ಕೊಲೂ ಡುಮ್ಮಿರ ಪರೇ ತಕ್ಕ ಪರಿವೂ!

ಸುಮಿ : ನೋಟ್ ಪಪ್ಪ, ಇಂವೊ! ನನ್ನ ಎಕ್ಕೊಲೂ ಡುಮ್ಮಿ ಡುಮ್ಮೀಂದ್ ಹಂಗ್ ಚಿಡುವೊ!

ಸಂಜು : ಪಿಂಜಾ ನೀನೆಂತಾಂಗ್ ನನ್ನ ಕುಂಟೆ ಕೋಣಾಂದ್ ಎಣ್ಣೊಂಡು?

ಮಾಚು : ಪೂವಿ, ಸೆರಿ ಉಂಡ್ ದಂಡಾಂಗೂ! ಒಂದ್ ಕುಂಟೆ ಕೋಣಾಲೊ! ಇಂಜೊಂದ್ ಡುಮ್ಮಿಯೊಲೊ! ಅಲ್ಲ ಎಲ್ಲಿಂಜ ಆಂಜ ಬಾತ್ ಈ ಪೆದತ್ ನಾಂದ್?(ತಳಿ)

ಪೂವಿ : ಎಂತೂ ಚೆಡಿ ಬಂದಿತ್ ಕುಂಟೆ ಕೋಣಾಂದ್ ಎಣ್ಣೆಟನಾ? ಇಕ್ಕ ಅದನೇ ಪುಡ್ಡಂಡತ್ ಇದ್! ಏಳಿ ಮಕ್ಕಳೆ, ಕೈಕಾಲ್ ಕತ್ತಿತ್ ದೇವಡೆದಿಕ್ಕ ಸ್ತೋತ್ರ ಮಾಡುವಂಜಿ ಕುರಿ ಇಟ್ಟಿ ಬಾರಿ. ಮದಿ ನಿಂಗಡ ಕಂಪ್ಲೆಂಟ್!

ಮಾಚು : ಓಹೋ, ಈ ನೇರ ಆಯಿತೂ ಕೈಕಾಲ್ ಕತ್ತಿತ್ತಿಲ್ಲಿಯ ನಿಂಗ? ಏಳಿ ಬೆರಿಯ!

ಪೂವಿ : ನೀಡ ಪೋಡಿ ಇಲ್ಲತಾಂಗ್ ಮಕ್ಕ ಇನ್ನನೆ ಆಯಿಟ್ಟಿಯೆ!

ಮಾಚು : ಅಂದಿತೂ ಎಂತೆಂಗೋರ್ ಕಂಪ್ಲೆಂಟ್ ನಾಡ ಮಂಡಕ್ ಮೆತ್ತತೆ ನೀಕ್ ವರ್ಕ್ ಬಪ್ಪಲೆ ಪೂವಿ! (ತಳಿ)

ಪೂವಿ : ನಾನೆನ್ನ ತಮಾಷಿಕ್ ಎಣ್ಣೆದಲ್ಲ ಮಾಚು. ಒಂದೋ ಅಪ್ಪಂಡ ಪೋಡಿ ಬೋಂಡು. ಇಲ್ಲೆಂಗಿ ಅಪ್ಪಂಡ ಪೋಡಿ ಬೋಂಡು ಮಕ್ಕಕ್, ಇಲ್ಲೆಂಗಿ ದೇವಳೇ ಗತಿ!

ಮಾಚು : ಪೋಡಿ ಬೋಂಡು ನೇರೇ, ಅನ್ನನೇಂದೆಣ್ಣೆತ್ ಮೂಂದ್ ನೇರವೂ ಏಳ್-ಅಳೇಂದ್ ಪೆರ್ತ್ ಶಿಸ್ಟ್ ಬೆಚ್ಚಕಲೂ ಮಕ್ಕ ಒಂದೂ ಉದ್ದಾರ ಆಪುಲೆ ಗೂತ್ತಾಚಾ? ಆ ಪೊಲೀಸ್ ಕಾರಂಗ್ ಒರೇ ಮೋವ ಇಂಜಿಯೆ. ಮನಲೂ ಪೊಲೀಸ್ ದರ್ಪತ್ನೇ ಕಾಟಿಯಂಡ್ ವ್ಯಾವಾರ ಮಾಡ್ ಚಿ. ಕಡೇಕ್ ಎಂತಾಚಿ ಕತೆ?

ಪೂವಿ : ಪೋಡೀಂದೆಣ್ಣೆಕ ಅನ್ನನೆ ಅಲ್ಲ ಮಾಚು. ಇಕ್ಕ ನೋಟ್, ಅಪ್ಪವ್ವ ಮನೆಲ್

ಸಕನು ಪ್ರೂಮ್ಯಾಲೆ

ಎನ್ನನೆ ಇಪ್ಪೊ- ಅನ್ನನೆ ಮಕ್ಕಳೂ ಆಪಕ್ ನೋಟುವ, ಅಪ್ಪ ಕುಡಿಕಾರನೊ, ಇಸ್ಪೀಟ್ ಕಳೆಕಾರನೊ ಆಯಂಡ್, ಮಕ್ಕಕ್ ಅದ್‌ನ ಮಾಡತೇಂದಣ್ಣಕ ಆಯಿಂಗ ಮಾಡತ್ತಿಪ್ಪಾ?

ಮಾಚು : ನಲ್ಲರಿಕೆ ಮಕ್ಕಕ್ ಬಪ್ಪದ್ ದಂಡ್ ತರತ್, ಬಂದ್ ಚೋರಲೇ ಬಪ್ಪನ್ನತದ್. ದಂದನೆಯತದ್ ನೋಟಿತ್ ಪಡಿಪನ್ನತದ್. ನಂಗ ಪೋಟ್ತ್ ಪರದಂಡ್ ಬೋಂಡತ ಕಳೆ ಕಳೆಚಂಡಿಂಜಕ ಮಕ್ಕಳೂ ಅದ್‌ನ ಅನುಕರಣೆ ಮಾಡುವ.

ಪೂವಿ : ಮಕ್ಕ ನಲ್ಲ ಪೆದ ಎದ್‌ತಕಲೂ ಕೆಟ್ಟ ಪೆದ ಎದ್‌ತಕಲೂ ಎಣ್ಣುವೊ ಅಪ್ಪವ್ವಂಗಳನೇ ಅಕ್ಕುವಲ್ಲ ಮಾಚು? ಆನಾಂಗುಂಡ್ ಎಚ್ಚಕ್ ಎಚ್ಚರ್‌ತ್ ಉಂಡಂಗಿ ಪೋರ. ತಿದ್ದಿಯಂಡೇ ಇರೊಂಡು ಮಕ್ಕಳ!

ಮಾಚು : ಅಲ್ಲ ಪೂವಿ, ಅದೋರ್ ಲಿಸ್ತ್ ಮಾಡಿತ್ ಬೆಯ್ಕೊಂಡ್ ಎಣ್ಣೆತಿಂಜಲ್ಲ? ಮಾಡಿತ್ ಬೆಚ್ಚತುಳಿಯ?

ಪೂವಿ : ಎಂತ ಲಿಸ್ತ್ ಮಾಚು? ನಾಕ್ ಗೇನ ಆಯಂಡಿಲ್ಲೆಪ್ಪ.

ಮಾಚು : ನಾನ್ ಎಂತ ಎಣ್ಣೆಕಲೂ ನೀಕ್ ಗೇನ ಇಪ್ಪದೆ ಇಲ್ಲೆ ವಯಸ್ಸಾಟಿ ನೋಟ್, ತೊಂಬತ್ತಾಲ್?!

ಪೂವಿ : ನಾಕ್ ನೇರಾಯಿತು ಗೇನ ಇಲ್ಲೆ ಮಾಚು...

ಮಾಚು : ಕೋಟಿ ಬೆಟ್ಟಕ್ ಟ್ರಿಪ್ ಇಡುವಾಂಗ್ ಎಂತೆಲ್ಲ ಬೋಂಡೂಂಡ್ ಇಕ್ಕಲೇ ಒರ್ ಲಿಸ್ತ್ ಮಾಡಿತ್ ಬೆಚ್ಚೊಂಡ್ ಪದ್‌ನಂಜಿ ದಿನಕ್ ಮುಪ್ಪಡೆ ಎಣ್ಣೆಯೆ! ಗೇನ ಇಲ್ಲೆಲ್ಲೊ ಅವಕ್!

ಪೂವಿ : ಈ ಮಕ್ಕಕ್ ರಜ ಬುಟ್ಟಿ ಪಿಂಞ ಓರ್ ಗಳಿಗೆ ಪುರುಸೊತ್ತುಂಡ ನಾಕ್? ಆಯಿಂಗಡ ವ್ಯಾಜ್ಯ ತೇಪದೇ ಆಚಿ. ಪಣ್ ಮಾತ್ರ ಚೆನ್ನಂಗಾಪ ಮನೆಲ್? ನಿನ್ನಾಂಡ್ ಆ ಮಕ್ಕಳ ಕೂಟಿಯಂಡ್ ಪೊಳೆಕ್ ಪೋಪಂಜಿ, ಉಳ್ಳಾ ಬೆಡ್‌ಶೀಟ್ ಕಂಬಳಿ ಎಲ್ಲಾ ನೆಲ್‌ತಿತ್ ಇಟ್ಟಿಯೆ. ಗೋತ್ತುಂಡ ನೀಕ್? ತರಕಾರಿ ಪಾತಿಕ್ ನೀರುಡುವೊ, ಅತ್ತಳ ಕೆಟ್ಟುವೊ ಒಂದಾ ದಂಡಾ? ಅಂದಿತೂ ನೀನ್ ಕೊರವು ಎಣ್ಣುವಾನ ಬುಡುಲೆಪ್ಪ...

ಮಾಚು : ಬಲ್ಯ ಕಷ್ಟ ಎಂತ ಗೊತ್ತುಂಡ?

ಪೂವಿ : ಎಂತ ನೀಕ್ ಬಲ್ಯ ಕಷ್ಟ?

ಮಾಚು : ಎದ್ ರೇಡಿಯೊ ಆಚೆಂಗೂ ಆಫ್ ಮಾಡಿರೊಲು. ಈ ಪೋಣ್ಣೆಂಡ್ ಎಣ್ಣುವ ರೇಡಿಯೊ ಉಂಡಲ್ಲ ಅದ್‌ನ ಆಫ್ ಮಾಡ್‌ವಕ್ ಬ್ರಹ್ಮಂಗೂ ಕಷ್ಟೇ!(ತಳೆ)

- ಪೂವಿ : ಅಕ್ಕು ಮಾಚು. ಈ ರೇಡಿಯೊ ಎಲೈಂಗಿ ಆಫ್ ಆಯಿಟಕ ದೇವಳೇ ಕಾಪಾಡೊಂಡು! ರೇಡಿಯೊಲೊ-ರೇಡಿಯೊ!..... ಇದಾ ಲಿಸ್ತ್!
- ಮಾಚು : ಅರೆ, ಪಿಂಞ ಗೇನೇ ಇಲ್ಲೆ - ಅನ್ನನೆ ಇನ್ನನೇಂದ್ ಬುರುಡೆ ಬುಟ್ಟಿಯೆ?
- ಪೂವಿ : ಸಂಸಾರಕೆಂದ್ ಪೊಣ್ಣ್ ಎಚ್ಚಕ್ ನೈಚಕಲೂ ಲೆಕ್ಕೆ ಇಲ್ಲೆ. ನಿಂಗಕ್ ಆಣಾಳಕ್. ಚೆರಿ ಚೆರಿಯ ವಿಷ್ಯಕೂ ಪೊಣ್ಣಾಳಳ ಹಂಗ್‌ಚಿಡುವಾನ ಮಾತ್ರ ಬುಡುಲೆ .
- ಮಾಚು : ಪೂವಿ, ಎಲ್ಲಿ ಚೆನ್ನ ಇಪ್ಪರ ತಿರ್ ನೋಡನ?
- ಪೂವಿ : ಎಂತಾಂಗ್ ಮಾಚು? ಮೂಡಲ್ ಮಸಿ ಎನ್ನೆಂಗಿ ಉಂಡಾ?
- ಮಾಚು : (ತೆಳಿ) ಅಂತದೊಂದೊ ಇಲ್ಲೆ ಆಚಾ? ಆ ಡೈಲಾಗ್‌ನ ನಲ್ಲ ಒನಕೆ ಓಬವ್ವ ಸೈಲ್‌ಲ್ ಎಣ್ಣೆಯಲ್ಲ? ಚಾಯಿಂಜತ್! (ತೆಳಿ)
- ಪೂವಿ : ನಾನ್ ಒನಕೆ ಓಬವ್ವ ಆಯಿತಿರೊಂಡಿಂಜತ್, ಇದಾ ಇನ್ನನೆ ಬೆಪ್ಪಂಜ ನೀಡ ಮಂಡಕ್!... ಪೊಣ್ಣಾಳ-ಪೊಣ್ಣಾಳೆಂದ್ ಹಂಗ್‌ಚಿಡುವಿಯಲ್ಲ? ಅಂದಕ ನೀನೂ ನಾಡನ್ನಕೆ ಅಚ್ಚಕುದ್ದ ಡೈಲಾಗ್‌ನ ಒರಿಚ್ಚಕೂ ನಿಪ್ಪಾಚಿಡತೆ ಎಣ್ಣೆರ್ ನೋಟನ?
- ಮಾಚು : ನಂಕ್ ಆಣಾಳಕ್ ನಿಂಗಡನ್ನಕೆ ಇಚ್ಚಕುದ್ದ ಭಾಷಣ ಬಿಗಿವಕ್ ಪುರ್‌ಸೊತ್ತ್ ಎಲ್ಲಿಪ್ಪ ಪೂವಿ? ಕಾಫಿ ತೋಟತರ್ ಆ ಬರಿಂಜ ಈ ಬರಿಕ್ ಆ ಪೈಪುನೆಲ್ಲ ಓರಂದಾನೇ ಕೊಂಡಮೋಯಿತ್ ಕೈಚಿತ್-ಕೂಟಿತ್, ಪುನಾದ್ಯ ಕೆರೆರಲ್ಲಿಕ್ ಓಡಿತ್, ನೀರ್ ಬುಟ್ಟಿತ್ ಆಕಣೆ ಕೈಲಾಸ ಕಂಡೋಚಿ, ಗೋತ್ತುಂಡಾ ನೀಕ್?... ಮದಿ ಆಯಿರ್‌ತದಾ!
- ಪೂವಿ : (ಚಿಪ್ಪಾಳೆ) ಶಭಾಷ್ ಮಾಚು! ನಾಕೆಣ್ಣೆಯಲ್ಲ? ಇಕ್ಕ ನೋಟ್, ನೀಡ ಡೈಲಾಗ್ ಎಚ್ಚಕುದ್ದ ಇಂಜತ್‌ಂದ್! ಅದಿರಡ್, ನೀನೊಮ್ಮೆ ಆ ಲಿಸ್ತ್‌ನ ನೋಟಿರ್ ಮಾಚು.
- ಮಾಚು : ಚೂದ್..... ಅರೆ, ಸುರುಲೇ ಎಂತಾಂಗ್ ಪೂವಿ, ಚೂದೇಂದ್ ಎಳೆದಿತುಳ್ಳಿಯಲ್ಲ? ಎಂತಾಂಗ್ ಚೂದ್?
- ಪೂವಿ : ಮರ್‌ಂದ್ ಮೋಚಾ, ನೀಕ್ ಕೈಂಜ ಕಾಲತರ್ ಕತೆ?
- ಮಾಚು : ಎಂತ ಕೈಂಜ ಕಾಲತರ್ ಕತೆ?
- ಪೂವಿ : ಅದೇ ಮಾಚು, ಕೊಟ್ಟೆ ಪಣ್ಣ್ ಕೊಯ್ಯುವಕ್ ಪೋಪಂಜಿ ಮುಳ್ಳು ಕುತ್ತಾಚಿಟ್ಟಂಡ್, ಆ ಮುಳ್ಳಿನ ಎಡ್‌ಪಕ್ ಬೋರೇದೋ ಮುಳ್ಳೆಲ್ ಕುತ್ತನದ್. ಆ ಮುಳ್ಳೆಲ್ ಕುತ್ತನದ್ ಸೆಪ್ಪಿಕ್ ಆಪಂಜಿ ನೀಡ ಕಾಲ್ ತೊರೆರನ್ನಕೆ

ಸಕಲಮೆ ಪ್ರೊಮ್ಯಾಲೆ

ಬಣ್ಣ ಬೆಚ್ಚಿದ್?

ಮಾಚು : ಪರೊಲೆಲ್ಲ ನೀಡ ಮಂಡೆ? ಕಾಡ್‌ಕ್ ಪೋಪಕ ಕೈಲೋರ್ ಕತ್ತಿ ಬೋಂಡು ನೇರೇ. ಅನ್ನನೇ ಕೂಡೆ ಒರ್ ಚೂದ್ ಇಂಜಕ ನಲ್ಲದ್. ಎಂತ ನಲ್ಲ ಪಾಟಿ ಆಯಿರ್‌ತಲ್ಲ?

ಪೂವಿ : ಪಾಟಾಂದ್ ಎಣ್ಣಾವಕ ಗೇನಾಚಿ ನೋಟ್, ನಂಗ ಕೋಟಿ ಬೆಟ್ಟ ಕುಂದ್‌ಕ್ ಪೋಪದನ್ನೊ ಸೆರಿ, ಸಂಜುಕ್ ಒರ್ ಪ್ರಬಂಧ ಎಳುದುವಕ್ ಎಣ್ಣೆಯೆ.

ಮಾಚು : ಎಂತ ಪ್ರಬಂಧ?

ಪೂವಿ : ಆದೇ ಮಾಚು, ಕೊಡಗಲ್ ಏದೇದ್ ಬಲ್ಯ ಬಲ್ಯ ಕುಂದ್‌ಂದ್? ಆದ್ ಸಮುದ್ರ ಮಟ್ಟತ್‌ಂಜ ಎಚ್ಚೆಚ್ಚಕ್ ಎತ್ತರ ಉಂಡ್? ಅದದ್ ಕುಂದ್‌ರ ಕೊಡಿಲ್ ನೋಟುವನ್ನತದ್ ಎಂತಂತ ಉಂಡ್? ಅಲ್ಲಿ ಉಳ್ಳನ್ನತ ದೇವ ನೆಲೆ ಏದ್? ಇನ್ನೆಲ್ಲ ಕೂಟಿತ್ ಎಳೊಂಡು.

ಮಾಚು : ಇದ್ ಮಾತ್ರ ನಲ್ಲ ಐಡಿಯ ಪೂವಿ. ಮುಂಡತೇಂಗಿ ಮಜ ಮಾಡುವಕ್ ಪೋಪದಲ್ಲ. ಅಲ್ಲಿಯತ್ತರ ವಿಷಯ ವಿಶೇಷತೆ ಎಂತ ಉಂಡ್‌ಂದ್ ಮಕ್ಕಕ್ ಅರಿವಿಕೆ ಕೊಡ್‌ಪದೂ ಒರ್ ನಲ್ಲ ಪಾಟಿವೇ! ಆದ್ ಸೆರಿ, ಸುಮಿ ಮೂಡಿಕ್ ಒಂದ್ ಎಣ್ಣೆತ್ತಿಲ್ಲಿಯ ಆಂದಕ?

ಪೂವಿ : ಅವಳ ಮಾತ್ರ ಮುಂಡತೆ ಬುಡುವಿಯನಾ? ಕೊಟ್ಟಿಪಣ್ಣೆ, ಚೀಪೆಪಣ್ಣೆ ತಿಂದಕ ಪೋರ. ಅದ್ ಎಕ್ ಪೂ ಬುಡುವ? ಎಕ್ ಪಣ್ಣಾಪ? ಆಂಡ ಗಿಡ ಅಲ್ಲೆಂಗಿ ಮರ ಎನ್ನನಿಪ್ಪ? ಅದ್ ಕುಂದ್‌ಲ್ ಬೊಳಿವದಾ? ಆ ಪಣ್ಣಾನ ಎದೇದ್ ಪ್ರಾಣಿಯ, ಪಕ್ಷಿಯ ತಿಂಬ? ಇದ್ ಅವಕುಳ್ಳ ವಿಷ್ಕ!

ಸಂಜು : ಡಿಂಗ್ ಡಿಂಗ್ ಡಿಂಗಾಲೆ! ಅಮ್ಮ, ನಂಗಲೂ ಬಾತ್!

ಮಾಚು : ಅಚ್ಚಕ್ ಬೆರಿಯ ಆಯಿರ್‌ತರಾ ನಿಂಗಡ?

ಸುಮಿ : ಪಪ್ಪನಾಡ ಪ್ರಬಂಧ ರೆಡಿ! ಸಂಜುರದೇ ಆಕತದ್!

ಮಾಚು : ನಾಡ ಸುಮಿ ಕುಂಜೆಯೇ ಉಶಾರ್ ಮರಿ. ಸಂಜು ಜಡ್ಡ!

ಪೂವಿ : ನೋಟಿಮ್ಮ, ಪಪ್ಪ! ಅವಡ ಪರ ವಹಿಸಿಯಂಡ್ ತಕ್ ಪರಿವೊ!

ಪೂವಿ : ಅದೆಕ್ಕೊಲೂ ಅನ್ನನೆರ ಸಂಜು! ಅವ್ವಂಗೆ ಮೋನಿಯಂಗಳ ಕುಸಿಯೊಲೊ! ಅಪ್ಪಂಗೆ ಮೋಳಿಯಳ ಕುಸಿಯೊಲೊ! (ತಳಿ)

ಮಾಚು : ಅದೆಲ್ಲ ಒಂದೊ ಇಲ್ಲೆ. ಮಕ್ಕ ಉಶಾರ್ ಉಂಡೆಂಗಿ ದಂಡಾಳನೊ ಕುಸಿಯೇ! ಸೆರಿ ಇಕ್ಕ ನೀಡ ಪ್ರಬಂಧ ಓದ್ ಕೇಕನ.

ಸುಮಿ : ನಾನ್ ಪೂರ್ತಿ ಎಳೆದಿತಾಯಿತ್‌ಲೆ ಪಪ್ಪ! ಪಾಯಿಂಟ್ಸ್ ಮಾತ್ರ ಎಳೆದಿಯೆ

ಅಚ್ಚೆಕೆ!

- ಸಂಜು : ಇಕ್ಕ ನೋಟ್ ಪಪ್ಪ! ಪ್ರಬಂಧ ರೆಡೀಂದ್ ಎಣ್ಣವ ಪಾಯಿಂಟ್ಸ್ ಮಾತ್ರ ಎಳ್‌ದಿಯೆಲೊ!... ಅಚ್ಚೆಕಾಚೆಂಗಿ ನಾನೂ ಎಳ್‌ದಿತ್ ಬೆಚ್ಚೆಯೆ ಗೊತ್ತಾಚಾ?
- ಮಾಚು : ಓಹೋ ದಂಡಾಳೂ ಕಳ್ಳಂಗಲೇ. ಒಂದ್ ಚೆರಂಗಳ್ಳ-ಇಂಜೊಂದ್ ಪೆರ್‌ಂಗಳ್ಳ ಅಚ್ಚೆಕೆ!(ತಳಿ)
- ಪೂವಿ : ಕಳ್ಳ-ಕಳ್ಳಿ ಜೋಡಿ....
- ಸುಮಿ : ನಾಯಿನ ಕೂಟಿಯಂಡ್ ಓಡಿ!(ತಳಿ) (ಎಲ್ಲಾರೂ:- ತಳಿ)
- ಪೂವಿ : ಅಲ್ಲ ಮಾಚು ಲಿಸ್ಟ್ ಪಾದಿಲೇ ಆಯಿರ್‌ತಲ್ಲ?
- ಮಾಚು : ಲಿಸ್ಟ್ ಅಲ್ಲಿರಡ್, ಮಕ್ಕ ಪ್ರಬಂಧಕ್ ಎಂತೆಲ್ಲ ಪಾಯಿಂಟ್ಸ್ ಗುಡ್ಡೆ ಕೂಟ್ಟಂಡಿತ್ ನೋಟಂಗ. ನೀನ್ ಸುರೂಲ್ ಓದ್‌ರ ಸಂಜು.....
- ಸಂಜು : ಬುಡ್ ಬಟ್ಟೆ....
- ಸುಮಿ : ಒಹೋ, ಇಲ್ಲಿ ಸ್ಟೇಜ್ ಒಂದೂ ಇಲ್ಲೆ. ಮುಂಡತೆ ಅಲ್ಲಿಯೇ ಓದ್....
- ಸಂಜು : ನೋಟ್ ಪಪ್ಪ. ಇವ ಬಟ್ಟೆ ಬುಡುಲೆ!
- ಪೂವಿ : ನಿಂಗ ಚೆನ್ನ ಜಗಳಾಡಿತಿ ಮಕ್ಕಳೆ, ಒಮ್ಮೆ ಸ್ಕೂಲ್ ತೊರಂದಕ ಮದಿಯಪ್ಪ. ಇಂವೊ ಅವಡ ಮೇಲೆ ಪುಕಾರ್ ಎಣ್ಣವೊ- ಅವ ಇವಂಡ ಮೇಲೆ ಪುಕಾರ್ ಇಡುವೊ. ಮದಿ ಆಯಿರ್‌ತ್ ನಾಕ್ ಜಗಳ ತೇತಿತ್!.... ನೀನ್ ನಿಸೂರಾಯಿತಿರ್ ಮಾಚು. ನಾನ್ ಮಾತ್ರ ಬಾಯಿ ಬಡ್‌ಚಂಡಿಪ್ಪಿ!
- ಮಾಚು : ನೀನ್ ಅದ್‌ಂಗಾಯಿತೇ ಉಳ್ಳವ. ನೀಡ ಬಾಯಿಕ್ ಬೊತ್ತುವನ್ನಕೆ ಮಕ್ಕ ನಾಡ ಬಾಯಿಕ್ ಬೊತ್ತುವಾಂದ್ ಗೇನ ಮಾಡ್ಕ?
- ಪೂವಿ : ಪರೋಲೆ ಮಾಚು ನೀನ್! ಇಂಡೈರಕ್ಪಾಯಿತ್ ನಾಕ್ ನೀನ್ ಬಾಯಿ ಕಾರ್ತಿಯೆಂದ್ ಎಣ್ಣಂಡುಳ್ಳಿಯಲ್ಲ?
- ಮಾಚು : ಏ, ಇಲ್ಲೆಪ್ಪ. ಈ ಕೇಸ್‌ನ ಉದ್ದ ಬಲಿಪ್ಪದ್ ಬೋಂಡ. ನೀನ್ ಓದ್‌ರಾ ಸಂಜು.
- ಸಂಜು : ಕೊಡಗ್‌ಲೆ ದುಂಬ ಎತ್ತರ ಉಳ್ಳ ಕುಂದ್ ತಡಿಯಂಡ ಮೋಳ್ ಕುಂದ್. ದಂಡನೆ...
- ಪೂವಿ : ನಿಂದ ನಿಂದ.... ತಡಿಯಂಡ ಮೋಳ್ ಏದ್ ತಾಲ್ಲೂಕ್‌ಲೆ ಉಂಡ್?... ಅದ್ ಏದ್ ಊರ್‌ರ ಪಕ್ಕ ಉಂಡ್? ಅದ್‌ನೊ ಕೂಟೊವೊಂಡು.
- ಸಂಜು : ತಡಿಯಂಡ ಮೋಳ್ ಕುಂದ್ ಮಡಿಕೇರಿ ತಾಲ್ಲೂಕ್‌ಲೆ ಉಂಡ್. ಅದ್ ನಾಪೋಕ್ಲೆರ ಪಕ್ಕ ಉಂಡ್.

ಪಳಮೆ ಪ್ರೊಮ್ಯಾಲೆ

- ಮಾಚು : ಅದೊನ ಕೂಟಿಯ ಮಿಂಜಾಕ್ ಓದ್...
- ಸಂಜು : ದಂಡನೆ ಕುಂದ್ ಪುಷ್ಪಗಿರಿ. ಅದ್ ಸೋಮವಾರ ಪೇಟೆ ತಾಲ್ಲೂಕ್‌ಲ್ ಉಂಡ್. ಇದ್ ಶಾಂತಳ್ಳಿ ಗ್ರಾಮಕ್ ಪಕ್ಕ ಆಪ. ಮೂಂದನೇ ಕುಂದ್ ಮಡಿಕೇರಿ ತಾಲ್ಲೂಕ್‌ಲುಳ್ಳ ಕೋಟೆಬೆಟ್ಟ, ಇದ್ ಮುಕ್ಕೋಡ್ಲ ಪಿಂಜಾ ಗರ್ವಾಲೆ ಗ್ರಾಮಕ್ ಪಕ್ಕ ಉಂಡ್.
- ಪೂವಿ : ಆಚಾ? ಅಚ್ಚಕ್ಕೆ?
- ಸಂಜು : ಇಂಜೂ ಸುಮಾರ್ ಉಂಡಮ್ಮ. ಕರೆಕ್ಕಾಯಿತ್ ಎಳೊಂಡು ಅಚ್ಚಕ್ಕೆ.
- ಮಾಚು : ನೀನ್ ಎಂತೆಲ್ಲ ಎಳದಿಯವ್ವ! ಸುಮಿ?
- ಸುಮಿ : ಪಪ್ಪ, ನಾನ್ ಪಣ್ಣಾರ ಪೆದ ಎಳದಿಯೆ, ಕೊಟ್ಟೆಪಣ್ಣಾ , ನೇರಪಣ್ಣಾ, ಚೇಪೆಪಣ್ಣಾ, ಉಪ್ಪಾಲಿ ಪಣ್ಣಾ, ಎಲಂದೆ ಪಣ್ಣಾ, ವಾಲೆ ಪಣ್ಣಾ, ಪಾಲೆ ಪಣ್ಣಾ , ಕುಮ್ಮೆ ಪಣ್ಣಾ , ಇಡೊಂಜಿ ಪಣ್ಣಾ.... ಆಚಿ!
- ಪೂವಿ : ದಂಡಾಳೂ ಇಚ್ಚಕೇ ಎಳದಿಯದಾ? ಇಂಜೂ ಎಚ್ಚಕ್ ವಿಷ್ಯ ಉಂಡ್ ಕೂಟುವಕ್? ಪೋಯಿ ಮಕ್ಕಳೇ, ಉಂಬಕಾಕಣೆ ಎಚ್ಚಕಾಪ ಅಚ್ಚಕ್ ಎಳೊದಿರಿ . ಬಾಕಿ ನಾಳೆ ನೋಟಂಗ!
- ಸಂಜು : ಸುಮಿ, ಬೆರಿಯ ಬಾ....
- ಮಾಚು : ರೆಕ್ಕ ಬಿತ್ತೆ ಸಿಕ್ಕಾಂದ್ ಎನ್ನನೆ ಓಡಿರ್ತ್ ನೋಟ್ ಮಕ್ಕ?
- ಪೂವಿ : ಮಾಚು, ನೀಕ್ ಓರ್ ವಿಷ್ಯ ಗೋತ್ತುಂಡಾ?
- ಮಾಚು : ಎಂತ ಅಂತದ್?
- ಪೂವಿ : ಈ ಮಕ್ಕ ಉಂಡಲ್ಲ? ನಂಗಡದಿಕ್ಕೆ ಮಾತ್ರ ಅನ್ನನೆ ಜಗಲಾಡುವ ಅಚ್ಚಕ್ಕೆ. ಅಯಿಂಗಯಿಂಗ ಒಂದೇ!(ತೆಳಿ)
- ಮಾಚು : ಅದೆಂತದೊ ಒರ್ ಗಾದೆ ಉಂಡಲ್ಲ? ನಂಗ ನಂಗ ಒಂದಾಯಿತಿಕ್ಕ, ಊರೊಡ ಮಿಂಜಾಲ್ ಪಗೆಯಾಯಿತಿಕ್ಕಾಂದ್! ಅನ್ನನೆ ಇಯಂಗಡ ಕತೆಯೂ! (ತೆಳಿ)
- ಪೂವಿ : ಅದೆಂತದೇ ಇರದ್ ಮಾಚು, ಓರಂದ್ ಮಕ್ಕಳ ಓರಂದ್ ತರ ಟ್ರೀಟ್ ಮಾಡುವಕಾಗ ಅಪ್ಪವ್ವ, ಕೆಣ್ಣ ಕುಂಜೋಂದ್ ಮಂಡಲ್ ಪೂರ್ತವಕೂ ಆಗ, ಮೂಡಿ ಕುಂಜೋಂದ್ ದೂರ ಬೆಪ್ಪಕೂ ಆಗ.
- ಮಾಚು : ಅದ್ ಮಾತ್ರ ಅಕ್ಕು. ಓರ್ ಕಣ್ಣಾಕ್ ಚುಣ್ಣ- ಓರ್ ಕಣ್ಣಾಕ್ ಬೊಣ್ಣೆನೆಯ್ಯೊಂದ್ ಮಾಡುವಕಾಗಪ್ಪ.... ಸೆರಿ ಇಕ್ಕ ನೀಡ ಲಿಸ್ಕಾರ ಕತೆ ಎಂತಾಚಿ ನೋಟನ. ಓರ್ ಕತ್ತಿ. ಬೆಡ್‌ಶೀಟ್, ಸ್ವೀಲ್‌ಕಪ್ಪು, ಟಾರ್ಬ್, ತಿತ್ತೊಟ್ಟಿ, ಕ್ಯಾಂಡಲ್

ಅಲ್ಲ ಪೂವಿ, ಆ ಕುಂದ್‌ರ ಕೊಡಿಲ್ ಗಾಳಿಕ್ ಆ ಕ್ಯಾಂಡಲ್ ನಿಪ್ಪಾ?

ಪೂವಿ : ಗಾಳಿ ಕಮ್ಮಿ ಉಂಡೆಂಗಿ ಕತ್ತ್‌ಚಿಡೊಲು. ಅಂದಿತೂ ಇರಡ್‌ಂದ್ ಅಚ್ಚಿಕ್ಕೇ.

ಮಾಚು : ನಂಗ ಪೋಪದೆಂತೂ ಪುಣ್ಣ್‌ಮೆರಂದೇ ಆನಾಂಗುಡ್ ತೊಂದರೆ ಇಲ್ಲೆ ಬುಡ್.

ಪೂವಿ : ಕೈಂಜ ಕುರಿಯೂ ಬೊಳ್‌ತ ಬಾವುರಂದೇ ಪೊಯೆಲ್ಲ ಮಾಚು ? ಕೈಂಜ ಕುರಿಕ್‌ಂಜ ಜಾಸ್ತಿ ಜನ ಇಪ್ಪಲ್ಲ ಈ ಕುರಿ?

ಮಾಚು : ಎಲ್ಲಾಕೂ ಸುರೂಲೇ ಎಣ್ಣೆರಂಗ ಒರ್ ವಿಷ್ಯತ್‌ನ...

ಪೂವಿ : ಎಂತೇಂದ್?

ಮಾಚು : ಕುಂದ್‌ಕ್ ಪೋಪಯಿಂಗ ಏದೇ ಪ್ಲಾಸ್ಟಿಕ್ ವಸ್ತುನ ಕೊಂಡಬಪ್ಪಕ್ ಕಯ್ಯಾಂದ್!

ಪೂವಿ : ನೇರೆಲ್ಲ? ಕೈಂಜ ಕುರಿ ನಂಗ ನೋಟ್‌ಚಿಲ್ಲ? ಪ್ಲಾಸ್ಟಿಕ್ ಬಾಟ್ಟಿ, ಕಪ್ಪು ಎಂತೆಲ್ಲ ಕನ್‌ಚಿಂಜತಲ್ಲ ಅಲ್ಲಿ? ಜನಕ್ ಓರಿಚ್ಚಕ್ ನಿಗಾ ಇಲ್ಲೆ.

ಮಾಚು : ಓರಬ್ಬಕ್ ಗೊತ್ತಿಪ್ಪಲೆ. ಇಂಜೋರಬ್ಬಕ್ ಉದಾಸೀನ. ಕುಂದ್ ಪಾಳಾನಕ ನಂಕೆನ್ನಂದ್ ಬೇಜವಾಬ್ದಾರಿ.

ಪೂವಿ : ತಿಂಬಕ್ ಎಂತ ಕೊಡ ಪೋಪೊ?

ಮಾಚು : ಕೈಂಜ ಕುರಿರನ್ನಕೆ ಬಟ್ಟೆ ಕರ್ಚಿಕ್ ಅವಲಕ್ಕಿ, ತೆಂಗೆಪೊಳಿ, ಬೆಲ್ಲ ಎಡ್ಡವನ. ಬೈಟೆಕ್ ಚಿತ್ರಾನ್ನ ಮಾಡ್ಯಂಡಕ ಆಚಿ.

ಪೂವಿ : ಚಿತ್ರಾನ್ನಕುಳ್ಳ ಮಸಾಲೆ?

ಮಾಚು : ಅದ್‌ನ ಮಾತ್ರ ಮನೆಂಜೇ ಕೆಟ್ಟಂಡಕ ಆಚಿ. ಪೋಪಕ ಒರ್ ಗಂಜಿ ಕೊಂಡ ಪೋಚೆಂಗಿ ಅಲ್ಲಿ ಕೂಳ್ ಮಾಡ್‌ಚಿ... ಅದ್‌ಂಗ್ ಈ ಮಸಾಲೆನ ಮೇಕಿಟ್ಟಕ ಆಚಿಪ್ಪ!

ಪೂವಿ : ನಲ್ಲ ಐಡಿಯ ಮಾಚು!... ನೆಲ್‌ಚಿ ಬೋಳಿಲ್ ಎಲ್ಲಾರೂ ಕೂಡ್ಯಂಡ್ ಐಲಾಟ ಪರಂದಂಡ್ ಉಂಬದ್ ಅದೆಚ್ಚಕ್ ಚಾಯಲ್ಲ?

ಮಾಚು : ನೋಟ್ ಪೂವಿ, ಇನ್ನನೆ ಪತ್ತಾಳ್ ಕೂಡ್‌ನಲ್ಲಿ ಪಾಟ್, ಪಳಮೆ ಅದ್ ಇದ್‌ಂದ್ ಎಚ್ಚಕ್ ವಿಷ್ಯ ಅಪ್ಪರಿಪ್ಪರ ಅರ್‌ಂಜವಲು, ಆಚೆಂಗಿ ಓರಬ್ಬ ಮುಂಡತೇಂಗಿ ಮತ್ಯದ್ ಕುಡ್‌ಚಂಡೋ, ಇಸ್ಪೀಟ್ ಕಳ್‌ಚಂಡೋ ಕಾಲ ಕೈಪ. ಅದೆಲ್ಲ ಎನ್ನ ಪ್ರಯೋಜನ?

ಪೂವಿ : ಅಕ್ಕು, ತಮಾಸಿಲೇ ಕಾಲ ಕೈಪದಾಚೆಂಗಿ ಕೂಡಿ ಅಲ್ಲಿ ಏದೇಂಗೋರ್ ಸಾಮಾಜಿಕ ಸಮಸ್ಯೆನ ಚರ್ಚೆ ಮಾಡುವದೋ, ಆಂಗುಳ್ಳ ಪರಿಹಾರ ಕಂಡೊವದೋ ಎಂತೇಂಗಿ ಮಾಡ್‌ನಕ ನಲ್ಲದಪ್ಪ.

- ಮಾಚು : ಕೈಜ ಕುರಿ ನಂಗ ಪೋಪಕ ನೋಟ್, ದಾರೋ ಕುಂದ್‌ಕ್ ತಿತ್ತ್ ಇಟ್ಟಿಂಜಾನ ಕೆಡ್‌ತಿತ್ ಪೋಚಿಲ್ಲ.... ಓರಬ್ಬಕ್ ತಿತ್ತ್‌ನುಂಡ್ ಎಂತೆಲ್ಲ ಅನಾಹುತ ಆಪಾಂದೇ ಗೊತ್ತಿಪ್ಪಲೆ. ಕೇಟಕ "ಪಳಿಯ ಪಿಲ್ಲೆಲ್ಲ ಕರೊಂಜಕ, ಅತ್ತಕ್ ನಲ್ಲ ಪಿಲ್ಲೆ ಅಡಿಂಜ ಚಿಗುರುವ. ಆಂಗಾಯಿತ್ ನಂಗ ಕುಂದ್‌ಕ್, ಕಾಡ್‌ಕ್ ತಿತ್ತ್ ಇಡುವಾಂದ್ ಎಣ್ಣುವ.
- ಪೂವಿ : ಆಚೇಂಗಿ ಕುಂದ್‌ಕ್, ಕಾಡ್‌ಕ್ ತಿತ್ತ್ ಇಟ್ಟಕ ಅಲ್ಲಿ ಉಳ್ಳ ಪ್ರಾಣಿ, ಪಕ್ಷಿಯ ಎಲ್ಲಾ ನಾಶ ಆಯಿ ಪೋಪ. ಆನಗುಂಡ್ ಕುಂದ್‌ಕ್, ಕಾಡ್‌ಕ್ ತಿತ್ತ್ ಇಡುವಕ್ ಆಗಾಂದ್, ಈಯಾಂಡಂತೂ ಚಿಣ್ಣಾಪ್ಪಣ್ಣಂಡ ಕೊರವುಕಾರಿಕೆಲ್ ಸುಮಾರ್ ಜಾಗತ್ 'ಜಾಗ್ಯತಿ ಜಾಧಾ' ನಡತ್‌ಚಿಲ್ಲ ಮಾಚು?
- ಮಾಚು : ಅಲ್ಲ ಪೂವಿ, ನೀನ್ ಮಕ್ಕಕ್ ಪ್ರಬಂಧ ಎಳುದುವಕ್ ವಿಷ್ಯ ಕೊಡ್ತಿಯಲ್ಲ. ನೇರಾಯಿತೂ ನಲ್ಲದಾಚಿ. ಕಾಡ್‌ನುಂಡ್ ಎಂತೆಲ್ಲ ಪ್ರಯೋಜನ ಉಂಡ್? ಪಣ್ಣ್ ಪಲ ತಿಂದಿತ್ ಅದೆಚ್ಚಕ್ ಪ್ರಾಣಿಯ, ಪಕ್ಷಿಯ ಬದ್‌ಕಿಯಂಡುಂಡ್? ಇದೆಲ್ಲ ಮಕ್ಕಡ ಮಂಡಕ್ ಚೆರ್‌ಪತ್‌ಂಜೀ ಪೋಚೆಂಗಿ ನಲ್ಲದೇ!
- ಪೂವಿ : ಆಂಗಾಯಿತೇ ನಾನೂ ಎಣ್ಣೆಯೆ ಮಕ್ಕಕ್, ಮುಂಡತೇಂಗಿ ಪೋಚಿ-ಬಾತ್ ಎಣ್ಣಕ ಎನ್ನ ಫಲ? ಒರ್ ಕುಸಿರ ಟ್ರಿಪ್ಪೂ ಆಂಡು. ಕೂಟ್‌ಕ್ ಅಲ್ಲಿ ಮಕ್ಕಡ ಅರಿವಿಕೆಕ್ ನಲ್ಲ ವಿಷ್ಯವೂ ಇರೊಂಡು. ಮಾಚು, ಲಿಸ್ಸಾರ ವಿಷ್ಯ ಆಚಿಲ್ಲ? ಇಕ್ಕ ಟೈಂ ಟೇಬಲ್ ನಿಡ ಪಣ್....
- ಮಾಚು : ಆದ್‌ಂಗಂತ ಟೈಂ ಟೇಬಲ್ "ಇಡುವಕುಳ್ಳೊ"? ಪಾದಿ ಬಟ್ಟೆಕೆತ್ತನೆ ಎಂತೂ ಜೇಪುಲೇ ಪೋಪದಲ್ಲ? ಅಲ್ಲಿಂಜ ಸುಮಾರ್ ದಂಡ್‌ಗಂಟೆ ನಡ್‌ಪಕ್ ಬೋಂಡು....
- ಪೂವಿ : ಅಲ್ಲಿಕ್, ಪೊಲಾಕ ಪತ್ತೆಗಂಟೆಕ್ ಮನೆಬುಟ್ಟಕ ಕುಂದ್‌ಕರೆಕೆತ್ತುವಕ ಪನ್ನಂದರೆ. ಪನ್ನೆರಂದರೆ- ಒಂದರೆ, ಕುಂದ್ ಪತ್ತಿತಾನದು ಕೆಟ್ಟುಂಡ್ ಪೋನ ಕೂಪದಿ ಉಂಡತ್. ದಂಡ್ ಗಂಟೆಂಜ ನಾಲ್ ಗಂಟೆಕೆತ್ತನೆ ರೆಸ್ಸೆ,
- ಮಾಚು : ನನ್ನ ಟೈಂ ಟೇಬಲ್ ಇಡುವಕೆಣ್ಣೆತ್ ಎಲ್ಲಾ ನೀನೇ ಎಣ್ಣೆಟಿಯ?
- ಪೂವಿ : ನಾಡ ಐಡಿಯ ನಾನೆಣ್ಣಪ್ಪ, ಅದೇ ಫೈನಲ್ ಆಂಡೊಂದಿಲ್ಲೆಲ್ಲ ಮಾಚು?
- ಮಾಚು : ಬಾರಿ ಕೆಣ್‌ಕಾರ್ತಿ ಪೂವಿ, ನೀನ್! ಎಲ್ಲಾ ಐಡಿಯ ಮಿಂಜಾಲೇ ನೀನೇ ಇಟ್ಟಿತಿಪ್ಪಿಯ. ಅದ್‌ಂಗೋರ್ ಸೀಲ್ ಮಾತ್ರ ನಾನ್ ಇಡಂಡಿಯ!
- ಪೂವಿ : ನೀನ್ ಮುಂಡತೇಂಗಿ ನನ್ನ ದೂರತೆ ಮಾಚು, ನಾನೆಣ್ಣಕ ಎನ್ನೆ? ನೀನ್ ಎಣ್ಣಕ ಎನ್ನೆ? ನಂಗ ನಂಗಳೇ ಅಲ್ಲ?(ತಳಿ)

- ಮಾಚು : ಅಂದಕ, ನಾನ್ ಉಂಡಕ ಎನ್ನೆ-ನೀನ್ ಉಂಡಕ ಎನ್ನೆ- ನಂಗ ನಂಗ ಒಂದೇ ಅಲ್ಲ?(ತೆಳಿ)
- ಪೂವಿ : ಉಫ್! ಎಂತಾಂಗಿನ್ನೆನೆ ತಕ್ಕ ಪರಿವಕಾಯಿಟ್ಟಿ ಎಣ್ಣೆ? ನೀನ್ ಲಾಯರ್ ಅಂಡೂಯಿಂಜತ್!..... ಅಲ್ಲ, ಈ ಮಕ್ಕ ಎಂತ ಮಾಡ್ಯಂಡುಂಡೋ?.... ಸದ್ದೇ ಇಲ್ಲೆ? ವರೀರ್ ತಾ?.... ನೋಟಿತ್ ಬಪ್ಪಿ.... ಸಂಜೂ.... (ಪಪ್ಪಾ ಪಪ್ಪಾ) ಇಲ್ಲಿ ನೋಟ್ ಮಾಚು!
- ಮಾಚು : ಎಂತ! ಕತೆ?
- ಪೂವಿ : ಮಕ್ಕಡ ಪಣೆ ನೋಟ್, ಕ್ಯಾಸೆಟ್ ಇಟ್ಟಂಡ್ ಒರೇ ಸಮ ಆಡ್ಯಂಡುಡ್!
- ಮಾಚು : ಉಯೀ ರಾಮ! ಕಳಿ ನೋಟಿಯಿಂಗಡ!
- ಪೂವಿ : ಮುಂಡತ್ತಿರ್, ಎನ್ನೆಲ್ಲ ಕಳಿಪ್ಪ ನೋಟನ...
- ಪಪ್ಪಾ ಪಪ್ಪಾ.....

* * * * *

ಮಾಚು ಕೂ.....

- ಪೂವಿ : ನೋಟಿಸರು?... ಪೋಪಕಲೇ ಎಣ್ಣೆಲ್ಲ ನಾನ್? ಒರ್ ಗಂಟೆರೊಳಿಯ ಬಂದ್ತಿದ್? ಬಾತಾ ನೋಟ್? ತೋಟಕ್ ನುಗ್ಗಿರ್ತೆಂಗಿ ಮದಿ ಇವಂಗ್! ಮನೆರತ್ತಟಿ ಗೇನೇ ಇಲ್ಲೆ. ತಾನಾಚಿ ತಾಂಡ ತೋಟಾಚಿ...
- ಸರು : ಬಕ್ಕು ಬುಡಕ್ಕಯ್ಯ.. ಕೆಲ ಪಯಿಪ ನೀಕಿಕ್ಕ?
- ಪೂವಿ : ಕೆಲ ಪಯಿಪ್ಪದ್ ಇರಡಲ್ಲಿ. ಅಪರೂಪತ್ ನೀನೂ ನೀಡ ವಡಿಯನೂ ಮನೆಕ್ ಬಂತಿಪ್ಪಕ ಸೆರಿ ಮಜ್ಜಣ ನೇರತ್ ಒರ್ ಪುಡಿ ಕೂಳೇಂಗಿ ತಕ್ಕಂಡ ನಂಗ?... ಇನ್ನೇ ಇಂವೂ.... ಎಂತ ಮಾಡಿಯಂಡಿಂಜಿಯ ಮಾಚುಂದ್ ಕೇಟಕ ಎಂತ ಎಣ್ಣುವ ಗೊತ್ತುಂಡಾ?(ತೆಳಿ)
- ಸರು : ಎಂತ ಎಣ್ಣುವ ಬಾವೊ?
- ಪೂವಿ : ನೀಡ ಬಾವಂಡ ಕತೆ ಕೇಟಕ!.... ಓರಂದೇ ಕಾಫಿ ಗಿಡತ್ ರ ಕೂಡ ಸಮಾಧಾನತ್ ತಕ್ಕ ಪರಿಯುವೊಲ್ಲೊ ಇಂವೊ!(ತೆಳಿ)
- ಸರು : (ತೆಳಿ) ಎಂತೇಂದ್ ತಕ್ಕ ಪರಿವೊಯೊ ಅಕ್ಕಯ್ಯ?
- ಪೂವಿ : ಎಂತ ಎಣ್ಣಡ್ ನಾಡ ಹಣೆಬರತ್ನ? ಕೇಟಕ ದಾರೇಂಗಿ ತೆಳಿಕ್ಕು, ಗಿಡತ್ ರ

ಸಕಮೆ ಪ್ರೊಮ್ಯಾಲೆ

ಕೂಡೆ ನೇರಾಯಿತೂ ತಕ್ಕ ಪರಿಯುವ ಇಂವೊ! (ತೆಳಿ)

ಸರು : ಇದ್ ನಲ್ಲ ರಸ ಉಂಡಲ್ಲ? ಎಂತೇಂದ್ ತಕ್ಕ ಪರಿಯುವೊ?

ಪೂವಿ : ನಾನ್ ನೀನೆಲ್ಲ ಇಕ್ಕ ಅಪರಿಪ್ಪರ ತಕ್ಕ ಪರಂದಂಡುಂಡಲ್ಲ ಅನ್ನನೆ! "ಎನ್ನರಾ ತಡ್ಯಪ್ಪ? ಅಚ್ಚಕೆಲ್ಲ ಗೊಬ್ಬರ ಇಟ್ಟ. ನೀಡ ತಲ್ಮಿನೆಲ್ಲ ಕಟಾಪ್ ಮಾಡಿತ್ ಚಾರ ಮಾಡುವಂಜಿ ಚಾಯಿಕಾರ ಮಾಡ್ನ. ಅಂದಿತೂ ನೋಟಂವೊ! ದಂಡ್ ಪರೆ ಕಾಪಿ ತಂತ್! ಇಗಾಣ ಆಪುಲಿಯರಾ ನೀಕ್"? (ತೆಳಿ)

ಸರು : (ತೆಳಿ) ಅದೆಂತ ಬಲ್ಯ ವಿಷ್ಯ ಅಕ್ಕಯ್ಯ? ನಾಡ ವಡಿಯ ಆಂಗ್ಂಜ ನಿಸೂರ! ಅವೊ ತೇನೊಲಂಜಿಯಡ ಕೂಡೆ ತಕ್ಕ ಪರಿವ ಗೊತ್ತುಂಡಾ? "ಏಯ್ ಬಾರಿರಾ ವಲ್ಂಜಿಯಳೇ! ಕಾಫಿ ಪೊವ್ ಬೀಂದಂಡುಂಡ್. ಇಲ್ಲಿಯೇ ಬಂತ್ ಒಳಿವಕಾಪುಲಿಯಾ ನಿಂಕ್? ದಿನಾಲೂ ಅಚ್ಚಕ್ ದೂರತೆಂಜ ಎನ್ನಂಗ್ ಬಪ್ಪಿರಾಂದ್" ಒರೇ ಸಮ ವಲ್ಂಜಿಯಡ ಕೂಡೆಯೂ ತಕ್ಕ ಪರಿವಕ್ಕಯ್ಯ!

ಪೂವಿ : ಆಚಿ ಮೂಡಿ ಅಂದಕ! ಇಂವೊ ಕಾಫಿ ಗಿಡತೆರ ಕೂಡೆ ತಕ್ಕ ಸುರು ಮಾಡಿತಿಕ್ಕು. ಶಂಭು ವಲ್ಂಜಿಯಡ ಕೂಡೆ ತಕ್ಕ ಸುರು ಮಾಡಿತಿಕ್ಕು. ನಂಗ ದಂಡಳೂ ಉಂಬದೇ ನಲ್ಲದ್ ಕಾಂಬ!

ಸರು : ಅಲ್ಲೆಂಗೂ ನೇರೇ ಅಕ್ಕಯ್ಯ. ಆ ಪಣ್ಣ್ ಈ ಪಣ್ಣೆಂದ್ ಎಂತೇಂಗಿ ಒಂದಾನ ಬಾಟಿತಿಪ್ಪ. ಅಲ್ಲಿಂಜ ಮನೆಕ್ ಬಪ್ಪಂಜಿ "ಎನ್ನಂಗೋ ಕಲೇ ಪಯಿಪ್ಪುಲೇಂದ್" ಕೆಣಿ ಬೋರೆ!

ಪೂವಿ : ನೀಕ್ ಎಡ್ತ ಬಪ್ಪಾ ಪಣ್ಣೆನ?

ಸರು : ಅವೊ ತಿಂದಾನೆಲ್ಲ ನಾನೂ ತಿಂದಕ ಆಸ್ತತ್ತೆಕ್ ಕೂಡುವೊ ಗ್ಯಾರಂಟಿ! ಮೊನಿಯಂದ್ ಚೆನ್ನ ಎಲ್ಂದೆ ಪಣ್ಣ್ ಕೊಂಡಬಾತ್. ತಿಂದಿತ್ ನೋಟೆನ. ಮಕ್ಕರೆ ಮಕ್ಕರೆ! ದಮ್ಮಯ್ಯ ನೀನೇ ತಿಂದಾಂದ್ ಕೊಡ್ತೆಟ!

ಪೂವಿ : ಮಾಚು ಅನ್ನನೇ ಮೂಡಿ. ಒನ್ನಾಂದ್ ಕೋಡಂಕಿತ್ತುಳಿ ಕೊಂಡ ಬಾತ್. ಇದ್ನ ತಿಂದೆಟಕ ಇಂವ್ ನೀನ್ ಬುಡೆಲೇಂದ್! ಒರ್ಪುಳಿನ ತೊಲಿಪ್ಪಂಜಿ ಒರ್ ತೊಳೆ ಬಾಯಿಕ್ ಇಟ್ಟ ನೋಟ್.... ಧೂ ಧೂ... ಪುಳೀ ಪುಳಿ! ನಿನದಲ್ಲಿಯೇ ತುಳ್ಳಿರನಾಂದ್ ಆಚಿ, ಅಚ್ಚಕ್ ಪುಳಿ. ಅಂದಿತೂ ಇಂವೊ ಎಂತ ಎಣ್ಣೆವೊ ಗೋತ್ತುಂಡಾ?(ತೆಳಿ)

ಸರು : (ತೆಳಿ) ಎಂತ ಎಣ್ಣೆಚಿ ಬಾವೊ?

ಪೂವಿ : (ತೆಳಿ) "ನೀಕ್ ಒಂದ್ ತಿಂಬಕಲೇ ಅಚ್ಚಕ್ ಕಷ್ಟಾಚೆಲ್ಲ? ಅಂದಕ ಕೋಡಂಗ

ಆ ಪುಳಿನ ತಿಂದಿತ್ ಕಾಡ್ಲ್ ಎನ್ನನೆ ಜೀವನ ಮಾಡೊಂಡು ಎಣ್ಣೆ ನೋಟನಾಂದ್" ನಾಕೇ ಸವಾಲ್ ನೀಡ ಬಾವಂಡ!

ಸರು : ಒಮ್ಮೆ ನಾನೂ ಕೋಡಂಕಿತ್ತುಳಿ ತಿಂದ್ಯೆ! ಕೋಡಂಗ ಎನ್ನಂಗನ್ನನೆ ಮರತ್ಂಜ ಮರಕ್ ತುಳ್ಳುವೊಂದ್ ಅದ್ನ ತಿಂದಿತಾನ ಪಿಂಜ್ ಗೊತ್ತಾಯೆ ನಾಕ್! (ತಳಿ)

ಪೂವಿ : (ತಳಿ) ಪುಳಿ ತಡ್ಪಕಯ್ಯತೆ ತುಳ್ಳವೊ!..... ಅಲ್ಲ ಮೂಡಿ, ನಂಗ ಸ್ಕೂಲ್ಕ್ ಪೋಪಕ ಆ ಕರ್ಟ್ ಚೋರಂಗನ ತೊಲ್ಚಿತ್ ತಿಂಬಂಜತಲ್ಲ ಗೇನಾಪ ನೀಕ್?

ಸರು : ಗೇನಾಕತೆ? ಆಂಗ್ ಜಗಳ ಬೋರೆ! ಮಮ್ಮಿರ ಕೈಂಜ ದಂಡಾಳಕೂ ಪ್ರಸಾದ ಕಟ್ಟುವಕ ಸತ್ಯ ಪೊರಬಪ್ಪಿಂಜತ್!

ಪೂವಿ : (ತಳಿ) ನೀನ್ ನಾಡ ವೇಲೆ ದೂರ್ ಎಣ್ಣೆವಂಜಿ ನಾಕ್ ಪೊಯ್ಯಿಚಿಡುವಿಂಜದ್?

ಸರು : ನೀನೂ ಕಮ್ಮಿಲಿಲ್ಲೆ, ನೀಡ ಕೈಲಿಂಜ ಕರ್ಟ್ ಕಾಯಿನ ನಾಡ ಕೈಕ್ ತಪ್ಪಂಜಿ ನೀನೇ ಮಮ್ಮಿಕ್ ಚಾಡಿ ಎಣ್ಣೆವಿಂಜದ್? (ತಳಿ)

ಪೂವಿ : ಆ ಕಾಲೇ ಚಾಯಿ ಬಾ. ಇಕ್ಕತ ಮಕ್ಕಕ್ ಕಾಡ್ ಪಣ್ಣೆ ಎಂತಂದೇ ಗೊತ್ತಲ್ಲೆ. ಒಮ್ಮೆ ನೋಟ್, ನಾನೂ ನೀನೂ ಊಕಾಡ್ಂಜ ಕರ್ಮಂಜಿ ಪಣ್ಣೆನ ಮಡಲ್ಟ್ಟಂಡ್ ಮನೆಕ್ ಬಂದ್ಯೆ!.... ಬಟ್ಟೆ ಇಡೀ ಕರೆ! (ತಳಿ)

ಸರು : "ಮಡ್ಕ್ ಇಟ್ಟ ಮೂಡೀಂದ್" ಎಣ್ಣೆ ನೀನ್! ಪೊಯ್ತ ನಾಕ್!(ತಳಿ)

ಪೂವಿ : (ತಳಿ) ಇಕ್ಕ ಗೇನ ಮಾಡ್ಚೆಂಗಿ ತಳಿ ಬಪ್ಪ, ಪೊಯ್ತ ತಪ್ಪೆಚಿಟ್ಟವಕ್ ನೀನ್ ಚಾಡಿ ಎಣ್ಣೆವಿಂಜಿಯ. ನೀನೊಂದೂ ಕಮ್ಮಿಲಿಂಜಿಲೆ.... ಅಲ್ಲ! ಇಯಂಗ ದಂಡಾಳೂ ಏಲೆ ಪೋಚಪ್ಪ?

ಸರು : ಬಾವೊ ಮೊಬೈಲ್ ಎಡ್ಡ ಪೋಯಿತಿಲ್ಲಿಯಾ? ಒರ್ ಪೋನ್ ಮಾಡ್.

ಪೂವಿ : ಅವೊ ತೋಟಕ್ ಪೋಪಕ ಮೊಬೈಲ್ ಎಡ್ಡ ಪೋಪುಲೆ.(ತಳಿ) ಒಮ್ಮೆ ಎಂತಾಚಿ ಗೊತ್ತುಂಡಾ?

ಸರು : ಎಂತಾಚಿ?

ಪೂವಿ : ಈ ಪುಣ್ಯಾತ್ಮ ನಲ್ಲಮಳು ಕೊಜ್ಜಂಡ್ ಮರತ್ ಇಂಜತ್. ಅಕ್ಕಣೆ ಜೋಬುಲಿಂಜ ಮೊಬೈಲ್ ರಿಂಗಾಯಿತ್, ಬೆರಿಯ ಮೊಬೈಲ್ ಎಡ್ಡಿತ್ ಹಲೋಂದ್ ಎಣ್ಣೆ ಮರಕ್ ತಾಕಿಂಜ ಪುಂಡತ್ರ ಏಣ್ ಅಡಿಕ್!(ತಳಿ)

ಸರು : ಉಯೀ ರಾಮಾ! ಅಲ್ಲಿಂಜ?

ಸಕಮೆ ಪೊನ್ನಾಳೆ

- ಪೂವಿ : ಅಲ್ಲಿಂಜ ನಾಕ್ ಫೋನ್ ಮಾಡಿತ್ ಎಣ್ಣೆಚಿ. ಬೆರಿಯ ದಾರ್ನೇಂಗಿ ಕೂಟಿಯಂಡ್ ತೋಟಕ್ ಬಾ ನಾನ್ ಕೋಡಂಡನ್ನಕೆ ಮರತರ ಕೊಡಿಲುಳ್ಳಂದ್!(ತೆಳಿ)
- ಸರು : ಪಾಪ! ಬಾವೊ! ಅಲ್ಲಿಂಜ?(ತೆಳಿ)
- ಪೂವಿ : (ತೆಳಿ) ಅಲ್ಲಿಂಜಂತಾಪೊ? ಆ ಮನೆಕ್ ಓಡ್ನ- ಜನ ಇಲ್ಲೆ. ಈಮನೆಕ್ ಓಡ್ನ-ಜನ ಇಲ್ಲೆ. ಅಕ್ಕಣೆ ವಿಷ್ಯ ಊರ್ಡೀ ಪಬ್ಬೆಚಿ....
- ಸರು : ಅಲ್ಲಕ್ಕಯ್ಯ ನೀಕೇ ಪೋಲು ಇಂಜತ್ತಲ್ಲ?
- ಪೂವಿ : ನಾನ್ ಪೋಯಿತ್ ಎಂತ ಮಾಡ್ವಕಾಪ? ಆ ಏಣಿನ ನಾಕ್ ನೇತುವಕ್ ಕಯ್ಯುವಾ?..... ಅಲ್ಲಿಂಜ ಎನ್ನನೆಲ್ಲೊ ಮಾಡಿತ್ ದಾರ್ನೊ ಕೂಟಿಯಂಡ್ ಪೋನ, ಮಾಚುರ ದುಂಡ್ ನೋಟೊಂಡಿಂಜತ್ ನೀನ್, ಅಚ್ಚೆಕ್ಲೆ ಕಪ್ಪ ಪಟ್ಟಿತ್ ಜನ ಕೂಟಿಯ ಪೋಚಿಂಗೂ ನಾಡ ಮೇಲೇ ಚೊಡಿ ಅವಂಗ್!
- ಸರು : ಎಂತಾಂಗ್ ನೀಡ ಮೇಲೆ ಚೊಡಿ?
- ಪೂವಿ : ಅವೊ ನಾಕ್ ಫೋನ್ ಮಾಡುವಕ ಗಂಟೆ ಪನ್ನೆರಂಡ್. ನಾನ್ ಊರ್ಡೀ ಸುತ್ತಿತ್ ಜನ ಕೆಟ್ಟತೆ, ದಾರ್ನೋ ದಮ್ಮಯ್ಯ ದಕ್ಕಯ್ಯ ಇಟ್ಟಿತ್ ಕೂಟಿಯೆ ಪೋಕಣೆ ಗಂಟೆ ನಾಲ್! (ತೆಳಿ) ತಿಂಬನ್ನಕೆ ನೋಟುವ ಇಂವೊ ನನ್ನ!
- ಸರು : (ತೆಳಿ) ಪಾಪ! ಬಾವಂಗ್ ಎಚ್ಚಕ್ ಕೆಲ ಪಯಿಚಿತಿಜಂತೊ?
- ಪೂವಿ : ನೀನ್ ಬಾವನ ವಹಿಸಿಯಂಡ್ ಪರಿಯತೆ ಸರು. ಚೊಡಿ ಬಪ್ಪ ನಾಕ್. ಅಲ್ಲೆಂಗಿ ಅವಂಗ್ ಉಪಕಾರ ಉಂಡಾ ಗೇನ ಮಾಡ್. ಮನೆ ಮನೆ ತಿರಿತ್ ಜನಕೂಟ್ಟಿಂಡ್ ಪೋಯಿತೂ ನಾಡ ಮೇಲೇ ಉರಿ ಕಾರುವೊ ಎಣ್ಣಕ ಚೊಡಿ ಬಪ್ಪಲಿಯ?
- ಸರು : (ತೆಳಿ) ಅಲ್ಲ ಅಕ್ಕಯ್ಯ ನೀಡ ಮೇಲೆ ಎಂತಾಂಗ್ ಚೊಡಿ ಬಂದ್ಕೆ ಬಾವಂಗ್?
- ಪೂವಿ : ಮೊಬೈಲ್ಕ್ ಫೋನ್ ಮಾಡ್ನವ ನಾನೇ! (ತೆಳಿ)
- ಸರು : ಎಂತಾಂಗ್ ಫೋನ್ ಮಾಡ್ಕೆ?
- ಪೂವಿ : ನೀಡ ಬಾವನೇ ಎಣ್ಣೆತ್ ಪೋಯೆ. ಮಡಿಕೇರಿಂಜ ದಾರೋ ಫೋನ್ ಮಾಡುವ ಅಕಸ್ಮಾತ್ ಮನೆ ನಂಬರ್ಕ್ ಫೋನ್ ಮಾಡ್ಚೆಂಗಿ ನಾಕ್ ಅರಿಚಿಡ್ಂದ್! ಇಂವೊ ಮರತರ ಕೊಡಿಲುಳ್ಳದ್ ನಾಕೆನ್ನೇಂಗಿ ಸ್ವಪ್ನ ಬೂವ ಮೂಡಿ? ನಾನ್ ಫೋನ್ ಮಾಡ್ನ. "ನಿನ್ನಂಜಾಯಿತೆ ನಾಲ್ ಗಂಟೆ ನೇರ ಕೋಡಂಡನ್ನಕೆ ಮರತ್ತ ಕೊಡಿಲ್ ಇಪ್ಪಕಾಚೆಂದ್" ನನ್ನ ದೂರ್ನಕ? ನಾಡ ತಪ್ಪಾ ಎಣ್ಣೆ?... ಆಂಡ ಕೂಟ್ಕ್ ಬಂದಂವೊ

ಮುಂಡತೆ ಇಂಜತಾಂದ್. "ಮಾಚು ಬಾವ ನಿಂಗಕ್ ಮರ ಪತ್ತುವಕ್ ಮಾತ್ರ ಪಡ್‌ಪ್‌ಚಿಟ್ಟಿಲೊ. ಇಳಿವಕ್ ಪಡ್‌ಪ್‌ಚಿಟ್ಟಿತ್‌ಲೆಲೊ". ಅಕ್ಕಯ್ಯ ಎಣ್ಣೆಚಿ, ನೇರಾ ಬಾವಾಂದ್ ಕೇಟರ್‌ತಾ?... (ತೆಳಿ) ಇವಂಗ್ ಉರಿ ಪತ್ತಿರ್‌ತ್!

ಸರು : (ತೆಳಿ) ಆ ಪರಿಸ್ಥಿತಿನ ಗೇನ ಮಾಡುವಕಲೆ ತೆಳಿ ಬಪ್ಪನಾಕ್! ಅಲ್ಲಿಂಜಂತಾಂಚಿ? ಅಂದ್‌ಡೀ ಜಗಲಾಡ್‌ಚಾ, ನೀಡ ಕೂಡೆ?

ಪೂವಿ : ಅದೇ ಲಾಸ್ಟ್, ತೋಟಕ್ ಪೋಪಕ ಮೊಬೈಲ್ ಕೊಂಡ ಪೋಪದ್ ನಿಂದೇ ಪೋಚಿ(ತೆಳಿ)

ಸರು : ಅಂದಕ ಎಂತೇಂಗಿ ಅರ್ಜಂಟ್ ಇಂಜಕ?

ಪೂವಿ : ಬೇಲ್‌ರಲ್ಲಿ ಆ ಬಲ್ಯ ದಾಟ್ಲೆ ಉಂಡ್ ನೋಟ್ ಅಲ್ಲಿಕ್ ಪೋಯಿತ್ ಕೂತ್ ಇಡುವೊ, ಮಾಚು ಕೂ...ಂದ್!(ತೆಳಿ)

ಸರು : ಅಂದಕ ಎನ್ನಂಗಕ್ಕಯ್ಯ ತಡ? ಮಾಚು ಕೂ....ಂದ್ ಎಣ್ಣೆತ್ ಬಾ ಅಂದಕ! (ತೆಳಿ)

ಪೂವಿ : ಅಯ್ಯೋ ಬಾ, ಅದೂ ಕಷ್ಟೇ ಈ ಕಾಲತ್!.... ಗ್ರಾಚಾರ!

ಸರು : ಅರೆ, ಎಂತಾಂಗ್ ಕಷ್ಟ?

ಪೂವಿ : ಒನ್ನಾಂದ್ ಪೋಯಿತ್ ಇನ್ನನೇ ಕೂತ್ ಇಟ್ಟಿನಾ.... ಮಾಚುಂದ್ ಕಾಕ್‌ನದ್ 'ವಾಸೂಂದ್' ಕೇಟತೂಲೊ, ಪೂವಿ ಅಕ್ಕಯ್ಯ ಎಂತಾಂಗೋ ಕಾಕಿಯಂಡುಂಡ್ ಪೊಳೆಕರೆಂಜ ಎದ್ದನೋ ಬುದ್ದನೋಂದ್ ವಾಸು ಓಡಿಯಂಡ್ ಬಂದುವದಾ?(ತೆಳಿ)

ಸರು : ಉಯೀ ರಾಮಾ!.... ಎಂತ ಎಣ್ಣೆ ನೀನ್ ಅವಂಗ್? (ತೆಳಿ)

ಪೂವಿ : ಇನ್ನನೇ ಕತೆಕ್ ಕಾಲ್- ಬಾಲ್ ಕೂಡ್ಯಂಡ್ ಪೋಪೊ ನೋಟ್!

ಸರು : ಎಂತಾಚಿಕ್ಕಯ್ಯ ಅಂತದ್?

ಪೂವಿ : ಒರ್ ವಾರಕ್ ಮಿಂಜಾ ಎಂತಾಯಿತ್... ದಾದೋ ಒಬ್ಬ ಬಿಕ್ಷೆಕಾರ ಈಲೆಲ್ಲ ತಿರಿಯಂಡಿಂಜತಾ.... ಆಂಡ ಕೂಟ್‌ಕ್ ಒರ್ ಸುದ್ದಿಯೂ ಪುಟ್ಟಿಂಜತ್. ಈಲೆಲ್ಲ ಉರ್ತಮಾರಿಯ ವೇಷ ಇಟ್ಟಿಂಡ್ ತಿರಿಯಂಡುಂಡೊಲೋಂದ್. ಅಕ್ಕಣೆ ಆ ಬಿಕ್ಷೆಕಾರನ ತೇಡಿತ್ ಪಡನೆಟ್ಟಿಕ್ ದಂಡ್ ಕೊಡ್ತಿತ್, ಅವಡ ಗ್ರಾಚಾರಕ್ ಅವಂಡ ಕೆಟ್ಟ್‌ಮೂಟೆನ ಉತ್ತಿತ್ ನೋಟಣೆ ಅದೊಲೋರ್ ಚಾಕೂ ಕೊಟ್ಟಿತ್, ಪಾಪತವಂಗ್ ಪೊಯ್ತ!

ಸರು : ದಮ್ಮಯ್ಯ! ಅವೊ ನೇರಾಯಿತೂ ಬಿಕ್ಷೆಕಾರನಾ- ಉರ್ತಮಾರಿಯ ಅಕ್ಕಯ್ಯ?

ಪಳನು ಪೊನ್ನಾಲ್

- ಪೂವಿ : ದಾಕ್ ಗೊತ್ತ್ ಮೂಡಿ? ಅಂತೂ ಇಂತೂ ಎಲ್ಲಾರೂ ತಕ್ಕ್ ಪರ್ಂದಂಡಿಂಜತ್, ಊರ್‌ರೊಳ್‌ದಾಕ್ ದಾರ್ ಬಾತೆಂಗೂ 'ಕೂ'....ಂದ್ ಕೂತ್ ಕೊಡಿ, ಆಣಾಳ ನಂಗ ಎಲ್ಲಿಂಜಕಲೂ ಮನೆಕ್ ಓಡಿಯಂದ್ ಬಪ್ಪಾಂದ್!(ತೆಳಿ) ಪಾಳಾನದ್, ಇದ್ ನಾಕ್ ಗೇನ ಉಂಡೆಂಗನ್ನೆ? (ತೆಳಿ)
- ಸರು : (ತೆಳಿ) ಕರ್ಮ!..... ವಾಸುರ ಕೂಡೆ ಬಾಕಿ ಉಳ್ಳವೊ ಬಂದಿತಿಕ್ಕು!
- ಪೂವಿ : ಅಕ್ಕು ಮೂಡಿ!... ಬಂದನ್ನಕೆ ವಾಸು "ಎಲ್ಲಿಯ ಅಕ್ಕಯ್ಯ ಅಂವೊ"ಂದ್ ಕೇಟಿತ್. ಬಾಕಿ ಉಳ್ಳವು ವಾಸು ಓಡಿ ಬಪ್ಪಾನ ನೋಟಿತ್ ಕೈಲ್ ಎಂತ ಉಂಡೋ ಅದ್‌ನೆಲ್ಲ ಪುಡ್‌ಚೆಂಡ್ ಓಡಿಯಂದ್ ಬಂದಿತ್, ಕತ್ತಿ, ಗುದ್ದಲಿ, ಇರ್‌ಂಬಾರೆ, ಪಿಕಾಸಿ, ಒಂದ-ದಂಡಾ? ಬೋಂಡ ಪಾಡ್!.... (ತೆಳಿ) ಮಾಚು ನಾಕ್ ಪೊಯ್ಯುವದೊಂದ್ ಬಾಕಿ!(ತೆಳಿ)
- ಸರು : (ತೆಳಿ) ಗ್ರಾಚಾರ ಎನ್ನನೆಲ್ಲ ಬಂದುವಲ್ಲ ಅಕ್ಕಯ್ಯ? ಎಂತೆಂಗಾಡ್ ಊರ್‌ಲ್ ಅಚ್ಚಕ್ ಒಗ್ಗಟ್ಟ್ ಉಂಡಲ್ಲ, ಅದೇ ಬಲ್ಯ ವಿಷಯ,
- ಪೂವಿ : ಒಗ್ಗಟ್ಟ್ ತೊಂದರೆ ಇಲ್ಲೆ ಬುಡ್, ಇಕ್ಕ ಪೊಣ್ಣಾಳಲೂ ಒಂದೂ ಕಮ್ಮಿ ಇಲ್ಲೆ ಮೂಡಿ, ಸ್ತ್ರೀ ಶಕ್ತಿ, ಮಹಿಳಾ ಸಮಾಜ ಸ್ವಸಹಾಯ ಸಂಘ ಅದ್ ಇದೊಂದ್ ಎಲ್ಲರೂ ಇಕ್ಕ ಪೆರ್ತ್ ಗಟ್ಟಿಗಂಗಳೇ,
- ಸರು : ನಾನೂ ಕೂಡಿಯಂಡಿಯೆ ಒರ್ ಸ್ವಸಹಾಯ ಸಂಘಕ್, ಕೈಂಜ ತಿಂಗ ಒರ್ ಸಂಘಕ್ ಇಟ್ಟಿಂಜ ಪಣತ್‌ನ ಪಾಲ್ ಇಟ್ಟಿಂಡತ್, ನುಪ್ಪದಾಯಿರ ಉರ್‌ಪಿಯ ಬಂತ ಓರಬಕ್, ಮಿಂಜೆಲ್ಲ ಎಚ್ಚಕ್ ಕಷ್ಟ ಪಡುವಿಂಜತಲ್ಲಕ್ಕಯ್ಯ ಪ್ರತಿಯೊಂದಾಂಗೂ ವಡಿಯಂಗಳನೇ ಕೇಕೊಂಡು, ಅಯಿಂಕ್ ಓರ್ ಕೊಂಬು ಬಂದುವೊ, ಇಕ್ಕ ನಂಗಳೂ ಮಂಡೆ ನೇತಿತ್ ನಡೆಪನ್ನಕೆ ಆಯಿತ್ ಬಾ.
- ಪೂವಿ : ಕೂಡುವಕ್ ನಾನೂ ಕೂಡಿಯಂಡಿಯೆ, ದುಡ್ಡ್ ಕೈಕ್ ಬಪ್ಪದ್ ಒಂದ್ ಮಾತ್ರ ಅಲ್ಲ ಮೂಡಿ, ಪತ್ತಾಳ್ ಕೂಡೆನಲ್ಲಿ ಪತ್ತೆ ವಿಷ್ಯ ಅಪ್ಪರಿಪ್ಪರ ಪರ್ಂದಿತಾಪಕ ಒಬ್ಬಕ್ ಗೊತ್ತುಳ್ಳ ಮಾಹಿತಿ ಪತ್ತಾಳಕೂ ಗೊತ್ತಾಪ, ಅದೂ ಬಲ್ಯ ಲಾಭೇ.
- ಸರು : ನಂಗ ಈಯಾಂಡ್ ಕಾಫಿ ಕೊಜ್ಜಿಯೆ ಎನ್ನನೇಂದ್ ಗೇನ ಮಾಡ್ಕ? ಏದ್ ಆಳಡ ಪ್ರಾಬ್ಲಂ ಕೂಡಿ ನಂಗಕಿಲ್ಲೆ, ನಂಗಡ ಒರ್ ಟೀಂ ಉಂಡ್, ಆರ್ ಜನಕ್ ಒರ್ ತಿಂಗ ಇಡೀ ಕಾಫಿರದೇ ಪಣ್.
- ಪೂವಿ : ವಡಿಯಂಡ ಕೈಂಜ ಸಂಬಳಾಂದ್ ಕೇಕೊಂಡಿಂಜತ್ ಸರೂ...
- ಸರು : ನಾನ್ ಬುಟ್ಟಿಯೇಂದ್ ಗೇನ ಮಾಡ್ಕ? ಪೊರ್ಮೆಂಜ ಆಳಳ ಕೂಟಿಯ

ಬಪ್ಪಕ ಇನೂರ್ ಉರ್‌ಪಿಯ ಸಂಬಳ, ಕೂಟ್‌ಕ್ ಜೀಪು ಬಾಡಿಗಿ, ಆಂಡ ಕೂಟ್‌ಕ್ ಆಳಳ ಕೂಟಿಯ ಬಂದವಂಗ್ ಕಮಿಷನ್ ಬೋರೆ! ಅದೆಲ್ಲ ಕೂಡುವಕ ಇನೂರ್‌ಯಿಟ್ಟು ಐಂಬದ್ ಉರ್‌ಪಿಯ ಅಪಿಂಜತ್, "ನಾಕ್ ಆಚ್ಚೆಕೆಲ್ಲ ಬೋಡ, ಇನೂರ್ ಉರ್‌ಪಿಯ ಲೆಕ್ಕ ಇಡ್ ಮದೀಂದ್" ಎಣ್ಣೆಯೆ.

ಪೂವಿ : ಎಂತ ಎಣ್ಣೆಚಿ ಶಂಭು?... ಒತ್ತಂಡತಾ?

ಸರು : ಒತ್ತವತೆ ಇಂಜಕ ನಾನ್ ಬುಡುವಿಯನಾ?... ಅದಲ್ಲತೆ ಅವಂಗೂ ಗೊತ್ತುಂಡ್ ಅಕ್ಕಯ್ಯ, ಇವ ದುಡ್ಡೆನ ಮುಂಡತೇಂಗಿ ಪಾಳ್ ಮಾಡುವವ ಅಲ್ಲಾಂದ್.

ಪೂವಿ : ಅಲ್ಲ ಸರೂ, ಕಾಲ ಎನ್ನನೆಲ್ಲ ಬದಲಾಪ ಗೇನ ಮಾಡ್, ಓರ್ ಕಾಲತ್ ಪೊಣ್ಣಾಳ ದೈನಾಂದ್ ವಡಿಯಂಗಳ ದುಡ್ಡೆ ಕೇಪ ಕಾಲ ಇಂಜತ್, ಇಕ್ಕ ನಂಗಳೂ ನಾಲ್ ಕಾಸ್ ಸಂಪಾದನೆ ಮಾಡುವಕಾಪಕ ನಂಕೂ ಎಂತದೋ ಒರ್ ದೈರ್ಯ ಬಂದನ್ನಕೆ ಆಯಿತ್,

ಸರು : ನಾನೂ ಅದೇನೇ ಎಣ್ಣುವಕ್ಕಯ್ಯ, ಸ್ವಂತ ನೈಪು ನಂಕೂ ಬಲ ತಪ್ಪ, ವಡಿಯಂಗೆ ಕೈಲ್ ದುಡ್ಡೇ ಇಲ್ಲತೆ ಆಪಕ ಅಯಿಂಗ ಪೊಣ್ಣಾಳಳ ಕೇಟಿತೇ ಕೇಪ. ಅಕ್ಕ ನಂಗಳೂ? ತಾಕತ್ ಉಳ್ಳದ್ ಅಯಿಂಕ್ ಗೊತ್ತಾಪ.

ಪೂವಿ : ಅನ್ನನೆ ಅಲ್ಲ ಸರು, ವೆಡಿಯನೇ ಆಡ್- ಪೊಣ್ಣೇ ಆಡ್, ನೈಪದ್ ಸಂಸರಕೆನ್ನೆ? ಅವೊ ಬಲ್ಯಂವೊ-ಇವ ಕಮ್ಮಿಂದ್ ದಾರೂ ಗೇನ ಮಾಡುವಾಗ, ಒಟ್ಟಾರ ಎನ್ನನೇಂಗಿ ಸಂಸಾರತೆರ ಜವಾಬ್ದಾರಿನ ನೀಸಿಯಪೋಂಡುವಪ್ಪ..... ಓ ನಾಯಿರ ಕೂರೆ ಕೇಪ, ಬಾತ್ ಕಾಂಬ ಇವು....

ಮಾಚು : ಓಹೊಹೋ ಎನ್ನ ಸರೂ, ಅಕ್ಕಂಡೊ ತಂಗರೊ ಒಪ್ಪಾರ ನೋಟ್, ಕಣ್ಣ ಚೆರಟೆರ ಚಿಪ್ಪಾರ ನೋಟ್‌ಂದ್ ಎನ್ನೊ ಬಾರಿ ಪಳಮೆ ಕೇಪಿಂಜತ್?

ಶಂಭು : ಮಾಚೂ ಅಣ್ಣಯ್ಯ, ದಂಡ್ ಪೊಣ್ಣಾಳ ಕೂಡ್‌ನಲ್ಲಿ ಪೊಡಿಯ-ಡ್ರೆಸ್‌ರ ಸುದ್ದಿ ಅಲ್ಲತೆ ಪಿಂಚಿಂತ ಪರಿಯುವ ಎಣ್ಣೆ? ಅದ್ ಬುಟ್ಟಕ ಟಿ.ವಿ. ಸೀರಿಯಲ್, ಅವಡ ಮಾಯಿ ಅನ್ನನೆ ಮಾಡಿರ್‌ತ್, ಇವಡ ಮೈಮ ಇನ್ನನೆ ಮಾಡಿರ್‌ತ್‌ಂದ್! (ತಳಿ)

ಸರು : ನೀನ್ ಚೆನ್ನ ಮುಂಡತ್ತಿರ್ ಶಂಭು.ನಂಕೆನ್ನೆ ಬೋರೆ ಕೆಯಿಮೆ ಇಲ್ಲಿಯಾ? ನಂಗ ಬೋರೆಂತೋ ಪರಂದಂಡಿಂಜತ್.

ಪೂವಿ : ಅಲ್ಲ ಮಾಚು, ಎಂತ ಮಾಡಿಯೆ ಈನೇರ?

ಸಳಮೆ ಫೋನ್ಮಾಲ್

ಮಾಚು : ನೀಕೆಂತ ಗೊತ್ತ್ ಪೂವಿ ನಾಡ ಕಷ್ಟ? ಪೋಯಿತ್ ನೋಟಣೆ ನೀರಾ ಪಾರಿಯಂಡ್ ಇಂಜಿಲೆ, ತೋಡ್‌ರ ಕೊಡೀಲ್ ಕಟ್ಟಿ ಕಟ್ಟಿತಲ್ಲ ಅಲ್ಲಿಕೆತ್ತನೆ ಪೋಂಡಿಯಾಚಿ....

ಶಂಭು : ಅಣ್ಣಯ್ಯಂಡ ಕೈಕ್ ಒರ್ ಪಾಂಬು ಕಡಿಪ್ಪಿಂಜತ್, ಚೆನ್ನಂಗಾಲ್ ಬಚಾವ್!

ಪೂವಿ : ಎಂತ? ಪಾಂಬುವಾ? ಎಲ್ಲಿಂಜತ್ ಮಾಚು?

ಮಾಚು : ನೀನ್ ಚೆನ್ನ ಸಮಾಧಾನತಿರ್ ಮಿಂಜಾ ಹಾರ್ಟ್‌ಎಟೀಕ್ ಆಯಿಪೋಕು, ಪಾಂಬುವಣ್ಣಕ ವಿಷತ್ ಪಾಂಬು ಅಲ್ಲ,ಒಳ್ಳೆ ಪಾಂಬು!

ಸರು : ಎಲ್ಲಿಂಜತ್ ಬಾವ ಪಾಂಬು?

ಶಂಭು : ಪೈಪುಲ್ ನೀರೆನ್ನಂಗ್ ಬಂದಂಡಿಲ್ಲೆಂದ್ ನೋಟಣೆ ಪೈಪು ಅಡ್‌ತ್ ಪೋಯಿತಿಂಜತ್, ಇದೆಂತ ಕತೇಂದ್ ಅಣ್ಣಯ್ಯ ಆಂಡೋಳ್‌ಕ್ ಬೆರ ಇಟ್ಟಿತ್ ನೋಟ್‌ಚಾ, ಅಕ್ಕಣೆ ಎಂತದೋ ಮೆತ್ತನೆ ಕೊಟ್ಟೊಚೊಲೊ....

ಪೂವಿ : ಅಲ್ಲ ಮಾಚೂ, ಅಚ್ಚಕೂ ಗೊತ್ತಾಪುಲಿಯ ನೀಕ್, ಪೈಪ್‌ರೊಳ್‌ಲ್ ಎಂತ ಇಪ್ಪಾಂದ್ ದಾಕ್ ಗೊತ್ತ್? ಬೆರ ಇಡುವಕಂತಾಂಗ್ ಪೋಯೆ ನೀನ್?

ಮಾಚು : ನೀನ್ ಚೆನ್ನ ಮುಂಡತಿಪ್ಪಿಯಾ? ಎಂತಾಚಿ ಇಕ್ಕಾಂದ್ ಅನ್ನನೆ ಕಳಿಪ್ಪೊನೀನ್?

ಸರು : ಮುಂಡತಿರಕ್ಕಯ್ಯ, ಕೆಲ ಪೈಪಾಂದ್ ಎಣ್ಣೆಯಂಡಿಂಜಿಯಲ್ಲ ಉಂಗನ....

ಪೂವಿ : ನೀಕ್ ಗೊತ್ತಿಲ್ಲೆ ಸರು, ಇವಂಡ ಕಿತಾಪತಿಂಜ ಮಂಡೆ, ಮಂಡೆ ಪಾಳಾಯಿ ಪೋಪ ನಾಡ!

ಸರು : ನಂಗಡ ಸಾಹುಕಾರನೂ ಕಮ್ಮಿಲೊಂದೂ ಇಲ್ಲೆ, ಎಣ್ಣುವಕ್ ಪೋಚೆಂಗಿ ನನ್ನ ಕಡಿಪ್ಪಕ್ ಬಪ್ಪ!(ತೆಳಿ)

ಶಂಭು : ಸುರು ಮಾಡ್ಯ ನೀಡ ಹರಿಕತೆ? ಅಣ್ಣಯ್ಯ, ನಾನ್ ಎಣ್ಣದ್ ಎಂತಾಚಿ? ಮಮ್ಮಂಡ ಕೂಡೆ ಇವ ನಾಡ ಕತೆನೇ ಎಣ್ಣಂಡಿಂಜಿತಿಕ್ಕು!(ತೆಳಿ)

ಮಾಚು : ಇಂಜಿಲೋರ್ ವಿಷ್ಯ ಎಂತ ಗೊತ್ತುಂಡ ಶಂಭು? ಈ ಪೋಣ್ಣಾಳ ಇಕಿಕ್ಕ ಇಚ್ಚಕ್ ಚಿಗಿರಿಟ್ಟಿ, ಮಹಿಳಾ ಸಮಾಜ, ಆ ಸಂಘ-ಈ ಸಂಘಾಂದ್ ಸುರು ಆನ ಪಿಂಜಾ!

ಪೂವಿ : ಅಕ್ಕು ಅಕ್ಕು, ನಿಂಗ ಆಣಾಳ ನಂಗಳ ನಾಲ್ ಗೋಡೆರ ನಡುಲ್ ಕೂಟಿತ್ ಚಾಯಿ ನೋಟ್ಪಂಡಿಂಜಿರ, ಎನ್ನೊ ದೇವಡ ದಯ ಇದೋರ್ ಸ್ತ್ರೀಶಕ್ತಿ ಸಂಘ, ಸ್ವಸಹಾಯ ಸಂಘ ಬರಲಾಯಿತ್ ನಂಗ ಬಚಾವಾಯಂಡತ್!

ಮಾಚು : ಇಕ್ಕ ಗೇಟ್ ಓಪನ್ ಮಾಡಿತ್ ನಿಂಗಳ ಬಾಣೆಕ್ ಮೇವಕ್ ಬುಟ್ಟಿತ್!(ತೆಳಿ)

ಶಂಭು : ಮಮ್ಮ, ನಂಗ ಪೋನ ಪಿಂಜಾ ನಿಂಗ ಕುಶೀಲ್ ಜಗಲಾಡ್ಲೊಳಿ ಆಚಾ!(ತೆಳಿ)

- ಸರು : (ತೆಳಿ) ನಂಗಡಲ್ಲಿ ಜಗಳಕ್ ಮೊಳಿ ತೇಡುವೊ ನಾನೇ!
- ಶಂಭು : ಸದ್ಯ! ಒತ್ತಂಡಿಯಲ್ಲ? (ತೆಳಿ)
- ಪೂವಿ : ಎಂತಾಂಗ್ ಜಗಳಕ್ ಮೊಳಿ ತೇಡುವೊ?
- ಸರು : ಎಚ್ಚಕ್ಂದ್ ಮುಂಡತೆ ಇಪ್ಪೊ ಅಕ್ಕಯ್ಯ? ಇಂವೊ, ಪತ್ತ್ ಪರ್ಂದಕ ಒಂದ್ ಪರಿವದ್ ಕಷ್ಟ!.... ನಾನ್ ಕೂಳಿರನ್ನಕ ಒಬ್ಬಳೇ ಪರಪರ ಪರಾಂದ್ ತಕ್ ಪರ್ಂದಂಡಿಪ್ಪಿ.....
- ಶಂಭು : "ಅದ್ಂಗೆ ಮೆಲ್ಲೆ ಒರ್ ಮೊಳಿ ಇಡುವಿ. ಜಗಳ ಸುರು ಮಾಡ್ವಿ. ಅಕ್ಕ ಇವನೂ ಜಗಳಕ್ ಸುರು ಮಾಡುವ".... ಆಚಾನೀಡ ವರದಿ?
- ಮಾಚು : ಶಂಭೂ, ದಂಡಾಳಡ ಕೇಸೂ ಒರೇ ಧರ ಆಚಾ! ಜಾಗ ಮಾತ್ರ ಬೋರೆ ಬೋರೆ ಅಚ್ಚಕೆ!(ತೆಳಿ)
- ಪೂವಿ : ನೋಟ್ಯಾ ನೋಟ್ಯಾ ಸರು? ಅವೊ ಇಂಡೆರೆಕ್ಕಾಯಿತ್ ನನ್ನ ಜಗಳಗಂಟೀಂದ್ ಎಣ್ಣಂಡುಳ್ಳ? ನಂಗಡಲ್ಲಿ ಜಗಳ ಸುರು ಮಾಡುವದೇ ಇಂವೊ, ಅಲ್ಲಿಂಜ 'ಕೋಡ ಮೋರ್ ತಿಂದಿತ್ ಮೇಕೆರ ಬಾಯಿಕ್ ಉದ್ದುಟೆ'ಂದೆಣ್ಣಾಟ ಎಲ್ಲಾನೋ ನಾಡ ಮಂಡೆಕ್ ಇಟ್ಟುವೊ!
- ಮಾಚು : ಮದಿ ಪೂವಿ, ದುಂಬಾ ಹೊಗಳತೆ ನನ್ನ! ನಾಡ ಕೇಳಿಂಗೀರ್ತಿ ಲೋಕಕ್ ಪಬ್ಬರುವ,(ತೆಳಿ)
- ಸರು : ಬಾವ, ನಿಂಗ ಜಗಳಾಡಿಯಂಡ್ ಎಕ್ಕೇಂಗಿ ತಕ್ ಪರಿಯತೆ ಇಂಜದ್ ಉಂಡಾ?
- ಮಾಚು : ನೀಡ ಅಕ್ಕಯ್ಯನ ಕೇಳ್, ಎಂತ ಎಣ್ಣುವ ನೋಟನಾ!(ತೆಳಿ)
- ಶಂಭು : ಮುಂಡತ್ತಿರ್ ಸರು ನೀನ್! ಆಯಿಂಕಯಿಂಕ್ ಕಡ್ಪೊಚಿಡುವಂಜಿ ಚಾಯಿ ನೋಟತೆ, (ತೆಳಿ)
- ಪೂವಿ : ಕಾಲ ನೇರ ನೋಟತೆ ನಂಗ ಮಾತ್ರ ಜಗಳ ಮಾಡುವಾಂದ್ ಗೇನ ಮಾಡ್ಕ?
- ಮಾಚು : ರಾಹುಕಾಲತ್ ಜಗಳ ಸುರು ಆಚೀಂದ್ ಬೆಚ್ಚ, ಒರ್ ದಿನಕೆತ್ತನೆ ಆಂಡ ಕಾಚೆ ಇಕ್ಕು, ಗುಳಿಗ ಕಾಲತ್ ಸುರು ಆಚೆಂಗಿ ಮಾತ್ರ ಮೂಂದ್ ದಿನಕೆತ್ತನೆ ಇಪ್ಪದೂ ಉಂಡ್, ಆಚೆಂಗಿ ತಕ್ ಪರಿಯತೆ ಇಪ್ಪುಲೆ, ಖರ್ಚಿಕ್ ಎಚ್ಚಕ್ ಬೋಂಡುವೊ ಅಚ್ಚಕೆ!(ತೆಳಿ)
- ಸರು : ನಿಂಗ ದಂಡಾಳಡ ಗುಟ್ಟ್ ನಾಕ್ ಗೊತ್ತಿಲ್ಲತೆ ಒಂದೂ ಇಲ್ಲೆ, ಅರೆಗಂಟಿ ಒಬ್ಬನ ಕಾಂಗತೆ ಒಬ್ಬಿಂಗೆಪ್ಪಕ್ ಆಪುಲೇಂದೂ ಗೊತ್ತುಂಡ್ ಆಚಾ?

ಪಳನು ಪೊನ್ನೂಲೆ

- ಶಂಭು : ಮಮ್ಮ, ಇವಡ ಕತೆ ಮಾತ್ರ ಎಂತೇಂದ್ ಗೇನ ಮಾಡ್ಕೆ? ವಡಿಯಂಡ ಕೂಡೆ ತಕ್ಕ ಪರಿಯೆತೆ ಇಂಜಕಲೂ, ಅಕಸ್ಮಾತ್ ಯಾವನೇಂಗಿ ವಡಿಯಂಡ ಸುದ್ದಿತ್ ಬಾತ್‌ಂದ್ ಬೆಚ್ಚ, ಮಾಕಾಳಿರನ್ನಕೆ ವಡಿಯನ ವಹಿಸಿಯಂಡ್ ಅಯಿಂಡ ವಿರುದ್ಧ ಪೋರಾಟಕ್ ಇಳೊಂಜಿರುವ!(ತೆಳಿ)
- ಪೂವಿ : ಅಲ್ಲೆಂಗಿ ಮಾತ್ರ ಬುಟ್ಟೆಕೊಡ್‌ಪಕಾಪ ಶಂಭು? ಅದೆಂತದೋ ಒರ್ ಗಾದೆ ಉಂಡ್ ನೋಟ್, "ನಂಗ ನಂಗ ಪಗೆ ಆಯಿತಿಂಜಕಲೂ ಊರ್‌ರ ಮಿಂಜಾಲ್ ಒಂದಾಯಿತಿಕ್ಕಾಂದ್" ಅನ್ನನೇ ಇದೂ! (ತೆಳಿ)
- ಮಾಚು : ಒರ್ ವಿಷ್ಯ ಮಾತ್ರ ನೇರೇ ಶಂಭು, ಇಕ್ಕಿಕ್ಕ ಈ ಪೊಂಗಡ ಸಂಘ ಆದ್ ಇದೊಂದ್ ಸುರು ಆನ ಪಿಂಜಾ ಆಣಾಳಕ್ ಬಾಳ್ ಗೆತಿ ಇಲ್ಲತೆ ಆಯಿರ್‌ತ್!
- ಶಂಭು : ಅಲ್ಲ ಅಣ್ಣಯ್ಯ, ಅದೋರ್ ವಿಷ್ಯ ಗೇನ ಮಾಡ್‌ಚೆಂಗಿ ಆಶ್ಚರ್ಯ ಆಪ, ನಂಗಡಲ್ಲಿ ಆ ಪಾಪ ಕಳ್ಳೆ ಬುಡ್‌ತಿರ್‌ತ್,
- ಪೂವಿ : ಸುಮಾರ್ ಜಾಗತ್ ಈ ಕತೆ ನಡೊಂದಿತ್ ಶಂಭು, ಓರಂದ್ ಹಾಡಿಲ್ ಆ ಪೊಮ್ಮಕ್ಕಳ ಬದುವಕೇ ಬುಡುವಿಂಜಲೆ ಆಣಾಳ, ಅಲ್ಲಿ ಇಕ್ಕಿಕ್ಕ ಪೊಮ್ಮಕ್ಕ ಉಶಾರಾಯಿತ್, ಸ್ತ್ರೀ ಶಕ್ತಿ ಸಂಘಟನೆ ಪೆರ್ತ್ ಚಾಯಿಲ್ ಕೆಲಸ ಮಾಡ್ಕೊಂಡುಂಡ್,
- ಸರು : ನಂಗಡ ಊರ್‌ಲ್ ಅಯಿಂಕ್ ಮೇಲ್‌ಕ್ ಬಟ್ಟೆಕೇ ಕಷ್ಟ ಇಂಜತ್, ಇಕ್ಕ ಎಲ್ಲಾರೂ ಒಂದಾಯಿತ್ ನೈಪ, ಸಂಪಾದನೆ ಮಾಡ್‌ನ ದುಡ್ಡಿನ ಉಳಿಕೆಯೂ ಮಾಡುವ,
- ಮಾಚು : ಆಣಾಳಕ್ ಲಾಭ ಕೂಡಿ ಉಂಡಲ್ಲ ಸರೂ? ಅರ್ಜಂಟ್‌ಕ್ ಎನ್ನೇಂಗಿ ದುಡ್ಡ್ ಬೋಂಡೂಂದಾಚೆಂಗಿ ಪೊಣ್ಣಾಳ ಕೂಟಿ ಬೆಚ್ಚದೂ ಕೆಟ್ಟುವಲ್ಲ? ದಂಡಾಂಗಡೆ ಕೂಡ್‌ಚೆಂಗಿ ಚಾಯಿಲ್ ಬದುಕೊಲೂಂದ್ ಅಯಿಂಕೂ ಗೊತ್ತಾಯಿತ್,
- ಮಾಚು : ಮನುಷ್ಯಂಗ್ ಆ ವಿಚಾರ ಮಂಡಕ್ ಪೋಚೆಂಗಿ ಮದಿ, ನಂಗ ನಂಗಳ ನಂಗ ನಂಗಲೇ ಉದ್ದಾರ ಮಾಡ್ಕೊವೊಲು ಅಲ್ಲತೆ ಬೋರೆ ದಾರು ಬಂತ್ ನಂಗಳ ಪೊಲ್‌ತುಲೆ ಎಣ್ಣುವದ್ ಗೊತ್ತಾಚೆಂಗಿ ಪ್ರತಿಯೊಬ್ಬನೂ ಉದ್ದಾರ ಆಲು,
- ಸರು : ಪೊಣ್ಣಾಳಲೂ ಕಳ್ಳೆ ಕುಡಿಪ್ಪಿಂಜತ್ ಬಾವಾ, ಅದೆನ್ನನೆ ಅಯಿಂಕ್ ದೇವ ಮನಸ್ ತಾತೊ? ಎಲ್ಲಾ ಬದಲಾಯಂಡುಂಡ್,
- ಪೂವಿ : ಅಯಿಂಡ ಮಂಡೆರ ಎಳ್ತೆ ಅನ್ನನಿಂಜಿತಿಕ್ಕು, ಇಂಜೆ ನಂಗ ಬದಲಾಂಡೂಂದ್

ಮನೆಸ್ ಬಪ್ಪಕೂ ಅದೇ ಕಾರಣ ಆಯಿತಿಕ್ಕು, ಪೊಣ್ಣಾಳ ಬದಲಾಚೆಂಗಿ ಎಲ್ಲಾ ಬದಲಾಪ

ಮಾಚು : ಪೂವಿ, ಎಕ್ಕಲೋ ಅಂತಾರಾಷ್ಟ್ರೀಯ ಮಹಿಳಾ ದಿನಾಚರಣೆ ಉಂಡ್ ಕಾಂಬಲ್ಲ?

ಪೂವಿ : ಅದೆಂತಾಂಗಿಕ್ಕ ನೀಕ್? ಮಹಿಳಾ ದಿನಾಚರಣೆ?

ಮಾಚು : ಎಂತಾಂಗಿಣ್ಣಕ ಅಂದೆತ್ ರ ದಿನ ನಂಗ ಆಣಾಳ ಚೆನ್ನ ಎಚ್ಚರತ್ತಿರೊಂಡು, ಎಲ್ಲಾಕೂ ಓರಂದ್ ದಿನಾಚರಣೆ ಉಂಡ್, ಮಹಿಳಾ ದಿನಾಚರಣೆ, ಮಕ್ಕಳ ದಿನಾಚರಣೆ, ಆ ದಿನಾಚರಣೆ, ಈ ದಿನಾಚರಣೆ! ಪಾಪತ ಈ ಆಣ್ ಜನ್ಮಕ್ ಏದೇಂಗಿ ಒರ್ ದಿನಾಚರಣೆ ಉಂಡಾ ಎಣ್ಣ್ ಶಂಭು?

ಶಂಭು : ನೇರೆ ಅಲ್ಲ ಅಣ್ಣಯ್ಯ? ಆಣಾಳಡ ದಿನಾಚರಣೆಂದ್ ನಂಗಲೂ ಎನ್ನೇಂಗಿ ಒಂದ್ ಮಾಡಿಯವದ್ ನಲ್ಲದ್, ನಂಕೂ ಚೆನ್ನ ಧೈರ್ಯ ಬಪ್ಪ,

ಸರು : ಅಂದಕ ನಿಂಗ ದಂಡಾಳು ಕೂಡಿತ್ ಒರ್ ಸಂಘ ಸುರುಮಾಡಿ!(ತೆಳಿ)

ಮಾಚು : ನೇರೇ, ಪೆದ ಎಂತ ಬೆಕ್ಕನ?(ತೆಳಿ)

ಪೂವಿ : ಪಾಪಿಕೆಟ್ಟಿ ಆಣಾಳಡ ಸಂಘ, ಅಧ್ಯಕ್ಷರು ಪೊಳೆಕರೆ ಮಾಚಯ್ಯ, ಉಪಾಧ್ಯಕ್ಷರ ಬಲ್ಯಬೇಲ್ ಶಂಭು!(ತೆಳಿ)

ಮಾಚು : ಆಂಗ್ಂಜ ಮಿಂಞ ಓರ್ ಊಟ ಉಂಡಕ ನಲ್ಲದ್ ಪೂವಿ!

ಪೂವಿ : ಅಯ್ಯೊಯ್ಯೊ! ನಾಡ ಮರ್ಪುಕಿಚ್ಚಕ್! ಪಾಪ ಶಂಭುಕ್ ಎಚ್ಚಕ್ ಕೆಲ ಪಯಿಚಿತೋ!

ಸರು : ಅಕ್ಕಯ್ಯಂಗ್ ಅಕ್ಕಲೇ ಕೆಲ ಪಯಿಪಿಂಜತೊಲೊ! ಮಾಚು ಕೂ....ಂದ್ ಎಣ್ಣುವಕ್ ಏರ್ಪಾಡ್! ಅಕ್ಕಣೆ ನಿಂಗಲೇ ಬಂದ್‌ಟ್ಟ!

ಶಂಭು : ಇಂಞೆಂತಾಂಗ್ ಬಾಕಿ ಆಯೆ? ಕೂತ್ ಇಡೊಲಿಂಜತಲ್ಲ?

ಮಾಚು : ಮಾಚುರ ಬದಲ್‌ಕ್ ವಾಸು ಬಪ್ಪದ್ ಬೋಂಡಾಂದ್ ಪೂವಿ ಕೂತ್‌ಡುವಾನ ಬಾಕಿ ಮಾಡಿತಿಕ್ಕೊಂಡು ಅಂದಕ!(ತೆಳಿ)

ಪೂವಿ : ಆ ವಿಷ್ಯ ಉಂಡಿತಾನದೂ ಪರಿಯನ, ಎಲ್ಲರೂ ಉಂಬಕೇಳಿ 'ಕೂ!'(ತೆಳಿ)

ಮಾಚು : ಶಂಭು 'ಕೂ'-ಸರು 'ಕೂ'- (ತೆಳಿ)

ಶಂಭು ಸರು: 'ಕೂ'

ಮಾಚು : ಪೊರ್ಮೆ ದಾರೇಂಗಿ ಕೆಮಿಕೊಡ್ತುಂಡುಂಡೆಂಗಿ ಇಯಂಗಡ ಮನೆಕ್ ಕುರ್ಕ ಬಂತ್ ಕೂಡ್ಯಂಡಿತ್ ಕಾಂಬಾಂದ್ ಗೇನ ಮಾಡು!(ತೆಳಿ)

ಪೂವಿ : ಶಂಭು, ಸರೂ, ಕೈ ಕತ್ತಿಯಂಡ್ ಬಾರಿ,

ಮಕ್ಕಕೋರ್ ಮಕ್ಕಡ ಕತೆ

- ಸಂಜು : ಸಂತು ಮಾಮ, ಕತೆ ಎಣ್ಣೆ ಮಾಮ,
- ಸಂತು : ಚೆನ್ನ ಮುಂಡತ್ತಿರಿ ಮಕ್ಕಳೆ, ನಾನ್ ಬುಕ್ಕ್ ಓದಿಯಂಡುಳ್ಳೆ,
- ಸುಮಿ : ಪ್ಲೀಸ್ ಮಾಮ, ನೀನ್ ನಿನ್ನಾಂದೇ ಎಣ್ಣೆತುಳ್ಳಿಯ,
- ಸಂತು : ಎಂತೇಂದ್ ಎಣ್ಣೆ ನಾನ್ ನಿನ್ನಾಂದ್?
- ಸಂಜು : ಗಲಾಟೆ ಮಾಡತಿ ಮಕ್ಕಳೆ, ನಾಳೆ ನಿಂಗಕ್ ಒರ್ ಕತೆ ಎಣ್ಣುವೀಂದ್!
- ಸಂತು : ನಾಳೇಂದ್ ಎಣ್ಣಲ್ಲ? ಪಿಂಞಂತಾಂಗ್ ನಿಂಗ ಇಂದೇ ಕೇಟಂಡುಳ್ಳಿರ?
- ಸುಮಿ : ಓಹೋ! ನಿನ್ನಾಂದ್ ಎಣ್ಣೆಯೆ ನೀನ್! ಇಂದ್ ಎಣ್ಣೆ ಇಕ್ಕ ಕತೆ!
- ಸಂತು : ಬಲ್ಯ ಕಷ್ಟಾಚಿಲ್ಲಪ್ಪ ನಿಂಗಡ! ನಿಂದೊಳಿ, ಚೆನ್ನ ನೇರ ಗೇನ ಮಾಡಿತ್ ಎಣ್ಣುವಿ ಅಂದಕ,
- ಸಂಜು : ಒಂದೂ ಬೋಡ, ಇಕ್ಕಲೇ ಎಣ್ಣೊಂಡು.
- ಸುಮಿ : ನೀನ್ ಬರೀ ಮೋಸ ಮಾಮ, ಚೆನ್ನ ನೇರ ಕೈಜಕ, 'ನಾನ್ ಅನ್ನನೆ ಎಣ್ಣೆತೇ ಇಲ್ಲೇಂದ್' ಎಣ್ಣೆರುವಿಯ ನೀನ್!
- ಸಂತು : ಚೆನ್ನ ಮುಂಡತ್ತಿರಿಯಪ್ಪ, ಈ ಕತೆ ನಲ್ಲ ಇಂಟೆರೆಸ್ಟಿಂಗ್ ಉಂಡ್, ಇದ್ನ ಓದಿತಾನ ಪಿಂಞ ಇದ್ನೇ ನಿಂಗಕೆಣ್ಣೆರುವಿ,
- ಸಂಜು : ಒಂದೂ ಬೋಡ, ನಾಕ್ ಇಕ್ಕಲೇ ಕತೆ ಬೋಂಡು,
- ಸುಮಿ : ನಾಕೂ ಅಚ್ಚಿಕೇ, ಓರಮ ನೀನ್ ಪೊಟ್ಟೇ ಪರಿಯುವೊ ಮಾಮ!
- ಸಂತು : ಏದ್ ರಾಹುಕಾಲತ್ ಎಣ್ಣೆನೊ, ಕತೆ ಎಣ್ಣೆವೀಂದ್!.... ನಲ್ಲ ಇಂಡ್ ಮುರ್ಕ್ಕಾಟ ಮುರ್ಕಿಯಂಡುಂಡಲ್ಲ ಇವು?.... ನಾನೇ ಆಂಡೂಇಂಜತಾ ನಿಂಗಕ್? ಬೋರೆ ದಾರೂ ಕೊಟ್ಟೆಯಿ?
- ಸಂಜು : ಬೋರೆ ದಾರ್ ಎಣ್ಣೆಕಲೂ ರಸ ಇಪ್ಪುಲೆ ಮಾಮ!
- ಸಂತು : ಎಂತಾಗ್‌ರಾ? ನೀಡ ಅಪ್ಪೊ ಕತೆ ಎಣ್ಣಲಿಯ?
- ಸುಮಿ : ಅದ್ ಬರಿ ಪಳಿಯ ಪಳಿಯ ಕತೆ!
- ಸಂತು : ಓ ಇವಕ್ ಕತೆಲೂ ಪುದಿಯದ್- ಪಳಿಯದ್‌ಂದ್ ಉಂಡ್ ಕಾಂಬ!
- ಸಂಜು : ನೀನ್ ಮುಂಡತೆ ನೇರ ಕೈಕತೆ ಮಾಮ, ಬೆರಿಯ ಎಣ್ಣೆ, ಪ್ಲೀಸ್!
- ಸಂತು : ಆಚಿಪ್ಪಾ, ಇದಾ ಈ ಬುಕ್ಕ್ ಇಲ್ಲಿರಡ್ ಅಂದಕ.... ಏದ್ ಕತೆ ಎಣ್ಣಡಪ್ಪಾ? ಒಂದೂ ಗೇನ ಬಂದಂಡೇ ಇಲ್ಲೆಲ್ಲ.... ಸರಿ..... ಕೇಳಿ.....ರೆಡಿಯಾ?
- ಸಂಜು ಸುಮಿ : ನಂಗ ರೆಡಿ....

- ಸಂತು : ಓರ್ ಊರ್‌ಲ್ ಓರ್ ರಾಜ ಇಂಜತೊಲೊ....
- ಸುಮಿ : ಈ ಊರ್‌ಲ್ ರಾಜ ಇಪ್ಪ ಮಾಮ?
- ಸಂಜು : ಮಾಮಂಗ್ ಗೊತ್ತೇ ಇಲ್ಲೆ. ರಾಜ ಇಪ್ಪೊ ಒರ್ ದೇಶತ್!
- ಸಂತು : ಎಂತದೋ ಒಂದ್, ಓರ್ ದೇಶತ್ ಒರ್ ರಾಜ ಇಪ್ಪ....
- ಸುಮಿ : ಓ ರಾಜ ಮಾತ್ರ ಇಪ್ಪದಾ? ಬಾಕಿ ಉಳ್ಳವು ಇಪ್ಪಲಿಯ?
- ಸಂತು : ಪಿಂಜಂತೆ ನಿಂಗಡ? ಎಡಲ್ ಬಾಯಿ ಇಡುವೊ?
- ಸುಮಿ : ನೀನೇ ಅಲ್ಲ ಮಾಮ ಎಣ್ಣೆ ತಂದಿಯೆ? ಎಂತೇಂಗಿ ಡೊಟ್ ಬಾತೆಂಗಿ ಅದ್‌ನ ಅಕ್ಕಕ್ಕಲೇ ಕೇಕೊಂಡೊಂದ್?
- ಸಂತು : (ಸ್ವಗತ) ಬಾರಿ ಎಚ್ಚರ ಬೋಂಡುವಪ್ಪ, ಇಕ್ಕತ ಮಕ್ಕಡ ಕೂಡ, ಬೆರ ಕಾಟ್‌ಚೆಂಗಿ ಮದಿ ಕೈನೇ ಮುಗ್ಗಿರುವ!
- ಸಂಜು : ಒರ್ ದೇಶತ್ ಒರ್ ರಾಜ ಇಂಜತ್, ಅಲ್ಲಿಂಜ?
- ಸಂತು : ಅವಂಗ್ ಓರ್ ರಾಣಿಯೊ ಇಂಜತ್,
- ಸುಮಿ : ಅವಂಗ್ ಎನ್ನನೆ ಅವ ರಾಣಿ ಆಪೊ?
- ಸಂಜು : ಅಚ್ಚಕೂ ಗೊತ್ತಾಪುಲಿಯ ಪೆದ್ದಿ? ರಾಜಂಡ ಪೊಣ್ಣ್ ರಾಣಿ, ಗೊತ್ತಾಚಾ?
- ಸುಮಿ : ನೋಟ್ ಮಾಮ, ಇಂವೊ ನನ್ನ ಪೆದ್ದೀಂದ್ ಎಣ್ಣುವೊ!
- ಸಂತು : ಮುಂಡತ್ತಿರ್ ಸಂಜು, ಇಕ್ಕನ್ನ ಕತೆ ಎಣ್ಣೊಂಡುವೊ ಬೋಂಡೊ?
- ಸಂಜು : ಕತೆ ಬೋಂಡು ಮಾಮ,
- ಸಂತು : ಅಂದಕ ಮುಂಡತೆ ಜಗಲಾಡತೆ ಕೇಳಿ.... ನಿಂಗಡನ್ನಕೆ ಆ ರಾಜ್ಯತ್‌ರ ರಾಜ, ರಾಣಿ, ಎಲ್ಲಾರೂ ಚೆನ್ನ ಪೆದ್ದಂಗೊಲೊ!
- ಸುಮಿ : ಮಾಮ, ಮಾಮ, ಈ ಕತೆ ಬೋಡ, ಬೋರೆ ಏದೇಂಗಿ ಎಣ್ಣೆ.
- ಸಂಜು : ನಾಕೂ ಅಚ್ಚಕೇ, ಬೋರೆ ಕತೆ ಎಣ್ಣೆಮಾಮ,
- ಸಂತು : ಎಂತಾಂಗ್? ನಾನ್ ಸುರು ಮಾಡುವಕಲೇ ಬೋಂಡಾಂದೆಣ್ಣುವೊ ನಿಂಗ?
- ಸುಮಿ : ಪಿಂಜಂತಾಂಗ್ ನೀನ್ 'ಅಯಿಂಗಲ್ಲರೂ ನಿಂಗಡನ್ನಕೆ ಪೆದ್ದಂಗಾಂದ್' ಎಣ್ಣುವೊ?
- ಸಂಜು : ನಂಗ ಒಂದೂ ಪೆದ್ದಂಗ ಅಲ್ಲ ಗೊತ್ತಾಚ?
- ಸಂಜು : ಉಯ್ಯವ್ವಯ್ಯ! ಚೆಡಿ ಬಂದ್ರೆತ್ ಕಾಂಬಲ್ಲ ದಂಡಾಂಗೂ?..... ಸ್ವಾರಿ ಆಚಾ?
- ಸಂಜು : ಈ ಸಂತು ಮಾಮ ನಂಕ್ ಸಾರಿ ಎಣ್ಣೆಟಿಯೆ? (ತಳಿ)
- ಸುಮಿ : ಬಲ್ಯಯಿಂಗ ಚೆರಿಯಯಿಂಗ್ ಎಲ್ಲಿಯೇಂಗಿ ಸಾರಿ ಎಣ್ಣುವ ಮಾಮ?

ಸ್ವಾರಿ ಎಣ್ಣೆಯಿಂದಿರುವ ನಂಗ,(ತೆಳೆ)

ಸಂಜು : ಸಾರಿ ಮಾಮ, ಕತೆ ಎಣ್ಣೆ,

ಸುಮಿ : ನಾನೂ ಸ್ವಾರಿ ಕೇಟವಿ ಮಾಮ... ಅಲ್ಲಿಂಜಂತಾಚಿ?

ಸಂತು : ಓರ್ ಕಂಡೀಶನ್, ಎಂತ ಎಣ್ಣೆ ನೋಟನ?

ಸಂಜು : ಕತೆ ಎಣ್ಣೆಯಿಂದಿಪ್ಪಕ ಎಡೆಲ್ ದಾರೂ ತಕ್ಕ ಪರಿವಕಾಗ,

ಸಂತು : ಗೊತ್ತಾಯಿರ್ತಾ? ಸರಿ, ಕೇಳಿ... ಅಲ್ಲ, ನಿಂಗಡ ಅಪ್ಪನೂ ಅಪ್ಪನೂ ಈ ನೇರ ಬಂದೆಲ್ಲೆ? ಪೇಟೆಕ್ ಪೋನವು!

ಸುಮಿ : ಎಟ್ ಗಂಟೆ ಆಕೂಂದ್ ಎಣ್ಣೆಚಲ್ಲ ಮಾಮ!

ಸಂತು : ಅಲ್ಲ, ನಾನಿಕ್ಕ ನಿಂಗಕ್ ಕತೆ ಎಣ್ಣೆಯಿಂದಿಪ್ಪಕ ಅಯಿಂಗ ದಂಡಾಳೂ ಬಂದೆಟಕ ಎಂತ ಮಾಡುವೊ?

ಸಂಜು : ಎಂತ ಮಾಡುವೊ? ನಾನ್ ಮಾತ್ರ ಇಂದ್ ನೀಡ ಕೂಡೇ ಬುದ್ದವೊ!

ಸುಮಿ : ಒಹೋ ಬಾರಿ ಉಶಾರ್ ಇಂವೊ! ಇಂದ್ ಮಾಮಂಡ ಕೂಡೆ ನಾನ್ ಬುದ್ದವೊ!

ಸಂತು : ಆಚಪ್ಪ, ಅದೊಂಗೆಂತಾಂಗಿನ್ನನೆ ಜಗಳಾಡುವಿರ? ದಂಡಾಳೂ ಬುದ್ದವೊ! ಕಡಿಕ್ಕಿಲ್ 'ಸುಸು' ಮಾಡೆಚಿಂಗಿ ಮಾತ್ರ ಬೆನ್ನೆಕ್ ಪ್ರಸಾದ್ ಕೆಟ್ಟುವ ಅಚ್ಚಿಕೆ!

ಸಂಜು : ನಂಗನ್ನೆ ಚಿರಿಯ ಮಕ್ಕಾಂದ್ ಗೇನ ಮಾಡಿಯ? (ತೆಳೆ)

ಸಂತು : ಅಯ್ಯೊಯ್ಯೊ ನಾನೆಲ್ಲಿ ಅನ್ನನೆ ಎಣ್ಣೆ? ಸಂಜು ಕೆಣ್ಣಿಂಗ್ ಇಂದ್-ನಾಳೆಂದ್ ಮಿಸೆ ಬಪ್ಪಕಾಯಿಲಿಯಾ? (ತೆಳೆ)

ಸುಮಿ : ಈ ಮೀಸೆ ಬಪ್ಪಕಾಯಿತೊಲೊ!(ತೆಳೆ)

ಸಂಜು : ನೀನ್ ಮುಂಡತೆ ಕತೆ ಎಣ್ಣೆ ಮಾಮ, ಉಪಾಯ ತೇಡತೆ!

ಸುಮಿ : ಇಂದ್ ಮಾತ್ರ ನೀನ್ ಎಂತ ಉಪಾಯ ಮಡೆನಕಲೂ ನಿನ್ನ ನಂಗ ಕತೆ ಎಣ್ಣೆಚಿಡತೆ ಬುಡುಲೆ ಗೊತ್ತಾಚಾ?..... ಎಣ್ಣೆ ಮಾಮ, ಕತೆ!

ಸಂತು : ಆಚಪ್ಪ, ಎಲ್ಲಿಕೆತ್ತನೆ ಆಚಿ, ಅಕ್ಕಲೆ ಎಣ್ಣೆಂದ್?

ಸಂಜು : ಓರ್ ದೇಶತ್ ಓರ್ ರಾಜನೂ ರಾಣಿಯೂ ಇಪ್ಪ.

ಸಂತು : ಆ ದೇಶತ್ ರಾಜ, ರಾಣಿ, ಮಂತ್ರಿ, ಜನ ಎಲ್ಲರೂ ನಾಡನ್ನೆಕೆ ಚೆನ್ನ ಪೆದ್ದೆಂಗೊಲೊ!....

ಸಂಜು : ಈ ನೀನ್ ಪೆದ್ದನಾ ಅಂದಕ?(ತೆಳೆ)

ಸುಮಿ : ನೇರಾಯಿತೂ ನೀನ್ ಪೆದ್ದನಾ ಮಾಮ?

- ಸಂತು : ಪಿಂಞಂತ ಮಾಡುವೊ? ನಿಂಗಡನ್ನಕೆ ಪೆದ್ದಂಗಾಂದ್ ಎಣ್ಣಕ ನಿಂಗಕ್ ಚೆಡಿ ಬಪ್ಪ, ಆಂಗಾಯಿತ್ ನನ್ನ ನಾನೇ ಪೆದ್ದಾಂದ್ ಎಣ್ಣಂಡಪ್ಪ! (ತೆಳಿ)
- ಸಂಜು : ಅದೆಲ್ಲ ಬೋಂಡ ಮಾಮ, ಅಯಿಂಗ ಮಾತ್ರ ಪೆದ್ದಂಗ, ಅಚ್ಚಕೆ!
- ಸಂತು : ಆಚಿ ಅಂದಕ, ಓರ್ ದಿವಸ ರಾಣಿರ ಪಣಿಕಾರ್ತಿ ಮೊರಟ್ಟಂಡ್ ರಾಣಿರ ಪಕ್ಕ ಬಾತೊಲೊ....
- ಸುಮಿ : ಎಂತಾಂಗ್ ಮಾಮ?
- ಸಂತು : "ಅಯ್ಯೋ ಎಂತೇಂದ್ ಎಣ್ಣಡ್ ಮಾರಾಣ, ನಂಗಡ ಗೋವಿಂದ ಚತ್ತ್ ಪೋಚೇಂದ್" ಎಣ್ಣಂಡ್ ಮೊರಟ್ಟತೊಲೊ!
- ಸಂಜು : ದಾರ್ ಮಾಮ? ಗೋವಿಂದ ಎಣ್ಣಕ?
- ಸಂತು : ಎಣ್ಣವಿ ಕೇಳ್, ಅದೇ ಉಳ್ಳ ತಮಾಸಿ, ಅಕ್ಕಣೆ ಅದನ ಕೇಟಿತ್ ರಾಣಿಯೂ ಮೊರಡುವಕ್ ಕೂಡ್ಚೊಲೊ.
- ಸುಮಿ : ಗೋವಿಂದ ಎಣ್ಣಕ ಪಣಿಕಾರ್ತಿರ ವಡಿಯನಾ?
- ಸಂಜು : ಮುಂಡತ್ತಿರ್ ಅಕ್ಕಯ್ಯ ಮಾಮನೆ ಎಣ್ಣೆತಪ್ಪ,
- ಸುಮಿ : ಇಂವೊ ಬಲ್ಯ ತಡ್ಯಪ್ಪ ನಾಡ, ನೀನ್ ಮುಂಡತ್ತಿರ್... ದಾರ್ ಮಾಮ?
- ಸಂತು : ಕತೆ ಕೇಳಿ, ಗೊತ್ತಾಪ ದಾರ್ಂದ್, ರಾಣಿ ಮೊರಡುವನ ಕಂಡಿತ್ ರಾಜನೂ ಮೊರಡುವಕ್ ಸುರು ಮಾಡ್ಚೊಲೊ,
- ಸುಮಿ : ಅಲ್ಲಿಂಜಂತಾಚಿ?
- ಸಂತು : ಅಕ್ಕಣೆ ಅಲ್ಲಿಕ್ ಮಂತ್ರಿ ಬಾತೊಲೊ....
- ಸಂಜು : ಅವನೂ ಮೊರಟ್ಟತ್.(ತೆಳಿ)
- ಸುಮಿ : ನೀಕೆನ್ನನೆ ಗೊತ್ತಾರಾ? ನೀನೂ ಅಲ್ಲಿಂಜಿಯ ಕಾಂಬ!(ತೆಳಿ)
- ಸಂಜು : ನಾನಿಪ್ಪಕ್ ನಾನೆನ್ನೆ ಪೆದ್ದಾನಾ? ನೀನೇ ಅಲ್ಲಿಂಜವ!(ತೆಳಿ)
- ಸಂತು : ಮುಂಡತ್ತಿರಿ ಮಕ್ಕಳೆ, ಜಗಣಾಡತಿ, ಮಂತ್ರಿ ಮೊರಡುವಾನ ಕಂಡಿತ್ ಸೇನಾಧಿಪತಿಕೂ ಮೊರೆ ಬಾತೊಲೊ, ರಾಜ, ರಾಣಿ, ಮಂತ್ರಿ, ಸೇನಾಧಿಪತಿ ಎಲ್ಲಾರೂ 'ಗೋವಿಂದ ಚತ್ತ್ ಪೋಚೇಂದ್' ಮೊರಡುವಕ್ ಕೂಡ್ಚೊಲೊ!
- ಸಂಜು : ಎಲ್ಲಾರೂ ಮೊರಟ್ಟತಾ?
- ಸಂತು : ಸೇನಾಧಿಪತಿ ಮೊರಡುವಾನ ಕಂಡಿತ್ ಸೈನಿಕಂಗ ಮೊರಡುವಕ್ ಕೂಡ್ಚಿ. ಇಯಂಗ ಮೊರಡುವಾನ ಕಂಡಿತ್ ಕಾವಲ್ ಕಾಪವು, ಆಳ, ಬಾಳ ಎಲ್ಲಾ ಮೊರಡುವಕ್ ಸುರು ಮಾಡ್ಚೊಲೊ....
- ಸುಮಿ : ಅಕ್ಕಣೆ ದೇಶತ್ ರ ಜನ ಎಲ್ಲ ಮೊರಟ್ಟತ್ತಿಕ್ಕು....(ತೆಳಿ)

- ಸಂತು : ಇಂಜ್ ಅಯಿಂಗ ಮಾತ್ರ ಮುಂಡತ್ತಿಪ್ಪ? "ಗೋವಿಂದ ಚತ್ತ ಪೋಚೀಂದ್" ಇಡೀ ದೇಶಕಾರಲೇ ಮೊರಟ್ಟಂಡಿಂಜತೊಲೊ!
- ಸಂಜು : ಅಲ್ಲಿಂಜ?
- ಸಂತು : ಇನ್ನನೆ ಇಪ್ಪಕಾಪಕ ನಂಗಡ ಸಂಜುರನ್ನತ ಓರ್ ಬುದ್ಧಿವಂತ ಆ ಊರ್ಕ್ ಬಾತೊಲೊ...
- ಸಂಜು : ಊರ್ಕ್ ಅಲ್ಲ ಮಾಮ.... ದೇಶಕ್!
- ಸಂತು : ಆಚಪ್ಪ, ದೇಶಕ್!.....
- ಸುಮಿ : ಓ, ನಾನ್ ಮಾತ್ರ ಬುದ್ಧಿವಂತತಿ ಅಲ್ಲ ಅಂದಕ?
- ಸಂತು : ಅಯ್ಯೋ, ಬಲ್ಯ ಕಷ್ಟಾಚಲ್ಲ ನಿಂಗಡ? ಆಚಿ ಅದೊಂಗೊನ್ನಾಂಡು ಇಕ್ಕ? ಓರ್ ಬುದ್ಧಿವಂತನೂ ಅವಂಡ ಅಕ್ಕ ಬುದ್ಧಿವಂತತಿಯೂ ಬಾತ್ ಅಲ್ಲಿಕ್!
- ಸುಮಿ : ಅನ್ನನೆ ಎಣ್ಣೆ ಮಾಮ, ಅದುಳ್ಳ ಮಜಾ!(ತೆಳಿ)
- ಸಂಜು : ಸುರೂಲ್ ಬುದ್ಧಿವಂತ ಬಪ್ಪ, ಅಲ್ಲಿಂಜ ಅವಂಡ ಅಕ್ಕ, ಗೊತ್ತಾಚಾ?
- ಸುಮಿ : ನೋಟ್ ಮಾಮ ಇಂವೊ!
- ಸಂತು : ಧತ್! ನಾಕೆನ್ನಂಗ್ ಬೋಡಿಂಜತ್ ನಿಂಕ್ ಕತೆ ಎಣ್ಣುವ ಸಾವಾಸ? ಪುಳ್ಳರೆ ಪೂತವುಡೆ ಎನ್ನ ಪೂಕಂಡಾಂದ್' ಇದೊಂಗೇ ಉಳ್ಳ ಗಾದೆ!
- ಸಂಜು : ಎಂತ ಮಾಮ ಅನ್ನನೆಣ್ಣಕ?
- ಸಂತು : ನಾಡ ಮಂಡೆರ ಓಡೊಂದ್ ಗೊತ್ತಾಚಾ?(ತೆಳಿ)
- ಸುಮಿ : ಪ್ಲೀಸ್ ಮಾಮ, ಚೆಡೊಂಜವತೆ ನೀನ್,
- ಸಂಜು : ಪಿಂಜೊಂತಾಂಗ್ ನೀನ್ ಮಾಮಂಗ್ ಅನ್ನನೆ ಎಣ್ಣೆಯೆ,
- ಸಂತು : ಇಕ್ಕ ಚೆನ್ನ ಮುಂಡತ್ತಿಪ್ಪಿರಾ ದಂಡಾಳೂ? ಕತೆ ಎಣ್ಣೊಡುವಾ-ಬೊಂಡಾ?
- ಸುಮಿ : ಎಣ್ಣೆ ಮಾಮ ನೀನ್,
- ಸಂತು : ಅಲ್ಲಿಂಜ ಈ ಬಂದ ಬುದ್ಧಿವಂತ ಉಂಡಲ್ಲ? ಧತ್! ಬಂದ ಈ ಬುದ್ಧಿವಂತನೂ ಬುದ್ಧಿವಂತತಿಯೂ ಉಂಡಲ್ಲ? ಅಯಿಂಗ ಜನಳ ಕೇಪ, "ಎನ್ನಂಗಿನ್ನನೆ ಮೊರಟ್ಟಂಡುಳ್ಳಿರಾಂದ್," ಅಕ್ಕಣೆ ಜನ ಎಣ್ಣುವ, ಸೈನಿಕಂಗ ಮೊರಟ್ಟಂಡುಳ್ಳಾಂಗ್ ನಂಗಲೂ ಮೊರಟ್ಟಂಡುಂಡೊಂದ್,
- ಸಂಜು : ಸೈನಿಕಂಗಳ ಕೇಪಕ?
- ಸಂತು : ಅಯಿಂಗ ಎಣ್ಣುವ, "ಸೇನಾಧಿಪತಿ ಮೊರಟ್ಟಾಂಗ್ ನಂಗಲೂ ಮೊರಟ್ಟಂಡುಂಡೊಂದ್"
- ಸುಮಿ : ಸೇನಾಪತಿನ ಕೇಪಕ ಮಂತ್ರೀಂದ್ ಎಣ್ಣೆತಿಕ್ಕು,

- ಸಂತು : ಅಕ್ಕು, ಆಡಿಕೂಡಿ ಕಡೇಕ್ ರಾಜನೇ ಕೇಟತ್ ಇಯಂಗ, ಅಕ್ಕ ರಾಜ ಎಣ್ಣೆಚಿ, "ರಾಣಿ ಮೊರಟ್ಟಾಂಗ್ ನಾನೂ ಮೊರಟ್ಟಿಯೇಂದ್,"
- ಸಂಜು : ರಾಣಿ ಎಣ್ಣೆಚಿ, ಪಣಿಕಾರ್ತಿ ಮೊರಟ್ಟಾಂಗ್‌ಂದ್,
- ಸಂತು : ಪಣಿಕಾರ್ತಿನ ಕೇಪಕ ಅವ ಎಂತ ಎಣ್ಣೆಚಿ ಗೊತ್ತುಂದಾ?
- ದಂಡಾಳೂ: ಎಂತ ಎಣ್ಣೆಚಿ ಮಾಮ?
- ಸಂತು : ನಂಗಡ ಗೋವಿಂದ ಚತ್ತೋಚಿ, ಇಂಜಿ ಮೊರೆ ಬರತೆ ಇಕ್ಕುವಾಂದ್!....
'ದಾರಪ್ಪ ಅದ್ ಗೋವಿಂದೇಂದ್ ಎಣ್ಣಕ?' ಕೇಟತ್ ಇವು ಪಣಿಕಾರ್ತಿನ.
- ಸುಮಿ : ಎಂತ ಎಣ್ಣೆಚಿ ಅವ?
- ಸಂತು : ಅವ ಎಣ್ಣೆಚಿ, 'ಗೋವಿಂದ' ಎಣ್ಣಕ ನಂಗಡ ಕತ್ತೇಂದ್! (ತೆಳಿ)
- ಸಂಜು : ಈ, ಕತ್ತೆ! (ತೆಳಿ)
- ಸುಮಿ : ಸುರೂಲೇ ಕೇಕೊಲಿಂಜತಲ್ಲ ರಾಣಿಕ್? ಗೋವಿಂದ ಎಣ್ಣಕ ದಾರ್‌ಂದ್?
- ಸಂಜು : ಅಚ್ಚಕ್ ಗೊತ್ತಾಪುಲಿಯ ನೀಕ್? ಆಯಿಂಗಲ್ಲರೂ ಪೆದ್ದಂಗಲ್ಲ?
- ಸಂತು : ನೋಟಿ ಮಕ್ಕಳೆ, ಅದ್‌ಂಗೇ ಎಣ್ಣೆವೊ, ದಾರ್ ಎಂತ ಎಣ್ಣಕಲೂ ಅದ್ ಎಂತಾಂಗ್- ಎನ್ನನೇಂದ್ ನಂಗ ಅರಜಂಡ್ ಮೊಟ್ಟೆಡೊಂಡು, ಗೊತ್ತಾಚಾ?
- ಸಂಜು : ಅದ್‌ಂಗೇ ನಾನ್ ಅನ್ನನೆಲ್ಲ ಕೊಶ್ಚನ್ ಕೇಟಿಯೆ ನಿನ್ನ!
- ಸುಮಿ : ಓ, ನೀನೊಬ್ಬನೇ ಕೇಟಿಯದಾ? ನಾನೂ ಕೇಟಿಯೆ ಮಾಮನ!
- ಪೂವಿ : ಓಹೊಹೋ, ಬಾರಿ ಮಿಟಿಂಗ್ ಆಯಂಡುಂಡ್ ಮಾಮಂಡದೂ- ಮೈಮಕ್ಕಡದೂ
- ಸಂಜು : ಅಮ್ಮನೂ ಪಪ್ಪನೂ ಬಾತ್! (ಕೈ ಚಪ್ಪಾಳೆ)
- ಸುಮಿ : ನಾನೇ ಸುರೂಲ್ ನೋಟಿಯೆ ಗೊತ್ತಾಚಾ?
- ಸಂತು : ಬಾವ ಬಂದಿತ್ತಿಲ್ಲಿಯಾ ಅಕ್ಕಯ್ಯ?
- ಪೂವಿ : ಬಾತ್, ಅಲ್ಲ, ನಿನ್ನ ಸಮಾರ್ ಗೋಳಬೂಕಿತಿಕ್ಕು ನಂಗಡ ಕಪಿ ಸೈನ್ಯ!(ತೆಳಿ)
- ಸಂಜು : ಪೋ ಅಮ್ಮ ನೀನ್! ನಾಕ್ ಚೆಡಿ ನೀಡ ಮೇಲೆ!
- ಪೂವಿ : ಎಂತಾಂಗ್‌ರಾ ಕುಂಜಿ? ನೀನ್ ನಾಡ ರಾಜ ಅಲ್ಲಾ?
- ಸುಮಿ : ರಾಜೊಲ್ಲೊ! ಪೆದ್ದಂಗಡ ರಾಜ! (ತೆಳಿ)
- ಸಂಜು : ನೀನೇ, ಪೆದ್ದಂಗಡ ರಾಣಿ, ಕತ್ತೆ ಚತ್ತಾಂಗ್ ಮೊರಟ್ಟವ!
- ಮಾಚು : ಎಂತಾಚಿರಾ ಸಂತು? ಕತ್ತೆ, ರಾಜ, ರಾಣೀಂದೆಲ್ಲ ಕೇಟಿಂಡುಂಡ್! ಎಂತಕತೆ?
- ಸಂತು : ಎಂತದೋ ಒರ್ ಕತೆ ಎಣ್ಣಂಡಿಂಜ ಮಕ್ಕಕ್, ಎನ್ನನೇಂಗಿ ಇಯಂಗಳ ಸುಧಾರಣೆ ಮಾಡೊಂಡುವಲ್ಲ ನಿಂಗ ಬಕ್ಕಣೇಕ್!(ತೆಳಿ)

ಸಕಲವು ಪೂಜಾರ್ಥ

- ಪೂವಿ : ನಿನ್ನ ಓರ್ ಮಾದ್ರಿ ಬೆಂಡೆಡ್‌ತಿಕ್ಕು ಕಾಂಬ!
- ಸಂತು : ನನ್ನ ಕೆಟ್ಟವದೇ ಓರಾಂಡೆಕೊಮ್ಮೆ, ಪಿಂಜಾ ಬುಡುವಾ ಅಯಿಂಗ?
- ಮಾಚು : ಎಲ್ಲಿಕೆಲ್ಲ ಪೋಯಿಂಜಿರಾ ಅಕ್ಕಲೆ?
- ಸಂತು : ಮಾನಿಬೇಲ್‌ಕಾಲೆ ಪೋಯಿತ್ ಪೊಳೆಕರೆಕ್ ಪೋಚಿ, ಅಲ್ಲಿಂಜ ಕುಂದ್‌ಕ್ ಪೋಯಿತ್ ಬಲ್ಲ ಬಾಣೆಕಾಲೆ ವಾಪಾಸ್ ಬಾತ್,
- ಪೂವಿ : ಸಕತ್ ಓರ್ ಅಂದಕ ಇಂದ್!..... ಸುಮಿ, ಸಂಜು ಏಳಿಯಪ್ಪ ಕೈಕಾಲೆ ಕತ್ತಿಯಂಡ್, ನೆಲ್ಲಕ್ಕರೆದಿಕ್ಕೆ ಅಡ್ಡ ಬುದ್ಧಿತ್ ಬಾರಿ,
- ಸಂತು : ಎಂತಾಂಗ್ ಬಾವ ಲೇಟ್ ನಿಂಗ?
- ಮಾಚು : ನೀಡ ಅಕ್ಕಯ್ಯಂಡ ಕತೆ ಕೇಟಕ! ಓರ್ ಬಟ್ಟೆ ಶಾಪ್‌ಕ್ ಪೋಯಿತ್ ನೂಯಿಟ್ಟ ಯಿಂಬದ್ ಪೊಡಿಯತ್‌ನ ಬಲ್‌ಪೆಚ್ಚಿತ್, ಅದಲ್ ಒಂದೇಂಗಿ ಎಡ್ಡಂಡ?
- ಪೂವಿ : ಅಲ್ಲರಾ ಸಂತು, ನೀನೇ ಸೆಲೆಕ್ಟ್ ಮಾಡ್ ಒಂದಾನಾಂದ್ ಎಣ್ಣೆಕಲೂ ಅದೂ ಚಾಯುಂಡ್- ಇದೂ ಚಾಯುಂಡ್ ಎಣ್ಣೆಕ ಚೆಡಿ ಬಪ್ಪುಲಿಯ?
- ಮಾಚು : ಪಾಪ! ಅಂವೊ ಬೆವರ್ ಉಳ್‌ಪಿಯಂಡ್ ಒರೇ ಸಮ "ಈತಿತ್ ಇಟ್ಟುಂಡುಂಡ್. ಏದಾಚೆಂಗಿ ಒಂದಾನ ಆಂಜೋವದೆನ್ನಾ?
- ಪೂವಿ : ಓಹೋ, ಅಂವೊ ಬಲ್‌ಚಿತ್ ಇಟ್ತ್‌ತ್‌ಂದ್ ಆಂಜೋವಕಾಪ? ನೋಟುವಕ್ ಕುಸಿಯಾಂಡ ಕಾಂಬ? ದುಡ್ಡ್ ಕೊಡ್‌ಪುಲಿಯಾ? ಬಣ್ಣೆ ತಪ್ಪದಾಚೆಂಗಿ ಏದಾಚೆಂಗಿ ಒಂದಾನ ಆಂಜಂಡಕ ಆಚಪ್ಪ! ನಲ್ಲ ಕತೆ ನೀಡ!
- ಸಂತು : ಅಲ್ಲಿಯೂ ಇನ್ನನೇ ಜಗಳಾಡಿರ ಕಾಂಬ! (ತೆಳ)
- ಪೂವಿ : ಅಲ್ಲಿ ಜಗಳಾಡುವಕಾಪ? ದುಂಡ್‌ನ ಕಡ್‌ಂಬುಟ್ತ್ ಮಾಡ್ಯಂಡಿಂಜತ್! (ತೆಳ)
- ಮಾಚು : ಪಾಪ! ಇಂತ ಓರಂದ್ ಗಿರಾಕಿ ಬಾತೆಂಗಿ ಮದಿ ಅಂಗಡಿಕ! ಅವಂಡ ಪಣೆಕೂಡ್‌ನ ಲೆಕ್ಕ! (ತೆಳ)
- ಪೂವಿ : ಇಲ್ಲೆಂಗಿ ನೀನೋರ್ ಪೊಡಿಯ ಕೊಂಡಬಂದಿಯಲ್ಲ? ಅನ್ನನೇ ಆಕು. ಕಲರ್ ಚಾಯಿ ಕಂಡತೊಲೊ. ಅದ್‌ನ ಮಡ್‌ಕ್ ಬೀತಿತ್ ನೋಟಿತ್ ಕೂಡಿ ಇಲ್ಲೆ. ಇಲ್ಲಿ ನೋಟ್‌ವಕಲ್ಲ ಗೊತ್ತ್. ಅದ್ ಕುಂಬ್ ಪುಡ್‌ಚಿತ್ ಏದಪ್ಪಂಡ ಕಾಲ ಆಯಿತೊ?
- ಮಾಚು : ಎನ್ನ ನೀಡ ರಭಸ? ಚೊತೆಕ್ ತಮ್ಮಣನೂ ಉಂಡ್‌ಂದಾ? (ತೆಳ)
- ಸಂತು : ನನ್ನ ಕೂಟಿಯವತಿಯಪ್ಪ. ಆಖೀರಿಕ್ ನಿಂಗ ಒಂದೇ. ನಾಳೆ ಪೋಪಕುಳ್ಳವಂಗ್ ನಾಕೆನ್ನಂಗ್ ನಿಪ್ಪುರ? (ತೆಳ)

ಪೂವಿ : ನಾಳೆಂಜ ನಾಕ್ ಮದಿ ಮದಿ ಆಪಕುಂಡ್‌ರ ಸಂತು. ಸಂತು ಮಾಮ ಅನ್ನನೆಣ್ಣ್ ಚಿ, ಸಂತು ಮಾಮ ಇನ್ನನೆಣ್ಣ್ ಚೀಂದ್ ನೀಡದೇ ಸುದ್ಡಿ, ಮಕ್ಕಡ ಬಾಯಿಲ್!

ಸಂತು : ನಾಕಂತೂ ಇಕ್ಕಲೇ ಹರಟೆ ಪುಡ್‌ಚಂಡುಂಡ್ ಅಕ್ಕಯ್ಯ. ಬುಟ್ಟಿತ್ ಪೋಂಡುವಲ್ಲಾಂದ್. ನೀನ್ ಎಂತದೇ ಎಣ್ಣ್. ಮಕ್ಕ ಆಯಿತಿಪ್ಪಕಲೇ ಚಾಯಿ. ಅಯಿಂಗಡ ಆ ವಯಸ್ಸ್‌ಲ್ ಉಂಬದ್, ತಿಂಬದ್, ಕಳಿಪ್ಪದ್ ಬುಟ್ಟಿಕ್ ಜೋರೆ ಒಂದೂ ಇಪ್ಪಲೆ.

ಪೂವಿ : ಆಂಗೇ ನೀನೂ ಓರಮ ಮಕ್ಕಡನ್ನೆಕೆ ಕಳಿಪ್ಪೊ ಕಾಂಬ! (ತೆಳ)

ಮಾಚು : ನಾನೆಂತ ಮಕ್ಕಡನ್ನೆಕೆ ಕಳಿಚಿಯೆ? ಇದೆಂತೋರ್ ಪುದಿಯ ಕಂಪ್ಲೆಂಟ್ ನೀಡ್?

ಪೂವಿ : ಎಂತ ಗೊತ್ತುಂಡರಾ ಸಂತು. ಮಕ್ಕ ಗಲಾಟೆ ಮಾಡ್ಯಂಡಿಪ್ಪಕ ಇವನೂ ಅಯಿಂಗಡ ಕೂಡೇ ಕೂಡ್ಯೋವೊ. ನಾನ್ ಮಾತ್ರ ಮಕ್ಕಕ್ ಬಜ್ಜಿತ್, ಪೊಜ್ಜಿತ್ ನಿಷ್ಟುರ ಆಯೊವೊಂಡು. ಇಯಂಗೆಲ್ಲರೂ ಒಂದೇ!

ಮಾಚು : ಸಂತು ನಾಡ ತಕ್ಕ ಚೆನ್ನ ಕೇಳ್. ಆ ಪಾಪತ ಮಕ್ಕಕ್ ಪೊಜ್ಜಿತ್, ಬಜ್ಜಿತ್ ಎನ್ನ ಫಲ? ನಲ್ಲ ತಕ್ಕಲ್ ಎಣ್ಣಕ ಕೇಪ ಅಪು. ಮುಂಡತೇಂಗಿ ಎನ್ನಂಗ್ ಬಯ್ಯಂಡಿಯೆ?

ಸಂತು : ಅಲ್ಲಕ್ಕಯ್ಯ, ಮಕ್ಕಕ್ ನಿನ್ನ ಕುಸಿಯಾ- ಬಾವನ ಕುಸಿಯಾ?

ಪೂವಿ : ಕುಸಿ ದಂಡಾಳ್‌ನೊ ಉಂಡಾಚಾ.... ಆಚೆಂಗಿ ಓರಮ ಅಯಿಂಗಡ ಕೋಡ ಕಳಿ ಅದಿಯಾಪಕ ಚೆನ್ನ ಬಿಸಿ ಮಾಡತೆ ಪೋಚೆಂಗಿ ಆಪಾ?

ಮಾಚು : ಬಿಸಿ ಮಾಡ್‌ಚೆಂಗಿ ಇಂಞೂ ಮೊರೆ ಪಡೆಕ್ ಬಟ್ಟೆ. ಆಂಗ್‌ಂಜ ಉಪಾಯತ್ ಕೇಸಾನ ತೇಕೊಂಡುವಪ್ಪ.

ಸಂಜು : ಮಮ್ಮಿ, ನೋಟ್ ಮಮ್ಮಿ ಇವ, ನಾಡ ಬೆಲೂನ್‌ನ ಎಡ್‌ತಂಡಿಯೆ...

ಮಾಚು : ಎಂತಾಂಗ್ ಸುಮಿ, ಅವಂಡ ಬೆಲೂನ್‌ನ ಎಡ್‌ತಂಡಿಯೆ ನೀನ್?

ಮಾಚು : ನೀಡ ಬೆಲೂನ್ ಎಂತಾಚಿ ಮೂಡಿ?

ಸುಮಿ : ಮಮ್ಮಿ, ಅವೊ ನಾಡ ಬೆಲೂನ್‌ಕ್ ಊದ್‌ಬತ್ತಿಲ್ ಕುತ್ತಿತ್ ಪೊಟ್‌ಚಿಟ್ಟಿತ್.

ಪೂವಿ : ನೋಟ್‌ರಾ ಸಂತು, ನೀನ್ ಬೆಲೂನ್ ಕೊಂಡ ಬಂತ ಕೊಡ್‌ಕಲಾಯಿತ್ ಇಯಂಗಡ ವ್ಯಾಜ್ಯ ತೇಪದೇ ಕಷ್ಟ ಇಂಞಾ!...ಅಲ್ಲ ಎಂತಾಂಗ್‌ರಾ ಸಂಜು ಅವಡ ಬೆಲೂನ್‌ಕ್ ಊದ್‌ಬತ್ತಿಲ್ ಕುತ್ತಿಯೆ?

ಸಂಜು : ಅವಳೇ ಎಣ್ಣೆಯೆ ಮಮ್ಮಿ ಇದಂಗ್ ಕುತ್ತ್ ನೋಟಿನಾಂದ್!

ಪಕಮೆ ಪೊಮ್ಮಾಲೆ

- ಮಾಚು : ಎಂತಾಂಗ್ ಕುಂಞಿ? ನೀನೇ ಎಣ್ಣೆಯಲೊ!
- ಸುಮಿ : ಅಂವೊ ಪೊಟ್ತ್ ಪರಿವೊ ಪಪ್ಪ. ಸುರೂಲ್ ಅವನೇ ಎಣ್ಣೆಯೆ.
- ಪೂವಿ : ಎಂತೇಂದ್ ಎಣ್ಣೆಯೆ?
- ಸುಮಿ : ಊದ್‌ಬತ್ತಿಲ್ ಕುತ್ತನಕ ಬೆಲೂನ್ ಇಂಞೂ ಬಣ್ಣ ಬೆಪ್ಪಾಂದ್!
- ಸಂತು : ಇದೂರ್ ಕತೆ ಇಂದೇ ಕೇಟಿಯೆ ನಾನ್! (ತೆಳಿ)
- ಮಾಚು : ಊದ್‌ಬತ್ತಿಲ್ ಬೆಲೂನ್‌ಕ್ ಕುತ್ತನಕ ಅದ್ ಬಣ್ಣ ಬೆಪ್ಪೊಲೊ ! (ತೆಳಿ)
- ನಾನೂ ಇಂದೇ ಕೇಟಿಯೆ ಇದ್‌ನ!
- ಪೂವಿ : ನೋಟಿಯಲ್ಲರ ಸಂತು. ಇನ್ನನೆ ನೀಡ ಬಾವಂಡ ಕಳಿ. ಅಯಿಂಗಡ ವ್ಯಾಜ್ಯ ಮಾತ್ರ ನಾನೇ ತೇಕೊಂಡು. ಇಂವೊ ತೆಳ್‌ಚಂಡ್ ಅಯಿಂಡ ಕೂಡ ಅಯಿರುವ!
- ಮಾಚು : ಇಂಞಿಂತ ಮಾಡಡ್? ಮಂಡೆ ಮಂಡೆ ಪೊಜ್ಜಂಡ್ ಮೊರಡದಾ?... ಬೆಲೂನ್‌ಕ್ ಊದ್‌ಬತ್ತಿ ಕುತ್ತಿತ್ ಪೊಟ್ಟಿ ಪೋಚಲ್ಲೊಂದ್! (ತೆಳಿ)
- ಸಂಜು : ಸಂತು ಮಾಮ, ಇಲ್ಲಿಕ್ ಬಾ....
- ಸಂತು : ಎಂತಾಂಗ್‌ರಾ?
- ಸಂಜು : ಇಲ್ಲಿಕ್ ಬಾ ಎಣ್ಣೆ ತಪ್ಪಿ.
- ಸುಮಿ : ಬಾ ಮಾಮ ಪ್ಲೀಸ್...
- ಪೂವಿ : ಓಹೋ ಇಯಂಗಡ ಬೆಲೂನ್ ಕೇಸ್ ಡಿಸ್‌ಮಿಸ್ ಆಯಿರ್‌ತ್ ಕಾಂಬಲ್ಲ?
- ಮಾಚು : ಮಕ್ಕಡದೂ ಸಂತುರದೂ ಎಂತೋ ಮೀಟಿಂಗ್ ಉಂಡ್ ಕಾಂಬ! ಆಂಗೇ ಎಣ್ಣುವೊ ನಾನ್. ಮಕ್ಕಡ ಕೇಸ್‌ಕ್ ನಂಗ ಮಂಡೆ ಇಡುವಕಾಗಾಂದ್!
- ಪೂವಿ : ನೀಕ್ ಅರ್ಥ ಆಪುಲೆ ಮಾಚು. ಮಕ್ಕಳ ಚಿರಪತ್‌ಂಚೇ ಚಿನ್ನ ಕಂಟ್ರೋಲ್‌ಲ್ ಬೆಕ್ಕತೆ ಪೋಚಿಂಗಿ "ಗಿಡ ಆಯಿತ್ ಬಗ್ಗತದ್ ಮರ ಆಯಿತಾಪಕ ಬಗ್ಗಲೆ"
- ಮಾಚು : ಅದನ್ನೋ ನೇರೇ ಪೂವಿ. ಅನ್ನನೇಂದ್ ತೊಟ್ಟಾಂಗ್ ಪುಡ್‌ಚಾಂಗ್ ಅಯಿಂಕ್ ಹರಟೆ ಎಣ್ಣುಂಡಿಪ್ಪದೂ ಆಗ. ಚಿನ್ನಂಗಲ್ಲ ಸ್ವಾತಂತ್ರ್ಯ ಕೊಡ್ತೊಂಡು.
- ಪೂವಿ : ಆಚೆಪ್ಪ ನೀನ್ ಎಣ್ಣುನ್ನಕೇ ಮಾಡಂಗ. ಇಕ್ಕೆನ್ನೆ ಇನ್ನನೇ ತಕ್ಕ ಪರ್‌ಂದಂಡ್ ಇಪ್ಪದಾ ಉಂಬಾಂಡ ಗೇನ ಉಂಡಾ?
- ಮಾಚು : ನಾನ್ ರೆಡಿ. ತಕ್ಕ ನಿಪ್ಪಾಚಿಡಂದ್ಯೆ ನೀನೇ!
- ಪೂವಿ : ಸಂತುನ ಮಕ್ಕಳ ಕೂಟಿಯ ಬಾ. ನೀನ್ ಕರಿನ ಚಿನ್ನ ಬಿಸಿ ಮಾಡಿರುವಿ.....
- ಮಾಚು : ಸಂಜೂ, ಸುಮಿ, ಮಾಮನ ಕೂಟಿಯಂಡ್ ಬಾರಿ ಉಂಬಕ್.....

ನಾಡ ಕೊಡಗ್‌ರ ಚಾಯಿ!

- ಮಾಚು : ಎಂತೋರ್ ಚಾಯಿ| ನಾಡ ಕೊಡಗ್ ನಾಡ್‌ರ ಚಾಯಿ|
 ಪೊಮ್ಮಾಲೆ ಪೋಲೇ| ಭೂಮಿ ಮೀದ ಇಲ್ಲೆದ್ ನೋಟ್|
 ಪಚ್ಚೆ ಮರ್‌ಂಜ ಕುಂದ್‌ರ ಸಾಲ್| ಏದ್ ಸೃಷ್ಟಿಯೋ|
 ದೇವ ಲೋಕ ತಾನೋ| ನಾವು ಒಂದ್ ಪೋರದ್ ನಾಕ್|
 ಚಾಯಿ ಕೊದ್‌ಚಿ ತುದಿಪಕ್ ಇದ್‌ನಾ| ಏದ್ ಭಾಗ್ಯವೋ||
 ಎಂತೋರ್ ಚಾಯಿ||
- ಪೂವಿ : (ಚಪ್ಪಾಳೆ) ಒನ್ಸ್ ಮೋರ್, ಒನ್ಸ್ ಮೋರ್ ಮಾಚು!
- ಮಾಚು : ಓಹೋ, ನೀನ್ ಇಲ್ಲಿಯೇ ಉಳ್ಳಿಯಾ?
- ಪೂವಿ : ಎಂತಾಂಗ್? ನಾನ್ ಇಪ್ಪಕಾಗ ಕಾಂಬ - ನೀನ್ ಪಾಡುವಕ್?
- ಮಾಚು : ಇಪ್ಪಕಾಗಾಂದ್ ಎಣ್ಣನ ನಾನ್? ಎದಿಕ್ಕೆ ದಾರೆಂಗಿ ಉಂಡೇಂಗಿ ಪಾಟ್
 ಅಚ್ಚಕೋರ್ ಚಾಯಿಲ್ ಪೊರಬಪ್ಪದ್ ಕಪ್ಪ!
- ಪೂವಿ : ಅದ್‌ಂಗ್ ನಂಗಡ ಗಣೇಶ್ ಮಾಡುವಲ್ಲ, ಅನ್ನನೆ ಮಾಡಿಟಕ ಆಚಿ! (ತೆಳಿ)
- ಮಾಚು : ಎಂತ ಮಾಡುವ ಗಣೇಶ್?
- ಪೂವಿ : ಸ್ಟೇಜ್ ಪತ್ತಿತ್ ಮೈಕೊರೆದಿಕ್ಕೆ ಅಳ್‌ತಿತ್ ಪಾಡುವಕ್ ಸುರು ಮಾಡಿಟಕ
 ಪಾಟ್‌ರ ಸೂರೆ! ಆಚೇಂಗಿ ಪಾಟ್ ತೇರಣೆಕೂ ಕಣ್ಣ್ ದಂಡ್ ಮುಚ್ಚಂಡೇ
 ಇಪ್ಪ! (ತೆಳಿ)
- ಮಾಚು : ಜನಳ ನೋಟುವಕ್ ಒರ್ ತರಾ ಆಪೆನ್ನೊ?
- ಪೂವಿ : ಆಯಿತಿಕ್ಕು, ನೀನೂ ಅನ್ನನೆ ಮಾಡ್. ನಾನ್ ಎದಿಕ್ಕೆ ಅಳ್‌ತೊವಿ. ನೀನ್
 ಕಣ್ಣ್ ಮುಚ್ಚಂಡ್ ಪಾಡ್ಯಂಡಿರ್.
- ಮಾಚು : ಆಚ ನೀಡ ಪಣೆ ಎಲ್ಲ?
- ಪೂವಿ : ಎಂತ ಎಣ್ಣುವಿಯ ಮಾಚು ನೀನ್? ಪೊಣ್ಣಾಳಡ ಪಣೆ ತೇಂದಕ
 ತೇರುಲೇಂದ್ ನೀನೇ ಎಣ್ಣುಂಡಿಪ್ಪಿಯ. ಅಂತಲ್ಲಿ ಪಣೆ ತೇಂದತಾಂದ್
 ಕೇಪಿಯಲ್ಲ?
- ಮಾಚು : ಅದೂ ನೇರೇ! ಅಂದಕ ಇನ್ನನೆ ಕೇಕನ. ನೀಡ ಪಣೆ ಎಲ್ಲಿಕೆತ್ತ್‌ಚಿ?
- ಪೂವಿ : ಅನ್ನನೆ ಬಕ್ಕಡ್! ಎಣ್ಣುವಿ ಕೇಳ್, ಓರ್ ಬೊಳ್ಳರಿ ಬರ್‌ತಿತ್ ಬೆಚ್ಚಿಯೆ.
 ಮಜ್ಜಾಣತರ ನೀರ್ ಕಣ್ಣೆ ಉಂಡ್. ಇಂಇನೋರ್ ಕೂಳ್ ಆಯಿಟಕ ಆಚಿ.

ಸಚಮೆ ಫೋನ್ಮಾಲ್

ಇಂಞಾಸೊಮ್ಮ ನೆಲ ತ್ತೇಟೊಂಡು. ಚೆನ್ನ ಬಟ್ಟೆ ಒಣ್ಣೆ ಇಡುವಕ್ ಉಂಡ್.....

ಮಾಚು : ನಿಂದ ನಿಂದ ನಿಂದ.... ನಲ್ಲ ಸೂಪರ್ ಫಾಸ್ಟ್ ರೈಲ್‌ರನ್ನೆಕೆ ಎಣ್ಣೆಟಕ ನಾನಾ ಎನ್ನನೆ ಜೀರ್ಣ ಮಾಡ್ತೊವಡ್, ನೀನ್ ಎಣ್ಣಾನ? ಚೆನ್ನ ನಿಧಾನತ್ ಎಣ್ಣುವದ್ ಬುಟ್ಟಿತ್?.... ಅವೆಂತೊ ಎಣ್ಣೆಯಲ್ಲ ಬೊಳ್ಳರಿ - ಗಿಳ್ಳರೀಂದ್....

ಪೂವಿ : ಬೊಳ್ಳರಿ... ಗಿಳ್ಳರಿ ಅಲ್ಲ. ಬೊಳ್ಳರಿ ಬರಾತಿತ್ ಬೆಚ್ಚಿಯೇಂದ್ ಎಣ್ಣೆಯೆ ನಾನಾ!.... ಮಂಡೆಕ್ ಹೊಕ್ಕಾಚಾ?

ಮಾಚು : ಅಲ್ಲ ಪೂವಿ, ಬೊಳ್ಳರಿಕೂ ನೀಕೂ ಭಯಂಕರ ಬೆಂದೂರ್ತ ಕಾಂಬಲ್ಲ?

ಬೊಳ್ಳು : ಬೆಂದೂರ್ತ ಅಲ್ಲ ಮಾಚು. ಪೊತ್ತೂರ್ತ!.... ಅರ್ಥ ಆಚಾ?

ಮಾಚು : ಅರ್ಥ ಆಚಿ... ಪೊಣ್ಣಾರ ಅಪೊ ಎಣ್ಣಕಲೂ ಒಂದೇ - ಮಾಯಿರ ವಡಿಯ ಎಣ್ಣಕಲೂ ಒಂದೇ! ಬೆಂದೂರ್ತವೊ - ಪೊತ್ತೂರ್ತವೊ! ಆಡಿಕೂಡಿ ಬೊಳ್ಳರಿ ಬುಟ್ಟಕ ಅಲ್ಲಿ ಬೋರೆಂತದೂ ಇಲ್ಲೆ ಕಾಂಬ!

ಪೂವಿ : ಅದ್ ಇಲ್ಲೆ, ಇದ್ ಇಲ್ಲೆಂದ್ ಎಣ್ಣಕಾಗಾಂದ್ ನೀನೇ ಎಣ್ಣವಲ್ಲ ಮಾಚು... ನಂಗಡಲ್ಲಿ ಇಲ್ಲತದ್ ಎಂತ ಎಣ್ಣ ನೋಟನ? ಬೊಳ್ಳರಿ ಬುಟ್ಟಕ ಚಾತೆ ಉಂಡ್, ಚೆಕ್ಕೆ ಕುರು ಉಂಡೇ ಉಂಡ್. ಆಲೆ ಬಗ್ಗೆಚೇಂಗಿ ತಾತೆ ತೊಪ್ಪು! ಈಲೆ ಬಗ್ಗೆಚೇಂಗಿ ಕಾಕೆ ತೊಪ್ಪು... ಬೆದ್ಕೆಕ್ ಕೆ ಇಟ್ಟಕ ವಣ್ಣೆಕ್ ಎರ್ಚಿ.. ಒಂದಾ... ದಂಡಾ?.... ಅದಲ್ಲತೆ....

ಮಾಚು : ವೆರಿಗುಡ್.... ವೆರಿಗುಡ್! ನಿನ್ನ ಏದೇಂಗಿ ಹೋಟೆಲ್‌ಲ್ ಸರ್ವ್ ಮಾಡುವಕ್ ಬುಟ್ಟಿತಿಂಜಕ ನಲ್ಲದಿಂಜತ್! (ತೆಳಿ) ಮಜ್ಜಣ ಹೋಟೆಲ್‌ಲ್ ಆಲುಗಡ್ಡೆ - ಈರುಳ್ಳಿ ಸಾಂಬಾರ್‌ಂದ್ ಎಣ್ಣಕ, ಬೈಟ್ ಪೋಯಿತ್ ಕೇಟಕ ಆಲುಗಡ್ಡೆ - ಆರುಳ್ಳಿ ಸಾಂಬಾರ್‌ಂದ್ ಎಣ್ಣವ. ಅನ್ನನೇ ನೀನೂ..... (ತೆಳಿ)

ಪೂವಿ : ಪಿಂಞಂತೆ ಮಾಡುವೊ ಮಾಚು? ದೇವ ತಂದಾಲ್ ತೃಪ್ತಿ ಪಟ್ಟವಂಡು. ಓರಮ್ಮ ಅದ್ ಬೋಂಡು - ಇದ್ ಬೋಂಡೂಂದ್ ಮನಸ್‌ಕ್ ತೋಂದುವ. ಆಚೇಂಗಿ ನಂಗ ನಂಗಡ ಪರಿಸ್ಥಿತಿನ ಕೂಡಿ ನೋಟೊವೊಂಡು.... ಅದಿರಡ್, ನೀನ್ ಇಕ್ಕ ಪಾಡುವಿಂಜಿಯಲ್ಲ ಪಾಟ್, ದಾರ್ ಎಳ್‌ದಿಯೆ ಅದ್‌ನ?

ಮಾಚು : ಎಂತಾಂಗ್?

ಪೂವಿ : ಮುಂಡತೆ... ದಾರ್ ಎಳ್‌ದ್‌ನದ್‌ಂದ್ ಕೇಟ ಅಚ್ಚಿಕೆ!

ಮಾಚು : ದಾರೊ ಎಳ್‌ದ್‌ನದಲ್ಲ. ಅನ್ನನೇ ಎಂತೋ ಗೇನ ಮಾಡ್ಯಂಡಿಂಜ. ಅಕ್ಕ

ತನ್ನಾಲೆ ಬಾಯಿಕ್ ಬಂದಾನ ಪಾಡ್ಯಂಡಿಂಚೆ.

ಪೂವಿ : ಅದ್‌ನ ಅನ್ನನೇ ಎಳ್‌ದಿತ್ ಬೆಚ್ಚಿರ್ ಮಾಚು. ಕೈವೆಂಗಿ ಅದ್‌ನ ಇಂಞೂ ಚೆನ್ನ ಕೂಟಿತ್ ಪಾಡುವಕ್ ನೋಟ್. ನೇರಾಯಿತೂ ಗೇನ ಮಾಡ್‌ಚೇಂಗಿ ಎಚ್ಚಕೋರ್ ಅರ್ಥ ಉಂಡ್ ಅದ್‌ಲ್.

ಮಾಚು : ಸರಿಯಪ್ಪ.. ಅದ್‌ಲ್ ನೀಕ್ ಎಂತದೆಲ್ಲ ಅರ್ಥ ಅಚಿ. ಅದ್‌ನೆಣ್ಣ್ ಅಂದಕ!

ಪೂವಿ : ಕೇಳ್, ಆ ಪಚ್ಚೆ ಮರ್‌ಂಜ ಕೂಂದ್‌ರ ಸಾಲ್, ದೇವ ಲೋಕತೂ ಕಾಂಗತನ್ನತ ಪ್ರಕೃತಿರ ಚಾಯಿ - ಬೋಜ. ನೋಟುವ ಕಣ್ಣ್ ಒಂದ್ ಉಂಡೇಂಗಿ, ಪರಿವ ನಾವು ಒಂದ್ ಉಂಡೇಂಗಿ... ಇಲ್ಲಿ ಉಳ್ಳದೆಲ್ಲ ನೇರಾಯಿತೂ ದೇವಡ ಸೃಷ್ಟಿಯೆ!

ಮಾಚು : ಶಾಭಾಷ್ ಪೂವಿ! ಎನ್ನ ಸಮಾಚಾರ್? ಪೂವಮ್ಮ ಕವಿ ಆನನ್ನಕೆ ಕಾಂಬ?

ಪೂವಿ : ಎಲ್ಲಾ ನೀಡ ಸಹವಾಸತ್‌ರ ಫಲ ಮಾಚು! ನೀನ್ ಕಪಿರನ್ನಕೆ ಕಳಿಪಕ ನಾನ್ ಕವಿಯಾಪದ್ ಏದ್ ಬಲ್ಯ ವಿಶ್ಯ? (ತಳಿ)

ಮಾಚು : ಎಂಥ ಎಣ್ಯ? ಬೋಂಡುವ ಎನ್ನೇಂಗಿ?

ಪೂವಿ : ಸಾರಿ ಮಾಚು.. ಓರಮ್ಮ ತಕ್ ಪರಿವಕ ಗ್ರಾಮರ್ ಮಿಸ್ಸೇಕ್ ಆಯಿ ಪೋಪಪ್ಪ!

ಮಾಚು : ನಾಕೂ ಅಚ್ಚಕೇ... ಓರಮ್ಮ ನೀಡ ಪಡಮಂಡೆಕ್ ಕೈ ಪೋಪಪ್ಪ!

ಪೂವಿ : ನಾನ್ ತಮಾಷಿಕ್ ಎಣ್ಯೆ ಅಲ್ಲ ಮಾಚು. ನಂಕ್ ಕೊಡಗಲ್ ಉಳ್ಳಯಿಂಕ್ ಕೊಡಗರ್ ಬೆಲೆ ಗೊತ್ತಿಲ್ಲೆ. ಬೋಳ್‌ಚತ್‌ರ ಅಡಿಲ್ ಇರ್‌ಟ್ತ್ ಇಪ್ಪಲ್ಲ ಅನ್ನನೆ... ಕೊಡಗರ್ ಬೆಲೆ ಗೊತ್ತಾಂಡುವೇಂಗಿ ಪೋರ್ಮೆ ಸುತ್ತಾಡಿತ್ ಬರೊಂಡು... ಉಫ್ ನಾಕಂತೂ ಮದಿಯಾಯಿರ್‌ತ್ ಒರ್ ವಾರಕೇ ಬೆಂಗ್ಲೂರ್!

ಮಾಚು : ಪಿಂಞ ನೀನೇ ಅಲ್ಲ ಕೊಣ್‌ಂಜಂಡಿಂಜಿಯೆ? ಶೀಲಂಡಲ್ಲಿಕ್ ಪೋಕ - ಶೀಲಂಡಲ್ಲಿಕ್ ಪೋಕಾಂದ್? ಶೀಲಂಡಲ್ಲಿಕ್ ಪೋಯಿತಾನದೂ ಶೂಲಕ್‌ಟ್ಟನ್ನಕೆ ಕಳಿಪ್ಪಕ್ ಸುರು ಮಾಡಿಟ್ಟಿಯ!

ಪೂವಿ : ನೀನ್ ಎಂತೇಂಗಿ ಎಣ್ಯ ಮಾಚು.. ನಂಗಡ ನಾಡೇ ನಂಕ್ ಚಾಯಿ. ಒರ್ ನಲ್ಲ ಗಾಳಿ ಇಲ್ಲೆ... ಒರ್ ನಲ್ಲ ನೀರಿಲ್ಲೆ.. ಮೂಂದ್ ನೇರವೂ ಮನೆಕ್ ಪಡಿ ತಾಕಿಯಂಡೇ ಇಕ್ಕೊಂಡು... ಮೈಸೂರೂ ಬೋಂಡ... ಬೆಂಗ್ಲೂರೂ ಬೋಂಡ.

ಮಾಚು : ಸದ್ಯ! ಅಚ್ಚಕ್ ಬುದ್ಧಿ ಬಾತಲ್ಲ... ನಾನ್ ಬಚಾವ್! ಮೊನಿಯಾಂದ್ ನಂಗಡ ಸುನಿತ ಮೂಡಿ ಅದೆಲ್ಲಿಕೋ ಪಾರಿತ್ ಬಾತ್ ನೋಟ್....

ಸಕನು ಫೋನ್ಮಾಲ್

- ಪೂವಿ : ಅರೆ, ಅದೆಂತ ಮಾಚು ನೀಡ ವಿಚಿತ್ರ?... ಏದ್ ಸುನೀತ ಮೂಡಿ ಪಾರಿಯೆ?
- ಮಾಚು : ಅಯ್ಯೋ ಅಚ್ಚಕೂ ಗೊತ್ತಾಪುಲಿಯ ಪೂವಿ... ಸುನೀತಾ ವಿಲಿಯಂಸ್, ಆಕಾಶಕ್ ಪೋಪಂಜಿ ಆರ್ ತಿಂಗ ಅಲ್ಲಿಯೆ ಇಂಜಿತ್ ಬಾತಲ್ಲ ಅವು.
- ಪೂವಿ : ಅವಳಾ? ನಾನ್ ಗೇನ ಮಾಡಿಯೆ ಎಂತ ಗೊತ್ತುಂಡ? ನಂಗಡ ಮಿಟ್ಟು ಅಣ್ಣಯ್ಯಂಡ ಮೋವ ಸುನೀ ಉಂಡಲ್ಲ... ಅವ ಎಲ್ಲಿಕಪ್ಪ ಪಾರಿಟ್ಟೇಂದ್ ಗೇನ ಮಾಡ್ನ! (ತೆಳಿ)....
- ಮಾಚು : ನೀಡದ್ ಎಕ್ಕೊಲೂ ಇಂತದೇ... ಲೋಕಲ್ ಮೈಂಡ್. ಆಂಗ್ಂಜಿ ಜಾಸ್ತಿ ನೀಡ ಬುದ್ಧಿ ಓಡ್ಚೆಂಗೆನ್ನೆ?
- ಪೂವಿ : (ಚೆಡಿ ಸ್ವರ) ಅಕ್ಕು ನಾಡ ಲೋಕಲ್ ಮೈಂಡೇ..... ನೀಡದ್ ಮಾತ್ರ ಇಡೀ ಲೋಕಕುಳ್ಳ ಮೈಂಡ್.
- ಮಾಚು : ಓಹೋ... ಕೆಲಸ ಕೆಟ್ಟೋಚಿ ಕಾಂಬಲ್ಲಪ್ಪ, ನಾಳೆ ಅಗೆ ಕಂಬಳ ಬೋರೆ ಉಂಡ್. ಅಡಿಗಿ ನಾನೇ ಆಂಡುವೊ ಎನ್ನೋ...? ವೆರಿ ಸ್ವಾರಿ ಡಿಯರ್ ಪೂವಿ....
- ಪೂವಿ : ಪೋ ಮಾಚು. ನೀಡದೆಲ್ಲ ನಾಕ್ ಗೊತ್ತುಂಡ್. ಕಾರ್ಯ ವಾಸಿ ಕತ್ತೆ ಕಾಲ್. ನೀನೇ ಭೂಲೋಕತ್ ಬುದ್ಧಿವಂತ. ನಂಗ ಪೊಣ್ಣಾಳ ಒಂದೂ ಗೊತ್ತಿಲ್ಲತಯಿಂಗ...
- ಮಾಚು : ಸಾರೀಂದ್ ಎಣ್ಣೆಲ್ಲ ಪೂವಿ. ಇಂಞಿ ಅದ್ಂಂಗ್ಂಜಪ್ಪರ ಎನ್ನನೆ ಮಾಪ್ ಕೇಪೋ?
- ಪೂವಿ : ನಾಕೆಲ್ಲ ಗೊತ್ತುಂಡ್ ನೀಡ ಕಳಿ. ಇಕ್ಕ ನೀಕ್ ಕಾರ್ಯ ಉಂಡ್. ಅದ್ಂಂಗ್ ನೀನ್ ನನ್ನ ನೈಸ್ ಮಾಡುವೊ. ನಾಳೆ ಅಗೆ ಉಂಡ್. ಅದ್ಂಂಗಾಪಕ ನಾನೇ ಆಂಡು... ಪೊಳೆ ಮರ್ಂಜಿತ್ ಆ ಅಗೆ ಎನ್ನನೆ ಉಂಡ್ ಗೊತ್ತುಂಡಾ ನೀಕ್? ಅಲ್ಂಂಗ್ ನಿಂದಿತ್ ಕೆತ್ತಲ್ ಪೂಂದ್ಪೋಯಿತದ್. ಒರ್ ವಾರತ್ಂಜ ಕೂಡಾಳ್ ಪಣೆಕ್ಪೋಯಂಡುಳ್ಳ. ಒರಾಂಡೆಕುಳ್ಳ ಕೂಳ್ಕ, ಅಗೆಕೇ ಪದ್ನಾರ್ ಮುಯ್ಯಾಳ್ ಕೂಡೊಂಡು ನಾನ್. ಅಂತಲ್ಲಿ ನೀಕ್ ಉಪಕಾರ ಉಂಡಾ?
- ಮಾಚು : ಎಂತ ಪೂವಿ ನೀನ್? ಚೆರಿಯ ಮಕ್ಕಡನ್ನೆಕೆ! ನೀನ್ ಅಚ್ಚಕೆಲ್ಲ ಕೆಜ್ಜಾನಂಗುಂಡೇ ನಾನ್ ಇಚ್ಚಕ್ ಆರಾವ್ಲಾ... ಏದೋರ್ ವರೀಸ್ ಇಲ್ಲತೆ ಬದ್ಕಿಯಂಡುಳ್ಳ. ಎನ್ನೋ ಚೆನ್ನ ಪುಂಡ್ ಮಾಡಂಗಾಂದ್ ಎಣ್ಣೆಟಪ್ಪ... ಅದ್ಂಂಗ್ ಇಚ್ಚಕ್ ಸೀರಿಯಸ್ ಆಯಿರುವದ ನೀನ್?... ಎಲ್ಲಿ ತೆಳಿ ನೋಟನ.... ಪುಳುಪಲ್ಲ ಇಲ್ಲೆಲ್ಲ ತೆಳಿಪಕೆನ್ನ ನೀಕ್? (ತೆಳಿ)

- ಪೂವಿ : (ತೆಳಿ) ಮದಿ ನೀಡ ಕೋಡ ಕಳಿ!... ಅದೆಂತದೋ ಎಣ್ಣೆಂಡಿಂಜಿಯ ಸುನೀತಂಡ ಕತೆ....
- ಮಾಚು : ಅದೇ ಪೂವಿ... ಅವ ಆಕಾಶತ್‌ಂಜ ಭೂಮಿನ ನೋಟ್‌ಚೊಲೊ... ಅಕ್ಕ ಗೊತ್ತಾಚೊಲೊ ಅವಕ್ ದೇವಡ ಸೃಷ್ಟಿಲ್ ಎಂತೆಂತದೆಲ್ಲ ಉಂಡಲ್ಲಾಂದ್!
- ಪೂವಿ : ಆಂಡ ವಿಷ್ಯ ಎಂತಾಂಗಾಯಿತ್ ಬಂದ್ಯೆ ಇಕ್ಕ?
- ಮಾಚು : ಆಂಡ ವಿಷ್ಯ ಎಂತಾಂಗ್ ಬಂದ್ಯೆಂದೆಣ್ಣೆಕ ಚೆನ್ನ ಪ್ಲಾಶ್ ಬ್ಯಾಕ್‌ಕ್‌ಪೋಕನ. ನೀನ್ ಅಕ್ಕಲೆ ಎಣ್ಣೆ ನೋಟ್. ಮೈಸೂರೂ ಮದಿ - ಬೆಂಗೂರೂ ಮದಿ.. ನಂಗಡ ಕೊಡಗೇ ನಂಕ್ ಚಾಯೀಂದ್. ಅನ್ನನೇ ಪ್ರತಿಯೊಂದೂ ನಂಗಡ ಕಾಲಾರ ಮೊರಡ್‌ಲುಳ್ಳ ಚಾಯಿ ಬೋಜ ನಂಕ್ ಕಾಂಬ್‌ಲೆ. ದೂರತ್‌ಂಜ ನೋಟುವಕ ಗೊತ್ತಾಪಾಂದ್ ಎಣ್ಣೆಕಾಯಿತ್ ಸುನೀತಂಡ ಉದಾಹರಣೆನ ಎಣ್ಣೆ ಅಚ್ಚಿಕೆ.
- ಪೂವಿ : ಅಲ್ಲೇಂಗಿ ನೀನೇ ಗೇನ ಮಾಡ್ ಮಾಚು. ಪೇಟೆಲ್ ಉಳ್ಳಯಿಂಗಕ್ ಕೈಲ್ ದುಂಬ ಪಣ ಇಕ್ಕು.. ಮನೆದುಂಬ ಸೌಕರ್ಯ ಇಕ್ಕು.. ಆಚೇಂಗಿ ಈ ಪ್ರಕೃತಿರ ಚಾಯಿಬೋಜ ಆಯಿಂಕುಂಡಾ?
- ಮಾಚು : ಓರಬ್ಬಕ್ ಪಣ ಉಂಡೇಂಗಿ ಅದೇ ಅಯಿಂಗಡ ಸರ್ವಸ್ವ. ನಂಕ್ ಅನ್ನೆ ಇಲ್ಲ... ಈ ನೀರ್... ಈ ಗಾಳಿ... ಈ ಕುಂದ್ ಕಾಡ್ ಇದ್‌ಂಡ ಮೀದ ಇಂಞಿಲ್ಲತ ಆಸೆ.
- ಪೂವಿ : ನಂಗ ನಂಗ ಪುಟ್‌ನ ಮಣ್ಣರ ಮೀದ ಅಭಿಮಾನ ಇಲ್ಲತಾಂಗೇ ಇಂದ್ ಕೊಡಗಲ್ ಎಂತೆಂತದೋ ಆಯಂಡುಳ್ಳ... ನಂಗಡ ಮಣ್ಣ್ ನಂಗಲೇ ಪೋರಾಡುವನ್ನತ ಸ್ಥಿತಿ ಬಂದ್ ಪೋಯೆ.
- ಮಾಚು : ಮೊನಿಯಾಂದ್ ರಾಜಣ್ಣಯ್ಯಂಡಲ್ಲಿಕ್ ಪೋಯಿಂಜ ನೋಟ್... ಅಲ್ಲಿಕ್ ಅವಂಡ ಅಣ್ಣಂಡ ಮಕ್ಕ ಬಂತಿಂಜತ್...
- ಪೂವಿ : ಅಯಿಂಗ ಬೆಂಗೂರ್‌ಲ್ ಉಳ್ಳಯಿಂಗಲ್ಲ?
- ಮಾಚು : ಅಕ್ಕು... ಆ ಮಕ್ಕಳ ಕೇಟ... ನಿಂಕ್ ಎಲ್ಲಿ ಕುಶಿ ಮಕ್ಕಳೇಂದ್... ಅಕ್ಕ ಅವು ಎಣ್ಣೆ ತಕ್ಕ ಕೇಟಿತ್ ನಾಕ್ ಓರ್ ತರಾ ಆಯಿರ್‌ತ್.
- ಪೂವಿ : ಎಂತೇಂದ್ ಎಣ್ಣೆ ಚವು?
- ಮಾಚು : ನಂಗಡ ಅಪ್ಪವ್ವ ನಂಕ್ ದ್ರೋಹ ಮಾಡಿರ್‌ತ್ ಅಂಕ್... ಇಂತಾ ಚಾಯಿರ ಕೊಡಗಲ್ ಇಪ್ಪದ್ ಬುಟ್ಟಿತ್ ಆ ಕಾಂಕ್ರೀಟ್ ಕಾಡ್ ಬೆಂಗಳೂರ್‌ಲ್ ಕೂಡಲಾಯಿತ್ ನಂಗ ಕೊಂಬು ತಪ್ಪನ ಕೋಡಂಗಡನ್ನಕೆ ಆಯಿರ್‌ತ್. ಇತ್ತಟಿ

ಪಳಮೆ ಪ್ರೊಮ್ಯಾಲೆ

ಕೊಡಗ್ ಬಗಲ್ ನಂಕ್ ಪೂರ್ತಿ ಗೊತ್ತಿಲ್ಲೆ... ಅತ್ತಟಿ ಅಲ್ಲಿಯತ್ ಸಂಸ್ಕೃತಿಕ್ ಕೂಡುವಕೂ ಮನಸ್ ಒತ್ತವುಲೆ. ನಂಗ ಪಾಪಿಯ ಅಂಕ್ಲಂದ್.. ಬೇಜಾರ ಪಟ್ಟಿತ್ ಆ ಮಕ್ಕ.

ಪೂವಿ : ಅಂತ ಮನಸ್ ಮಕ್ಕಳೂ ಉಂಡಲ್ಲ ಮಾಚು?

ಮಾಚು : ಇಲ್ಲತೆ? ನೋಟ್ ಪೂವಿ... ಇಲ್ಲಿ ಬದ್ ಕ್ ನೀಸುವಕ್ ಕಯ್ಯತೆ, ಬದುಕುವಕ್ ಬೋರೆ ಬಟ್ಟೆಯೇ ಇಲ್ಲತೆ, ಪರ ಊರ್ಕ್... ಪರನಾಡ್ಕ್, ಪರದೇಶಕ್ ಪೋಪದ್ ಒರ್ ತರ. ಆಚೇಂಗಿ ಬರೀ ಪಣತ್ ರಾಸೆಕಾಯಿತ್ ನಂಗಡ ಮಣ್ಣನ ಬುಟ್ಟ್ ಪೋಪದ್ ಮಾತ್ರ ಅಯಿಂಗಡ ಮಕ್ಕಕ್ ಅಯಿಂಗ ಮಾಡ್ ನ ವಂಚನೆಯೇ ಅಕ್ಕು. ನೀನಂತ ಎಣ್ಣವಿಯ?

ಪೂವಿ : ನಾಕಾಪ ಎಂತ ಗೊತ್ತುಂಡ? ಮಕ್ಕಕ್ ನಂಗ ದುಂಬ ವಿದ್ಯಾಭ್ಯಾಸ ಕೊಡ್ ಪ ನೋಟ್.. ಅಲ್ಲಿಂಜ ಅಯಿಂಕ್ ಇಲ್ಲಿಯತ್ ಸಂಸ್ಕೃತಿ... ಇಲ್ಲಿಯತ್ ಮಣ್ಣರ ಮೇಲೆ ಒರ್ ತರ ಕ್ಳರಿಮೆ ಬಂದ್ ಪೋಪೆನ್ನೊಂದ್ ನಾಕಾಪ....

ಮಾಚು : ಆಂಗ್ ಕಾರಣ ಅಯಿಂಗ ಅಲ್ಲ... ನಂಗ.... ಏದ್ ಸಂಸ್ಕೃತಿ ಇರಡ್... ನಂಗ ನಂಗ ಪುಟ್ಟಿತ್ ಬಂದ ಸಂಸ್ಕೃತಿರ ಮೀದ ನಂಗಡ ಮಕ್ಕಕ್ ನಂಗ ಚೆರ್ ಪತ್ ಅಂಜೇ ಎಣ್ಣ ಕೊಡ್ಕೊಂಡು... ಆಂಡ ಮೀದ ಅಭಿಮಾನ ಪುಟ್ಟ್ ಚಿಡೊಂಡು.

ಪೂವಿ : ಅದ್ ಮಾತ್ರ ನೇರೇ... ಇಕ್ಕ ಪರ ನಾಡ್ಲೇ ಉಂಡೇಂಗೂ... ನಮ್ಮ ನಾಳ್ಕ್... ಮಂದ್ ಮಾನಿಕ್ ಅದದ್ ಸಂದರ್ಭತ್ ಮಕ್ಕಳ ಇಲ್ಲಿಕ್ ಕೂಟ್ಟಿಂಡ್ ಬಂದಕ ಅಯಿಂಗಕೂ ನಂಗಡ ಸಂಸ್ಕೃತಿ - ಆಚಾರ ವಿಚಾರ ಗೊತ್ತಿಪ್ಪ. ಆಚೆಂಗಿ ಓರಂದ್ ಮನೆಲ್ ಅಪ್ಪವ್ವನೇ ಮಕ್ಕಳ ಬೋರೆ ತರತ್ ಬೊಳತುವಲ್ಲ...

ಮಾಚು : ಎಂತ ಮಾಡಂಗ ಎಣ್ಣ. ಲೋಕ ಎಣ್ಣ ಪಿಂಞ ಪತ್ತ್ ತರ ಕಳಿಕಾರ ಇಂಜಿತೇ ಇಪ್ಪ. ಅಯಿಂಕ್ ಅಯಿಂಗಡದ ರೀತಿ ನೀತಿಯೇ ಸರೀಂದ್ ತೋಂದುವೆನ್ನೊ? ಚೋಟು ಬಾವಂಡಲ್ಲಿ ನೋಟ್! ಮಕ್ಕ ಅಚ್ಚಕೆಲ್ಲ ಓದಿತ್ ಫಾರೀನ್ಕ್ ಪೋಯಿತುಂಡೇಂಗಿ ಕೂಡಿ ತಂಗಡ ಅವ್ವ ತಕ್ಕ್ ನ ಓದಿಚ್ಚಕೂ ಮರಂದಿತ್ಲೆ ಆ ಮಕ್ಕ. ಅನ್ನನೆ ಅಭಿಮಾನ ಉಳ್ಳಯಿಂಗಳೂ ಉಂಡ್. ಬೋರೆ ತರತ ಜನಳೂ ಉಂಡ್.

ಪೂವಿ : ನೀನ್ ಚೋಟು ಅಣ್ಣಯ್ಯಂಡ ವಿಷ್ಯ ಪರಿವಕ ನಾಕೋರ್ ತಮಾಷಿ ಗೇನ ಬಾತ್! (ತಳಿ)

ಮಾಚು : ಎಂತ ಅಂತದ್?

ಪೂವಿ : ಮೊನಿಯಂದ್ ಬಲ್ಯ ಮಳೆ ಬಾತಲ್ಲ? ಆಂಡ ಪಿತ್ಯಾಂದ್ ಪೊಳೆರ ಆ ಬರಿಕ್ ಉಪ್ಪಕ್ಂದ್ ಎತ್ತ್ ಉಳ್‌ಪಿಯಂದ್ ಪೋಚೋಲೊ ಚೋಟು ಅಣ್ಣಯ್ಯ....

ಮಾಚು : ಪೊಳೆ ದಾಟಿತ್ ಪೋನದಾ? ಪಾಲ ದಾಟಿತ್‌ಪೋನದಾ?

ಪೂವಿ : ದಂಡಾನೊ ದಾಟಿತ್‌ಲೆ! ಅಕ್ಕಣೆಕ್ ಕತೆ ಕೆಟ್ಟೋಯಿತ್ (ತೆಳ)

ಮಾಚು : ಇದ್ ನಲ್ಲ ಕತೆ ಆಚಲ್ಲ? ಎಣ್ಣುವಕ್ ಮಿಂಞಾಲೆ ತೆಳಿಪ್ಪಲ್ಲ ಇವ?

ಪೂವಿ : ಕತೆ ಅನ್ನನೆ ಉಂಡ್ ಮಾಚು... ಎಂತವಂಗೂ ತೆಳಿ ಬಕ್ಕತೆ ಇಪ್ಪುಲೆ...

ಮಾಚು : ಎಣ್ಣ್ ಅಂದಕ...

ಪೂವಿ : ಅಣ್ಣಯ್ಯ ಉಪ್ಪಕ್ಂದ್ ಪೋನ ಚೆನ್ನ ನೇರಕ್ ದಾರೋ ಒಬ್ಬೊ ಮೇಲ್‌ಡೀ ಕೆತ್ತೆ ಬಳಂದಂಡ್ ಮನೆಕ್ ಬಾತೊಲೊ....! ಅಯಿಂಡ ನಾಯಿ ಅವನ ನೋಟಿತ್ ಒರೇ ಸಮ ಕೊರ್‌ಪಲೋ....(ತೆಳ)

ಮಾಚು : ಅಚ್ಚಕ್ ನೇರ್ತೆ ದಾರ್ ಬಪ್ಪ ಮನೆಕ್?

ಪೂವಿ : ಅದೇ ಮಮ್ಮಂಗೂ ಆಶ್ಚರ್ಯ ಆಯೆ.... ಮಮ್ಮನೂ ನಾಯಿನ 'ಭೂ...' ಕೂಟ್‌ಚೊಲೊ! (ತೆಳ)

ಮಾಚು : ಅಲ್ಲಿಂಜ?

ಪೂವಿ : ಬಂದ್ಯೆ ದಾರ್‌ಂದ್ ಗೇನ ಮಾಡ್ಯೆ?... ಚೋಟು ಬಾವನೇ! (ತೆಳ)

ಮಾಚು : ಅಕ್ಕುವಾ? (ತೆಳ) ಎಂತಾಯೆಲೊ?

ಪೂವಿ : ಆಪ ಎಂತ? ಒನ್ನಾಂದೆಕ್ ಮುಪ್ಪಡೆ ಬಲ್ಯ ಮಳೆ ಬಂದದಲ್ಲ... ಪೊಳೆ ಕರಲ್ ಅಲ್‌ಂಗ್ ಬಂದಿತ್ ನಿಂದಿತಿಂಜತ್. ಕಾಲ್ ಜಾರಿತ್ ಬುದ್ಧಿಟಕ ಆಂಡೊಳ್‌ಕ್ (ತೆಳ)

ಮಾಚು : ಪಾಪ! ನೀಕ್ ದಾರ್ ಎಣ್ಣೆಯೆ ಇದ್‌ನ?

ಪೂವಿ : ಮಮ್ಮನೇ ಎಣ್ಣೆಯೆ.... ಮೊನಿಯಾಂದ್! ಮಮ್ಮಂಗ್ ದಂಡ್ ಅಡಿಯೂ ಕೊಟ್‌ಚೊಲೊ! (ತೆಳ)

ಮಾಚು : ಎಂತಾಂಗ್ ಪೊಜ್ಜಿಯೆ? (ತೆಳ)

ಪೂವಿ : ನಾಯಿ 'ಭೂ...' ಕೂಟ್‌ನಾಂಗ್!..... ಬಟ್ಟೆಲ್ ಬಪ್ಪಕಲೂ ದಂಡ್ ಮೂಂದಾಳ್ ಅಣ್ಣಯ್ಯನ ನೋಟಿತೊಲೊ... ದಾರೋ ಒಬ್ಬೊ... 'ಎನ್ನ ಚೋಟೊ... ಬೋಡ್‌ನಮ್ಮೆಕ್ ಇಂಞೂ ದಿನ ಉಂಡ್... ಇಕ್ಕಲೇ ಎಂತಾಂಗ್ ಕಳಿ ಪೊರಟ್ಟೆಂದ್' ಕೇಟಿತೊಲೊ...! (ತೆಳ)

ಮಾಚು : ಪಾಪತವಂಡ ಪಾಡ್ ಬೋಂಡ. ಎಂತ ಮಾಡಂಗ ಎಣ್ಣ್... ಈಯಾಂಡೆತ

ಸಳಮೆ ಪ್ರೊಮ್ಯಾಲೆ

ಮಳೆಗಾಲ ಅಂತದ್... ತಾರ್ ರೋಡ್‌ರ ಒಳಂಜೂ ಜಲ ಎದ್ದಿತ್.

ಪೂವಿ : ಅಂದ್ ಪೇಪರ್‌ಲ್ ಇಂಜತ್ ನೋಟ್... ಅದೇದೋ ಕುಂದ್‌ರ ಕೊಡಿಂಜ ಜಲ ಎದ್ದಿತ್, ತಾರಾಮಾರಾ ಮಣ್ಣ್ ಕಲ್ ಪೊರ ಬಂದಿತ್ ದಾಡದೋ ಸುಮಾರ್ ಕಾಫಿ ತೋಟ ಪಾಳಾಯಿತ್‌ಂದ್. ಈ ಮಳೆಗಾಲತ್ ಇಂಇಂ ಎಂತೆಲ್ಲ ಕಣ್ಣ್‌ಲ್ ನೋಟುವಕುಂಡೊ?

ಮಾಚು : ನೇರೇ ಪೂವಿ... ಅಂದಿತೂ ಒರ್ ಸಮಾಧಾನ ಎಂತ ಗೊತ್ತುಂಡಾ?

ಪೂವಿ : ಎಂತ?

ಮಾಚು : ನಂಗಡ ಕೊಡಗ್‌ಕಾರ ಬಲ್ಯ ಮನಸ್‌ಕಾರ. ಇಂಇಂನೊಬ್ಬಂಡ ಕಷ್ಟಕ್ ಆಪವು. ಮಳೆಲ್ ಜನ ಮನೆಮಾರ್ ಕಳಂದಂಡ್ ಕಂಜಿ ಕೇಂದ್ರತ್ ಇಂಜತಲ್ಲ? ಅಯಿಂಕ್ ಸಾರ್ವಜನಿಕಂಗ, ಸಂಘ ಸಂಸ್ಥೆಕಾರ ಕೈಲಾಪ ಸಹಕಾರ ಕೊಡ್ತಿತ್.

ಪೂವಿ : ಅಕ್ಕು, ಮನುಷ್ಯ ತಾಂಡ ತಾಂಡಾನ ಮಾತ್ರ ನೋಟುಂಡಕ ಪೋರ.. ತಾಂಡ ಕೈಲ್ ಎಚ್ಚಕಾಪೋ ಅಚ್ಚಕಾನ ಸಾಯ ಮಾಡೊಂಡು... ಆಚೇಂಗಿ ಓರಬ್ಬ ಪೆದಕಾಯಿತ್ ಸಾಯ ಮಾಡುವಾನ ನೋಟುವಕ್ ಅಯ್ಯೋ ಪಾಪಾಂದಾಪ!

ಮಾಚು : ಎಂತ ಮಾಡುವಕಾಪ? ಓರಬ್ಬಂಡ ಸ್ವಭಾವ ಅನ್ನನೇ. ಒಂದೂ ಸಾಯ ಮಾಡತೆ ಪೆದ ಪಡ್‌ಂದವಕ್ ನೋಟುವಲ್ಲ. ಅಯಿಂಕ್‌ಂಜಿ ಇವು ವಾಸಿ.

ಪೂವಿ : ಅಂತೂ ಇಂತೂ ಈ ಮಳೆಗಾಲ ಸುಮಾರೆಲ್ಲ ವಿಷಯಕಾಯಿತ್ ಮರ್‌ಪನ್ನತದಲ್ಲ.

ಮಾಚು : ಮುಖ್ಯ ಎಂತ ಗೊತ್ತುಂಡಾ? ಇಡೀ ಕೊಡಗ್‌ರ ಭವಿಷ್ಯಕೇ ಮುಳ್ಳಾಪನ್ನತ ಓರ್ ಆಚ್ಚೆ ಬಂತಿಂಜತಲ್ಲ ಸರ್ಕಾರತ್‌ಂಜ? ಅಂಡ ಏತುಲ್ ಕೊಡಗ್‌ಕಾರ ತಂಗೆಲ್ಲ ಒಂದ್‌ಂದ್ ಒತ್ತೋರ್ಮೆ ಕಾಟ್‌ಚೆಲ್ಲ.. ಅದ್ ಪೆರ್ತ್ ಕುಷಿರ ವಿಷ್ಯ.

ಪೂವಿ : ಕಣ್ಣ್‌ಕ್ ಬಂದದ್ ಕುಯಿಬುಲ್ ಪೋಚೇಂದೆಣ್ಣಾಟಿ ಸದ್ಯ ಎಲ್ಲ ಸೆರಿಯಾಚೆಲ್ಲ? ಅದೇ ಸಮಾಧಾನ.

ಮಾಚು : ನೋಟ್ ಪೂವಿ, ಸಂಸಾರಕ್ ಕಷ್ಟ ಬಾತೇಂಗಿ ಸಂಸಾರಕಾರ ಒಂದಾಯಿತ್ ಅದ್‌ನ ಎದ್‌ಪೊಟ್ಟಿಂಡಕ ಅದ್ ಪರಿಹಾರ ಆಪ. ಒಕ್ಕಕ್ ಬಾತೇಂಗಿ ಒಕ್ಕಕಾರ ಒಂದಾಂಡು.. ಊರ್‌ಕ್‌ಬಾತೇಂಗಿ ಊರ್‌ಕಾರ ಒಂದಾಂಡು.

ಪೂವಿ : ಅನ್ನನೇ ಜಿಲ್ಲೆ -ರಾಜ್ಯ - ದೇಶಕೂ ಇದೇ ತತ್ತ್ವ ಒತ್ತಬೂವಲ್ಲ ಮಾಚು?

ಮಾಚು : ಖಂಡಿತಾ ಅಕ್ಕು. ಇಕ್ಕ ನಂಗಡ ಸಂಸಾರತ್‌ರ ಉದಾಹರಣೆನೇ ಎಡ್‌ತವನ. ನೀನ್ ಅಚ್ಚಕ್ ಅಗೆ ಎಡ್‌ತಾನಗುಂಡ್ ನಾನ್ ಬೇಲ್ ನಡ್‌ಪಕ್ ಸಾಧ್ಯ

ಅಪ. ಇಲ್ಲೇಂಗಿ ಆಪಿಂಜತಾ?

ಪೂವಿ : ಎನ್ನ ಮಾಚು? ಬಾರಿ ಪೂಸಿ ಪೊಯ್ಯುವನ್ನೆ ಕಾಂಬ! ನಾಕೆಲ್ಲ ಗೊತ್ತುಂಡ್ ನೀಡ ಕೆಣಿ... ಬೇಲ್ ಪಣಿ ಇಪ್ಪ... ಕಾಫಿ ತೋಟತ್ ಪಣಿ ಇಪ್ಪಕ ನೀನ್ ಪೊಣ್ಣನ ಹೊಗಳಿತ್ ಅಟ್ಟ ಪತ್ತ್ ಚಿಡುವದ್ ನಾಕ್ ಗೊತ್ತಿಲ್ಲೇಂದ್ ಗೇನ ಮಾಡಿತುಳ್ಳಿಯಾ?

ಮಾಚು : ಪಿಂಞಂತೆ ಮಾಡಡ್ ಪೂವಿ... ಉಳ್ಳ ಒಬ್ಬಳೇ ಪೊಣ್ಣ.. ಅವಡ ನಿಷ್ಕೂರ ಕೆಟ್ಟಿಯಂಡಕ ನಾಡ ಪಾಡ್ ಎನ್ನಾಂಡು?

ಪೂವಿ : ಓಹೋ... ಇಂಞಿ ದಂಡ್ ಇಂಜಿತುಂಡೇಂಗೂ ಆಪಿಂಜತೆನ್ನೋ ನೀಕ್?

ಮಾಚು : ಅಯ್ಯೋ ಬಾ... ಮಂಡೆಲ್ ಎಳೆದಿತುಂಡೆಂಗೆನ್ನೆ?... ನಾನ್ ತಮಾಷಿಕ್ ಎಣ್ಣೆ ಪುಣ್ಯ ತಾಯಿ... ಅನ್ನನೆ ದುರ್ಗುಟ್ಟಿಯಂಡ್ ನೋಟತೆ ನನ್ನ! (ತೆಳಿ)

ಪೂವಿ : ಅದ್ ನಾಕೂ ಗೊತ್ತುಂಡ್ ಮಾಚು. ಒಂದಾನ ಚಾಕುವಕೇ ನೀಕ್ ಅಡಿ - ಆಕಾಶ ಒಂದ್ ಮಾಡಂಡಿಯಾಪ. ಅಂತಲ್ಲಿ ನೀಕ್ ಅದೆಲ್ಲ ಆಪಕುಳ್ಳದಲ್ಲಾಂಡ್ ನಾಕೂ ಗೊತ್ತುಂಡ್ (ತೆಳಿ)

ಮಾಚು : ಸರಿ ಪೂವಮ್ಮಕ್ಕ. ನೆಕ್ಸ್ತ್ ಪೋಗ್ರಾಂ ಎಂತ?

ಪೂವಿ : ನೆಕ್ಸ್ತ್ ಪೋಗ್ರಾಂ ಎಂತೆಂದೆಣ್ಣಕ, ನಾನ್ ಬಿಸಿ ಬಿಸಿ ಕೂಳ್ ಮಾಡಿರುವಿ. ಅಲ್ಲಿಂಜ ಕೈಕೂ - ಬಾಯಿಕೂ ಪೊಯ್ತಕಳಿ!

ಮಾಚು : ಅಚ್ಚಕ್ ನೇರ ನಾಡ ಪಾಡ್?

ಪೂವಿ : ಪಾಡ್ ಅಲ್ಲ ಮಾಚು ಪಾಟ್! ಅಕ್ಕಲೆ ಪಾಡಿಯಲ್ಲ ಅದ್ (ತೆಳಿ)

ಮಾಚು : ಕುಂದ್ ಕರೆಲ್ ನೋಟ್| ಒಕ್ಕಿ ಬಪ್ಪ ಕೊಲ್ಲಿರ ಚಾಯಿ|
ಬೇಲ್ ಬರಿಲ್ ನೋಟ್| ದುಂಬಿ ಮರಿವ ತೋಡ್ ರ ಚಾಯಿ|
ಕಾವೇರಮ್ಮ ಒಕ್ಕುವ ಚಾಯಿ| ಕಂಡ ನಾನ್ ಸ್ವರ್ಗತ ಚಾಯಿ|
ಎಂತ ಚಾಯಿದ್| ಎಂತೋರ್ ಚಾಯಿ- ನಾಡ ಕೊಡಗ್ ನಾಡ್ ರ ಚಾಯಿ|

ಮಾಚುರ ರಾಮಾಯಣ!

- ಮಾಚು : ಪೂವಿ, ನಾಕ್ ನಿನ್ನಾಂದ್ ಒರ್ ಸ್ವಪ್ನ ಬುದ್ಧಾನ ನೀಕ್ ಎಣ್ಣನಾ?
- ಪೂವಿ : ಇಲ್ಲೆಲ್ಲಾ? ಎಣ್ಣ ಕೇಕನ....
- ಮಾಚು : ಒಲೆಲ್ ಪಾಲ್ ಗೀಲ್ ಬೆಚ್ಚಿತುಳ್ಳಿಯಾ?
- ಪೂವಿ : ಇಲ್ಲೆ ಮಾಚು, ಪಾಲ್ ಕಾಚಿತ್ ಆಯಿತ್, ಬೈಟೆಕುಳ್ಳ ಅಡಿಗಿಯೂ ರೆಡಿ ಆಯಿತ್. ಗ್ಯಾಸ್ ಒಲೆನೋ ಆಫ್ ಮಾಡಿತಾಯಿತ್!
- ಮಾಚು : ಅರೆ ನಾನಿಕ್ಕ ಕೇಟನಾ ನಿನ್ನ? ಗ್ಯಾಸ್ ಆಫ್ ಮಾಡಿತುಳ್ಳಿಯಾಂದ್!
- ಪೂವಿ : ನೀನ್ ಕೇಪಿಯಾಂದ್ ನಾಕ್ ಗೊತ್ತುಂಡ್. ಅಂಗಾಯಿತೇ ಫಾಸ್ಡ್ ಕೇ ಎಣ್ಣೆಟ.
- ಮಾಚು : ಈ ಕಾಲತ್ ತಕ್ಕ ಪರಿವದೇ ಕಷ್ಟಪ್ಪ. ಅದತೂ ಇಕ್ಕಿಕ್ಕ ಈ ಪೊಂಗ ಪೆರ್ತ್ ಫಾಸ್ಡ್ ಕೇಪಕ್ ಮಿಂಞಾಲೇ ಉತ್ತರ ಎಣ್ಣೆರುವ.
- ಪೂವಿ : ಪೊಂಗ ಫಾಸ್ಡ್ ಅಲ್ಲ ಮಾಚೂ, ನೀಡ ಕೊಶ್ಚನ್ ಇಂತದೇಂದ್ ನಾಕ್ ಮಿಂಞಾಲೇ ಗೊತ್ತಿಂಜತ್....
- ಮಾಚು : ಅದೆನ್ನೆ ಪೂವಿ ಅಚ್ಚಕೋರ್ ಪರ್ಫೆಕ್ಟ್ ಆಯಿತ್ ಗೆಸ್ ಮಾಡುವಕಾಪ?
- ಪೂವಿ : ನೀಡ ಕೂಡೆ ಇಂದ್ ನಿನ್ನಾಂದೆಂಜ ಉಳ್ಳದೊಂದೂ ಅಲ್ಲ ನಾನ್ ಗೊತ್ತಾಚಾ? ನೀನ್ ಎಲ್ಲಿಕ್ ಪೋಪಿಯ, ಎಂತ ಮಾಡುವಿಯ, ಎಂತೆಂತೆಲ್ಲ ಚಿಲ್ಲರೆ ಕೊಶ್ಚನ್ ಕೇಪಿಯಾ ಎಲ್ಲಾ ಮಿಂಞಾಲೇ ಗೊತ್ತಾಯಿರುವ ನಾಕ್, ಇಕ್ಕಿಕ್ಕ! (ತೆಳಿ)
- ಮಾಚು : ಪರೋಲೆ, ನೀನ್ ನಾಡ ಭವಿಷ್ಯ ಎಲ್ಲ ನೀಡ ಕೈಲೇ ಉಂಡ್ ಅಂದಕ! (ತೆಳಿ) ಅದ್ಗರಿ ಚಿಲ್ಲರೆ ಕೊಶ್ಚನ್ ಎಣ್ಣೆಯಲ್ಲ ಅದೆಂತೇಂದ್ ಮಾತ್ರ ಗೊತ್ತಾಯಿಲೆ!
- ಪೂವಿ : ಚಿಲ್ಲರೆ ಕೊಶ್ಚನ್ ಮಾತ್ರ ಅಲ್ಲ ಅದ್ ಸಿಲ್ಲಿ ಕೊಶ್ಚನ್ ಅಂದ್ ಬೋಂಡಿಕೆಯೂ ಅದ್ನ ಕಾಕೊಲು...
- ಮಾಚು : ಓಹೊಹೋ.... ಸಬ್ಜೆಕ್ಟ್ನ ಈ ಪೊಣ್ಣಾಳ್ ಪೆರ್ತ್ ಡೀಪ್ ಆಯಿತ್ ಸ್ವಡಿ ಮಾಡಿತ್ ಕಾಂಬ!
- ಪೂವಿ : ಎಂತ ಎಣ್ಣೆಯ?
- ಮಾಚು : ಹ್ಲೆ ಹ್ಲೆ.... ಒಂದೂ ಇಲ್ಲೆ. ಬೈದಿ ಬೈ... ಭಾರತ್ ಮಾತಕೀ ಜೈ.... ನಾಳೆ ಮತ್ಯಂದ್ ಆಗಸ್ತ್ ಪದ್ನಂಜನೇ ತಾರೀಕೂ ಬಂದ್ರಾವಾಂದ್!
- ಪೂವಿ : ಸಬ್ಜೆಕ್ಟ್ನ ಈ ಪೊಣ್ಣಾಳ್ ಪೆರ್ತ್ ಡೀಪ್ ಆಯಿತ್ ಸ್ವಡಿ ಮಾಡಿತೊಲೊ!

ಮಂಗಲಾನ ಸುರೂಲ್ ವಡಿಯಂಗಕ್ ಪೊಣ್ಣಾರ ನಳ ಬುದ್ದಂಡೇ ಇಕ್ಕೊಂಡು. ತುಪ್ಪಾನಾಂಗ್ ತೂರ್ನಾಂಗ್ ಪೂವಿ, ಪೂವಿ, ಪೂವೀಂದ್ ಮುನ್ನೂಯಿಟೆಟ್ತ್ ಕುರಿ ಕಾಕಿಯಂಡ್ ಬಯ್ಯಕೋಡೇ ತಿರಿಯಂಡಿಪ್ಪಿಂಜತ್. ವಯಸ್ಸಾಯಂಡ್ ಬಂದನ್ನಕೆ... (ಮೊರೆಸ್ವರ) ಪೊಣ್ಣಾಳ್ ಆಯಿರುವ ಆಪ್ಪರಾಲ ಬೋರೀ ಪೊಣ್ಣಾಳ್!

ಮಾಚು : ಅಯ್ಯೋಯ್ಯೋ! ಎಂತ ಪೂವಿ ಇದ್ ಚೆರಿಯ ಮಕ್ಕಡನ್ನಕೆ! ನಾನೆಂತ ಎಣ್ಣೆ ಇಕ್ಕ ನೀಕ್? ಪೊಣ್ಣಾಳ್ಂದ್ ಎಣ್ಣೆಟಕ ಎಂತಾಯಿರ್ತ್ ಇಕ್ಕ? ನೀನೆನ್ನ ಆಣಾಳಾ?

ಪೂವಿ : ಪೋ ಮಾಚು ನೀನ್! ಎಣ್ಣೆವಾನ ಎಲ್ಲ ಎಣ್ಣೆತ್, ಗಾಯತ್‌ರ ಮೀದ ಬೋಣ್ಣೆ ನೆಯಿ ತೇಕತೆ... ನಾಕೆಲ್ಲ ಗೊತ್ತುಂಡ್....

ಮಾಚು : ಕಷ್ಟಪ್ಪ ಈ ಪೊಣ್ಣಾಳಡ ಸಾವಾಸ. ಎಕ್ಕ ತೆಳಿ ಬಪ್ಪ, ಎಕ್ಕ ಮೊರೆ ಬಪ್ಪ.. ಎಕ್ಕ ಕುಶಿಲಿಪ್ಪ, ಎಕ್ಕ ಜೊಡಿ ಬಪ್ಪ? ಒಂದೂ ಗೊತ್ತಾಪುಲೆ ನಾಕ್!

ಪೂವಿ : ಪಿಂಞಂತಾಂಗ್ ನೀನ್ ನನ್ನ 'ಬೋರೆ ದಾರೋ' ಎಣ್ಣೆವನ್ನಕೆ ಪೊಣ್ಣಾಳ್ಂದ್ ಎಣ್ಣೆವೋ? ನಾನೆನ್ನ ಪೊರ್ಮೆತವಳಾ?

ಮಾಚು : ಎಲ್ಲಿ ಇಪ್ಪರ ತಿರ್... ಅರೆ ಮೂಡಲ್ ಮಸಿಯೂ ಇಲ್ಲೆ. ಪಿಂಞಂತಾಂಗ್ ಇನ್ನನೆ ಆಚಿ? ನಾಕೊಂದೂ ಅರ್ಥ ಆಯಂಡಿಲ್ಲೆ!

ಪೂವಿ : ಎಂತ ಮೂಡಲ್ ಮಸಿಯಾ? ಮಸಿ ಇಂಜಕ?

ಮಾಚು : ಅಯ್ಯೋ ಪೆದ್ದಿ... ಅಚ್ಚಕೂ ಗೊತ್ತಾಪುಲಿಯಾ? ಪೊಣ್ಣಾಳಡ ಮೂಡಲ್ ಮಸಿ ಇಂಜಕ ಅಂದ್ ಅವು ವಡಿಯಂಗಡ ಕೂಡ ಜಗಳಾಡಿತೇ ಆಡುವೊಲೊ! (ತೆಳ)

ಪೂವಿ : (ತೆಳ) ನೀಡ ಮಂಡೆರ ಓಡ್! ನಾನೆನ್ನ ಜಗಳಾಡ್‌ನನಾ ಇಕ್ಕ ನೀಡ ಕೂಡೆ?

ಮಾಚು : ಅರೆ, ನಾನೆಲ್ಲಿ ಅನ್ನನೆ ಎಣ್ಣೆನ? ತಮಾಚಿ ನೋಟಿವಡ!

ಪೂವಿ : ಇಕ್ಕ ನೀನೇ ಎಣ್ಣೆಯಲ್ಲ ಮಾಚು? ಪೊಣ್ಣಾಳಡ ಮೂಡಲ್ ಮಸಿ ಇಂಜಕ ಅನ್ನತವು ವಡಿಯಂಗಡ ಕೂಡೆ ಜಗಳಾಡುವಾಂದ್?

ಮಾಚು : ಇಕ್ಕ ನೀನೇ ಎಣ್ಣೆಯಲ್ಲ ಪೂವಿ? 'ಪೊಣ್ಣಾಳ್' ಎಣ್ಣೆಕ ಪೊರ್ಮೆತವ ಆಯಿಪೋಪ. ನೀನ್ ಪೊಣ್ಣಾಳ್ ಅಲ್ಲಲ್ಲ? ನೀನ್ ಒಳ್‌ತವಳೇ ಅಕ್ಕುವಲ್ಲ?

ಪೂವಿ : ಮಾಚೂ, ಕೋತುವ ಕೈಕಣೆ, ಅಳ್‌ಕುವ ಚಟ್ಟುವ ದಂಡೂ ನೀಡ ಕೂಡೇ ಉಂಡ್. ಇಕ್ಕ ಎಣ್ಣಾನ ಇಂಞೋರ್ ಗಳಿಕೆಕ್ ಮೇಜಿರುವಿಯ. ಕಷ್ಟ ನೀಡ ಸಾವಾಸ!

ಪೆಚನು ಪೂಮ್ಯಾಲೆ

- ಮಾಚು : ಎನ್ನೊ ಮಾಡಂಗ ಪೂವಿ, ಉಪ್ಪು, ಪುಳಿ, ಖಾರ ತಿಂಬ ನಾವು, ಆಂಗ್ ಮೂಳೆಯೂ ಇಲ್ಲೆ. ಎಂತೆಂತಾನೋ ಪರಂದ್ರವ. ಪೋಡ್ ಬುಡ್ ನಂಗ ನಂಗ ಒಂದೇ ಅಲ್ಲ?
- ಪೂವಿ : ಕಾರ್ಯ ಇಪ್ಪಕ, ನಂಗಡ ಮಾಚು ಉಂಡಲ್ಲ? ಆಹಾ ತಕ್ಕಾಲ್ ನಿಸೂರ!.... ಕಾರ್ಯ ಇಲ್ಲತಿಪ್ಪಕ ಅದೇದ್ ಚೊಡಿ? ದೂರ್ವಾಸ ಮುನೀಂದೊಬ್ಬೊ ಇಂಜತೊಲೊ ಅನ್ನನೆ! ಮೂಕ್ ಮೇಲೆ ಚೊಡಿ!
- ಮಾಚು : ಅಲ್ಲ ಪೂವಿ, ನಾಕ್ ಮೊನಿಯಾಂದೊರ್ ವಿಷ್ಯ ಅಳತಂಡಿಪ್ಪಕ ಗೇನ ಬಾತಾಚಾ.. ಒಬ್ಬನೇ ಆಳತೆಂಡ್ ತೆಳಿಯೂ ಬಾತ್! (ತೆಳಿ)
- ಪೂವಿ : ಎಣ್ಣೆಪ್ಪ, ಕೇಕನ, ತೆಳಿ ಮುಂಡತೇಂಗಿ ಬಪ್ಪುಲೆಲ್ಲ?
- ಮಾಚು : ಒಂದೂ ಇಲ್ಲೆ. ನೀನ್ ಮನೆಲಿಪ್ಪಕ ಪರ ಪರ ಪರಾಂದ್, ಪರಗುಟ್ಟಿ ಯಂಡಿಪ್ಪಿಯಲ್ಲ? ಅದೊನ್ ಒನ್ನಾಂದ್ ಟೇಪ್ ರೆಕಾರ್ಡ್‌ಲಾರೆಕಾರ್ಡ್ ಮಾಡಿತ್‌ಚೆಕ್ಕೊಂಡೊಂದ್! (ತೆಳಿ)
- ಪೂವಿ : (ತೆಳಿ) ಎಂತಾಂಗೋ?
- ಮಾಚು : ನೀನ್ ತಾಮನೆಕ್ ಪೋಯ ನೋಟ್, ನೀನ್ ಪೋನಂದೇ ಇಲ್ಲಿ ಮಳೆ ಜೋರಾಚಾ? ಪಾಳಾನದ್ ಕರೆಂಟ್ ಇಂಜಿತಿಕ್ಕಕ ಟಿ.ವಿ. ನೋಟ್ಯಂಡೇಂಗಿ ಕಾಲ ಕೈಕೊಲಿಂಜತ್. ಅದೂ ಇಲ್ಲೆ. ಜೋರೋಂದ್ ಒರೇ ಸಮ ಮಳೆ. ಪೂರ್ಮ್ ಕಾಲ್ ಇಡುವನ್ನಕೆ ಉಂಡಾ.... ಮನೆರೊಳಕ್ ಕೂಡುವಕ ಎನ್ನನೆ ಆಚೀಂದ್ ಗೇನ ಮಾಡ್? 'ಗುಂಯ್ಯೊಂದ್" ಎಣ್ಣುವ ಮನೆ. ಒರ್ ಸದ್ ಸುದ್ದಿ ಇಲ್ಲೆ. ಇದೆನ್ನೊ ಭೂತ ಬಂಗ್ಲೆಕ್ ಬಂದ್‌ಟನಾಂದ್ ಆಯಿರ್‌ತ್ ನಾಕ್.
- ಪೂವಿ : (ತೆಳಿ) ಅನ್ನನೆ ಆಂಡು ನೀಕ್! ಇಪ್ಪಕ ಕಣ್ಣುರಿ... ಇಲ್ಲತಿಪ್ಪಕ ಕೆಲ ಉರೀಂದ್ ಎಣ್ಣುವಲ್ಲ. ಆ ತಕ್ಕಾ ಮುಂಡತೇಂಗಲ್ಲ ಮಾಚು!.... ನೀಕ್ ಎಕ್ಕೋ ಒಮ್ಮೆ ಇನ್ನತ ಅನುಭವ ಆಪೊ. ಅಕ್ಕ ನಾನೆನ್ನನೆ ಇರೊಂಡು? ಆ ಗೇನ ನೀಕುಂಡಾ?
- ಮಾಚು : ಗೇನ ಇಪ್ಪಾಚಾ... ಗೇನ ಇಲ್ಲತೆ ಒಂದೂ ಇಲ್ಲೆ. ಆಚೀಂಗಿ ಪೊಣ್ಣಾಳಕ್ ಅದ್ ಅಭ್ಯಾಸ ಆಯಿತಿಪ್ಪ. ಆಣಾಳ ಅನ್ನನೆ ಅಲ್ಲ!
- ಪೂವಿ : ಅಭ್ಯಾಸ ಆಪಲ್ಲ ಮಾಚೊ, ಅಭ್ಯಾಸ ಮಾಡ್ಯೊವೊ. ಸಹಿಸಿಯವೊ... ಅದ್ ಸರಿ. ಎಂತಾಂಗ್ ನಾಡ ತಕ್ಕೊನ ರೆಕಾರ್ಡ್ ಮಾಡನಾಂದ್ ತೋಂದಿಯದೋ ನೀಕ್? (ತೆಳಿ)
- ಮಾಚು : (ತೆಳಿ) ಎಂತೇಂದೆಣ್ಣೆಡ್ ಪೂವಿ? ಎಣ್ಣೆಟಕ ನೀಡ ಮಂಡಲ್ ಕೊಂಬು ಬಂದ್‌ಟಕಲೊ?

- ಪೂವಿ : ನೀನ್ ಎಣ್ಣೆ ಮಾಚು. ಮುಂಡತೇಂಗಿ ಪಾದಿ ಎಣ್ಣೆತ್ ಪಾದಿನ ಒಳ್‌ಪ್‌ಚಿಡತೆ!
 ಮಾಚು : ಥತ್! ಪರ್‌ಂದಿತ್ ಕಷ್ಟಾಯಿಪೋಪ ಕಾಂಬಲ್ಲ ಇಕ್ಕ? ಊಟಕ್ ಎಪ್ಪೆ ಆಯಿಟಕ?
- ಪೂವಿ : ಎಂತ ಕಷ್ಟಪಕುಳ್ಳ? ನಾನೆನ್ನ್ ನರಿಯಾ ನೀಕ್? ಸ್ವೆಲ್ ಕಳಿಕ್ಕತೆ ಮಾಚು!
 ಮಾಚು : ಸತ್ಯ ಎಣ್ಣೆಡಾ? ಮನೆರ ಪಕ್ಕ ನೀರಾರ ಅಬ್ಬಿ ಇಂಜಕ ಅಂಡ ಸದ್ ಇಂಜಿಲೆಂಗಿ ಎಂತದೋ ಕಳಂದಂಡನ್ನಕೆ ಆಪಲ್ಲ ಅನ್ನನೆ ಆಯಿರ್‌ತ್ ನಾಕಂದ್.
- ಪೂವಿ : ಅರೆ, ಆಂಗೂ ಈಂಗೂ ಎನ್ನತ ಸಮ್ಮಂದ ಉಳ್ಳೊ ಮಾಚು?
 ಮಾಚು : ಸಮ್ಮಂದ ಉಳ್ಳಾಂಗೇ ಎಣ್ಣೆಂಡುಳ್ಳ. ಮಾತಾಯಿ ಚೊಡಿ ಮಾತ್ರ ಮಾಡ್ಯವತೆ.
 ಪೂವಿ : ನಾನೆನ್ನಂಗ್ ಚೊಡಿ ಮಾಡ್ಯವಡ್? ಉಳ್ಳದ್ ಉಳ್ಳನ್ನಕೆ ಎಣ್ಣಕ? ಇಲ್ಲತಾನ ಎಣ್ಣಕ ಮಾತ್ರ ದಾಕ್ ಚೊಡಿ ಬಕ್ಕತ?
- ಮಾಚು : ಇದ್ ಇಲ್ಲತದಲ್ಲ ಪೂವಿ. ನಾಕಾನ ಅನುಭವ. ಬೇಲ್‌ಂಜ ಬಂದನ್ನಕೆ ಮಾಮೂಲಿ ಅಭ್ಯಾಸ ಪೋಲೆ ನಿನ್ನ ಕಾಕ್‌ನ. ಪೂವೀಂದ್....
- ಪೂವಿ : (ತೆಳಿ) ಅಲ್ಲೇಂಗಿ ನಿನ್ನ ಪೆದ್ದಾಂದ್ ಎಣ್ಣೆಂಡುವೊ ಬೋಂಡಾ? ಇಲ್ಲತ ಪೋಣ್ಣಾನ ಕಾಕ್‌ನಕ ಅವ ಎಲ್ಲಿಂಜ ಬಪ್ಪ? ತಾಮನೆಕ್ ಪೋನವ?
 ಮಾಚು : ಅದೇ ಮಜಾ ಉಳ್ಳ ವಿಷ್ಯ. ಈ ಮನೆಕಾರ ಉಂಬಕಳ್‌ಪಕ ಅಪ್ಪರತ್‌ರ ಮನೆಕಾರ ಎಕ್ಕೊಲೂ ಮೀನ್ ಚುಡುವಿಂಜತ್‌ಲೊ. ಈ ಮನೆಕಾರ ಅಂಡ ಗಮನ ಕೇಟಿಂಡ್ ಕೆಲ ದುಂಬ ಉಂಬಿಂಜತ್‌ಲೊ. ಎಕ್ಕಲೊ ಒಮ್ಮೆ ಇಂವೊ ಉಂಬಕಳ್‌ಪಕ ಅಂವೊ ಮೀನ್ ಚುಟ್‌ಲೆ. ಇಂವೊ ಅವಂಗ್ ಕಾಕಿತ್ ಎಣ್ಣೆಚೊಲೊ 'ಬೆರಿಯ ಮೀನ್ ಚುಡ್. ನಾನ್ ಉಂಬಕ್ ಅಳ್‌ಪೀಂದ್' ಅನ್ನನೆ ಇದೂ!
- ಪೂವಿ : ರಾಮಾಯಣ ಹರಿಕತೆ ಸುರು ಮಾಡಿತ್, ಬೊಳಿಯಾಕಣೆ ರಾಮಾಯಣಕತೆ ಎಣ್ಣತೆ ಉಪಕತೆಲೇ ಬೊಳಿ ಆಕಿರ್‌ತೊಲೊ ಹರಿಕತೆ ದಾಸ! ಅನ್ನನೆ ಆಚಿ ನೀಡ ಕತೆ!
- ಮಾಚು : ರಾಮಾಯಣತ್‌ರೆಡೆಲ್ ಪಿಟ್ಟಾಯಣಾಂದ್ ಒರ್ ಕತೆಯೇ ಉಂಡ್. ಗೊತ್ತುಂಡ ನೀಕ್?
- ಪೂವಿ : ಅರೆ, ಅದೆಂತ ಮಾಚು? ನೀನ್ ಎಣ್ಣತೇ ಇಲ್ಲೆ. ನಾಕೆನ್ನನೆ ಗೊತ್ತಾಂಡು?
 ಮಾಚು : ಕೇಳ್ ಅಂದಕ, ಹರಿಕತೆರ ಸ್ವೆಲ್‌ಲ್ ಎಣ್ಣೆಡಾ - ಆರ್ಡಿಫನರಿ ಸ್ವೆಲ್‌ಲ್ ಎಣ್ಣೆಡಾ?
- ಪೂವಿ : ಏದ್ ಸ್ವೆಲೂ ಬೋಂಡ ಉಳ್ಳದ್ ಉಳ್ಳನ್ನಕೆ ಎಣ್ಣಕ ಮದಿ.

ಪಳಮೆ ಪೊಮ್ಮಾಲೆ

- ಮಾಚು : ಆಚಿ. ಪಂಡ್ ತ್ರೇತಾಯುಗತ್ ನಡ್ಂದ ರಾಮಾಯಣ ನೀಕ್ ಗೊತ್ತುಂಡಲ್ಲ?
- ಪೂವಿ : ರಾಮಾಯಣ ನಾಕ್ ಎನ್ನನೆ ಗೊತ್ತಾಂಡು? ಅದ್ ನಡ್ಂದಿಯೆ ತ್ರೇತಾಯುಗತ್. ನಾನ್ ಪುಟ್ಟಿಯೆ ಕಲಿಯುಗತ್...
- ಮಾಚು : ಓಹೋ, ಎನ್ ಪೂವಿ, ಕೇಸ್ ಉಳ್ಳಾ ತಿರಿಯಂಡುಂಡ್?
- ಪೂವಿ : ನೀನ್ ಎನ್ನನೆ ಉಲ್ಪಾ ಪರಿಯುವಿಯಾಂದ್ ಕಾಟಿಯೆ ಅಚ್ಚಿಕೆ ನಾನ್. ನೀಡ ಗರಡಿಲ್ ಪಳಗ್ನಾಂಡ ಫಲ! (ತೆಳಿ) ಎಣ್ಣೆ ನೀನ್ ಕತೆ!
- ಮಾಚು : ಎನ್ನಂಗೋ ಇಕ್ಕಿಕ್ಕ ಪೂವಿ ಪೆರ್ತ್ ಶಾರ್ಪ್ ಆಯಂಡುಂಡಪ್ಪ. ಅವಡ ಅದ್ಯಷ್ಟಾಂದೂ ಗೊತ್ತಿಲ್ಲೆ. ನಾಡ ಗ್ರಾಚಾರಾಂದೂ ಗೊತ್ತಾಯಂಡಿಲ್ಲೆ.
- ಪೂವಿ : (ತೆಳಿ) ನಾಡ ಅದ್ಯಷ್ಟೋ ಅಲ್ಲ. ನೀಡ ಗ್ರಾಚಾರೋ ಅಲ್ಲ. ನೀನಿಕ್ಕ ಎಣ್ಣೆ ಕತೆ.
- ಮಾಚು : ಪಿಂಞ 'ರಾಮಾಯಣ' ನಡ್ಂದದ್ ಗೊತ್ತಿಲ್ಲೆಂದ್ ಎಣ್ಣೆಯ?
- ಪೂವಿ : 'ರಾಮಾಯಣ' ಗೊತ್ತಿಲ್ಲತದ್ ನೇರೆ. ಅಕ್ಕ ನಾನಿಂಜಿಲ್ಲೆ? 'ರಾಮಾಯಣ ಕತೆ' ಗೊತ್ತುಂಡ್. ಅದ್ನ ಗೊತ್ತಿಲ್ಲೆಂದ್ ಎಣ್ಣೆನಾ?
- ಮಾಚು : ಉಫ್! ನೀಕ್ ಚೊರೆ ಪೂವಿಯೆಂದ್ ಪೆದ ಇಡೊಂಡಿಂಜತ್! ಬರೀ ಚೊರೆ ನೀಡ!
- ಪೂವಿ : ಚೊರೆ ನಾಡದಲ್ಲ ನೀಡದ್. ಎಣ್ಣೆ ಮಾಚು ನೀನ್ ಕತೆನ.....
- ಮಾಚು : ರಾಮ ಲಂಕೆಕ್ಪೋಪಂಜಿ ರಾವಣನ ಕೊಂದಿತ್ ವಾಪಾಸ್ ಬಾತ್. ಲಂಕೆಕ್ ಸೇತುವೆ ಕೆಟ್ಟುವಕ್, ಯುದ್ಧ ಕಾಂದೆಲ್ಲ ಕೋಡಂಗ ಸುಮಾರ್ಕಷ್ಟ ಪಟ್ಟಿಂಜತಲ್ಲ? ಇಯಂಗಕ್ ಒರ್ ಗದ್ದಾಳ ಊಟ ಮಾಡಿತ್ಡನಾಂದ್ ರಾಮ ಸೀತೆಕ್ ತೋಂದ್ಚಿ.....
- ಪೂವಿ : ಕಷ್ಟಪಟ್ಟಿಯಿಂಗಡ ಮೀದ ದಾಕೇಂಗಿ ಕುಶಿ ಇಪ್ಪದ್ ಉಳ್ಳದೇ.. ಅಲ್ಲಿಂಜ?
- ಮಾಚು : ಎಲ್ಲಾ ಕೋಡಂಗಳ ಬಪ್ಪಕೆಣ್ಣೆಚಿ. ಸುಗ್ರೀವ, ಹನುಮಂತಂಗಲೂ ಇಂಜತ್. ಉಂಬಕ್ ಬಳಂಬ್ಚಿ. ಎಲ್ಲಾ ಬಳಂಬಿತಾಕಣೆ ಉಂಬಕಾಗಾಂದೂ ತಾಕೀತ್ ಮಾಡ್ಚಿ. ಸುರೂಲ್ ಮಾಂಗಿ ಪಾರ ಇಟ್ಟಿತ್. ಆಂಡ ಬಯ್ಯ ಕೂಡೆ ಎಲ್ಲಾ ತೀನಿಯೂ ಎಲಕಂಡಕ್ ಬಂದಿತ್ ಬುದ್ದಂಡಿಂಜತ್. ಒರ್ ಕೋಡಂಗ್ ಅದೆಂತಾಂಗ್ ಅನ್ನನೆ ತೋಂದ್ಚೋ? ಮಾಂಗಿರ ಆಂಡಿನ ಎಡ್ತಿತ್ ಬೆರತ್ರ ನಡುಲ್ ಪುಡ್ಚಂಡ್ ಅಮುಕ್ಚಿ. ಆಂಡಿ ಕೊಡಿಕ್ ಪಾರ್ಚಿ. ಇದ್ನ ನೋಟನ ಬಾಕಿ ಕೋಡಂಗಲೂ ಪುರ್ಡ್ ಬಾತ್. ಎಲ್ಲಾ ಕೋಡಂಗಲೂ ಮಾಂಗಿ ಆಂಡಿನ ಕೊಡಿಕ್ ಪಾರ್ಚಿಡವಕ್ ಕೂಡ್ಚಿ.....

ಪೂವಿ : ಕೋಡ ಬುದ್ಧೀಂದ್ ಮುಂಡತೇಂಗೇಣ್ಣುವದಾ? (ತೆಳ)

ಮಾಚು : ಅದಲ್ಲ ತಮಾಷಿ. ಅಂಡಿ ಮಾತ್ರ ಪಾರುವದಾ? ಆಂಗ್ಂಜ ಎತ್ತರ ನಾನ್ ಪಾರುವೀಂದ್ ಒರ್ ಕೋಡ ಉಂಬಕಳ್ತಲ್ಲಿಂಜೇ ಕೊಡಿಕ್ ಪಾರ್ಚಿ. ನೀಕ್ಂಜ ಎತ್ತರ ನಾನೂ ಪಾರುವೀಂದ್ ಇಂಇಸೋರ್ ಕೋಡ ಪಾರ್ಚಿ..... (ತೆಳ)

ಪೂವಿ : ಉಂಬಕಳ್ತಲ್ಲಿ ಎಲ್ಕಂಡಕೇ ಬುದ್ಧಿತಿಕ್ಕು! (ತೆಳ)

ಮಾಚು : ಬೂವತಿಪ್ಪಾ? ಇಯಂಗಲ್ಲ ಪಾರಿಕಳ್ಚಂಡಿಪ್ಪಕ ಹನುಮಂತಂಗ್ ಚೊಡಿ ಬಾತೊಲೊ. ನಾನ್ ಅನ್ನತಾ ಲಂಕೆಕೇ ಪಾರ್ನಂವೊ ಇದೇದ್ ಬಲ್ಯ ವಿಷ್ಯಾಂದ್ ಎಲ್ಲಾಕೂಂಜಿ ಎತ್ತರಕ್ ಪಾರ್ಚೊಲೊ.... ಉಂಬಕ್ಟ್ಟು ಎಲ್ಕಂಡ ಮನಾರ ಚೆಲ್ಲಾಪಿಲ್ಲಿ ಆಯಿರ್ತೊಲೊ ಒರ್ ಗಳಿಗೇಲ್! ಸೀತೆ, ರಾಮ ಬಂತ್ ನೋಟುವೊಲೊ.... ಉಂಬಕಳ್ತ ಜಾಗಾಂದೇ ಅದ್ ಗೊತ್ತಾಪಿಂಜಿಲೆಲೊ.... "ಪಂಡೇ ಕೋಡಂಗ, ಇಯಂಗಡ ಸಾವಾಸ ಮಾಡಿಟಿಲ್ಲಾಂದ್" ರಾಮ ಮಂಡೆಕ್ ಪೊಜ್ಜಂಡ್ ತೆಳ್ಚಂಡ್ ಪೋಚೊಲೊ! (ತೆಳ)

ಪೂವಿ : ಸೀತೆ 'ರಾಮ ರಾಮಾಂ'ದೆಣ್ಣೆತಿಕ್ಕು! (ತೆಳ)

ಮಾಚು : ಅನ್ನನೆಲ್ಲ ಕತೆ, ಎಂತೆಂತೋ ಪರ್ಂದಂಡ್ ಎಲ್ಲಿಕೋ ಬಂತೆತ್ತನ ನಂಗಡ ಕತೆಯೂ ಓರ್ ರಾಮಾಯಣೇ.

ಪೂವಿ : ಅದಿರಡ್, ಇಕ್ಕ ಎಣ್ಣ್, ನಾಡ ತಕ್ಕನ ಎಂತಾಂಗಾಯಿತ್ ರೆಕಾರ್ಡ್ ಮಾಡೊಂಡಿಂಜತ್ಂದ್ ಗೇನ ಮಾಡಿಯಾ?

ಮಾಚು : ನೀಡ ಪಿರಿ ಪರಿ ಇಂಜಿಲೆಂಗಿ ಎಂತದೋ ಕಮ್ಮಿ ಉಳ್ಳನ್ನಕೆ ಕಾಂಬ ಪೂವಿ. ಆಂಗಾಯಿತ್ ನೀಡ ಪಿರಿ ಪಿರಿನ ರೆಕಾರ್ಡ್ ಮಾಡಿತ್ ಬೆಚ್ಚಂಡಕ ನೀನ್ ಮನೆಲ್ ಇಲ್ಲತಿಪ್ಪಕ ಅದಾನ ಇಟ್ಟಂಡ್ ಆರಾಮಾಲ್ ಇಕ್ಕೊಲು "ನೀನ್ಯಾಕೋ ನಿನ್ನ ಹಂಗ್ಯಾಕೋ.... ನಿನ್ನ ಪಿರಿ ಪಿರಿಯೊಂದೇ ಇದ್ದರೆ ಸಾಕೋ"ಂದ್!

ಪೂವಿ : ನೀಕ್ ಎಲ್ಲ ತಮಾಷಿಯೇ ಮಾಚು. ಉಳ್ಳಾನ ಉಳ್ಳನ್ನಕೆ ಪರ್ಂದಕ ನೀಕೆಲ್ಲ ಪಿರಿ ಪಿರೀಂದ್ ಆಯಿ ಪೋಪ. ನಾನ್ ಅಚ್ಚಕ್ ಪರಿಯತಿಂಜಕ ಈ ಮನೆಲ್ ಎಂತೆಂತೆಲ್ಲ ಆಪಿಂಜತೋ... ಆರಾಮಾಲ್ ಒರ್ ದಿನ ರೆಕಾರ್ಡ್ ಮಾಡಿತ್ ಬೆಚ್ಚತ. ನಾಕೆನ್ನಾಂಡು?

ಮಾಚು : ಅನ್ನನೆ ಅಲ್ಲ ಪೂವಿ. ನಂಗ ಬೆರ್ಪತ್ ಇಪ್ಪಕ ಎಡ್ತ ಪೋಟೋ ಎಚ್ಚಕೋ ಕಾಲಾನ ಪಿಂಇ ನೋಟುವಕ ಎನ್ನತ ಕುಶಿ ಆಪ ನೋಟ್! ಅನ್ನನೆ ಇದೂ

ಎಕ್ಕೇಂಗಿ ಇಟ್ಟಂಡ್ ಕೇಪಕ ಮಜಾ ಇಪ್ಪ.

ಪೂವಿ : ಬೋರೆ ಕೆಯಿಮೆ ಇಲ್ಲೇಂಗಿ ಇನ್ನತದೆಲ್ಲ ಚಾಯಿಪ್ಪ ಮಾಚು. ಕೈಂಜ ಕುರಿ ಅಟ್ಟಿ ಕ್ಲೀನ್ ಮಾಡ್ಯಂಡಿಪ್ಪಕ, ನಂಗ ಸ್ಕೂಲಾಕ್ ಪೋಯಂಡಿಪ್ಪಕ ಎಡ್ತ ಓರ್ ಪೋಟೋ ಕಾಟ್ಚಿ. ಬೋಜಿ ಮಾಂವೊ ಎಡ್ತದ್.... ನೀನ್ ನಾಡತ್ತಟಿ ತಿರಿಯಂಡ್ ಮೂಡ್ನ ತಿರ್ಕಿಯಂಡ್ ಹಂಗ್ ಚಿಟ್ಟಂಡುಳ್ಳಿಯ... ನಾನ್ ಕೊಡಿಕ್ ನೋಟಿಯಂಡುಳ್ಳ.

ಮಾಚು : ಮಕ್ಕಳಿನ ಗೇನ ಮಾಡುವಕಲೇ ತಳಿ ಬಪ್ಪ ಪೂವಿ. ಒರ್ ದಿವಸ ನೀನ್ ಕ್ಲಾಸ್‌ಲೇ ವರೀತಿಂಜದ್ ಗೇನಾಪ ನೀಕ್? (ತಳಿ)

ಪೂವಿ : ಚೆನ್ನ ಚೆನ್ನ ಗೇನಾಪ. ದಾರೋ ಮಕ್ಕ ಮೆಲ್ಲೆ ಬಂತ್ ನಾಡ ಕೆಮಿಕ್ ದಂಡ್ ತುಳಿ ನೀರ್ ಬುಡಣೆ ಒಮ್ಮಕೇ ಎಚ್ಚರಾಯಿತ್ ನೋಟುವಿ. ಬೋಜಮ್ಮ ಟೀಚರ್ ಕಣ್ಣ ಮರ್ಚಂಡ್, ಕೈಲ್ ತೂರ ಕೋಲ್‌ನೊ ಪುಡ್‌ಚಂಡ್ ಪಕ್ಕ ನಿಂದಿತ್.... ನಾಕ್ ಪೋಡಿ ಆಯಿತ್ ಕಯ್ಯ.... (ತಳಿ)

ಮಾಚು : ಮೊರೆ ನೋಟೊಂಡಿಂಜತ್ ಪೂವಮ್ಮಂಡ!..... ಟೀಚರ್‌ರ ಕೈಂಜ ಕಾಟ್ಟುವಾಂದ್ ಪೋಡಿಲ್ ಅದೆಂತಾ ಮೊರೆ? ಟೀಚರ್‌ಕ್ ತಳಿಯೂ ಬಾತ್! ಸದ್ಯ ಬಚಾವಾಯ! (ತಳಿ)

ಪೂವಿ : ಅಲ್ಲ ಮಾಚು... ಮಕ್ಕ ಆಯಿತ್ ಇಪ್ಪಕ ಎಚ್ಚಕ್ ಒತ್ತೋರ್ಮೆಲ್ ಇಪ್ಪ! ಅಲ್ಲಿಂಜ ಬಲ್‌ಂಜನೆ ಆನನ್ನಕೆ ಆನನ್ನಕೆ ಅದೆಂತಾಂಗ್ ಮನುಷ್ಯಂಗ ಶತ್ರುವಡ ಪೋಲೆ ಕಳಿಪ್ಪೊ?

ಮಾಚು : ನಾಕೂ ಅದೇ ಆಶ್ಚರ್ಯ ಪೂವಿ. ಒರ್ ಮನೆಲ್ ನಾಲಾಳ್ ಮಕ್ಕ ಇಪ್ಪ. ಎಂತೇಂಗಿ ಕಟ್ಟಿತ್ ತಿಂಬಕಲೋ, ಎಂತೇಂಗಿ ಕೇತರೆ ಮಾಡ್ಯಂಡೋ ಅಪ್ಪವ್ವಂಗ್ ಅರಿಯನ್ನಕೆ ಎಲ್ಲಾರೂ ಒಗ್ಗಟ್ಟಲ್, ಒತ್ತೋರ್ಮೆಲ್ ಇಪ್ಪ. ವಯಸ್‌ಕ್ ಬಂದ ಪಿಂಞ ಓರವ್ವಂಡ ಮಕ್ಕಳೇ ಅಲ್ಲ ಎಣ್ಣುವನ್ನಕೆ ಆಯಿಪೋಪಲ್ಲಾಂದ್.!

ಪೂವಿ : ನಾಕಾಪ ಎಂತ ಗೊತ್ತುಂಡಾ? ಅಪ್ಪವ್ವ ಮಕ್ಕಕಾಯಿತ್ ಆಸ್ತಿ ಪಾಸ್ತಿ, ಸೊತ್ತ್ ಪಣಾಂದ್ ಕೂಟಿತ್ ಬೆಚ್ಚಿತಿಪ್ಪ ನೋಟ್, ಅದೇ ಮಕ್ಕಳ ಆಖೀರಿಕ್ ಕಡ್‌ಚ ಬೂವನ್ನಕೆ ಮಾಡಿರುವೊ.

ಮಾಚು : ಆಯಿತಿಕ್ಕು, ಸೋಮುರೈಂಗಡ ಕತೆನೇ ಎಡ್ತ. ನೋಟುವಕ್ ಪೋಚೇಂಗಿ ದಂಡಾಳೇ ಕಣ್ಣ ಮಕ್ಕ. ಮೂಡಿಯಡ ಮಂಗಲತ್‌ನ ಕಷ್ಟತ್ ಅಪ್ಪವ್ವೊ ಕೈಚತ್. ಪೆರಿಯವಂಗ್ ಮಂಗಲಾನದೇ ಉಳ್ಳೊ. ಆ ಮನೆ ಎನ್ನನೆ ಆಯಿರ್‌ತ್ ನೋಟ್.

ಪೂವಿ : ಅಪ್ಪವೊ, ಅಸ್ತಿ ಮಾಡಿತ್ ಬೆಚ್ಚಕ ಪೋರ ಮಾಚು. ಅದ್ನ ಚೆರ್ಪತೇ ಮಕ್ಕಕ್ ಪಾಲ್‌ಟ್ಟಿತೂ ಕೊಡ್ತೊಂಡು. ಅಂದಕ ಅಯಿಂಗಯಿಂಗಲೇ ಕಡ್‌ಚ ಬೂವದೇಂಗಿ ನಿಕ್ಕು.

ಮಾಚು : ಅಸ್ತಿ ಪಾಲ್‌ಟ್ಟಿತ್ ಕೊಡ್ತಕಲೂ ಸಮಾಧಾನ ಇಪ್ಪುಲೆ. ಅವಂಗ್ ನಲ್ಲ ಪಾಲ್‌ನ ಕೊಡ್ತತ್ - ನಾಕ್ ಬೋಂಡತಾನ ತಾತ್‌ಂದ್ ಒಳ್‌ಂಜೊಳ್‌ಕ್ ಪೊಗೆ ಇಂಜಿತೇ ಇಪ್ಪು.

ಪೂವಿ : ನೇರೇಪ್ಪ, ಅಪ್ಪ ಚತ್ತತ್, ಮಾದ ಕೈಪಕ್ ಕೂಡಿ ಜಗಳೇ ಮಕ್ಕಡೊಳ್‌ಲ್. ಅವಂಗ್ ಫಸಲುಳ್ಳ ತೋಟ ಕ್ಕೆಟ್ಟಿತ್ ಅವೊ ಮಾಡ್‌ಂದ್, ಇಂವೊ. 'ಇವಂಗ್ ಜಾಸ್ತಿ ಜಾಗ ಕ್ಕೆಟ್ಟಿತ್. ಇಂವೊ ಮಾಡ್‌ಂದ್ ಅವೊ. ಆಡಿಕೂಡಿ ಅವ್ವಂಡ ಬೇಜಾರತ್‌ನ ಎಣ್ಣುವದೇ ಬೋಂಡ. ಮಾದ ಕೈಂಜ ಪಿಂಞ ಪುನಾದ್ಯ ಓರ್ ಪಂಚಾತಿಕೆ.....

ಮಾಚು : ಎಂತಾಂಗ್ ಪಂಚಾತಿಕೆ ಆಯೆ?

ಪೂವಿ : ಓ, ನೀಕ್ ಗೊತ್ತಿಲ್ಲೆ ಕಾಂಬಲ್ಲ ಅಂದಕ? ನಾಕ್ ಮೊನಿಯಾಂದ್ ಮಹಿಳಾ ಸಮಾಜತ್‌ರ ಮೀಟಿಂಗ್‌ಕ್ ಪೋಪಕ ಚೋಂದು ಎಣ್ಣೆಯೆ.

ಮಾಚು : ಅದೆಂತೋರ್ ಪುದಿಯ ಕತೆ ಪೂವಿ?

ಪೂವಿ : ಅದೇ ಮಾಚು. ಚೆರಿಯಂವೊ ಪುದಿಯ ಮನೆ ಕೆಟ್ಟಿಯಂಡಿತಲ್ಲ? ಅವ್ವ ನಾಡ ಕೂಡೆ ಇಕ್ಕಡ್‌ಂದ್ ಅವೊ. ಇಲ್ಲೆ ಅವ್ವ ನಾಡ ಕೂಡೆ ಇಕ್ಕೊಂಡೊಂದ್ ಪೆರಿಯಂವೊ!

ಮಾಚು : ಅರೆ, ಅದೆಂತಾಂಗ್ ಬಲ್‌ಚಿ ಕಳಿ? ದಂಡಾಳಕೂ ಅವ್ವನ ಬುಟ್ಟಿತ್ ಇಪ್ಪಕ್ ಕಯ್ಯಲೆ ಕಾಂಬ!

ಪೂವಿ : ಅವ್ವಂಡ ಮೀದ ಪ್ರೀತಿಕ್ ಅಲ್ಲ ಮಾಚು. ಒಳ್‌ತ ಕತೆಯೇ ಬೋರೆ ಉಂಡ್!

ಮಾಚು : ಪಿಂಞಂತ ಅಂದಕ?

ಪೂವಿ : ಅಚ್ಚಕೂ ಮಂಡಕ್ ಪೋಯಿಲಿಯ ಮಾಚು. ಅವ್ವ ನಲ್ಲ ಪಣಿಕಾರ್ತಿ. ಒರ್ ಗಳಿಗೆ ಮುಂಡತೆ ಅಳ್‌ಪವ ಅಲ್ಲ. ಚೆರಿಯವಂಡ ಪೊಣ್ಣ್ ಚಾಕ್ರಿಕಾರ್ತಿ, ಪೊಲಾಕ ಪೋಚೇಂಗಿ ಬಪ್ಪೊ ಬೈಟಾಪಕಲೆ. ಬಂದಿತ್ ಕೆಲಕುಳ್ಳಾನ ಮಾಡೊಂಡು. ಆಂಗ್ ಬಲ್ಯ ಮನೆಂಜ ಮಾಯಿನ ಕೂಟಿಯ ಪೋಯಿರನಾಂದ್ ಚೆರಿಯವಂಡ ಪೊಣ್ಣ್‌ರ ಐಡಿಯಾ.

ಮಾಚು : ಉಯೀ.. ರಾಮಾ... ನೀಕ್ ಇದೆಲ್ಲ ಎನ್ನೆ ಗೊತ್ತಾಚಿ?

ಪೂವಿ : ಇಕ್ಕಿಕ್ಕ ಎಲ್ಲಾಡ ಕೆಣಿಯೂ ಗೊತ್ತಾಪಕಾಯಿತ್ ಮಾಚು. ಎಲ್ಲರೂ ತಂಗ

ಪೂವಿ : ಅಂದಿತೂ ಚೆನ್ನಂಗ್ ಪೂರ್ವ ಜನ್ನ ಪುಣ್ಯ ಕೂಡಿ ಬೋಂಡೂಂದ್ ಕಾಂಬ
ಮಾಚು. ಎಲ್ಲಾಕೂ ಅನ್ನತ ಭಾಗ್ಯ ಇಪ್ಪುಲೆಲ್ಲ?... ಅಲ್ಲ ಮಾಚು,
ಅದೆಂತದೋ ಸ್ವಪ್ನ.

ಮಾಚು : ಸ್ವಪ್ನ? ಅದೆಂತದೋರ್ ಕತೆ? ನಾನೆಕ್ಕ ಎಣ್ಣೆ?

ಪೂವಿ : ಇನ್ನನೆ ಆಯಿಟಕ ಪೆರ್ತ್ ಕಷ್ಟ ಉಂಡ್ ಮಾಚು. 'ಪೂವಿ ನಾಕ್ ನಿನ್ನಾಂದ್
ಒರ್ ಸ್ವಪ್ನ ಬುದ್ಧತ್. ನೀಕ್ ಎಣ್ಣನಾ ಅದ್ನಾಂದ್' ಕೇಟಂವೊ ತಕ್ಕನ
ಏಲೇಲೋ ಕೊಂಡ ಬಂದ್‌ಟಿಯ.... ಕುದರೆ ಪೋನದೇ ಬಟ್ಟೇಂದೆಣ್ಣಾಟ!

ಮಾಚು : ಓಹೋ... ಅದಾ! ಇಕ್ಕ ಗೇನಾಚಿ. ನಾನೂ ನೀನೂ ಬಸ್‌ಲ್
ಪೋಯಂಡಿಂಜತ್. ಬಸ್‌ಕ್ ಬ್ರೇಕ್ ಫೇಲಾಚೇಂದ್ ಕಾಂಬ.
ಸ್ವೀಡಾಯಿತ್‌ಪೋಪಕ್ ಕೂಡ್‌ಚಿ. .. ನೀನ್ ಒರೇ ಸಮ ಮಾಚೂ ಮಾಚೂ
ಮಾಚೂಂದ್ ಜೋರಾಯಿತ್ ಕೂತ್‌ಕೊಡ್ಡಕ್ ಸುರು ಮಾಡಿಯ. ಬಸ್‌ಲ್
ಉಳ್ಳವೆಲ್ಲ ನಂಗಡತ್ತಟಿಯೇ ನೋಟುವಕ್ ಕೂಡ್‌ಚಿ. ನಾನ್ ನೀಡ ಬಾಯಿನ
ಪೊತ್ತನ....

ಪೂವಿ : ಅಂತೂ ನೀಕೆಕ್ಕೊಲೂ ನಾಡ ಬಾಯಿ ಪೊತ್ತುವದೇ ಓರ್ ಬಲ್ಯ ಆಸೇಂದ್
ಕಾಂಬ.

ಮಾಚು : ಎಣ್ಣವಾನ ಚೆನ್ನ ಕೇಳ್... ಅಕ್ಕಣೆ ಬಸ್ ಬಲ್ಯೋರ್ ಪೊಳೆರೊಳ್‌ಕ್ ಕೊಡ
ಮರ್‌ಂಜತ್...

ಪೂವಿ : ಅಯ್ಯಯ್ಯೋ... ನಂಗ ಬದ್‌ಕಚಾ? ಚತ್‌ಪೋಚಾ?

ಮಾಚು : (ತಳಿ) ಅಲ್ಲ ಪೋಡಿ ನೋಟವಡ! ಸ್ವಪ್ನತ್ ಚತ್ತಕಲೂ ಅಚ್ಚಕೋರ್ ಪೋಡಿ
ಕಾಂಬಲ್ಲ ನೀಕ್?

ಪೂವಿ : ಚತ್ತ್ ಪೋನಕ ಪರೋಲೆ ಮಾಚು. ಕೈಯ್ಯೋ ಕಾಲೋ ಪೊಟ್ಟಿ
ಪೋಯಿಟಕಲೋ?

ಮಾಚು : (ತಳಿ) ನಾಕ್ ಗೇನಾಪೊ ಎಂತ ಗೊತ್ತುಂಡ? ಅಂದ್ ಬೆಂಗ್ಕೂರ್‌ಂಜ ಬಪ್ಪಕ
ನಾಡ ಪಕ್ಕ ಒರ್ ಆಸಾಮಿ ಗೂಕೆ ಬಲ್‌ಚೆಂಡ್ ವರುವಿಂಜತ್.
ಬೆಂಗಳೂರ್‌ಂಜ ಕುಶಾಲನಗರಕೆತ್ತನೆಯೂ ಅಂವೊ ನಲ್ಲ ನಲ್ಲ ಸ್ವಪ್ನ
ಕಾಂಬಿಂಜತ್‌ಂದ್ ಕಾಬ...

ಪೂವಿ : ಅದೆನ್ನನೆ ಗೊತ್ತ ನೀಕ್? ಅಂವೊ ಸ್ವಪ್ನ ಕಾಂಬಿಂಜದ್?

ಮಾಚು : ಅವಂಡ ಮೂಡ್ ನೋಟುವಕಲೇ ಗೊತ್ತಾಪಿಂಜತ್. ಓರಮ್ಮ ಚೆರ್‌ಂಬನೆ
ತಳಿ. ಇಂಞೋರಮ್ಮ ಪಲ್ ಕಡಿಪ್ಪ, ಇಂಞೋರಮ್ಮ ಬಾಯಿಲ್ ತ್ತು

ಪಳಸೆ ಪ್ರೊಮ್ಯಾಲೆ

- ತ್ತು ತ್ತೂಂದ್ ಸದ್. ನಾಕೋರ್ ನಲ್ಲ ಫಿಲಂ ನೋಟ್‌ನನ್ನೆ ಆಯಿರ್‌ತ್!
- ಪೂವಿ : ನೀನ್ ಮಾತ್ರ ವರುಲಿಯ ಬಸ್‌ಲಾ?
- ಮಾಚು : ನಾನ್ ವರುಲೇಂದ್ ಎಣ್ಣನಾ? ಆಚೇಂಗಿ ಅವಂಡನ್ನೆ ಸೊಯ ಇಲ್ಲತನ್ನೆ ವರುಲೆ. ಕುಶಾಲನಗರ ಕಡ್‌ಂದಿತ್ ಚೆನ್ನಂಗೇ ದೂರ ಬಂದಿಯೆ. ಇರ್‌ಟತ್ ಅದೆಂತ ಬಸ್‌ರ ಎದಿಕ್ಕೆ ಬಾತೋ. ಒಮ್ಮೆಕೆ ಬ್ರೇಕ್ ಇಟ್ಟತ್ ಡ್ರೈವರ್... ಅಕ್ಕಣೆ ಇವಂಡ ಬಾಯಿಂಜ ಒರ್ ಕೂತ್.... ಅಯ್ಯಯ್ಯೋ ಸತ್ತೇಂದ್!
- ಪೂವಿ : ಎಂತಾಚೋ ಅಂತದ್?
- ಮಾಚು : ಆಪ ಎಂತ? ಇವಂಡ ಮಂಡೆ 'ಲಟ್‌ಂದ್' ಎದಿಕ್ಕೆ ಸೀಟ್‌ರ ರಾಡ್‌ಕ್ ಬಡ್‌ಚತ್. ಎಲ್ಲಾರೂ ಒಮ್ಮೆಕೆ ತಿರಿತ್ ನೋಟ್‌ಚಿ. ಡ್ರೈವರ್ ಬಸ್‌ನೊ ನಿಪ್ಪಾಚಿಟ್ಟತ್. ಬಸ್‌ಲ್ ಎಲ್ಲಲೈಟ್‌ನೊ ಕತ್ತ್‌ಚಿಟ್ಟಿತ್ ನೋಟುವಾ... ಇವಂಡ ಕಿರಿ ನಲ್ಲ ಚೋಂದ ತೊಂಡೆ ಪಣ್ಣರನ್ನೆ ಆಯಿತ್! ಮಂಡೆಲ್ ಇಚ್ಚಕ್ ಬಲ್ಯ ಈರುಳ್ಳಿ ಕಂಡೆರನ್ನತ ಉಂಡೆ ಎದ್ದಿತ್ (ತೆಳಿ)
- ಪೂವಿ : ಪಾಪ! (ತೆಳಿ) ಅವಂಡ ಕಷ್ಟ ಅವಂಗ್... ಅದಿರಡ್ ನೀಡ ಸ್ವಪ್ನ ಎಂತಾಚಿ?
- ಮಾಚು : ಎಣ್ಣುವಿ ಕೇಳ್. ಬಸ್ ಪೊಳೆರೊಳ್‌ಕ್ ಕೊಡಮರಂಜಿತಾಕಣೆ ನೀಡ ಪತ್ತೆಯೇ ಇಲ್ಲೆ... ಬಸ್‌ರೊಳ್‌ಲ್ ತಾರಾಮಾರ ತೇಡುವಕ್‌ಸುರು ಮಾಡ್‌ನ. ನೀರ್‌ರ ಒಳ್‌ಲ್ ಒಂದೂ ಸೆರಿ ಕಾಂಬಿಂಜಿಲೆ. ಅಕ್ಕಣೆ ಮಂಡೆಕ್ ಎಂತದೋ ಒಂದ್ ಪಟ್ಟಿತ್.
- ಪೂವಿ : ಅಲ್ಲಿಂಜೆಂತಾಚಿ ಮಾಚು? ನನ್ನ ನೀಕ್ ಕ್‌ಟ್‌ಚಾ?
- ಮಾಚು : ಕ್‌ಟ್‌ಚಿ. ನೀನ್ ಕಟ್ವರ ಕೊಡಿಲ್ ಆರಾಮ್‌ಲ್ ಕಾಲ್ ನೋಟಿತ್ ಬುದ್ದಂಡಿತುಳ್ಳಿಯ. ನಾನ್ ಎಕ್ ಕಟ್ವಂಜ ಅಡಿಕ್ ಬುದ್ದಿತುಳ್ಳನೋ? ಕಟ್ವರ ಅಡಿಲ್ ಅಪ್ಪರ ಇಪ್ಪರ ತೇಡಿ ಕಳ್‌ಚೆಂಡುಳ್ಳ!
- ಪೂವಿ : ಕರ್ಮ! ಕಟ್ವಂಜ ಬುದ್ದಿತೂ ನೀಡ ಸ್ವಪ್ನ ತೇಂದಿತಿಂಜಿಲಿಯಾ? (ತೆಳಿ)
- ಮಾಚು : ತೆಳಿ ತೆಳಿ! ನೀಕೆಕ್ಕೊಲೂ ನಾನ್ ಬೂವಾನ ಕಂಡಿತ್ ತೆಳಿ!
- ಪೂವಿ : ನೀನ್ ಕಳಿಪ್ಪದೂ ಅನ್ನನೇ ಅಲ್ಲ ಮಾಚು! ಏಳ್ ನೇರಾಚಿ.... ಉಂಗನ!

ಗುಣಮನ ಇರಡ್!

- ಪೂವಿ : ನಾಳೆ ಪೊಲಾಕ ಮಂಜರಿ ಉಂಡ್ ಮಾಚು. ಗೇನ ಉಂಡಾ ನೀಕ್?
- ಮಾಚು : ಹ್ಲೂಂ...
- ಪೂವಿ : ನಾಕಂತೂ ಮದಿ ಮದಿ ಆಯಿಪೋಚಿ ಈ ಬೊಳೆಪಣಿ. ಒಮ್ಮ ತೇಂದಿತಿಂಜಕ ಮದಿ ಇಂಜತ್.
- ಮಾಚು : ಹ್ಲೂಂ.....
- ಪೂವಿ : ಈಯಾಂಡ್ ನಂಕ್ ಚೆನ್ನ ನೆಲ್ಲ ಜಾಸ್ತಿ ಆಕೂಂದಾಪಲ್ಲ ಮಾಚು?
- ಮಾಚು : ಹ್ಲೂಂ.....
- ಪೂವಿ : ನೆಲ್ಲ, ಕಾಫಿ ಮಾರಿತಾನದೂ ಪೂರ್ತಿ ದುಡ್ಡ್ ನಾಕೇ ತಪ್ಪೀಂದೆಣ್ಣೆ ತುಳ್ಳಿಯ. ಗೇನ ಉಂಡಲ್ಲ ಮಾಚು?
- ಮಾಚು : ಹ್ಲೂಂ..... ಇಲ್ಲೆ ಇಲ್ಲೆ... ಎಂತ ಎಣ್ಣೆಯೆ ನೀನಿಕ್ಕ?
- ಪೂವಿ : ಎಚ್ಚಕ್ ಹುಶಾರ್ ನೋಟಂವೊ? ಎಣ್ಣಾಂಗೆಲ್ಲ ಕೋಲೆ ಬಸವಂಡನ್ನೆ ಹ್ಲೂಂ... ಹ್ಲೂಂ... ಹ್ಲೂಂದ್ ಎಣ್ಣೆಂಡಿಂಜಂವೊ.... ಇಲ್ಲೆ ಇಲ್ಲೆಂದ್ ಎಣ್ಣೆಟ್ಟೆ?
- ಮಾಚು : ಮನೆಲ್ ಪೊಣ್ಣಾಳ ಎಣ್ಣಾಂಗೆಲ್ಲ ಹ್ಲೂಂ ಹ್ಲೂಂದ್ ಎಣ್ಣೆಂಡಿಂಜಕ ಮನೆ ಮಾರಿಪೋಕು. ಗೊತ್ತಿರಡ್.
- ಪೂವಿ : ಇಕ್ಕ ನಂಗಡ ಮನೆಲ್ ಎಂತ ಆಯಿತ್ ಮಾಚು? ಚಾಯಿಲೇ ಇಲ್ಲಿಯಾ ನಂಗ?
- ಮಾಚು : ಆಂಗ್ ಕಾರಣ ಉಂಡ್ ಪೂವಿ.
- ಪೂವಿ : ಎಂತ ಕಾರಣ ಉಳ್ಳೊ?
- ಮಾಚು : ನಂಗಡ ಮನೆಲ್ ಎಂತಾಯಿತ್ಂದೆಣ್ಣೆಕ ನಾನ್ ನೀಡ ತಕ್ಕಕ್ ಹ್ಲೂಂ ಹ್ಲೂಂದ್ ಎಣ್ಣೆವದೆನ್ನೊ ನೆರೆ. ಆಚೆಂಗಿ....
- ಪೂವಿ : ಎಂತ ಆಚೆಂಗಿ? ಅದ್ಲೂ ಒರ್ ಗುಟ್ತ್ ಎಂತೆಂಗಿ ಉಂಡಾ?
- ಮಾಚು : ನೀಕ್ ಅದೆಲ್ಲ ಎಂತಾಂಗಿಕ್ಕ? ಒಟ್ಟಾರೆ ಚಾಯಿಲುಂಡ್. ಅಚ್ಚಕ್ ಪೋರಾ?
- ಪೂವಿ : ನಂಕ್ಂದಲ್ಲ ಮಾಚು. ನಂಗ ನಂಗಡ ಗುಟ್ತ್ ನ ಬೋರೆಯಿಂಗಳೂ ಎಣ್ಣೆಕ ಅಯಿಂಗಳೂ ಚಾಯಿಲಿಕ್ಕುವಲ್ಲ? ಅದ್ಲೂಂಗ್!
- ಮಾಚು : ಏದ್ ಕೆಣಿ ನೋಟವಡ? ನೀನ್ ಕಂಡನ್ನೆಕೆ ಒಂದೂ ಅಲ್ಲ ಪೂವಿ. ಭಯಂಕರ ಜನ ಮಾತ್ರ ನೀನ್! ಏದೇಂಗಿ ಒರ್ ಬಟ್ಟೆಲ್ ವಡಿಯಂಡ ಬಾಯಿಂಜ ಗುಟ್ತ್ ನ ಪೊರ ಬೂಕಿತೇ ಬೂಕೊಂಡೂಂದ್ ಪೊರಟ್ಟವ....

ಸಕಮೆ ಪೂಮ್ಮಾಲೆ

- ಪೂವಿ : ವಡಿಯಂಡ ಪೊಣ್ಣಾರ ನಡುಲ್ ಗುಟ್ಟ್ ಉಂಡ್ಂದೆಣ್ಣಕ ಆಂಡ ಅರ್ಥ ಎಂತ ಎಣ್ಣೆ ನೋಟನ?
- ಮಾಚು : ಅದ್ಲೆಂತ ಅಚ್ಚಕ್ ಬಲ್ಯ ಅರ್ಥ ಗಿರ್ಥ ಉಳ್ಳೊ?
- ಪೂವಿ : ವಡಿಯ ಬೋರೆ ಮಂಗಲಾಪಕ್ Plan ಇಟ್ಟಿತ್ಂದ್ ಅಚ್ಚಕೇ! (ತೆಳಿ)
- ಮಾಚು : ಓಹೊಹೋ! ಅನ್ನನೆ ಎಣ್ಣಕ ಆಚೆಂಗೂ ವಡಿಯ ತಾಂಡ ಗುಟ್ಟನ ಪೊಣ್ಣ ಪೂವಿರೆದಿಕ್ಕೆ ಬಾಯಿ ಬುಡಡ್ಂದ್! (ತೆಳಿ)
- ಪೂವಿ : ಪೋ, ಮಾಚು ನೀನ್! ಎಣ್ಣವೆಂಗಿ ಎಣ್ಣೆ! ಇಲ್ಲೆಂಗಿ ಮುಂಡತ್ತಿರ್...
ಮಾಚು : ನೀಡ ಕಳ್ಳ ಚೆಡಿ ಒಂದೂ ಬೋಂಡ. ಮೊನಿಯಾಂದ್ ಆಕಾಶವಾಣಿಲ್ ಎಣ್ಣದ್ ಮರ್ಂದ್ ಪೋಚಿ. ಕಾಂಬ?
- ಪೂವಿ : ಎಂತ ಎಣ್ಣೆಯೆ ಆಕಾಶವಾಣಿಲ್? ನಾಕೆನ್ನನೆ ಗೊತ್ತಾಂಡು?
- ಮಾಚು : ಪಾಪ! ಒಂದೂ ಗೊತ್ತೇ ಇಲ್ಲೆ ಪೂವಮ್ಮಕ್ಕಂಗ್! (ತೆಳಿ)
- ಪೂವಿ : ಪ್ಲೀಸ್, ಎಣ್ಣೆ ಮಾಚು. ನೀಕ್ ನಾಳೆ ಬಡುವ ಕಜ್ಜಾಯ ಮಾಡಿತಿಪ್ಪಿ! (ತೆಳಿ)
- ಮಾಚು : ಓ ಲಂಚ ಬೋರೆ ಉಂಡಾ ಅಂದಕ? ಅಂದಕ ಸುರು ಮಾಡಡಾ?
- ಪೂವಿ : ದುಂಬ ಸ್ವೆಲ್ ಕಳಿಪ್ಪದ್ ಆರೋಗ್ಯಕ್ ನಲ್ಲದಲ್ಲ... ಎಣ್ಣವೀಂದೆಣ್ಣ ಪಿಂಞ ಲಟ್ಂದ್ ಸುರು ಮಾಡಿರೊಂಡುವಪ್ಪ!
- ಮಾಚು : ಒಲೆಲ್ ಪಾಲ್ ಬೆಚ್ಚಿತುಳ್ಳಿಯ?
- ಪೂವಿ : ಇಲ್ಲೆಲ್ಲ ಎಂತಾಂಗ್ ಮಾಚು?
- ಮಾಚು : ಒಂದಾಂಗೂ ಇಲ್ಲೆ. ಓರಮ ನೀಕ್ ತಕ್ಕಾರ ಗೂಡಲ್ ಕೂಡಿಟಕ "ಒಲೆಲ್ ಎಂತ ಉಂಡ್? ಮನೆಲ್ ದಾರ್ ಉಂಡ್? ಒಂದೂ ಗೊತ್ತಿಪ್ಪುಲ್" ಆಂಗ್!
- ಪೂವಿ : ಸತಾಯಿಚಿಡತೆ ನೀನ್! ಎಣ್ಣವೆಂಗಿ ಎಣ್ಣೆ!
- ಮಾಚು : ಕೈಂಜ ಕಾಲ ನಂಗ ಆಕಾಶವಾಣಿಕ್ ಪೋಯಿತಿಂಜತಲ್ಲ?
- ಪೂವಿ : ಕೈಂಜ ಕಾಲ? ಕೈಂಜ ತಿಂಗಾಂದೆಣ್ಣೆ! (ತೆಳಿ) ಓರಾಂದ್ ಆನನ್ನಕೆ ಕಳಿಪ್ಪಪ್ಪ!
- ಮಾಚು : ಇದಿಕ್ಕ ಎಚ್ಚಕನೇ ಇಸವಿ ಪೂವಿ?
- ಪೂವಿ : ದಂಡಾಯಿರತ ಏಳ್!
- ಮಾಚು : ನಂಗ ದಂಡಾಯಿರತ ಆರಾಲ್ ಪೋಯೆಲ್ಲ ಪೂವಿ ಆಕಾಶವಾಣಿಕ್?
- ಪೂವಿ : ಓ ಇಕ್ಕ ಗೊತ್ತಾಚಿ! ಎಣ್ಣೆ ಎಣ್ಣೆ! (ತೆಳಿ) ನಾನೆಂತೂ ಗೇನ ಮಾಡಿತಿಂಜ!
- ಮಾಚು : ಆಹಾ! ಟ್ಯೂಬ್‌ಲೈಟ್ ಕತ್ತೊಂಡುವೆಂಗಿ ಪಳಾಕ್ ಪಳಾಕ್ ಪಳಾಕ್‌ಂದ್ ಅಂಜಿ ಮಿನಿಟ್ ಬೋಂಡು!
- ಪೂವಿ : ನಾನಲ್ಲ ಟ್ಯೂಬ್‌ಲೈಟ್ . ನೀನೇ!
- ಮಾಚು : ನೇರೇ. ಟ್ಯೂಬ್‌ಲೈಟ್ ವಡಿಯಂಗ್ ಟ್ಯೂಬ್‌ಲೈಟ್ ಪೊಣ್ಣಲ್ಲತೆ ಪಿಂಞ

ದಾರ್ ಕಟ್ಟುವ?

ಪೂವಿ : ಅದಾಚೆಂಗಿ ಪರೋಲೆಪ್ಪ! (ತಳಿ) ನೀನ್ ಟ್ಯೂಬ್‌ಲೈಟ್ ಅಕ್ಕೂಂದಾನಕ ನಾನೂ ಆಪಿ. ಅದ್‌ಲೊಂದೂ ಬೇಜಾರಿಲ್ಲೆ. ಎಣ್ಣೆಕ್ಕ ಮಿಂಞಾಕ್.....

ಮಾಚು : ಅಂದೂ ಅನ್ನನೇ ಆಯಿಪೋಯೆ ಮಲಾಮತ್.....

ಪೂವಿ : ಎಂತ ಮಲಾಮತ್?

ಮಾಚು : ಏದೋ ಗೇನತ್ ನೀನ್ ಕೇಟಾಂಗ್ 'ಹ್ಲೂಂ'ದೆಣ್ಣೆಟ. ಆಕಾಶವಾಣಿಕ್ ಪೋಕಂಡಿಯಾಚಿ. ಡೈರೆಕ್ಟರ್ ಇಂದಿರಾ ಮೇಡಂಕ್ ಎಣ್ಣೆಂಡಿಯಾಚಿ. ಕಡೇಕ್ ನೀಕಾಯಿತ್ ಮೇಡಂ ಒರ್ ಪೋನಿನ್ ಪ್ರೋಗ್ರಾಂ ಚಾಯಿಲೇ ಆಯಿಲಿಯ?

ಮಾಚು : ಪ್ರೋಗ್ರಾಂ ಎನ್ನೋ ಚಾಯಿಲೇ ಆಚಿ. ನೀನ್ ಸುರೂಲ್ ಪರ್‌ಂದಿಯಲ್ಲ? ಅದ್ ಎಲ್ಲಾಕೂ ಗೊತ್ತಾಚಿ. ಆಕೀರಿಲ್ ಪರ್‌ಂದದೂ ಎಲ್ಲಾಕೂ ಕೇಟಿತ್!

ಪೂವಿ : ನಾನೆಂತ ಪರ್‌ಂದ ಸುರೂಲ್?

ಮಾಚು : ಗೊತ್ತೇ ಇಲ್ಲೆ ಪಾಪ ಇವಕ್? "ನಾಕೆನ್ನಂಗೋ ಪೋಡಿ ಆಯಂಡುಂಡ್ ಮಾಚು-ಲಂಗ್ ಲಸ್ಕಂದೆಲ್ಲ" ನಾನ್ ಅರಿಯತೆ ಹ್ಲೂಂದೆಣ್ಣಾಂಗೆನ್ನೆ ಅನ್ನನೇ ಆಯೆ?

ಪೂವಿ : ಸಾರಿ ಮಾಚು. ಅದೂ ಕೇಟೋಪಾಂದ್ ನಾನ್ ಗೇನ ಮಾಡಿತಿಂಜಿಲೆ.

ಮಾಚು : ಅಚ್ಚಕ್ ಬೆರಿಯ "ಮಾಚು ಕೀ ಬೀಗತೇ ಉಂಡ್. ತಂಬುಟ್ತ್ ತಪ್ಪಲೆಕ್ ಉರ್‌ಪು ಕೂಡಿರ್‌ತೊ ಎನ್ನೋ"ಂದೆಲ್ಲ ಅಳ್‌ಕಿಯಲ್ಲ? ಎಲ್ಲಾಕೂ ಕೇಟಿತದ್.

ಪೂವಿ : ಅಯ್ಯೋ! ನೇರಾ ಮಾಚು? ಇಂಞಾ ಚೆನ್ನ ಎಚ್ಚರ ಎಡ್‌ತಂಡಕ ಆಚಪ್ಪ! ಅದ್‌ಲೆಂತ ಮಂಡೆ ಪೋಪಕುಳ್ಳ?

ಮಾಚು : ನೋಟವ! ಮಾಡುವಾನೆಲ್ಲ ಮಾಡಿತ್ ನಿಸೂರತಿರನ್ನಕೆ ಕಳಿಪೊಪ್ಪ!

ಪೂವಿ : ನಾನೆಂತ ಮಾಡಡ್ ಮಾಚು? ನಂಗ ಪೊಣ್ಣಾಳ ಉಳ್ಳದೇ ಅನ್ನನೇ. ಏದೊಂದಾನೊ ಒಳಿಮರೆ ಮಾಡಿತ್ ನಾಕಂತೂ ಅಭ್ಯಾಸ ಇಲ್ಲೆ.

ಮಾಚು : ಅದ್‌ಂಗೇ ನೋಟ್ ನಾನ್ ಚೆನ್ನ ಅಪ್ಪರ ಇಪ್ಪರ ಬೇರ್ ಚಿಟ್ಟಿತೇ ನೀಡ ತಕ್ಕ್‌ಕ್ 'ಹ್ಲೂಂ'ದೆಣ್ಣೆವೊ! ನೀಕಂತೂ ಏದ್‌ನ ಎಕ್ಕ ಎಲ್ಲಿ, ಎನ್ನನೇ ಪರಿಯೊಂಡೂಂದ್ ಗೇನ ಇಪ್ಪುಲೆ. ನಂಗ ಪೊಣ್ಣಾಳ ಉಳ್ಳದೇ ಅನ್ನನೇಂದ್ ಎಂತೆಂತದೋ ಪರ್‌ಂದ್‌ಟಕ ಆಪಾ?..... ಪ್ರತಿಯೋರ್ ತಕ್ಕ್‌ಕೂ ಓರ್ ಕಾಲ ನೇರ ನೆಲ್‌ಚೀಂದ್ ಇಪ್ಪ. ಅದ್‌ನ ನೋಟಿಯಂಡ್ ಪರಿಯೊಂಡು ಗೊತ್ತಾಚಾ!

ಪೂವಿ : ಉಫ್! ಗೊತ್ತಾಚಿ ಮಾಚು. ಇಂಞಾ ಮಿಂಞಾಕ್ ನಾನ್ ಎಕ್ಕ ಎಲ್ಲಿ, ಎನ್ನನೇ ತಕ್ಕ್ ಪರಿಯೊಂಡೂಂದ್ ಒರ್ ಟ್ರೈನಿಂಗ್ ಎಡ್‌ತವಿ ಅಂದಕ ನಿನ್ನಂಗುಂಡ್!

ಸಕಲಮು ಪೊಮ್ಮಾಲೆ

- ಮಾಚು : ನೀಕೆಕ್ಕೊಲೂ ತಮಾಷಿಯೆ! ನಾನ್ ಕಾರ್ಯಕೆಣ್ಣಕ!
- ಪೂವಿ : ಚೆಡ್ಂಜವತೆ ಮಾಚು! ನೀಡ ತಕ್ಕಕ್ ನಾನೂ ಒತ್ತವಿ. ಆಚೆಂಗಿ ನಾಕೂ ಚೆನ್ನಂಗಲ್ಲ ಸಂಶಯ ಇಪ್ಪಲ್ಲ? ಅದ್ನ ತೇತವಂಡ ?
- ಮಾಚು : ಸಂಶಯ ಎಕ್ಕಕೂ ನಲ್ಲದಲ್ಲ. ಅದ್ನ ತೇತವಂಡು. ನೀಡ ತಕ್ಕಕ್ o.k.
- ಪೂವಿ : ಇಕ್ಕ ಎಣ್ಣೆ ಮಾಚು. ಏದೇದ್ ತಕ್ಕನ್ ಪರಿವಕಾಗಾಂದ್ ನೀಡ ಅಭಿಪ್ರಾಯ?
- ಮಾಚು : ವಡಿಯ ಪೊರ್ಮೆ ನೈಚಿತ್ ಬಂದನ್ನಕೆ ಕುಡಿಪ್ಪಕ್ ಒರ್ ಬಟ್ಟ ಕಾಫಿ ಕೂಡಿ ಕೊಡ್ಕತೆ ಎಂತೆಂಗಿ ಪುಕಾರ್ನ ವಡಿಯಂಗ್ ಎಣ್ಣುವಕಾಗ.
- ಪೂವಿ : ಅರೆ, ನಾನೆಕ್ಕ ಎಣ್ಣೆನ ಮಾಚು. ಅನ್ನನೆ?
- ಮಾಚು : ನೀನ್ ಎಣ್ಣೆಯಾಂದ್ ನಾನ್ ಎಣ್ಣೆನ ಇಕ್ಕ? ಲೋಕಾರೂಡಿ ಎಣ್ಣೆ ಅಚ್ಚಿಕೆ!
- ಪೂವಿ : ಲೋಕಾರೂಡೀಂದೆಣ್ಣಕ ಇಂಡೈಯೆಕ್ಕಾಯಿತ್ ನಾಕೇ ಅಲ್ಲ ತಾನೆ? (ತಳಿ)
- ಮಾಚು : ನೀನ್ ಎನ್ನನೆ ಬೋಂಡೆಂಗೂ ಗೇನ ಮಾಡ್ಕ. ನಾಕೆನ್ನ ಇಕ್ಕ? ನೋಟ್ ಪೂವಿ, ನೀನೇ ಎಣ್ಣೆನ ಒರ್ ತಕ್ಕರ್ ಉದಾಹರಣೆನ ಎಡ್ತವಂಗ....
- ಪೂವಿ : ಎಂತ ಎಣ್ಣೆನ ನಾನ್?
- ಮಾಚು : ಅದೇ ಪೂವಿ, ಕೇದಿಯ ಮನೆ ರಾಜು ಬಾವ ಮನೆಕ್ ಬಂದನ್ನಕೆ ಜಾಜಿ ಮೂಡಿ, ನೆರೆಮನೆಕಾರಡ ಎತ್ತ ತುಂಡ್ಚಿಟ್ಟುಂಡ್ ಬೇಲ್ಕ್ ಬಂದಾನ ಎಣ್ಣೆರ್ತ್. ಅಂವೊ ಅಕ್ಕಲೇ ಎತ್ತನ ಕೆಟ್ಟಿತ್‌ಟ್ಟಿಲ್ಲಿಕೇ ಪೋಯಿತ್ ಅಂಡ ಬಾಲ್ನ ತುಂಡಾಕಿರ್ತ್‌ಂದ್ " ಎಣ್ಣೆಲ್ಲ? ಅದ್!
- ಪೂವಿ : ಅದೋರ್ ವಿಷ್ಯ ಮಾತ್ರ ಗೇನ ಮಾಡ್ಚೆಂಗಿ ಬೇಜಾರಾಪ ಮಾಚು. ಪಾಪ! ಎತ್ತರ್ ಬಾಲ್ ಎನ್ನನಿಂಜತ್. ನೀನೇ ನೋಟಿತ್ತುಯಲ್ಲ. ಚೆಡಿರ ಕೈಕ್ ಬುದ್ಧಿ ಕೊಡ್ಪಕಾಗಾಂದ್ ಅದ್ಂಗೇ ಎಣ್ಣೆವೊ!
- ಮಾಚು : ಅದ್ಂಗೇ ನಾನ್ ಎಣ್ಣೆಯೆ. "ಆರ ಬೇರ ಅರಿಯತೆ ಮೋವಳ ಪುಡ್ಚಾಂದ್ ಗಾದೆ ಉಳ್ಳದೇ ಅದ್ಂಗೇ ! ಎತ್ತ ಬೇಲ್ಕ್ ಬಂದಿತ್ ಬೊಳೆ ತಿಂದತ್ ನೇರೇ. ಅನ್ನನೇಂದೆಣ್ಣೆತ್ ಓಡಿಯ ಪೋಯಿತ್ ಅಕ್ಕಂಜಕ್ಕಲೆ ಅಂಡ ಬಾಲ್ನ ತುಂಡ್ಚಿಟ್ಟಕ ಮಾತ್ರ ಅದ್ ತಿಂದ ಬೊಳೆ ಬಯ್ಯಕ್ ಬಂದನ್ನಕೆ ಆಚಾ?
- ಪೂವಿ : ಇಕ್ಕ ನೀನೇಣ್ಣವೊ ಎಂತೆಂದ್? ಆ ವಿಷ್ಯತನೇ ಜಾಜಿ ಅಕ್ಕಯ್ಯ ತಾಂಡ ವಡಿಯಂಡ ಕೂಡೆ ಎಣ್ಣುವಕಾಗಯಿಂಜತ್‌ಂದಾ?
- ಮಾಚು : ಎಣ್ಣುವಕಾಗಯಿಂಜತ್‌ಂದಲ್ಲ ಪೂವಿ. ಮನೆಕ್ ನುಗ್ಗನನ್ನಕೆ ಅದ್ನೇ ಬಲ್ಯ ವಿಷ್ಯಾಂದ್ ಎಣ್ಣುವಕಾಗಯಿಂಜತ್‌ಂದ್ ಅಚ್ಚಿಕೇ.
- ಪೂವಿ : ಪೊಣ್ಣಾನವ ತಾಂಡ ವಡಿಯಂಡ ಕೂಡೆ ಅಲ್ಲತೆ ಬೋರೆ ದಾಡ ಕೂಡೆ ಎಣ್ಣೊಂಡು ಮಾಚು? ನೀನೇ ಎಣ್ಣೆ ನೋಟನ? ಮನೆಲ್ ನಡ್ಂದಾನ

ಆಪಚ್ಚಕ್ ಬೆರಿಯ ವಡಿಯಂಗ್ ಎಣ್ಣೆತ್ ತಾಂಡ ಮನಸ್ಸನ ತೂವೆ
ಮಾಡ್ಯೊವೊಂಡೂಂದ್ ಅವ ಪಾರಕಾತಂಡಿಪ್ಪ.

ಮಾಚು : ಎಣ್ಣೊಂಡು ಪೂವಿ. ಬೋಂಡಾಂದೆಣ್ಣನ ನಾನಿಕ್ಕಿ? ಜಾಗ ನೋಟ್ಯಂಡ್ ಲಾಗ
ಇಡೊಂಡು. ಇಲ್ಲೆಂಗಿ ಕೊಡಮರಿವದ್ ನೇರೇ. ಇಕ್ಕ ನೋಟ್ ಆಂಡ
ಪರಿಣಾಮ ಎಂತಾಚಿ?

ಪೂವಿ : ಅದ್ ನೇರೇ ಮಾಚು. ಅಯಿಂಗಳೂ ಬಿದ್ದು ಬಾವಂಡಯಿಂಗಳೂ ನೀರ್
ಮೀನೊರನ್ನೆ ಇಂಜವು ಇಕ್ಕ ತಕ್ಕ ಬಾಕೇ ನಿಂದೋಯಿತಲ್ಲ? ಅಂದಿತೂ ರಾಜು
ಅಣ್ಣಯ್ಯ ಅಚ್ಚಕ್ ದುಡುಕುವಕ್ ಆಗ ಇಂಜತ್.

ಮಾಚು : ಆ ಸಂದರ್ಭತ್ ಎಂತವಂಗೂ ಅನ್ನನೆ ಆಯಿಪೋಪ ಪೂವಿ. ಮಂಡಲ್
ಇರುವತ್ತೆಟ್ ಪುಳು ಕೂಡಿತಿಪ್ಪ ನೇರತ್ ತಾನ್ ಎಂತ ಮಾಡ್ಯಂಡುಳ್ಳೇಂದೇ
ಗೊತ್ತಾಪುಲೆ ಓರಮ.

ಪೂವಿ : ಅಕಸ್ಮಾತ್ ಎಣ್ಣೆತೆ ಪೋಯಿತಿಂಜಕ ಅದ್‌ಂಗೂ ಅಂವೊ ಪೊಣ್ಣಾರ ಬೆನ್ನಕ್
ಪೂಜೆ ಮಾಡುವಿಂಜತ್.

ಮಾಚು : ನೋಟ್ ಪೂವಿ, ಆಣ್‌ಕ್ ಇಲ್ಲತೆ ಅದೆಚ್ಚಕೂ ನಲ್ಲ ಗುಣತ್‌ನ ದೇವ
ಪೊಣ್ಣಾನವಕ್ ಕೊಡ್ತಿತ್ ಅಕ್ಕುವಾ?

ಪೂವಿ : ಅದೇದ್ ಗುಣ ಮಾಚು ಅಂತದ್? ವಡಿಯ ಪೊಜ್ಜಕ ಕೇಟಂಡ್ ಮುಂಡತ್ತಿಪ್ಪ
ಗುಣವಾ?

ಮಾಚು : ನಾನೆಕ್ಕ ಪೊಜ್ಜಿಯೆ ನೀಕ್?

ಪೂವಿ : ಸ್ಯೂಲ್‌ಕ್ ಪೋಪಕ ಇಚ್ಚಕೇ ಕುರಿ ಪೊಜ್ಜಿಯಾಂದ್ ಲೆಕ್ಕ ಉಂಡಾ ಮಾಚು?

ಮಾಚು : ಥತ್! ನೀಡ ಆ ಪಳಿಯ ಅಕೊಂಟ್‌ನ ಒಲೆಕ್‌ಡ್ ಪೂವಿ ಒಮ್ಮೆ. ಮಂಗಲಾನ
ಪಿಂಞ ಪೊಜ್ಜಿತುಂಡೆಂಗಿ ಎಣ್ಣೆ!

ಪೂವಿ : ಮಂಗಲಾನ ಪಿಂಞ ಪೊಜ್ಜಿತುಳ್ಳಿಯಾಂದ್ ನಾನೆಣ್ಣನಾ? ಮಿಂಞ ಪೊಜ್ಜದೂ
ಪೊಯ್ತೆ ಅಕ್ಕುವಲ್ಲ?

ಮಾಚು : ಇದಾ, ಇಲ್ಲಿ ಕಾಂಬ ? ಕಲೆ? ಎಂತ ಎಣ್ಣೆ ನೋಟಿನ?

ಪೂವಿ : ಎಲ್ಲಿಯೋ ಮರ ಪತ್ತಿತ್ ಬುದ್ಧದಾಯಿತಿಕ್ಕು.

ಮಾಚು : ನೋಟ್, ಎಚ್ಚಕ್ ಸುಲ್‌ಬತ್ ಜಾರುವಕ್ ನೋಟುವೊ ಅವ? ಕಾಯಿ
ತಂದ್‌ಲೇಂದ್ ನೀನ್ ಕಡ್‌ಚದ್! ಗೇನ ಉಂಡಾ?

ಪೂವಿ : ಥೂ! ಬುಡಪ್ಪ ಅದ್‌ನೆಲ್ಲ. ಇಗಾಣ ಆಪುಲಿಯ ನೀಕ್? ಇದ್ ನಾಡ ಪೊಣ್ಣ
ಕಡ್‌ಚಿಟಿಯೇಂದ್ ಎಣ್ಣೆಕ್?... ಸಾರಿ ಮಾಚು! ಅಕ್ಕ ನಾನ್ ಚೆರಿಯವ ಅಲ್ಲ?
ಗೊತ್ತಾಯಿಲೆ! (ತೆಳೆ)

ಪಳಸೆ ಪ್ರೊಮ್ಯಾಲೆ

- ಮಾಚು : ಕರ್ಮಕರ್ಮ! (ತಳಿ) ನೀಡ ಅವಸ್ಥೆನ ಗೇನ ಮಾಡ್‌ಚೆಂಗಿ ತಳಿಬಪ್ಪ ನಾಕ್! ಗೊಣ್ಣೆ ತ್ತೇಟುವಕ್ ಸತಾ ನಾನೇ ಆಂಡೂಯಿಂಜತ್! ಇಕ್ಕ ಬಲ್ಯ ಜನ (ತಳಿ)
- ಪೂವಿ : ಮದಿ ಮಾಚು ನೀಡ! ಅದೆಂತದೋ ಪ್ರೊಣ್ಣಾಳಕ್ ಉಳ್ಳ ಗುಣಾಂದ್ ಎಣ್ಣೆಯಲ್ಲ ಅದೆಂತದ್ ಎಣ್ಣೆ ಕೇಕನ.
- ಮಾಚು : ಮಾಪು ಮಾಡುವ ಗುಣ ಪೂವಿ. ಪಿಂಞ ತಾಂದವನ್ನತ ಗುಣ.
- ಪೂವಿ : ನಾಕ್ ಅರ್ಥ ಆಯಂಡಿಲ್ಲೆ. ಒಡ್‌ತಿತ್ ಎಣ್ಣುವಕಾಪುಲಿಯ?
- ಮಾಚು : ಇಕ್ಕ ನೋಟ್, ರಂಜು ಕ್ಕಣ್ಣಿ ಗಲಾಟೆ ಮಾಡ್‌ಚೀಂದ್ ದಂಡ್ ಬೆಪ್ಪಿಯ. ಅಂವೊ ಮಾಡ್‌ನ ತಪ್ಪು ಅವಂಗೇ ಗೊತ್ತಾಪ. ಮೊರಟ್ಟಿಂಡ್ ನೀಡ ಪಕ್ಕೆ ಬಪ್ಪ. ಅಕ್ಕ ನೀಕೂ ಬೇಜಾರಾಪ. ಅವಂಡ ಕಣ್ಣೇರ್‌ನ ತ್ತೇಟುವಿಯ ಅಲ್ಲಾ?
- ಪೂವಿ : ಅಕ್ಕು, ತಪ್ಪುನ ತಿದ್ದುವಕ್ ಪೊಯ್ಯಂಡಿಯಾಪ. ಬಯ್ಯಂಡಿಯಾಪ, ಆಚೆಂಗಿ ಅದದ್ ತಪ್ಪುನ ಅಯಿಂಗ ಒತ್ತವಕಾಪಕ ಮಾಪು ಮಾಡಂಡಿಯಾಪ.
- ಮಾಚು : ಇದ್‌ನೇ ನಾನ್ ಎಣ್ಣೆಯೆ. ಈ ದಂಡ್ ಗುಣ ಆಣಾಳ್‌ಕ್‌ಂಜ ಪ್ರೊಣ್ಣಾಳಕೇ ಜಾಸ್ತಿ ಉಳ್ಳದ್‌ಂದ್ ಆಣ್‌ಕ್ ತಾಂದವನ್ನತ ಗುಣ ಕಮ್ಮಿ. ಪ್ರೊಣ್ಣ್ ಎಣ್ಣ್‌ಚಿ. ಇಂವೊ ಚೆಡಿಲ್ ಎತ್ತರ ಬಾಲನ್ ತುಂಡ್‌ಚಿಟ್ಟಿತ್ ಬಾತ್.
- ಪೂವಿ : ಎತ್ತರ ಬಾಲನ್ ತುಂಡ್‌ಚಿಟ್ಟಿತ್ ಬಾಂದ್ ಅವ ಎಣ್ಣೆತಲೆ ಮಾಚೂ. ಎತ್ತರ ಬಂತ್ ಬೇಲಲ್ ಬೊಳೆ ತಿಂದತ್‌ಂದ್ ಎಣ್ಣೆಯೆ ಅಚ್ಚಿಕೆ.
- ಮಾಚು : ಅದೇ ಪೂವಿ, ತಾಂದವನ್ನತ ಗುಣ ಅವಂಗ್ ಕಮ್ಮಿ ಇಂಜಾಂಗಾಯಿತ್ ಅಂವೊ ಪಾರಿಬುದ್ಧತ್. ಅದೇ ತಕ್ಕನ ಆ ಸಂದರ್ಭ ಕೈಂಜ ಪಿಂಞ ಅವಂಡ ಉಂಡ್ ಕುಡ್‌ಚಿತಾನ ಪಿಂಞ ಆರಾವಲ್ ಎಣ್ಣೆತಿಂಜಕ ಅಂತ ಪರಿಸ್ಥಿತಿ ಬಪ್ಪಿಂಜಿಲೇಂದ್ ಎಣ್ಣ ಅಚ್ಚಿಕೆ.
- ಪೂವಿ : ಅದೂ ಆಯಿತಿಕ್ಕೊಂದಾಪ. ವಡಿಯಂಡ ಮನಸ್ಸನ ಅರ್‌ಂಜವತೆ ಇವ ದುಡ್‌ಕಿರ್‌ತೆನ್ನೊಂದ್ ನಾಕೂ ಆಚಿ.
- ಮಾಚು : ಪ್ರೋಡ್, ಇದೇ ಕೇತರೆ ನಂಗಡಲ್ಲಿಯೆ ಆಚೀಂದ್ ಗೇನ ಮಾಡನ. ನೀನ್ ಎಂತ ಮಾಡುವಿಂಜಿಯ?
- ಪೂವಿ : ನೀನ್ ಅವಂಗ್‌ಂಜ ಚೂಡಾಂದ್ ನಾಕ್ ಗೊತ್ತುಂಡಲ್ಲ ಮಾಚು? ನಾನ್ ಅದ್‌ನ ಅಕ್ಕಲೇ ನೀಕ್ ಎಣ್ಣುವಿಂಜಿಲೆ. ನಿಧಾನತ್ ನೀಕ್ ಎಣ್ಣುವಿಂಜ.
- ಮಾಚು : ಅಂತೂ ನೀಕ್ ದಿನಕೊಮ್ಮೆಂಗಿ ನನ್ನ ದೂರತಿಂಜಕ ಉಂಡ ಕೂಳ್ ಅರ್‌ಗಣೆ ಆಪುಲೇಂದ್ ಗ್ಯಾರಂಟಿ ಆಚಿ. (ತಳಿ)
- ಪೂವಿ : ಉಳ್ಳ ವಿಷ್ಯ ಎಣ್ಣುಕ ನೀನೆನ್ನಂಗ್ ಅನ್ನನೆ ಕಳಿಪ್ಪೊ? ಸದ್ಯ! ಒತ್ತಂಡಿಯಲ್ಲ?
- ಮಾಚು : ಒತ್ತವತೆ ಪಿಂಞಂತೆ ಮಾಡುವಕಾಪ ಪೂವಿ? ಮೊನಿಯಾಂದ್ ಪ್ರೋನ್ ಇನ್

ಪ್ರೂಗ್ರೂಂಲ್ ನೀಡ ಬೀರ್ಯ ಗೂತ್ತೂನ ಒಂಞೂಚೆಂಗೂ ಒತ್ತವಂಡುವಲ್ಲ?

ಪೂವಿ : ಎಂತ ನೂಡ ಬೀರ್ಯ ಗೂತ್ತೂಯೆ ನೀಕ್?

ಮೂಚು : ಅದೇ ಪೂವಿ, ನಿಂಗಡ ಸಂಘಟನೆ ಬಲ್ಯದ್-ಅದೆಚ್ಚಕ್ ಪೂಣ್ಣೂಳ ಪೂೇನ್ ಮೂಡ್‌ಚಲ್ಲ ನೀಕ್! ಸುರು ಸುರುಲ್ ನೂಕ್ ಇದೇದ್ ಶನಿಕ್ ಬಂದ್‌ಟನೂಂದ್ ಆಯಿತಿಂಜತ್. ನನ್ನ ಕೇಪವನೇ ಇಲ್ಲೆ. ಎಲ್ಲೂ ನೀಕೇ ಸಪೂೇರ್ಟ್! ಕಡೆಕೂ ದಂಡ್ ಮೂಂದ್ ಆಣೂಳ ಬೆಂಬಲ ಕೂಟಿತೂಪಕ ಬಚೂವೂನ! (ತಳಿ)

ಪೂವಿ : ಮೂಚೂ ಇಂಞೂಚೆಂಗೂ ಗೇನ ಬೆಚ್ಚ. ನೂಕೆನ್ನೇಂಗಿ ತೂಂದರೆ ತಪ್ಪಕ್ ಬೂತೆಂಗಿ, ನೂನ್ ತೂಮನೆಕ್ ಪೂೇಪುಲೆ. ನೇರೇ ಆಕೂಶವೂಣೆಕ್ ಪೂೇಯಿರುವಿ!

ಮೂಚು : ಓಹೂೇ, ಒಮ್ಮೆ ಎನ್ನೂೇ ನೀಕ್ ಅವಕೂಶ ತೂತ್‌ಂದ್‌ಅಕ್ಕೂಕ ತಪ್ಪೂಂದ್ ಗೇನ ಮೂಡತೆವ್ವ. ಮೂಣೆ ಮೂಣೆ ಮಂಗಲ ಉಂಡ್‌ಂದ್ ಗೇನ ಮೂಡ್ಯ?

ಪೂವಿ : ಅದೆಂತದೇ ಇರಡ್, ನೂಡ ತಕ್ಕೂಕ್ ಬೆಲೆ ತಂದಿತ್ ಕೂಟ್ಟಿ ಪೂೇಯಲ್ಲ ಮೂಚು! ಥೂಂಕ್ಸ್ ಆಚೂ?

ಮೂಚು : ನೂಕ್ ಅದಲ್ಲ ಪೂೇಡಿ....

ಪೂವಿ : ಎಂತ ಪೂೇಡಿ ನೀಕ್?

ಮೂಚು : ಆಕೂಶವೂಣೆಕೆನ್ನೂೇ ಮೇಡಂರ ಸೂಯತ್ ಪೂೇಯಿತ್ ಬೂತ್. "ನಂಗಳೂ ಒಮ್ಮೆ ಚಂದ್ರ ಲೂೇಕಕ್ ಪೂೇಯಿತ್ ಬಕ್ಕ ಮೂಚೂಂದ್" ಸುರು ಮೂಡಿಟ್ಟಕೆ?ದೇವಳೇ ಗೆತಿ! (ತಳಿ)

ಪೂವಿ : ಅದ್ ನೀಡ ಕೈಲ್ ಬೇವುಲೇಂದ್ ನೂಕೂ ಗೂತ್ತುಂಡ್ ಮೂಚು. ಬಡೂಯಿ ಕಳಿಕ್ಕತೆ. ವಡಿಯಂಡ ಸೂಮರ್ಥಿಕೆನ ಅರ್‌ಂಜಂಡೇ ಪೂೇಣ್ಣೂನವಳೂ ತೂಂಡ ಬೂೇಡಿಕೆನ ಅವಂಡ ಮಿಂಞೂಲ್ ಬೆಪ್ಪೂ!

ಮೂಚು : ಸದ್ಯ! ಬಚೂವ್. ಅಚ್ಚಕ್ ಗೂತ್ತುಂಡಲ್ಲ ಮದಿ. ಮಡಿಕೇರಿ ಚತ್ತೆಕ್ ಪೂೇನನ್ನಕೆ ನಿಸೂರೂಯಿತ್ ಚಂದ್ರಲೂೇಕಕ್ ಪೂೇಕನ ಮೂಚೂಂದ್ ಎಣ್ಣೂಲೆಲ್ಲ? ನಲ್ಲ ಮೂಡಿ!

ಪೂವಿ : ನೀಡ ಪೂಲೀಸೆಲ್ಲ ಬೂೇಂಡ ಮೂಚು... ಅದಿರಡ್ ನಂಗ ಜೀವಮೂನತ್ ಎಚ್ಚಕ್ ಪಡ್‌ಚಕಲೂ ಪಡಿಪ್ಪಕ್ ಇಂಜಿತೇ ಇಪ್ಪಲ್ಲೂಂದ್!

ಮೂಚು : ಇಲ್ಲತೆ? ಪ್ರತಿ ದಿವಸವು ಎಂತೆಂಗಿ ಒಂದ್ ಪಡಿಪ್ಪಕ್ ಇಂಜಿತೇ ಇಪ್ಪ. ಗೂದ ಕೇಟಿತಿಲ್ಲಿಯ ನೀನ್? ಕನ್ನಡಿ ವಡ್‌ಂದಕ ಪೂೇಚಿ-ತಕ್ಕೂ ಪರ್‌ಂದಕ ಪೂೇಚೀಂದ್. ಅನ್ನನೇ ಓರ್ ಘಟನೆನ ನಂಗ ಎನ್ನನೆ ಎದ್‌ಪ್ ಇಟ್ಟಿವೂಂದ್ ಎಣ್ಣೂವದ್ ನಂಗ ನಂಗಡ ಸ್ವಬೂಾವತ್‌ನ ಹೂಂದಿಯಂಡುಂಡ್...

ಸಕನು ಪ್ರೂಮ್ಯಾಲೆ

ಪೂವಿ : ಅದೆನ್ನೋ ಅಕ್ಕು. ಓರಬ್ಬ ಚೂದಾಲ್ ಪೋಪಾಂಗ್ ಇರಾಂಬಾರ ಎಡ್ತಂಡತ್‌ಂದ್ ಎಣ್ಣಾಟ ಚೆರಿಯದಾನೇ ಬಲ್ಯದ್ ಮಾಡಿರುವ. ಇಂಇಸೋರಬ್ಬ ಬಲ್ಯ ಸಂಗತಿನ ಕೂಡಿ ಕೂಲಾಯಿತ್ ಎಡ್ತಂಡ್ ಒಂದೂ ನಡ್ಂದಿತೇ ಇಲ್ಲೇಂದ್ ಇಂಜಿರುವ....

ಮಾಚು : ಈ ಎತ್ತಾರ ಬಾಲ್ ತುಂಡ್‌ಚಿಟ್ಟಿ ವಿಷ್ಯತ್‌ನೇ ಎಡ್ತ. ಆಕಸ್ಮಾತ್ ಕೇರ್ ತುಂಡ್‌ಚಿಟ್ಟಿಂಡ್ ಎತ್ತ ಬಂತ ಬೇಲ್ ತಿಂದತ್ ನೇರೇ. ಆ ವಿಷ್ಯತ್‌ನ ಪೋಣ್ಣ ನಿಧಾನತ್, ವಡಿಯಂಡ ಮನಃಸ್ಥಿತಿನ ಅರಾಂಜಂಡ್, ಸಮಯ ಸಂದರ್ಭನೋಟಿತ್ ಎಣ್ಣೆತಿಂಜಕ ಅವನೂ ಪಾರಿಕಳಿಪ್ಪಿಂಜಿಲೆ. ಎತ್ತಾರ ಬಾಲ್‌ನ ತುಂಡ್‌ಚಿಡುವಿಂಜಿಲೆ. ಇಕ್ಕ ಅದೋರ್ ಪಾಪತ್ ಬೋರೆ-ತಕ್ಕ ಬಾಕಿಲ್ಲತೆ ಇದೋರ್ ಪಗೆಕಳಿ ಬೋರೆ!

ಪೂವಿ : ನೀಡ ಅಭಿಪ್ರಾಯತ್, ವಡಿಯನೇ ಆಡ್-ಪೋಣ್ಣೇ ಆಡ್ ಪ್ರತಿ ಓರ್ ತಕ್ಕನ ಪರಿಯುವಕಲೂ ಬೇರ್‌ಚಿಟ್ಟಿತ್ ತಕ್ಕ ಪರಿಯೊಂಡೂಂದ್ ತಾನೆ?

ಮಾಚು : ಅಕ್ಕು ಪೂವಿ. ಓರಂದ್ ನಲ್ಲ ಗಳಿಗೆ ಇಪ್ಪ-ಓರಂದ್ ವಿಷ ಗಳಿಗೆ ಇಪ್ಪಾಂದ್ ಪೆರಿಯವು ಎಣ್ಣುವ ನೋಟ್!.... ನಂಗಡ ಬಾಯಿಂಜ ಪೊರಬುದ್ದ ಓರ್ ತಕ್ಕ ಎಂತೆಂತದೋ ವಿಷ್ಯಕ್ ಮೊಳಿ ಆಯಿಪೋಪ. ಇಕ್ಕ ಈ ಪ್ರಾಣಿಪಕ್ಷಿಯಳ ನೋಟ್ ಪರಿಯೊಂಡು ಎಣ್ಣಕ ಅಯಿಂಕ್ ಪರಿವಕ್ ಕಯ್ಯುವಾ? ನಂಕಾಚೆಂಗಿ ನಂಗಡ ಮನಸಾಲುಳ್ಳಾನ ಪರಾಂದಿತ್ ಕಾಟೊಲು...

ಪೂವಿ : ಅನ್ನನೆ ಇಪ್ಪಕ ನಲ್ಲಾನೇ ಪರಿಯೊಂಡು. ನಲ್ಲಾನೇ ಗೇನ ಮಾಡೊಂಡು. ಅಲ್ಲ ಮಾಚು.

ಮಾಚು : ಅನ್ನನೆ ಬರಡ್! (ತೆಳಿ) ಪಾಟಿ ಪದಿಮೂಂದ್. ನಲ್ಲಾನ ಪರಾಂದಕ ಎಲ್ಲಾ ನಲ್ಲದೇ ಆಪ. ಕೆಟ್ಟಾನ ಪರಾಂದಕ ಪಗೆಕಳಿಕ್ ಮೊಳಿ ಆಪ. ನಾವು ಉಳ್ಳದೇ ನಲ್ಲಾನ ಪರಿಯುವಕ್!

ಪೂವಿ : ಮದಿ ಮಾಚು ನೀಡ ತಮಾಷಿಕಳಿ! ಚೆರಿಯ ಮಕ್ಕಡನ್ನಕೆ! (ತೆಳಿ)

ಮಾಚು : ಪೂವಿ, ನಾಕ್ ಓರಮ ಎನ್ನನೆ ಆಪ ಗೊತ್ತುಂಡಾ?

ಪೂವಿ : ಪೂವಿ, ನಾಕ್ ಓರಮ ಎನ್ನನೆ ಆಪ ಗೊತ್ತುಂಡಾ?

ಪೂವಿ : ಎನ್ನನೆ ಆಪ? ಚೆರ್‌ಪತ್ ಬೇಲ್‌ಲ್ ಓಡಿಕಳಾಚಂಡ್, ಕೊಡಮರಾಂಜಂಡ್ ಕಳಿಪ್ಪಿಂಜತಲ್ಲ? ಅನ್ನನೇ ಇಕ್ಕೊಲು ಮಾಡ್ಯಂಡಿಕ್ಕೊಂಡೂಂದಾವ? (ತೆಳಿ)

ಮಾಚು : ನೀಕೆನ್ನನೆ ಗೊತ್ತಾಚಿ ನಾಡ ಗುಟ್ಟ್?..... ಮಕ್ಕಡ ಮನಸ್ಸು ನೋಟ್ ಎಚ್ಚಕೋರ್ ಚಾಯಿ? ಅಪ್ಪರ ಇಪ್ಪರ. ಒಮ್ಮ ಜಗಳ ಆಡ್ಯಂಡಕಲೂ, ತಕ್ಕ ಬುಟ್ಟಕಲೂ, ಎಲ್ಲಾ ಚೆನ್ನಂಗೇ ನೇರ. ಬಲ್ಯಯಿಂಗಡ ಅನ್ನನೆ ಅಲ್ಲ. ಓರ್

ಚೆರಿಯ ಪವಗರ ಕುರು ಬಲ್ಯ ಮರ ಆಕಣೇಕ್ ಕೂಡಿ ನಂಗ ತಿದ್ದಿಯೋವದೇ ಇಲ್ಲೆ. ಅನ್ನನಿಪ್ಪಕ ನಂಗ ಇಂದೆಕೂ ಮಕ್ಕಳೇ ಆಯಿತಿಂಜಕ ಎಚ್ಚಕ್ ಚಾಯಿಂಜತಲ್ಲ ಪೂವಿ?

ಪೂವಿ : ನಾಕೂ ಅನ್ನನೇ ಆಪ ಮಾಚು. ಆಚೆಂಗೆನ್ನಾ ಮಾಡಂಗ? ಲೋಕನೇಮ ನಂಗಕೆನ್ನಾ ತಿದ್ದುವಕ್ ಕಯ್ಯುವಾ?..... ಉಯೀ, ಗಂಟೆ ನೋಟಿಯ ಮಾಚೂ?

ಮಾಚು : ಓಹೋ ನೇರೇ ಅಲ್ಲ? ಇರುವದ್ ಗಂಟೆ ಪದ್‌ನಂಜಿ ಮಿನಿಟ್ ಆಯಿರ್‌ತಲ್ಲ? (ತಳಿ)

ಪೂವಿ : ಆಕಾಶವಾಣಿ ಮಡಿಕೇರಿ.... ಇಕ್ಕ ಎಟ್ತ್‌ಗಂಟೆ ಪದ್‌ನಂಜಿ ಮಿನಿಟ್ ಪತ್ತ್ ಸೆಕೆಂಡ್. ನಂಗಡ ಮಿಂಞತ ಕಾರ್ಯಕ್ರಮ "ಕರಿ ಕೂಳ್ ಕಣ್ಣಿ" ಡೆಂಡೆಣೆ! (ತಳಿ)


ಮಾಚು : ಕರಿ, ಕೂಳ್, ಕಣ್ಣಿ, ಕಾರ್ಯಕ್ರಮಕ್ ನಿಂಗಕೆಲ್ಲ ಸ್ವಾಗತ. ಇದ್ ಮಜ್ಜಾಣತದೇ ಅನಾಂಗುಂಡ್ ಪೂವಮ್ಮ ಅದ್‌ನ ನಿಂಗಕ್ ಬಿಸಿ ಮಾಡಿತ್ ಬಳಂಬುವ.... ಡೆಂಡೆಣೆ!

ಪೂವಿ : ಮದಿ ಮಾಡ್ ನೀಡ ಕೋಣಿ! (ತಳಿ)

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಮಡಿಕೇರಿ

ಶ್ರೀ ಅಡ್ಡಂಡ ಸಿ. ಕಾರ್ಯಪ್ಪ	ಅಧ್ಯಕ್ಷ
ಪ್ರೊ. ಇಟ್ಟೀರ ಕೆ. ಬಿದ್ದಪ್ಪ	ಸದಸ್ಯ
ಶ್ರೀಮತಿ ಚೇಂದಿರ ನಿರ್ಮಲಾ ಬೋಪಣ್ಣ	ಸದಸ್ಯೆ
ಶ್ರೀ ಮಾಳೇಟಿರ ಅಭಿಮನ್ಯುಕುಮಾರ್	ಸದಸ್ಯ
ಶ್ರೀ ಬೊಟ್ಟೋಳಂಡ ಮಿಟ್ಟು ಪೂಣಚ್ಚ	ಸದಸ್ಯ
ಶ್ರೀ ಚರ್ಮಡ ಪೂವಯ್ಯ (ಅಪ್ಪುಣು)	ಸದಸ್ಯ
ಶ್ರೀ ಕುಡಿಯರ ತಮ್ಮಯ್ಯ	ಸದಸ್ಯ
ಶ್ರೀಮತಿ ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ	ಸದಸ್ಯೆ
ಶ್ರೀಮತಿ ಚೇಂದಂಡ ಸುಮಿ ಸುಬ್ಬಯ್ಯ	ಸದಸ್ಯೆ
ಶ್ರೀ ಮೇಲತಂಡ ಎ. ರಮೇಶ್	ಸದಸ್ಯ
ಶ್ರೀಮತಿ ನೆರೆಯಂಡಮ್ಮಂಡ ಉಮಾ ಪ್ರಭು	ಸದಸ್ಯೆ
ಶ್ರೀ ನಾಪಂಡ ರವಿ ಕಾಳಪ್ಪ	ಸಹ ಸದಸ್ಯ
ಶ್ರೀ ಮೋಟನಾಳಿರ ಸನ್ನಿ ಕಾರ್ಯಪ್ಪ	ಸಹ ಸದಸ್ಯ
ಶ್ರೀ ಮಂಡೇಪಂಡ ಬೋಸು ಮೊಣ್ಣಪ್ಪ	ಸಹ ಸದಸ್ಯ
ಶ್ರೀಮತಿ ಎನ್. ಶಾಂತಮ್ಮ	ರಿಜಿಸ್ಟ್ರಾರ್
ಶ್ರೀಮತಿ ಹೆಚ್.ವಿ. ಇಂದ್ರಮ್ಮ	ಅರ್ಥ ಸದಸ್ಯೆ



ನಾಗೇಶ್ ಕಾಲ್ಕೂರ್

ಮಡಿಕೇರಿ ಆಕಾಶವಾಣಿರ ಕಾರ್ಯಕ್ರಮ ಕೇಪಯಿಂಗ್ ನಾಗೇಶ್ ಕಾಲ್ಕೂರ್ ಅಯಿಂಗಳ ಪರಿಚಯ ಮಾಡಿತ್ತಪ್ಪ ಅವಶ್ಯಕತೆ ಇಲ್ಲ. ಕನ್ನಡ ಪಿಂಞ ಕೊಡವ ತಕ್ಮಲ್ ಸಾಹಿತ್ಯ ಕೃಷಿ ಮಾಡ್ಯಂಡುಳ್ಳ ಇವು ಕಾಲ್ಕೂರು ನಿವಾಸಿ.

ಟಿನ್ನಡತ್ : 'ಮನದ ಕಡವನು ತೆರೆದು' 'ಭಾವದಲೆಗಳನೇರಿ' ಎಣ್ಣುವ ದಂಡ್ ಕವನ ಸಂಕಲನ; ಸಂಘರ್ಷ, ಕುಟುಕು ಕವಿ ಕಪಿನೀಪತಿ-ನಾಟಕ, ವಿಚಾರ ಸಾಹಿತ್ಯ, ಸುಪ್ಪದಾಂಗೂ ಅದಿಯಾನ ಕತೆ, ತಮಾಪಿ ಎಳ್ಲ್, ವ್ಯಕ್ತಿ ಚಿತ್ರಣ ಬೊಳಿಕ್ ಬಂದಿತ್.

ಕೊಡವ ತಕ್ಮಲ್ 'ಶ್ರೀ ಭಗವದ್ಗೀತಾ ದರ್ಶನ' ಆಡ್ಯ ಗೀತಾ ಚೌಪದಿ ಖಂಡ ಕಾವ್ಯ, ಪೊಮ್ಮಾತೆ (ಕವನ ಸಂಕಲನ) 'ಚುಟುಕ ಚಂದೂಕ' ಆಡ್ಯ ಚುಟುಕ ಪುಸ್ತಕ, ಪಾತಾಳೆ ಗಾಣ, ಮೂಡಿ ಬೋಂಡು ಮೂಡಿ, ಕಣೆಯೋಕೆಣ, ಆ ಮರ, ಚಾಡಿಕಾರ ಚಿಂಗು, ಬಾಳ್ ಬಂಡಾಟ ಇನ್ನತ ನಾಟಕ. ಸ್ನೇಹ ಪಂಚಮಿ, ವಂದೇ ಮಾತರಂ ಪಲಭಾಷೆರ ನಾಟಕ.

'ವಳಮು ಪೊಮ್ಮಾತೆ' ತಿಂಗೋದಿ ತಕ್ಮ ಬಾಕ್ ಸುಮಾರ್ 10 ಕಾಲತೊಟ್, ಮಡಿಕೇರಿ ಆಕಾಶವಾಣಿಲ್ ಪ್ರಸಾರ ಆಯಂಡುಂಡ್. 'ಗ್ರಾಮಾಯಣ' ತಿಂಗೋದಿ ದಂಡ್ಕುರಿ ಮಡಿಕೇರಿ ಆಕಾಶವಾಣಿಲ್ ಪ್ರಸಾರ ಆಯಂಡುಂಡ್. ಶ್ರೀ ಕಾವೇರಿ ಕಥಾಮೃತ, ಶ್ರೀ ಇಗ್ಗುತಪ್ಪ ಸುಪ್ರಭಾತ, ಕಾವೇರಿ ಸುಪ್ರಭಾತ, ಶ್ರೀ ಕಾವೇರಿ ಗೀತಾಮೃತ ಇನ್ನತ ಸಿ.ಡಿ. ಬುಡ್ಗಡೆ ಆಯಿತ್.

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ಗೌರವ ಪ್ರಶಸ್ತಿ, ಜಿಲ್ಲಾ ರಾಜ್ಯೋತ್ಸವ ಪ್ರಶಸ್ತಿ ಕೂಡ್ನನ್ನಕೆ ಪಲತರ ಸಾಹಿತ್ಯ ಸನ್ಮಾನ ಪಡ್ಂದಿತ್.

ಮಡಿಕೇರಿ ಆಕಾಶವಾಣಿಲ್ ವಾರ್ತಾ ವಾಚಕನಾಯಿತೂ ನಿಲಯ ಕಲಾವಿದನಾಯಿತೂ, 'ಹಳ್ಳಿ ರೇಡಿಯೋ' ಕಾರ್ಯಕ್ರಮ ನಿರೂಪಕನಾಯಿತೂ ನೈಚಂಡುಳ್ಳ ನಯಗೇಶ್ ಕಾಲ್ಕೂರ್ ಕೊಡವ ಸಾಹಿತ್ಯ ಅಕಾಡೆಮಿರ ಮಾಜಿ ಸದಸ್ಯನೂ ಅಕ್ಕು.